

საქართველოს სსრ მეცნიერებათა აკადემია

სამეცნიერო-პოპულარული სერია

„ათინათი“

ბ. გიორგაძე

# ათასი ღვთაების ქვეყანა

(ხეთები და ხეთური ცივილიზაცია)



„მეცნიერება“

თბილისი

1988

წინამდებარე სამეცნიერო-პოპულარული ნაშრომი ეძღვნება მსოფლიოს ერთ-ერთი უძველესი ცივილიზაციის შემქმნელ ხალხს — ხეთებს, რომლებიც ძვ. წ. II ათასწლეულში ცხოვრობდნენ მცირე აზიის (ანატოლიის) ცენტრალურ ნაწილში (თანამედროვე თურქეთის ტერიტორიაზე).

ნარკვევში მოთხრობილია ხეთების აღმოჩენის ისტორია, განხილულია ხეთური ეთნოსის ჩამოყალიბების საკითხი, ხეთების სამეთოს პოლიტიკური და სოციალურ-ეკონომიკური განვითარების ეტაპები, ხეთების რელიგიურ შეხედულებათა სისტემა, ხეთური კულტურის საკითხები. საუბარია უძველეს ენობრივ, რელიგიურ, კულტურულ კონტაქტებზე, რომლებსაც ადგილი უნდა ჰქონოდათ ძველ მცირე აზიასა და სამხრეთ ამიერკავკასიაში მცხოვრებ ტომთა შორის.

ნაშრომი გამიზნულია მკითხველთა ფართო წრისათვის.

**რედაქტორები:** ისტორიის მეცნიერებათა დოქტორები ნ. ხ ა ზ ა რ ა ძ ე,

ი. გ ა გ ო შ ი ძ ე.

**რეცენზენტები:** ისტორიის მეცნიერებათა დოქტორი მ. ი ნ ა ძ ე,

ფილოლოგიის მეცნიერებათა დოქტორი ზ. კ ი ე ნ ა ძ ე

„ათასი ღვთაების ქვეყანა“ პირობითი, ჩვენ მიერ შემოთავაზებული. სახელწოდებაა ცენტრალურ მცირე აზიაში (ანატოლიაში) ოდესღაც არსებული, ფართოდ განთქმული ხათის ქვეყნისა. ში.ი ბინადარნი ცნობილი იყვნენ, თანამედროვე ტერმინოლოგიით, როგორც ხეთები. ხეთურად შედგენილ ტექსტებში არაერთგზისაა ნახსენები, ზოგჯერ კი ჩამოთვლილი, ეს „ათასი ღვთაება“ — მთელი ხეთური პანთეონი, თუმცა ჩამოთვლილ ღვთაებათა რაოდენობა როდია ზუსტად „ათასი“.

ამჟამად იშვიათად თუ მოიძებნება ადამიანი, რომელსაც არაფერი სმენოდეს ხეთების უძველესი სახელმწიფოსა და მისი შემქმნელი ხალხის შესახებ, არ წაეკითხოს პოპულარული სტატია, წიგნი თუ ენციკლოპედიური ცნობარი ხეთების ისტორიის, ხეთური ენის, რელიგიის, კულტურისა და, საერთოდ, უძველესი მცირე აზიის შთამბეჭდავ ცივილიზაციათა შესახებ.

თანამედროვე მსოფლიოს მრავალ ქვეყანაში ხეთებისადმი ინტერესი დღითიდღე იზრდება: ხეთების სამეფო იყო ერთ-ერთი უძველესი ადრეკლასობრივი სახელმწიფო — გარდასულ ძველადმოსავლურ საზოგადოებათაგან ხეთური საზოგადოება გამოირჩეოდა თვითმყოფობით, თავისებურებებით. ხეთურმა ენამ კი მთელი გადატრიალება შეიტანა თანამედროვე ინდოევროპეისტიკაში...

ხეთებისადმი ინტერესი განუზომლად დიდია საქართველოში. ზოგადმეცნიერულ ინტერესს ჩვენში აღრმავებს ის, რომ ხეთების სამეფო ჩამოყალიბდა და მთელი საუკუნეები იარსება ქართველურ ტომთა უძველესი განსახლების მეზობლად (სამხრეთ-დასავლეთიდან). მცირე-აზიულ, განსაკუთრებით, ხეთურ, სამყაროსთან ქართველური ტომების ისტორიული, ენობრივი და კულტურული უტყუარი კონტაქტების გამოვლენა ბევრ სიახლეს შეიტანს ქართველურ ტომთა უძველესი ისტორიის შესწავლის საქმეში, რისთვისაც ახლა იღვწიან ქართველი ისტორიკოსები, ენათმეცნიერები, არქეოლოგები.

ერთგვარად გასაკვირიცაა, ჩვენში რომ დღემდე ქართულ ენაზე არ შეიქმნა წიგნი, რომელშიც თანამედროვე მეცნიერების მიღწევათა გავალისწინებით სამეცნიერო-პოპულარული ფორმით იქნებოდა მოლხრობილი ხეთური საზოგადოების ისტორიის ძირითადი მომენტები (ამის შესაძლებლობა კი საქართველოში კარგა ხანია არსებობს).

წინაპდებარე ნაშრომი პირველი ცდაა სწორედ ასეთი წიგნის შექმნისა. ავტორი შეეცადა განეზოგადებინა თანამედროვე საბჭოთა და საზღვარგარეთელ ხეთოლოგთა მეცნიერული დასკვნები და დაკვირვებანი ისე, რომ წიგნი გამხდარიყო მკითხველთა ფართო წრეებისთვის მისაწვდომი. ამ მიზანს ემსახურება ხეთური ტექსტებიდან ცალკეული ადგილების მოყვანაც — ამით ავტორს სურს თვით ხეთების ხმა მიაწვდინოს თანამედროვე მკითხველს, აგრძნობინოს მას ამ ხმის თავისებურებანი, ხოლო ბევრ შემთხვევაში ტექსტებიდან თვითონ გამოიტანოს სათანადო დასკვნა.

როგორც თითქმის ყოველი პირველი ცდის დროს, ვფიქრობთ, ჩვენც არ ვიქნებით დაზღვეული ცალკეული ხარვეზისაგან, რომელთა გამოსავლენად ველით მკითხველის პირუთვნელ კრიტიკას. სამართლიან შენიშვნებს ავტორი სიამოვნებით გაითვალისწინებს, მით უმეტეს, რომ მკითხველთან შეხვედრა ავტორს ჩაფიქრებული აქვს მომავალშიც.



## სიდი აზიასა და ევროპას შორის. მაღალი კულტურის პირველი შუქურები

თანამედროვე თურქეთის აზიური ნაწილი — ანატოლია (ბერძნ. Ἀνατολή სიტყვასიტყვით „მზის ამოსვლა; აღმოსავლეთი“; თურქ. Anadolu) კაცობრიობის ცივილიზაციის ერთ-ერთ უძველეს კერადაა აღიარებული. ანტიკურ ხანაში მას უწოდებდნენ „მცირე აზიას“ — მისი მოხაზულობა და რელიეფი ძლიერ წააგავდა „დიდი აზიას“ (სინამდვილეში კი ასეთი შედარება ნაწილობრივად სწორია, რადგანაც იმხანად უცნობი იყო „დიდი აზიის“ ჩრდილოეთი და აღმოსავლეთი საზღვრები).

ეს არის საკმაოდ ვრცელი ტერიტორია, სადაც ათასწლეულთა მანძილზე ხდებოდა სხვადასხვა წარმოშობის ტომთა თუ ხალხთა შერევა-შეჯვარდინება. სწორედ აქ მოხდა მსოფლიოს ერთ-ერთი უძველესი ე. წ. „ნეოლითური რევოლუცია“, როდესაც ძვ. წ. VII—VI ათასწლეულებში, თანამედროვე ჩათალ-პუიუქისა და პაჩილარის მიდამოებში (კონიის ზეგანზე) ჩამოყალიბდა მაღალგანვითარებული ადრესამიწათმოქმედო კულტურა, რომელმაც საფუძველი ჩაუყარა მომავალ დიდ მცირეაზიურ ცივილიზაციას. ძველადმოსავლურ ხანაში (ძვ. წ. III—I ათასწლეულებში) მცირე აზიაში არაერთი დიდი თუ პატარა სახელმწიფო წარმოიქმნა, მაგრამ სხვადასხვა გარემოებათა გამო ისინი თანდათან გაქრნენ ისტორიის ასპარეზიდან ისე, რომ ვერც ერთმა მათგანმა ვერ შეძლო მოედწია ჩვენს ეპოქამდე.

ამ უზარმაზარ ტერიტორიაზე პოლიტიკურ-ეკონომიკურად და კულტურულად უძველესი ხანებიდანვე დაწინაურდა ანატოლიის ცენტრალური ნაწილი, სადაც ჩამოყალიბდა სახელმწიფო, რომელიც ერთ-ერთ უდიდეს პოლიტიკურ ძალად გადაიქცა არა მარტო მცირე აზიაში, არამედ მაშინდელ ახლო აღმოსავლეთშიც. ეს იყო ხეთების სამეფო ანუ ხათი, რომელიც ძვ. წ. II ათასწლეულში არსებობდა და მცირე აზიის ძველ ისტორიაში, სხვა მეზობელ პოლიტიკურ გაერთიანებებთან ერთად, მთელი ეპოქა შექმნა.

ხუთების სახელმწიფოს წარმოქმნამდე კი ანატოლიამ ისტორიული განვითარების თავისებური გზა განვლო, რაზედაც ქვემოთ შევჩერდებით.

## ანატოლიის გეოგრაფიული მდებარეობა

ანატოლიას ამჟამად ბუნებრივი კონტრასტების ქვეყანას უწოდებენ, რაც სავსებით შეეფერება სინამდვილეს. როგორც ვარაუდობენ, ამ ქვეყნის უძველესი ბუნებრივი პირობები დიდად არ უნდა ყოფილიყო განსხვავებული მისი თანამედროვე ბუნებრივი პირობებისაგან.

განსაკუთრებით მკვეთრი განსხვავება შეიმჩნევა შიდა ანატოლიასა, ერთი მხრივ, და ქვეყნის ჩრდილოეთ და სამხრეთ ნაწილებს შორის, მეორე მხრივ. თუკი შიდა ანატოლია, რომელიც მოიცავს ანტიკური ხანის კაპადოკიის, ლიკონიის, გალატიისა და ფრიგიის ტერიტორიას, წარმოადგენს ერთგვაროვან მაღალ პლატოთა და აზიური ვრცელი სტეპების სამყაროს, ჩრდილოეთი და სამხრეთი მცირე აზია არის მხარე მაღალი მთაგრებილებისა (შავი ზღვის სანაპიროს გასწვრივ — პონტო, სამხრეთში — ლიკიისა და კილიკიის ტავროსის მთიანი სისტემა, რომელიც აღმოსავლეთით უერთდება სომხეთის ზეგანს). აღნიშნული მთები ეშვება ზღვებში, ქმნის რა ხშირი ტყეებით დაფარულ ხეებს. მკვეთრად გამოირჩევა აგრეთვე დასავლეთი ანატოლია, სადაც გვხვდება როგორც აზიური სტეპები, ასევე მთაველიანი ლანდშაფტები.

მცირე აზიის რელიეფის თავისებურებამ განაპირობა რამდენიმე ლოკალური კულტურული რაიონის (ცენტრალურის, სამხრეთის, სამხრეთ-დასავლეთის, ჩრდილო-დასავლეთისა და ა. შ.) წარმოქმნა. სპეციალისტები მათ ორ დიდ კულტურულ მხარედ — დასავლეთანატოლიურ და აღმოსავლეთანატოლიურ კულტურულ ოლქებად ყოფენ.

ზემოაღწერილი რელიეფი ხელსაყრელ პირობებს ქმნიდა, უპირველეს ყოვლისა, მეცხოველეობის განვითარებისათვის. მიწათმოქმედება კი შეიძლებოდა განვითარებულიყო მხოლოდ დაბლობ ადგილებსა და მდინარეების ხეობებში. არქეოლოგიური მასალები და სხვადასხვა სახის წერილობითი წყაროების მონაცემები მართლაც ადასტურებენ, რომ უძველეს მცირე აზიაში მეცხოველეობა, ისევე როგორც მიწათმოქმედება, საკმაოდ დაწინაურებული ყოფილა.

ანატოლიის დიდი ნაწილი (ეგეოსის, ხმელთაშუა და შავი ზღვების სანაპიროები) სუბტროპიკული კლიმატის ზონაში მდებარეობს. ზღვებისაგან იზოლირებული შიდა რაიონების კლიმატი კი კონტინენტურია. როგორც ვარაუდობენ, ასეთი კლიმატური პირობები ერთ-ერთი

ზელისმეწყოები გარემოება უნდა ყოფილიყო ადამიანთა საზოგადოებ-  
ზის დაწინაურებისა და გავრცელებისათვის დედამიწის ამ რაიონში.

ანატოლიის თითქმის ყველა მდინარე, რომლებიც თავიანთი წყლის  
მარაგით ვერ შეედრებიან წყალუხვ მდინარეებს — ნილოსს ან  
ეუფრატსა და ტიგროსს, სათავეს იღებს მთებში და სწრაფად მიედინება  
ღრმა ქვიან კალაპოტში. ზაფხულობით მდინარეების წყალი მნიშვნე-  
ლოვნად იკლებს, ხოლო ზოგიერთი პატარა მდინარე საერთოდ ქრე-  
ბა შემოდგომამდე. ასეთმა ვითარებამ გამოიწვია ის, რომ ძველ მცი-  
რე აზიაში მდინარეებს სათანადოდ ვერ იყენებდნენ ვერც მორწყვი-  
სათვის და ვერც ნაოსნობისათვის. სწორედ ამ გარემოების გამო ვერ  
განვითარდა ანატოლიაში ირიგაცია — ხელოვნური მორწყვის სისტე-  
მა, რომელიც მესოპოტამიასა და ეგვიპტეში მაღალ დონეზე ავიდა.  
ზღვის სანაპიროზე მდებარე რაიონებში ძველთაგანვე უნდა ყოფილიყო  
განვითარებული ზღვაოსნობა (განსაკუთრებით, ანატოლიის დასავლეთ  
და სამხრეთ სანაპიროებზე).

ანატოლიაში ძველთაგანვე ორი ძირითადი მცენარეული ზონა  
უნდა არსებულებოდა: ზღვისპირა, რომლისთვისაც დამახასიათებელია  
ტყეები მარადმწვანე თუ სხვა ჭიშის მცენარეებით, და შიდა ზონა,  
სადაც ახლა მცენარეთა შედარებითი ნაკლებობაა. ვარაუდობენ, რომ  
თვით ცენტრალური ანატოლიაც დაფარული უნდა ყოფილიყო ტყე-  
ებით. მცირე აზია უძველესი დროიდანვე ასევე იყო ცნობილი მრავალ-  
ფეროვანი ცხოველთა სამყაროთი, რაც დასტურდება წერილობი-  
თი წყაროების მონაცემებით, სადაც გვხვდება მცენარეებისა თუ ცხო-  
ველების უთვალავი სახელწოდება.

მცირე აზია მდიდარი იყო წიაღისეული სიმდიდრეებით. აქ დიდი  
რაოდენობით იყო ლითონის საბადოები, განსაკუთრებით სპილენძისა  
და ვერცხლისა, რომელთა მოპოვება უძველესი დროიდანვე წარმო-  
ებდა. უფრო გვიან, განსაკუთრებით კი ძვ. წ. III—II ათასწლეულებ-  
ში, აქ დიდად განვითარდა ლითონების დამუშავება (მათ შორის —  
რკინისა).

დაახლოებით ასეთ ბუნებრივ პირობებში უნდა განვითარებულიყო  
მცირე აზიის საზოგადოება ჩვენთვის საინტერესო ეპოქაში. გეოგრა-  
ფიულმა გარემომ სათანადო გავლენა იქონია ანატოლიის ისტორიუ-  
ლი განვითარების მსვლელობაზე, მან გარკვეული როლი ითამაშა ამ  
განვითარების თავისებურებათა განსაზღვრასა და ჩამოყალიბებაში.  
მცირე აზიის გადაქცევის ცივილიზაციის ერთ-ერთ უძველეს კერად  
უდავოდ შეუწყო ხელი მისმა გეოგრაფიულმა მდებარეობამ: წარმო-  
ადგენდა რა უდიდეს ნახევარკუნძულს, ანატოლია უძველესი ეპოქი-  
დან იყო წინა აზიის, ეგეოსის სამყაროსა და ბალკანეთის ნახევარკუნ-  
ძულის დამაკავშირებელი; იგი ერთგვარი ხიდი იყო ცივილიზებულ აღ-

მოსავლეთსა და იმდროინდელ დასავლეთს შორის. განსაკუთრებით მნიშვნელოვან როლს ამ რეგიონთა ურთიერთკავშირების პროცესში ასრულებდა ტროა (ჰელესპონტის ანუ დარდანელის სრუტის აზიურ-სანაპიროზე მდგარი), სადაც აშკარად ვლინდებოდა ბალკანეთისა და ანატოლიის ნახევარკუნძულთა ტომების ინტენსიური ურთიერთობანი.

„ნეოლითური რევოლუცია“ ანატოლიაში:

ჩათალ-ჰუიუჰი, ჰაჩილარი

მცირე აზიას ახლა ადამიანის განსახლების ერთ-ერთ უძველეს რეგიონად თვლიან. ადამიანებს აქ ქვედა პალეოლითის ხანიდან უცხოვრობდა, ადამიანი ვითარდებოდა ანატოლიაში შუა და ზედა პალეოლითშიც. თავდაპირველად მას მდინარის ხეობებსა და ზღვის სანაპიროების ახლოს უცხოვრია, მოგვიანებით კი მთიან რაიონებშიც გადასახლებულა.

ნეოლითის ეპოქაში ანატოლიის საზოგადოებრივ ცხოვრებაში მოხდა ძალზედ საყურადღებო ძვრები, რასაც განსაკუთრებული მნიშვნელობა აქვს საერთოდ კაცობრიობის პროგრესისათვის. ანატოლიაში, კონიის ზეგანზე, სადაც ამჟამად მდებარეობენ ჩათალ-ჰუიუჰი და ჰაჩილარი, არქეოლოგებმა (ჟ. მელარტის ხელმძღვანელობით) აღმოაჩინეს ქალაქური ტიპის ნეოლითური დასახლებანი მოხატული სალოცავებითა და განვითარებული ადრესამიწათმოქმედო კულტურით. მსოფლიოს ამ ერთ-ერთ უძველეს დასახლებებს არქეოლოგები ათარიღებენ ძველი წელთაღრიცხვის 7000—5600 (ჩათალ-ჰუიუჰი) და 5700—5600 (ჰაჩილარი) წლებით.

ამ ადგილებში არსებობდა ხელსაყრელი პირობები საქონლის მოწინაურებისათვის, ცალკეულ სამიწათმოქმედო კულტურათა ჩამოყალიბებისათვის, რაც მიგვანიშნებს აღნიშნული ხანის ანატოლიაში შრომის პირველ დიდ საზოგადოებრივ დანაწილებაზე მიწათმოქმედებისა და მესაქონლეობის სამეურნეო დიფერენციაციის ფორმით.

ამ პერიოდში განხორციელდა გადასვლა მიმთვისებლურ (შემგროვებლურ) ეკონომიკიდან მწარმოებლურ ეკონომიკაზე, რაც მანიშნებელი იყო „ნეოლითური რევოლუციის“ დაწყებისა. ჩვენთვის საინტერესო ტერიტორია, რომელიც შედის „ნახევარმთვარის ნაყოფიერ მიწებში“, გადაიქცა მწარმოებლური მეურნეობის ერთ-ერთ უძველეს ცენტრად, სადაც მოგვიანებით ჩამოყალიბდა მთელი წინა აზიის ერთ-ერთი უძველესი ცივილიზაცია.

ჩათალ-ჰუიუჰისა და ჰაჩილარის მცხოვრებთა მეურნეობა დაუძენებული იყო მიწათმოქმედებასა და მესაქონლეობაზე: მოჰყავდათ ემერი,

სელტა, ქერი, ბარდა, ცერცველა და სხვა სასოფლო-სამეურნეო კულტურა, მისდევდნენ ცხვრებისა და ზოგიერთი რქოსანი საქონლს მოშენებას. ამ ადრესამიწათმოქმედო დასახლებათა განვითარება აღინიშნება იმით, რომ მათმა მცხოვრებლებმა იცოდნენ მოპოვება და დამუშავება ობსიდიანისა, რომლის საბადოები იმყოფებოდა ჩათალ-ჰუიუქის მახლობლად. დასახლებათა მცხოვრებნი იცნობდნენ, აგრეთვე, სხვა ადგილობრივ მინერალებს, მაგალითად, სპილენძსა და ტყვიას. მათგან ამზადებდნენ მძივებს, საყურეებსა და სხვა მცირე ზომის სამკაულს.

ზემოაღნიშნულ დასახლებათა მცხოვრებლებს გაცხოველებული ურთიერთობა ჰქონდათ ახლომდებარე რაიონებთან (ხმელთაშუა ზღვის სანაპიროსთან, ჩრდილოეთ სირიასთან, დასავლეთ ანატოლიასთან, კვიპროსთან), სადაც აგზავნიდნენ ობსიდიანს, სანაცვლოდ კი იღებდნენ კაქს, ნიქარებს, სხვადასხვა ძვირფას ქვას.

ჩვენთვის საინტერესო ეპოქაში წარმოიშვა და განვითარდა ადგილობრივი კერამიკა, ჩაისახა ანატოლიური ნეოლითური ხელოვნება და გაჩნდა ადგილობრივი ნეოლითური რელიგია (მარტო ჩათალ-ჰუიუქში იპოვეს 40-მდე ტაძარი-სალოცავი). უკვე ძერწავდნენ მთავარ ღვთაებათა პირველ ქანდაკებებს ანთროპომორფული იერით. კულტმსახურებისათვის შექმნილი სალოცავები შედიოდნენ სხვადასხვა დანიშნულების ნაგებობათა კომპლექსებში.

საცხოვრებელ სახლებსა და ტაძრებს აგებდნენ ფორმირებული ალიზისაგან. სამშენებლო ობიექტთა ნარჩენები ძალზედ მოგვაგონებენ გამაგრებულ დასახლებებს. „გვიანნეოლითურ“ ჰაჩილარში დასახლებას უკვე გარს ერტყა თავდაცვითი თიხატკეპნილი კედლები. სიმაგრეთა შიგნით კი მოთავსებული იყო მარცვალსაცავები, სამეტუნეო სახელოსნოები და სხვა დანიშნულების ნაგებობანი. ასეთი „სიმაგრენი“ წარმოადგენდნენ იმ ციხე-სიმაგრეთა პროტოტიპებს, რომლებიც მოგვიანებით არსებობდნენ ცენტრალურ და დასავლეთ ანატოლიაში.

ყოველივე ზემოთქმულს მიხედვით, ჩათალ-ჰუიუქისა და ჰაჩილარის დასახლებებში უკვე მომხდარი იყო „ნეოლითური რევოლუცია“. რომელიც თანდათან მთელ მცირე აზიას უნდა მოსდებოდა. ეს „რევოლუცია“ მოახდინა რომელიღაც ადგილობრივმა ეთნოსმა, რომლის ვინაობა ახლა, ალბათ, არც შეიძლება დადგინდეს. შესაძლოა, იგი მოგვიანო ხანების ანატოლიის მკვიდრთა ერთ-ერთი წინაპარიც იყო. მაგრამ რომლისა? ცენტრალურ ანატოლიაში მოგვიანებით მცხოვრებ არაინდოევროპელი ხათებისა (პროტოხეთებისა). იქვე ასევე მოგვიანებით მოხინდარე ინდოევროპელი ტომებისა (როგორც ზოგიერთი მკვლევარი ვარაუდობს, არ გამოირიცხება ამ ეთნოსის

გაიგივება წინარე ინდოევროპული ენის მატარებელ ეთნიკურ ერთეულთანაც კი, თუმცა ამ ვარაუდის დამამტკიცებელი მყარი არგუმენტები ჯერჯერობით ვერ გამოინახა), თუ ჩვენთვის სრულიად უცნობი ეთნოსისა? ამჟამად შეგვიძლია დაბეჯითებით ვამტკიცოთ მხოლოდ შემდეგი: ჩათალ-ჰუიუქისა და ჰაჩილარის მიდამოებში ჩამოყალიბებულმა მაღალგანვითარებულმა ადრესამიწათმოქმედო კულტურამ საფუძველი ჩაუყარა მოგვიანო ხანების დიდ მცირეაზიულ ცივილიზაციას, რომელსაც განეკუთვნებოდა ხეთური საზოგადოებაც.

## ცენტრალური ანატოლია ისტორიის გარიჟრაჟზე

ახალი ძვრები ცენტრალურ მცირე აზიაში

„ნეოლითური რევოლუციის“ მომდევნო პერიოდი, განსაკუთრებით, ძვ. წ. IV—III ათასწლეულები, აღინიშნა საყურადღებო ძვრებით ანატოლიის საზოგადოებრივ ცხოვრებაში. ლითონთა მნიშვნელობის ზრდამ და, საერთოდ, მეტალურგიის განვითარებამ ანატოლიის ცენტრალურ და ჩრდილო-აღმოსავლეთ რაიონებში, სადაც არსებობდა ლითონთა (სპილენძის, ვერცხლის, რკინის) უმდიდრესი საბადოები, დიდად დააჩქარა ამ რაიონთა წინსვლა. გაჩნდა ბრინჯაო—სპილენძის შენადნობი კალასთან. ყოველივე ეს უკვე ახალი „რევოლუციის“ მაუწყებელი იყო.

მომრავლდა ქალაქური ტიპის დასახლებანი, რომელთა ნაწილი მასიური კედლებით იყო გამაგრებული. სწორედ ამ ტიპის დასახლებათა ადგილას მოგვიანებით წარმოიშენენ პატარა ქალაქ-სახელმწიფოები, რომელთა მმართველებს ურთიერთშორის უნდა ჰქონოდათ ბრძოლა ჰეგემონობისათვის.

III ათასწლეულის შუა ხანებიდან ცენტრალური ანატოლია საგრძნობლად იყო დაწინაურებული როგორც ეკონომიკურად, ასევე კულტურულად. აქ მცხოვრებ ტომთა ეკონომიკა ეყრდნობოდა ძირითადად სოფლის მეურნეობას, მაგრამ მათი ძლიერების მთავარი წყარო უნდა ყოფილიყო ლითონების მოპოვება და დამუშავება. აღნიშნული დროის მონოქრომული კერამიკა ხელით ნაკეთია (გარედან წითლად, ხოლო შიგნიდან — შავად გაპრიალებული). მასთან ერთად არსებობდა აგრეთვე ხელით ნაძერწი შავი და ნაცრისფერი კერამიკაც მრავალნაირი მოხატულობით. დიდი გემოვნებითა და ოსტატობითაა დამზადებული ლითონის — ბრინჯაოს, სპილენძის, ვერცხლის, ოქროს ცალკეული ნივთები. ჯახვეწილია ქვისგან გაკეთებული საგნები. საცხოვრებელი ბინები სწორკუთხოვანია და აგებულია თიხის აგურებით ქვის საძირკველზე. ხელოვნების ნიმუშები წარმოდგენილია სტილიზებული ცხოველების (ირმების, ხარის) ფიგურებით. აშკარად ჩანს,

რომ ცენტრალურ ანატოლიაში მდებარე გამაგრებული პუნქტები (ბოლაჯქოის, ალიშარ- და ალაჯა-ჰუიუქის, ჰას-ჰუიუქისა და სხვა ადგილას) III ათასწლეულის მეორე ნახევარში წარმოადგენდნენ აქ მცხოვრებ ტომთა ეკონომიკური, პოლიტიკური და კულტურული ცხოვრების ცენტრებს.

აღნიშნული ეპოქისათვის ცენტრალურ ანატოლიას ეკავა გაბატონებული მდგომარეობა მთელს მცირე აზიაში. მას გააჩნდა არა მარტო ბრინჯაოს ხანის ეკონომიკისათვის საჭირო ბუნებრივი რესურსები, არამედ მათი გადასამუშავებელი ტექნოლოგიაც. ანატოლია უკვე მნიშვნელოვან როლს თამაშობდა ახლო აღმოსავლეთში, მისი გავლენა ვრცელდებოდა სამხრეთ მესოპოტამიამდე და, შესაძლოა ეგვიპტემდე, ისევე როგორც კავკასიამდე.

სარგონ დიდი (აქადელი) და მცირე აზია

შუამდინარეთის მმართველთათვის ანატოლიასთან ურთიერთობების დამყარებას განსაკუთრებული მნიშვნელობა ენიჭებოდა: შუამდინარეთი ღარიბი იყო ლითონებით, ანატოლია კი ლითონებით უმდიდრეს მხარეს წარმოადგენდა, თუმცა აკლდა ბრინჯაოს მეტალურგიისათვის აუცილებელი ლითონი — კალა. აქედან გამომდინარე, თავიდანვე გამოიკვეთა ამ ორი მხარის ურთიერთობათა ძირითადი პირობები: ანატოლიაში კალის შეტანა გული. ხმობდა მცირე აზიიდან ლითონების, განსაკუთრებით, სპილენძის გამოტანას. სწორედ ამას უნდა გამოეწვია შუამდინარელ ვაჭართა დაუოკებელი ინტერესი მცირე აზიისაკენ, რაც დასრულდა იმით, რომ დაახლოებით ძვ. წ. 2300 წლისათვის, როდესაც აქადის სახელმწიფო უკვე ითვლებოდა ძლიერ პოლიტიკურ გაერთიანებად მთელს შუამდინარეთში, ანატოლიაში უნდა გაჩენილიყო აქადელ ვაჭართა პირველი ფაქტორიები (კოლონიები).

აღნიშნული პერიოდის ანატოლიაში შექმნილი რეალური ვითარების გამოძახილი შემორჩენილია გაცილებით მოგვიანო ხანებში (დაახლოებით ძვ. წ. XIV ს.) აქადურ ენაზე შედგენილ ერთ ტექსტში, რომელიც ცნობილია „მეფე ბრძოლისას“ (აქადურად შ ა რ თ ა მ - ხ ა რ ი ს) სახელწოდებით („მეფეში“ აქ იგულისხმება აქადის ცნობილი მმართველი — სარგონ დიდი, რომელიც დაახლოებით ძვ. წ. 2300 წლისათვის მეფობდა). ჩვენამდე მოაღწია, აგრეთვე, ამ ტექსტის ძველხეთურმა ვერსიამაც. ამ ორი ტექსტის მონაცემთა შეჯერება შემდეგნაირად გადმოსცემს ანატოლიაში შექმნილ იმდროინდელ ვითარებას:

სარგონ დიდის მეფობის დროს მცირე აზიაში, კერძოდ, ბურუ-შხანდაში (ზუსტი ადგილმდებარეობა უცნობია, პირობით ათავსებენ



ტუხის ტბის მიდამოებში, შესაძლოა, მის აღმოსავლეთით), უკვე მო-  
ღვაწეობდნენ აქადელი ვაჭრები (მაშასადამე, მათი აქ გამოჩენა სავა-  
რაუდლოა უფრო ადრეც). ეს უკანასკნელნი შეუვიწროებია ბურუშხანდის  
მმართველს (მეფეს) ნურ-დაგალს (ხეთური წყაროს მიხედვით, ნურ-  
დახის). ეს გამნდარა მიზეზი იმისა, რომ ბურუშხანდაში მყოფ აქა-  
დელ ვაჭრებს დახმარებისათვის მიემართათ სარგონისთვის. აქადის  
მეფემ თავის მხრივ მიმართა მებრძოლებს, რომლებთანაც ერთად  
გზას გაუდგა ბურუშხანდისკენ: „თქვენ, მებრძოლნო, მისმინეთ! სიტ-  
ყვებს; რომლებითაც ქალღმერთმა იშთარმა მე მომმართა, თქვენ გა-  
განდობთ: მე დავიპყრობ ქვეყანას, საითაც მივემგზავრები“ (შემდეგ  
ტექსტში აღწერილია, თუ რაოდენ მდიდარია ეს ქვეყანა). ლაშქარი  
სარგონის ირგვლივ შემოკრბა. სარგონმა ხარი და 7 ცხვარი შესწირა  
მდ. ეფრატს, რომელიც მას, ანატოლიაში მიმავალს, უნდა გადაეღახა.  
სარგონს გადაუღახავს ეს მდინარე, რაც მოგვიანო ხანის ერთი ხე-  
თური ტექსტითაც მტკიცდება.

ღვთაება ენლილი ნურ-დახის, ბურუშხანდის მეფეს, გამოეცხა-  
და სიზმარში და ამცნო, სარგონი, მამაცი მეფე, შენთან საბრძოლველად  
მოდისო, მაგრამ შენ ღმერთებმა გადმოგცეს იარაღი, ქარიშხლის ძა-  
ლისა და საშინელი დარტყმისა... (აქ ტექსტი დაზიანებულია). ენლი-  
ლის გაფრთხილებას შედეგი არ მოჰყოლია, ნურ-დახი სარგონს, რო-  
გორც ჩანს, დაუმარცხებია. ბურუშხანდაში იგი სამ წელსა და ხუთ  
თვეს დარჩენილა, შემდეგ კი აქადისაკენ გზას გასდგომია...

აქადელ ვაჭართა პოზიციები სარგონს საიმედოდ უნდა გაემა-  
გრებინა, რაც უდავოდ გაახანგრძლივებდა ანატოლიაში აქადელ ვა-  
ჭართა მოღვაწეობის პერიოდს, რომელიც, შესაძლოა, ძვ. წ. III ათას-  
წლეულის ბოლომდე გაგრძელდა. ძვ. წ. II ათასწლეულის დასაწყი-  
სისათვის მცირე აზიაში დიდი საეაქრო საქმიანობის შესვეურებად  
უკვე ასურელი ვაჭრები გვევლინებიან.

„კავადოკიური“ ფირფიტები.

„უცხოელი ვაჭრები ცენტრალურ ანატოლიაში

თუ უძველესი ხანის მცირე აზიის საზოგადოებრივი განვითარე-  
ბის ზოგადი სურათის აღდგენა ხერხდება ძირითადად არქეოლოგიუ-  
რი მასალების მიხედვით, ძვ. წ. II ათასწლეულის დამდეგისათვის  
მეცნიერთა განკარგულებაშია უკვე წერილობითი წყაროები. ამ პერი-  
ოდის ცენტრალური ანატოლიის საზოგადოების ისტორია, რომელიც  
წინ უწერებს ხეთურ ხანას, ამჟამად შეისწავლება უმთავრესად ე. წ.  
„კავადოკიური“ ფირფიტების მიხედვით. ესენია ლურსმული დამ-

წერლობით შედგენილი ტექსტები, რომლებსაც გასული საუკუნის 80-იანი წლებიდან პოულობდნენ კაპადოკიაში, რის გამოც მათ „კაპადოკიური“ უწოდეს. მათი წარმოშობის ძირითადი ადგილია ქიულთეფე (თანამედროვე კაისერის ახლოს), სადაც ძველი მცირეაზიული ქალაქი ქ ა ნ ი შ ი (ხეთური წყაროების, ქ ა ნ ე ს ი, ანუ ნ ე ს ა) მდებარეობდა. 1891 წ. ცნობილმა რუსმა აღმოსავლეთმცოდნემ ვ. გოლენიშჩევმა გამოაქვეყნა კაისერიში შექმნილი რამდენიმე ათეული „კაპადოკიური“ ფირფიტა და პირველმა ზუსტად განსაზღვრა ამ წარწერების ენა, როგორც აქალღური ენის ძველასურული დიალექტი. ბ. ჰროზნის გათხრებმა ქიულთეფეში (1925 წ.) ათასობით ახალი ასეთი ფირფიტა შეიძინა მეცნიერებას. ასეთივე ტექსტები იპოვეს აგრეთვე ალიშარ-ჰუიუქსა და ბოლაჰქოიში. „კაპადოკიური“ ფირფიტების რიცხვი ამჟამად რამდენიმე ათეულ ათასს აღწევს და ეხება ძვ. წ. XIX—XVIII საუკუნეებს. ბევრი მათგანი გამოცემულია მსოფლიოს სხვადასხვა ადგილას, მათ შორის საბჭოთა კავშირშიც (ლენინგრადელი ასირიოლოგის ნინელ იანკოვსკაიას მიერ).

„კაპადოკიური“ ლურსმული ტექსტების დიდი ნაწილი ასახავს აღმოსავლეთ მცირე აზიის სხვადასხვა ადგილას არსებული უცხო ქვეყნების სავაჭრო გაერთიანებათა საქმიანობას, რომელსაც ეწოდნენ არა მარტო აღმოსავლელი (ასურელი), არამედ დასავლელი სემიტები — ამორეელები (ე. ი. სირიისა და, საერთოდ, ევფრატის დასავლეთით მცხოვრები სემიტები). ეს არის ოფიციალური თუ კერძო საქმიანი მიმოწერა, სამართლებრივი ხასიათის სხვადასხვა დოკუმენტები. ამავე დროს ამ ფირფიტების ერთი ნაწილი ასახავს ადგილობრივი მოსახლეობის ცხოვრების სხვადასხვა მხარესაც.

„კაპადოკიური“ ფირფიტების მონაცემები ადასტურებენ (და მათ მხარს უჭერს არქეოლოგიური მასალაც), რომ ძვ. წ. II ათასწლეულის დასაწყისში ცენტრალურ მცირე აზიაში საგრძნობლად იყო განვითარებული მიწათმოქმედება. მარცვლეული კულტურებიდან მოსახლეობას ძირითადად მოჰყავდა ხორბალი და ქერი, ამენებდა ვაზს, ამზადებდა სხვადასხვა ხარისხის ზეთს და ა. შ. სამიწათმოქმედო კულტურის განვითარებასთან ერთად კიდევ უფრო განვითარდა მესაქონლეობა. „კაპადოკიურ“ ფირფიტებში მრავლადაა საუბარი წვრილფეხა და მსხვილფეხა რქოსან საქონელზე (ცხვრებზე, თხეებზე, ხარებზე, ძროხებზე). ტრანსპორტირებისათვის ფართოდ იყენებდნენ სახედრებს. ადგილობრივი მოსახლეობა იცნობდა ცხენს.

ძვ. წ. II ათასწლეულის დასაწყისში კიდევ უფრო მაღალ დონეზე იყო ასული მეტალურგია. მზადდებოდა სპილენძისა და ბრინჯაოს უამრავი ჭურჭელი და საომარი იარაღი. გაიზარდა იშვიათი ლითონების — ოქროსა და ვერცხლის მოპოვება. არსებობდა ვერცხლისა და

სპილენძის სხვადასხვა ხარისხი. იცნობდნენ ლითონ ა მ უ თ უ მ სკ. რომელიც, როგორც ახლა დაბეჯითებით ვარაუდობენ, რკინა იყო მეტეორიტული, ან მიწიერი. იგი 40-ჯერ იყო ძვირი ვერცხლზე: ხოლო ოქროზე — 5-ჯერ (რკინის მადნის აღმნიშვნელი ტერმინი უნდა ყოფილიყო ა შ ი უ მ). ადგილობრივი ხელისუფლება სასტიკად კრძალავდა ამ ლითონის გატანას სხვა ქვეყნებში, რის გამოც იგი უცხოელ ვაჭართა მხრიდან კონტრაბანდის ობიექტი ხდებოდა. ცენტრალური მცირე აზიის მოსახლეობა ამუშავებდა ძვირფას ქვებსაც. საგრძნობლად დაწინაურდა ხელოსნობა.

ქვეყნის სიმდიდრეებმა, განსაკუთრებით კი ლითონებმა, კვლავ მიიზიდეს უცხოელი ვაჭრები — დასავლელი და აღმოსავლელი სემიტები, რომელთა შორის წამყვანი ადგილი ამჯერად ასურელ ვაჭრებს ეკავათ (ამ ხანებში კი უკვე ასურეთი განიცდიდა პოლიტიკურ და კულტურულ აღმავლობას). ვაჭრობის უკეთ წარმართვის მიზნით ისინი ცენტრალურ ანატოლიაში აარსებდნენ ორი ტიპის სავაჭრო დასახლებებს: ერთ მათგანს ერქვა ქარუმი (სიტყვისიტყვით, „ნავსაყუდელი“), რომელსაც ქალაქ-სახელმწიფოში საქალაქო თემის ტიპის ავტონომიური მმართველობის უფლება ჰქონდა. მეორე სახის სავაჭრო დასახლება კი ცნობილი იყო ვაბართუმის (სიტყვისიტყვით, „უბანი“) სახელით. უცხო სავაჭრო თემთა საორგანიზაციო ცენტრი ქანიშის ქარუმი იყო. ასეთი სავაჭრო დასახლებანი ცენტრალურა მცირე აზიის თითქმის ყველა მთავარ ქალაქ-სახელმწიფოში არსებობდნენ და ადგილობრივ მმართველებს ემორჩილებოდნენ.

უცხო სავაჭრო კოლონიათა ამოცანა იყო, უპირველეს ყოვლისა მცირე აზიიდან ლითონების გამოზიდვის ორგანიზაცია, რასაც წარმატებით ართმევდნენ თავს სემიტი ვაჭრები. ლითონების სანაცვლოდ უცხოელ ვაჭრებს ანატოლიაში შეჰქონდათ დიდი რაოდენობით: კალა, შუამდინარული შალისა და სელის ქსოვილები. სავაჭრო საქონლის გადატანა ხდებოდა სახედართა ქარავნებით.

სავაჭრო ოპერაციებში ჩაერთვნენ ადგილობრივი ვაჭრები. მთელი აღმოსავლეთი ანატოლია სავაჭრო გზებით დაისერა. ვაჭრობა ფართოდ ვასცილდა მცირე აზიის საზღვრებს.

ქალაქ-სახელმწიფოები ცენტრალურ ანატოლიაში:  
ჰანიში (ნაშა), ხათუზი, კუშარი

ძვ. წ. II ათასწლეულის დასაწყისში ცენტრალური მცირე აზიის სამეურნეო ცხოვრებასა და ტექნიკაში მომხდარმა მნიშვნელოვანმა ძვრებმა სათანადო ცვლილებანი გამოიწვია საზოგადოებრივ ურთიერ-

თობათა სფეროშიც. სოციალური და ქონებრივი დიფერენციაციის პროცესი საკმაოდ შორს იყო წასული ადგილობრივ მოსახლეობაში. კაპადოკიის და, საერთოდ, აღმოსავლეთ მცირე აზიის ტერიტორიაზე ჯერ კიდევ ძვ. წ. III ათასწლეულიდან ჩამოყალიბებული იყო „ქალაქ-სახელმწიფოს“ ტიპის პოლიტიკური გაერთიანებები. „კაპადოკიურ“ ფირფიტებში დასახელებულია შემდეგი ქალაქ-სახელმწიფოები: ქანიში (ნეშა), ხათუში (თანამედროვე ბოლანჯის მიდამოებში), ბურუშ-ხათუში (იგივე ბურუშხანდა), ქუშარი, ზალფა, ღურხუმიტი, ამქუვა, ვაშხანა, ვაშუშხანა, შალახშუვა და სხვანი (ბევრი მათგანის ადგილმდებარეობა დაუზუსტებელია).

ქალაქ-სახელმწიფოს სათავეში ედგა „მეფე“ (აქადურად რ უ ბ ა უ) ან „დედოფალი“ (აქადურად რ უ ბ ა თ უ). კქონდა თავისი „სასახლე“ (აქადურად ე ქ ა ლ ლ უ) ტაძრითურთ. პოლიტიკურ საქმეთა გარდა, „სასახლეში“ იხილებოდა, აგრეთვე, სამართლებრივი, ადმინისტრაციული თუ სხვა ხასიათის საქმენი.

სამეფო კარზე მნიშვნელოვან როლს ასრულებდნენ „დიდებულები“. ესენი იყვნენ სახელმწიფო თანამდებობის პირები, რომელთა რიცხვი რამდენიმე ათეულს აღწევდა. მათ შორის აღსანიშნავია „კიბის მოძღვარი“, „მთავარი მელეინეთუხუცესი“ და სხვა. სამეფო კარზე მოღვაწეობდნენ „მჭედელთა უფროსი“, „უფროსი მებაღე“, „უფროსი მეცხენე და ა. შ. „კიბის მოძღვარ“ ქალაქ-სახელმწიფოში უზენაესი მოსამართლის (მეფის მოადგილის) ფუნქციებს განაგებდა. ზოგჯერ იგი სამეფო ტახტზეც ადიოდა.

ანატოლიის ქალაქ-სახელმწიფოებში. ძირითადად, სამეფო კარზე, იხმარებოდა ლურსმული დამწერლობის ლოკალური ვარიანტი — ძველი აქადური ლურსმული დამწერლობის ერთ-ერთი სახეობა, რომელიც ასურელმა ვაჭრებმა გაავრცელეს ცენტრალურ ანატოლიაში, სადაც ლურსმული დამწერლობის სხვა ვარიანტს (მაგალითად, ისეთს, რომელსაც მოგვიანებით ხმარობდნენ ხეთები) ჯერ კიდევ არ იცნობდნენ. ადგილობრივთა მიერ ამ დამწერლობით შედგენილი ტექსტების ენა არ იყო რომელიმე ავტოქტონური ეთნოსის ენა. იგი იყო აქადური ენის ძველი ასურული დიალექტი, ასურელი ვაჭრები რომ მცირე აზიაში ხმარობდნენ (ალბათ, ყოველდღიურადაც). ამიტომაცაა, რომ ჩვენამდე არ მოაღწია ადგილობრივთა ენაზე (და ადგილობრივი დამწერლობით) შედგენილმა არცერთმა დოკუმენტმა. როგორც ჩანს, ადგილობრივ მცხოვრებთა ენას ზემოაღნიშნული დამწერლობა არ მიესადაგებოდა. რის გამოც ამჟობინებდნენ თავიანთი ტექსტების შედგენისას ეხმარათ აქადური ენის ძველი ასურული დიალექტი.

ძვ. წ. II ათასწლეულის დასაწყისიდანვე ცენტრალური მცირე აზიის ცალკეულ ქალაქ-სახელმწიფოთა შორის დიდი ბრძოლა იყო გა-

მართული ჰეგემონობისათვის. პირველ ხანებში იგი ბურჟუზანდას (ბურჟუზნათუმის) სასარგებლოდ მიმდინარეობდა. მისი მმართველი ანატოლიის დანარჩენ „მთავრებს“ შორის „დიდ მეფედ“ ითვლებოდა.

ერთ-ერთი ძლიერი პოლიტიკური გაერთიანება იყო აგრეთვე ქანიში (ნეშა). ჩვენთვის საინტერესო ხანაში იგი გადაიქცა დიდ ეკონომიკურ და კულტურულ ცენტრად ანატოლიის ზეგნის სამხრეთ-აღმოსავლეთ კუთხეში. ქანიში განსაკუთრებით უნდა გაძლიერებულიყო ე. წ. „ქიულთეფე-ქანიშ II ფენის“ დროს (დაახლოებით ძვ. წ. XIX ს.), როდესაც სავაჭრო კოლონიები აღმავლობას განიცდიდნენ მთელს ანატოლიაში. ამ პერიოდის ქანიშის მმართველთაგან ცნობილია ლაბარშა, ინარი და მისი ძე ვარშამა. უკანასკნელი ორი მმართველი ბრძოლებს აწარმოებდა მეზობელი რაიონების დამორჩილებისათვის.

ცენტრალური ანატოლიის პოლიტიკურ ერთეულთაგან აღსანიშნავია აგრეთვე ხათუში, რომელიც მოგვიანებით დიდი სახელმწიფოს დედაქალაქი გახდა. განსაკუთრებულ ყურადღებას იპყრობს ქუშარი (მდებარეობდა საღლაც ქანიშის მახლობლად).

ქუშარის (ქუსარას) პირველ მმართველთაგან ჩვენთვის ცნობილი არიან ფითხანა და მისი ძე ანითა (დაახლოებით ძვ. წ. 1790—1750 წწ.). ფითხანას დროს, როცა ანითა „კიბის მოძღვარი“ იყო, იწყება მეზობელი რაიონების დაპყრობა. ანითას სახელით შედგენილი ტექსტიდან. რომელმაც ჩვენამდე მოაღწია მხოლოდ მოგვიანო ხანის (ძვ. წ. XIV—XIII სს.) რედაქციით ხეთურ ენაზე\*, ვგებულობთ, რომ „ქუსარას მეფემ“ (შესაძლოა, მამამისმა) ილაშქრა ქ. ნესაში (ქანიშიში), აიღო იგი ღამით და თავის სამფლობელოს შეუერთა.

ანითამ, რომელსაც თავისი მმართველობის დასაწყისში წყაროებში უბრალოდ „მეფეს“ უწოდებდნენ, დაიმორჩილა მეზობელი რაიონები, დაამარცხა ხათის მეფე ფიუსთი და ხათუსა (ხათუში) მიწას-

---

\* დოქსიათა დედგენელია „ანითას ტექსტი“ დედნის შედგენის დრო და ენა. ტექსტი ხეთურ ენაზე. შესაძლოა, არსებობდა „ძველი საწიფოს“ დროიდან (ძვ. წ. XVII ს-ის შუა ხანებიდან), როდესაც ხეთმა მწერლებმა დაიწყეს ტექსტების შედგენა ხეთურ და აქადურ ენებზე ხეთური ლურსმული დამწერლობის გამოყენებით (განსაკუთრებით, ხათუსილი I-ის დროიდან). ეკვს ჩვენეს დედნის არსებობა ხეთურ ენაზე ძვ. წ. XVIII ს-ის შუა ხანებისთვის, ანითას დროსვე. როდესაც სურათოდ არ დგებოდა ტექსტები ხეთურად და არც ხეთური ლურსმული დამწერლობა არსებობდა (ამ დროისათვის ცენტრალური ანატოლიის ადგილობრივი მმართველები, მათ შორის, ანითა, ხმარობდნენ „კაადოკური“ ფირფიტების დამწერლობას, რომლითაც ადგენდნენ ტექსტებს აქადური ენის ძველ ასურულ დამწერლობაზე). დასაშვებია, რომ ანითას საქმიანობის ამსახველი ტექსტი ანითას დროსვე ყოფილიყო შედგენილი აქადურ ენაზე, საიდანაც მოგვიანებით ხეთებს უნდა ეთარგმნათ ხეთურად.

თან გაასწორა. ფურუსხანდას (ბურუსხანდას) მმართველი მას უბრძოლველად ჩაბარდა, მართვა რა ანითას რკინის ტახტი და კვერთხი (ეს იმხანად ძვირფას საჩუქრად ითვლებოდა, რადგან რკინა, როგორც ზემოთ დავინახეთ, ძვირად ფასობდა). ამის შემდეგ ანითა უკვე განიხილებოდა როგორც „დიდი მეფე“. თავის რეზიდენციად მან აირჩია ნესა, სადაც ციხე-სიმაგრენი და ტაძრები ააგო.

ანითას დროს (მოიცავს ე. წ. „ქიულთეფე-ქანიშ IB“ პერიოდს) ცენტრალურ მცირე აზიაში შეიქმნა საკმაოდ ძლიერი ქუსარას სამეფო, რომელიც რამდენიმე ქალაქ-სახელმწიფოს აერთიანებდა. იგი იყო ჩვენთვის ცნობილი ყველაზე მნიშვნელოვანი პოლიტიკური გაერთიანება, ხეთების სამეფოს შექმნამდე რომ არსებობდა აღრუელი ხანის ცენტრალურ მცირე აზიაში.

ანითას დაპყრობებთან ერთად იწყება უცხო სავაჭრო კოლონიათა (ფაქტორიების) გაქრობა მთელს ანატოლიაში. ამ მოვლენის მიზეზი გაურკვეველია, თუმცა ზოგიერთი მკვლევრის აზრით დასაშვებია, რომ ანითას მიერ გატარებულ პოლიტიკას უცხოელ ვაჭართა მიმართ საგრძნობლად უნდა დაესუსტებინა ამ უკანასკნელთა პოზიციები ანატოლიაში, რასაც შედეგად უნდა მოჰყოლოდა უცხოელ ვაჭართა დაბრუნება თავ-თავიანთ ქვეყნებში. როგორც სხვანი ვარაუდობენ, აღნიშნული მოვლენა კავშირში უნდა იყოს, უმეტესწილად, პოლიტიკურ და ეთნიკურ ცვლილებებთან, რომელთაც ადგილი ჰქონდათ არა მარტო ანატოლიაში, არამედ ჩრდილოეთ შუამდინარეთშიც: ხურიტების პოლიტიკური ძლიერების ზრდის შემდეგ ასურეთი აღმოჩნდა სრულიად მოწყვეტილი თავისი სავაჭრო კოლონიებისაგან ანატოლიაში. მალე დაეცა თვით ასურეთის ძლიერებაც. კალის იმპორტის მოულოდნელმა შეწყვეტამ კი ლამის კატასტროფულად იმოქმედა ანატოლიაზე — დაეცა ბრინჯაოს წარმოება, ოდესღაც ძლიერი ქალაქ-სახელმწიფოები დაკნინდნენ და დიდხანს წელში ვეღარ გასწორდნენ.

მაგრამ კალის გარეშე ხომ შეუძლებელი იყო ბრინჯაოს მეტალურგიის განვითარება. სხვა მიზეზებთან ერთად, მოგვიანებით ამანაც გამოიწვია ბრძოლა იმ რაიონებისთვის, რომლებიც კონტროლს უწყევდნენ აღმოსავლეთისა და სამხრეთ-აღმოსავლეთისაკენ მიმავალ გზებს. ეს კი უკვე ახლად წარმოქმნილი ხეთების სამეფოს დროს მოხდა, რაზედაც ქვემოთ ვრცლად ვისაუბრებთ.

## ცენტრალური ანატოლიის უპველესი ბინადარი

ცენტრალური მცირე აზიის ადრეული, წინახეტური ხანის მოსახლეობასთან დაკავშირებით ბევრი რამ დღესაც ბურუსითაა მოხილი. მართალია, მეცნიერებს ახლა გააჩნიათ აღნიშნული პერიოდის მდიდარი არქეოლოგიური მასალა, მაგრამ მარტო არქეოლოგიური მასალების მიხედვით შეუძლებელია განისაზღვროს ჩვენთვის საინტერესო ხანისა და რეგიონის მატერიალური კულტურის შემქმნელი ეთნოსის (თუ ეთნოსების) ვინაობა. ამ საკითხთან დაკავშირებით მხოლოდ ირიბ ცნობებს გვაწვდიან წერილობითი წყაროები — „კაპადოკიური“ ფირფიტები და უფრო მოგვიანო პერიოდის ხეთური ტექსტები. ამ წყაროებში დაცული ცნობების საფუძველზე საშუალება გვეძლევა მხოლოდ მიახლოებით, სავარაუდოდ აღვადგინოთ ცენტრალური ანატოლიის ეთნიკური შემადგენლობის სურათი. ძვ. წ. III ათასწლეულის ბოლოსა და ძვ. წ. II ათასწლეულის დამდეგისათვის იგი შემდეგნაირად გამოიყურება.

### ხათეგი (პროტახეთეგი)

ცენტრალური ანატოლიის ერთ-ერთ უძველეს, ავტოქთონურ ეთნოსად მეცნიერთა უმრავლესობა დღეისათვის მიიჩნევს ხათის ტომებს, ხათებს (ზოგჯერ მათ უწოდებენ პროტოხეთებსაც, ე. ი. ხეთებამდელ მცხოვრებლებს). „ხათი“ იყო ამ ტომთა მთავარი ქალაქისა და მთელი ქვეყნის აღმნიშვნელი ტერმინი. იგივე სიტყვა საფუძვლად უნდა დასდებოდა ხათების დედაქალაქის მეორე სახელწოდებას — ხათუშს, რომელიც თანამედროვე თურქული სოფლის — ბოღაზქოის ადგილას მდებარეობდა. ხათის ქვეყნის ძირითადი ეთნოსის თვითსახელწოდებამ ჩვენამდე არ მოაღწია, თუმცა ახლა საიუკოც არ უნდა იყოს, რომ იგი ტერმინ „ხათთან“ იქნებოდა დაკავშირებული. ამ ეთნოსის ენის აღმნიშვნელადაც იგივე „ხათი“ ყოფილა გამოყენებული, რაც კარგად ჩანს ხეთური ტექსტებიდან. რომლებშიც ზმნისართის ფორმაში ასახულია თვით სახელწოდება ამ ენისა: „ხათილი“,

ე. ი. „ხათურად“, „ხათურ ენაზე“. იგივე „ხათილი“ უნდა ეხმარათ ზედსართავი სახელისათვის — „ხათური“.

ხათური ენის ინტენსიურმა შესწავლამ უკანასკნელ წლებში თითქოს ერთგვარი გარკვეულობა შეიტანა საკითხში, რომელიც მსოფლიოს ენათა ჯგუფებთან ამ ენის დამოკიდებულებას ეხება. როგორც საბოლოოდ დადასტურდა, იგი არ განეკუთვნება არც ინდოევროპულ, არც სემიტურ ენებს. გამოჩენილი ხეთოლოგის, ე. ფორერის მიერ აღრე გამოთქმული ვარაუდი ხათური ენის ნათესაობის შესახებ ჩრდილოკავკასიურ ენებთან ახლა თითქოს მტკიცდება ხათური ტექსტების რაოდენობის ზრდისა და შესწავლის წყალობით, ისევე როგორც ჩრდილოკავკასიური ენების რეკონსტრუქციითა დახმარებით. ყოველივე ეს აახლოებს ხათური ენის მატარებელი ეთნოსის ვინაობის საკითხის საბოლოოდ გარკვევასაც. თუკი ხათების სახით საქმე მართლაც გვექნება ჩრდილოდასავლურ-კავკასიური ეთნოსის მონათესავე ტომებთან, მაშინ ანატოლიაში მათი ავტოქთონობის, ძირძველი ბინადრობის, საკითხი კარდინალურ გადასინჯვას მოითხოვს: დასაშვები იქნება ჩრდილო-დასავლეთ კავკასიიდან ანატოლიაში უძველეს ხანებში მათი გადასახლების შესაძლებლობა. საკითხის ასეთნაირად დაყენება, ბუნებრივია, დაკავშირებული იქნება ცენტრალურ ანატოლიაში ავტოქთონური მოსახლეობის გარკვევის საკითხთან. რაც მომავლის საქმეა. ამჟამად კი სამეცნიერო ლიტერატურაში გაბატონებულია მოსაზრება, რომლის თანახმად ძვ. წ. III ათასწლეულის მეორე ნახევარში ხათები ცენტრალური ანატოლიის ძირითადი ბინადარნი იყვნენ და მათ განეკუთვნებოდათ ბოლახქოის აღრეული ფენების, ალაჯა-ჰუიუქის I—II, ალიშარ-ჰუიუქის III-ისა და ჰოროზთეფეს ფენების მაღალი კულტურა.

როგორც აღვნიშნეთ, ენობრივი მასალის მიხედვით ხათურ ენასა და, შესაბამისად, ხათურ ეთნოსს, უკავშირებენ ჩრდილოდასავლურ-კავკასიურ ენათა ჯგუფებთან და, მაშასადამე, კავკასიური წარმოშობის ტომებთან. ამ უკანასკნელ ხანებში ზოგიერთ ენათმეცნიერს (განსაკუთრებით, ვ. ივანოვს) მოჰყავს კიდევ ათეულობით ხათურ-ჩრდილოდასავლურ-კავკასიური ენობრივი პარალელი, თუმცა მათი ერთი ნაწილი ჯერ კიდევ მოკლებულია სათანადო დამაჯერებლობას. ამავე დროს, ვარაუდობენ, რომ მცირე აზიის ჩრდილო-აღმოსავლეთ კუთხეში ანტიკურ ხანებში მოსახლე ზოგიერთი ტომი, მაგალითად, ზალიბები, რომელნიც ცნობილი იყვნენ რკინის დამზადებით, განსახილველი არიან როგორც ხათები, საბოლოო ჯამში კი, როგორც ჩრდილოდასავლურ-კავკასიური შოდგმის ტომები (ვ. ივანოვი), რითაც სრულიადაც არ ეწევა ანგარიში სამეცნიერო ლიტერატურაში დამკვიდრებულ მოსაზრებას ხალიბების, როგორც ერთ-ერთი ქართვე-



ლური ტომის შესახებ. შესაძლოა, ხალიბების სახელწოდება მართლაც დასაკავშირებელია ხათურ სიტყვასთან „ხაბალქი, ხაფალქი“, რაც „რკინას“ ნიშნავს (იხ. ქვემოთაც). ხათებისაგან ეს სიტყვა, როგორც ვარაუდობენ, უნდა ესესხათ ბერძნებს, რომლებმაც ჩვენთვის საინტერესო ტომებს დაარქვეს „ხალიბები“ — „რკინის მკეთებელნი“ საყოველთაოდ ცნობილი ფაქტის გამო, ე. ი. მათ მიერ რკინის დამზადების გამო. მაგრამ ეს სრულიადაც არ ადასტურებს ხალიბების უტყუარად გამოცხადებას ჩრდილო-კავკასიური მოდგმის ერთ-ერთ ტომად, რადგან ადრეული ხანებიდანვე ანატოლიის ჩრდილო-აღმოსავლეთ კუთხეში (შავი ზღვის სამხრეთ-აღმოსავლეთით) ბინადრობდნენ დასავლურ-ქართველური წარმოშობის ტომები. ამ უკანასკნელთა, და, საერთოდ, ქართველურ ტომთა გაიგივება ხათებთან გამორიცხულია, თუმცა მათ შორის გარკვეული შორეული კონტაქტების არსებობის დაშვება სავსებით შესაძლებელია.

ხათური ენისა და ეთნოსის პრობლემის საბოლოოდ გადაწყვეტა მხოლოდ და მხოლოდ ჩრდილოკავკასიურ სამყაროსთან ენობრივი კავშირების ძიებით არ იქნება მთლად გამართლებული, რადგან ასეთ შემთხვევაში სრულიად იქნება უგულებელყოფილი სამხრეთ ამიერ-კავკასიასთან, სახელდობრ, ქართველურ ენებთან და ქართველურ ეთნოსებთან კონტაქტების არსებობა. ხათური და ქართველური ენების ურთიერთშედარება კი ჭერჭერობით არავის მოუხდენია და არავინ იცის ამ მიმართულებით კვლევა-ძიება რა შედეგს გამოიღებს. საყურადღებოა ზოგიერთი აქამდე გამოვლენილი ფაქტი, მაგალითად, ხათური წარმომავლობის სუფიქსი -ილ თითქმის სრულიად იდენტურია იმავე დანიშნულების ქართველური -ელ სუფიქსისა (შდრ. ხათური „ნერიქილ“ და ქართული „ნერიქელი“; ხათური „ხათუშაილ“ და ქართული „ხათუშელი“ და სხვა). ხათურ-ქართველური ენობრივი პარალელების გამოვლენა (ამ მხრივ ყურადსაღებია. მაგალითად, ხათური „თეთე“ ქართული „დიდის“ მნიშვნელობით, ხათური „შავათ“ და ქართული „ვაშლ-“; ხათური „ქარამ“ (ღვინის ჭურჭელი) და ქართული „ქვევრ-“; ხათური („ვა-“)ცარ“ (ცხვარი) და ქართული „ცხვარ“ და ა. შ.) მომავლის საქმეა.

ხათებით დასახლებულ ქვეყანას უნდა ჰკავებოდა თითქმის მთელი ცენტრალური ანატოლია, განსაკუთრებით ის რაიონები, რომლებიც მოიცავდნენ მოგვიანო პერიოდის კაპადოკიასა და პონტოს. ეს არის ძირითადად თანამედროვე მდ. ყიზილ-ირმაყის (კლასიკური ხანის პალისის) რკალით შემოსაზღვრული ტერიტორია. იგი მოფენილი უნდა ყოფილიყო სხვადასხვა ტიპის დასახლებებით („ქვეყნებით“, „ქალაქებით“, „სოფლებით“), რომლებიც თავიანთი სახელწოდებებითვე

შემორჩნენ მოგვიანო ხანების („კაპადოკიური“ ფირფიტებისა და ხეთური ტექსტების დროინდელ) ცენტრალურ ანატოლიაში. როგორც ამ დასახლებათა სახელწოდებების ლინგვისტურმა ანალიზმა აჩვენა, აღნიშნული რაიონების ტოპონიმების დიდი ნაწილი ხათური წარმოშობისა იყო. ამ სახის ტოპონიმები ცენტრალურ მცირე აზიაში არსებობდნენ ხეთების სამეფოს არსებობის მთელს მანძილზე. ზოგიერთები კი — მის შემდგომაც.

ხეთურ ტექსტებში შემორჩენილი ხათური ლექსიკის მიხედვით თუ ვიძსჯელებთ, ხათურ საზოგადოებას ადრეკლასობრივ დონემდე მიუღწევია. ხათებს ჰყოლიათ მეფე („ქათთე“) და დედოფალი („ქათთახ“), რომელნიც შესაბამის ტიტულებს ატარებდნენ — „ლაბარნა/თაბარნა“ და „თავანანა“. უფლისწულს „თუხქანთე“ რქმევია, სამეფო ტახტს — „ხანვაშით“. ლაშქარს და, საერთოდ, მეომრებს აღნიშნავდნენ სიტყვებით: „პაქქუ/ვაქქუ“ და „ციცინთუ“.

• სამეფო კარზე მოხელეთა და სასახლის მსახურთა მთელი წყება ყოფილა: მელეინეთუხუცესი („ვინდუქარამ“), სამეფო სკიპტრის მტარებელი („თანიავა“), მესუფრე („ცულუვე“), მზარეული („ხანთიფშუეა“), დალაქი („თახაია“), მაცნე („ლუიცილი“) და სხვა მრავალი.

ხათური პანთეონი მრავალ ღვთაებას („ვაშხაბ“) ითვლიდა. ესენია: მზის ღვთაება („ეშთან“), ქ. არინას მზის ქალღმერთი („ვეურუშემუ“), მთვარის ღვთაება („ქაშქუ“), ქვესკნელის ქალღვთაება („ლეღანა“), სამყაროს მაცოცხლებელი ღვთაება („თელიფინუ“), რომელზედაც დამოკიდებული იყო ბუნების აღორძინება, ქვეყნის ნაყოფიერება და სიუხვე და, კიდევ არაერთი ღვთაება. ხათები მათ საპატივცემულოდ დიდ დღესასწაულებს მართავდნენ.

თუკი ბოლაზქოის, ალაჯა-ჰუიუქის, აღიშარ-ჰუიუქის და ჰოროზთეფეს ზემომითითებული ფენების კულტურა მართლაც ხათებს განეკუთვნებოდათ, მაშინ ხათური საზოგადოების კულტურის დონე ნაკმაოდ მაღალი უნდა ყოფილიყო. როგორც ახლა ვარაუდობენ. ხათები დიდად უნდა ყოფილიყვნენ დაწინაურებული ლითონთა წარმოების, განსაკუთრებით, რკინის დამზადების საქმეში, რაშიც მათ პიონერებად თვლიან. როგორც ვარაუდობენ. ხათებს უნდა სცოდნოდათ არამარტო მეტეორიტული რკინის დამუშავება. არამედ მანდნეული რკინის მიღებაც (რკინასთან დაკავშირებით უფრო ვრცლად იხ. ქვემოთ). ალაჯა-ჰუიუქის ზემოაღნიშნულ ფენაში, რომელიც დაახლოებით ძვ. წ. XXI ს-ით თარიღდება, სწორედ მანდნეული რკინისაგან დამზადებული სატევარი აღმოაჩინეს (ეს დაადასტურა სატევრის მეტალოგრაფიულმა ანალიზმა). რკინას ხათურად ერქვა „ხაბალქი“ („ხაფალქი“), რომელიც მოგვიანებით, როგორც ეს პირველად ვ. ივანოვმა შენიშნა,

ძველ ბერძნულ ენაშიც შესულა (ამ ხათურ სიტყვას ახლა ადარებენ ბერძნულ სიტყვებთან γένεσι „ფოლადი“ და γένεσι „სპილენძი; რკინა“).

ხათური ეთნოსი ცენტრალურ ანატოლიაში ძვ. წ. III ათასწლეულის ბოლომდე ან ძვ. წ. II ათასწლეულის დასაწყისამდე უნდა არსებელიყო. ამის შემდეგ ხათები თანდათან ჰქარგავენ თავიანთ ეთნიკურ ინდივიდუალობას ისე, რომ სარბიელს უთმობენ ცენტრალურ მცირე აზიაში იმავე ხანებშივე მცხოვრებ და საკმაოდ მოძძლავრებულ სხვა ეთნოსს. ესენი იყვნენ ინდოევროპული წარმოშობის ტომებო. ამ ორი ეთნოსის მშვიდობიან ჰიდილში საფუძველი ჩაეყარა ახალ ეთნოსს — ხეთებს, რომელთა შესახებ ჰვემთ ვრცლად ვისაუბრებთ. ახლა კი შევებოთ საკითხს, თუ, სახელდობრ, რომელ ინდოევროპულ ტომებთან უნდა გვეჭონოდა საქმე ცენტრალურ მცირე აზიაში მცხოვრები ინდოევროპელების სახით?

ინდოევროპელთაი. „ტუნგუსის მატორიტი“.

ნესიტების ძირითადი კარა — ჟუსარა

ინდოევროპულ ენათა ოჯახი ამჟამად ერთ-ერთი ყველაზე მრავალრიცხოვანია. რომელსაც განეკუთვნება ისეთი ენობრივი ჯგუფები, როგორცაა ანატოლიური (ხეთურ-ლუვიური), ინდოირანული, ბალტიური, სლავური, კელტური, გერმანიკული, იტალიკური, ანდა ცალკეული ენები — ბერძნული. სომხური და სხვანი. ყველა ეს ენა წარმოიშვა ე. წ. წინარე (ანდა პროტო-)ინდოევროპული ენის სხვადასხვა გენეტურ დიალექტად დაშლის შედეგად.

ერთ-ერთი ადრეული ტალა, წინარეინდოევროპული ეთნოსიდან გამოყოფილი, სწორედ ჩვენთვის საინტერესო პროტოანატოლიური ინდოევროპული ენის მატარებელი ეთნოსია. ამ ენას იმიტომ დაერქვა „ანატოლიური“, რომ ინდოევროპელთა პირვანდელი საცხოვრისი ტერიტორიის ანუ წინარესამშობლოს მიტოვების შემდეგ მისი მატარებელი ეთნოსი ანატოლიაში დასახლდა. აღნიშნულმა ენამ მოგვიანებით ანატოლიაშივე განიცადა დიფერენციაცია რამდენიმე დიალექტად (და შესაბამისად, ეთნოსად), რომელთაგან ერთ-ერთი სწორედ ხეთური ენა (და. შესაბამისად, ხეთური ეთნოსი) იყო.

ანატოლიაში მცხოვრებ ინდოევროპელებთან დაკავშირებით ბევრი რამაა ჩვენთვის ცნობილი. მაგრამ დღეისათვის დაუდგენელია ერთ-ერთი უმთავრესი — როდის და საიდან მოვიდნენ ინდოევროპელები მცირე აზიაში. ეს პრობლემა კი გადახლართულია საერთოდ ინდოევროპელთა წინარესამშობლოს დროისა და ადგილის დადგენის პრობლემასთან. ტრადიციული შეხედულებებისაგან განსხვავებით, რომლის

მიხედვით ასეთ ადგილად უნდა მივიჩნიოთ ცენტრალური ან აღმოსავლეთი ევროპა, თანამედროვეობის ორმა დიდმა ლინგვისტმა — თანაზ. ვამყრელიძემ და ვიანესლავ ივანოვმა ფუნდამენტურ ნაშრომში „ინდოევროპული ენა და ინდოევროპელები“ (თბილისი, 1984, რუსულად) წამოაყენეს ახალი მოსაზრება: ინდოევროპელთა წინარესამშობლო საძებნია წინა აზიაში, იქ, სადაც შეიძლებოდა განხორციელებულიყო ინდოევროპულ, სემიტურ, ქართველურ და სხვა ენათა ურთიერთკონტაქტები. ასეთ რეგიონად მათ მიაჩნიათ ამიერკავკასიის სამხრეთით მდებარე ტერიტორია ზემო მესოპოტამიამდე (მოიცავს აღმოსავლეთ მცირე აზიასაც). ეს შესაძლებელი გახდა მხოლოდ მას შემდეგ, რაც აღნიშნულმა მკვლევარებმა აღადგინეს ინდოევროპული წინარე ენა, რომელზედაც ლაპარაკობდნენ უძველესი ინდოევროპელები, სანამ ისინი დანაწევრდებოდნენ სხვადასხვა ენობრივ დიალექტად. ამ ჰიპოთეზიდან გამომდინარე, წინარეინდოევროპულ ენას გამოყოფილი პროტოანატოლიური ინდოევროპული დიალექტის მატარებელი ტომები წინა აზიის რომელიღაც ახლომდებარე რეგიონიდან (შესაძლოა, თვით აღმოსავლეთ ანატოლიის აღმოსავლეთი პერიფერიიდან) უნდა გადასახლებულიყვნენ უფრო დასავლეთით, სადაც მათ მოგვიანებით უნდა განეცადათ დიფერენციაცია. თუკი ასეთ გადმოსახლებას მართლაც ჰქონდა ადგილი, იგი უნდა მომხდარიყო დაახლოებით ძვ. წ. IV—III ათასწლეულების მიჯნაზე (ამავე დროს, გასათვალისწინებელია, რომ ძველადმოსავლურ წყაროებში, თვით ხეთურ წყაროებშიც კი, ინდოევროპელთა, კერძოდ, ხეთების, ანატოლიაში გადმოსახლების საკითხი საერთოდ არ აისახა).

ამგვარად, მცირე აზიაში ინდოევროპელთა მოსვლის გზებია თუ დროის საკითხი ბოლო ხანებში ძალზედ აქტუალური გახდა და მისი საბოლოოდ გადაწყვეტა მომავლის საქმეა. ყოველივე ზემოაღნიშნული ჩვენს მეცნიერულ სამყაროში (ი. დიაკონოვის მიერ) შედარებულ იქნა ისეთ უნიკალურ მოვლენასთან, როგორიც იყო ტუნჯუსის მეტეორიტი მისი დამანგრეველი ძალით. თ. ვამყრელიძისა და ვ. ივანოვის სამუშაო ჰიპოთეზა მართლაც „ანგრევს“ ძველ შეხედულებას ინდოევროპელთა წინარესამშობლოსთან დაკავშირებით. იგი მალე, ალბათ, მეცნიერულ დებულებად იქცევა, რადგან აღნიშნული ჰიპოთეზის მომხრეთა რიცხვი სულ უფრო და უფრო მატულობს, ზოლო თვით ჰიპოთეზას სულ უფრო მეტი დამაჯერებლობა ემატება.

ძვ. წ. III—II ათასწლეულთა მიჯნაზე ინდოევროპული წარმოშობის ტომების არსებობა ცენტრალურ მცირე აზიაში წერილობითი წყაროებითაა დამტკიცებული. უფრო მეტიც. ძვ. წ. II ათასწლეულის დასაწყისში ცენტრალური ანატოლიის გარდა ინდოევროპელები გავრცელებული ყოფილან მცირე აზიის საკმაოდ დიდ ტერიტორიაზე.

„კაპადოკიური“ ლურსმული ფირფიტების მონაცემებით, ინდოევროპული წარმოშობის სახელებს ატარებდნენ ადამიანები, რომლებიც ანატოლიის სულ სხვადასხვა რაიონში მოსაქმეობდნენ. ამავე ტექსტებში აღმოჩენილია ცალკეული სიტყვებიც (იხიხულ „შეკავშირება; ხელშეკრულება“, იხფანთ „ღამე“ და სხვ.), რომლებიც აშკარად ინდოევროპული, კერძოდ, ხეთურია (უფრო ზუსტად — ნესური. ქანესური). ახლა უკვე საკმაოდ დამაჩერებლად გამოიყურება მოსაზრება, რომ აღნიშნული პერიოდისათვის დამთავრებული უნდა ყოფილიყო საერთო ანატოლიური ინდოევროპული ფუძე-ენის დანაწევრების პროცესი მის ცალკეულ დიალექტებად — ნესურად ან ქანესურად ცენტრალურ ანატოლიაში (მეცნიერებმა სწორედ ნესური ანუ ნესიტური, იგივე ქანესური დიალექტი მონათლეს როგორც „ხეთური“, რაც სრულ გაუგებრობაზე იყო დამყარებული — იხ. ქვემოთ), ლუვიურად (მცირე აზიის სამხრეთსა და სამხრეთ-დასავლეთში) და ფალაურად (ანატოლიის ჩრდილოეთ ან ჩრდილო-აღმოსავლეთში). მოგვიანებით. სწორედ ამ დიალექტებიდან შეიქმნა სათანადო ენობრივი ერთეულები.

ახალ ტომთა კავშირების წარმოქმნის პროცესი მრავალი საუკუნე გრძელდებოდა. ამიტომ ანატოლიური წინარე ენის დიფერენციაციის დასაწყისი (რასაც ადგილი ჰქონდა თვით ანატოლიის ტერიტორიაზე) განეკუთვნება იმ ეპოქას, როდესაც მცირე აზიაში დამკვიდრებული ინდოევროპელი ტომები ცხოვრობდნენ გვაროვნული წყობილების პირობებში — დაახლოებით ძვ. წ. IV ათასწლეულის ბოლოს — III ათასწლეულის დამდეგს. ჯერჯერობით არ შეგვიძლია ზუსტად განვსაზღვროთ ის ტერიტორია, სადაც დამკვიდრდა ანატოლიური წინარე ენის მატარებელი ეთნოსი და საიდანაც გამოიყვნენ ცალკეული ტომობრივი დიალექტები (ასეთ ტერიტორიად ვარაუდობენ სამხრეთ ანატოლიას). მიახლოებით შეგვიძლია განვსაზღვროთ მხოლოდ ნესიტურ ტომების უძველესი განსახლების კერა. ეს იყო ნესიტების ადრეული პოლიტიკური გაერთიანების ადგილი — ქუსარა (ზუსტი ადგილმდებარეობა უცნობია, საძებნია ნესა/ქანესთან საღდაც ახლოს) და მისი მეზობელი ნესა (ქანე:ი). როგორც ჩანს, აქედან, ე. ი. თანამედროვე მდ. ყოზილ-ჩრმაყის შუა დინების მოსაზღვრე სანახებიდან, დაიწყო ნესიტების გავრცელება მთელს ცენტრალურ ანატოლიაში. სადაც გაბატონებული მდგომარეობა იმხანად ადგილობრივ ხათებს უნდა ჰკავებოდათ. ხათებისა და ნესიტების ურთიერთობა, როგორც ჩანს. მშვიდობიან ატმოსფეროში მიმდინარეობდა. რასაც შედეგად უნდა მოჰყოლოდა ხათურ-ნესიტური ორენოვნება. რომელიც ემთხვევა ცენტრალურ ანატოლიაში ქალაქ-სახელმწიფოთა არსებობის ხანას (იხ. ზემოთ). მოგვიანებით, როდესაც დასრულდა ორ-

უნოვნების პროცესი, ცენტრალურ ანატოლიაში შეიქმნა სრულიად შეცვლილი ეთნო-პოლიტიკური სიტუაცია. რაზედაც ქვემოთ შევჩერდებით.

#### სამხრეთი და ჩრდილოეთი

ზომოგანხილული ორი ძირითადი ეთნოსის გარდა, ძვ. წ. II ათასწლეულის დასაწყისის ცენტრალურ მცირე აზიაში არსებობდნენ, აგრეთვე, სხვა ეთნიკური ჯგუფები. მართალია, ისინი არ განეკუთვნებოდნენ ანატოლიის ავტოქთონურ მოსახლეობას. მაგრამ მცირე აზიაში ძველთაგანვე ბინადრობდნენ და ქვეყნის ძირითად მოსახლეობასთან მჭიდრო კონტაქტში იმყოფებოდნენ. ესენი იყვნენ სემიტური და ხურიტული წარმოშობის ეთნიკური ჯგუფები.

სემიტური ეთნიკური ელემენტი ცენტრალურ ანატოლიაში საკმაოდ ადრეული ხანებიდან ჩნდება, ყოველ შემთხვევაში იმ დროიდან, როდესაც ივარაუდება მცირე აზიაში აღმოსავლელი სემიტების — აქადელი ვაჭარ-კოლონისტების გადმოსახლება (იხ. ზემოთ). ძვ. წ. II ათასწლეულის დასაწყისიდან ცენტრალური მცირე აზია უკვე სხვა აღმოსავლელი სემიტებით — ასურელი ვაჭრებით იყო მოფენილი. მათ გვერდით საქმიანობდნენ სემიტი ვაჭრები დასავლეთ წინა აზიიდან — ე. წ. ამორეელები (განსაკუთრებით, ჩრდილოეთ სირიელები). მცირე აზიაში უნდა ჩამოსულიყვნენ ებლაელი ვაჭრები — ებლას ქვეყნის მკვიდრნი (ებლას ქალაქი-სახელმწიფო ამ ხანებისთვისაც მძლავრ პოლიტიკურ გაერთიანებას წარმოადგენდა. იგი მდებარეობდა თანამედროვე თელ-მარდისის მიდამოებში, ალექსოს სამხრეთით დაახლოებით 40 კმ-ზე).

სემიტი ვაჭრები მცირე აზიაში ჩამოსახლებული იყვნენ თავიანთი ოჯახებითურთ, რომლებიც ანატოლიაში ხანგრძლივი ცხოვრების მანძილზე ქმნიდნენ ახალ ოჯახებს. სემიტი ვაჭრების რამდენიმე თაობა საქმიანობდა ცენტრალურ ანატოლიაში. ამ ხნის განმავლობაში მათ მჭიდრო ურთიერთობა ჰქონდათ ადგილობრივ მოსახლეობასთანაც. „კაბადოკიურ“ ფირფიტებში დადასტურებულია არაერთი ფაქტი, რომელთა თანახმად ადგილობრივი წარმოშობის ზოგიერთი პიროვნება უკვე სემიტურ სახელს ატარებდა (აისახა პირუკუ სურათიც — სემიტური წარმოშობის ადამიანებს ადგილობრივი, მცირეაზიული სახელი ერქვათ). ადგილობრივი მოსახლეობის ლექსიკაში თანდათან სემიტური წარმოშობის სიტყვებიც გაჩნდა. სემიტებმა დიდი გავლენა მოახდინეს არამართ ადგილობრივი ვაჭრობის ორგანიზების განვითარებაზე, რამაც დიდად შეუწყო ხელი ადგილობრივ ვაჭართა მომძლავრე-

ზას, არამედ ადგილობრივ რელიგიასა და კულტურაზე. ჩვენს ხელთ არსებული მასალების მიხედვით, ლურსმული დამწერლობა ცენტრალურ ანატოლიაში სწორედ აღმოსავლელმა სემიტებმა შემოიღეს — ეს იყო ძველი აქადური ლურსმული დამწერლობის ძველი ასურული ვარიანტი, რომელსაც ხმარობდნენ როგორც სემიტი ვაჭრები, ასევე ადგილობრივ მცხოვრებთა ზედაფენები. ამ დამწერლობითა და აქადური ენის ძველასურულ დიალექტზე შედგენილია ადგილობრივ ქალაქ-სახელმწიფოთა მმართველებისა და დიდ მოხელეთა პოლიტიკური, საქმიანი თუ იურიდიული შინაარსის ტექსტები (რომელიმე ადგილობრივ ენაზე შედგენილი ტექსტი ადგილობრივი დამწერლობით დღემდე ცნობილი არ არის, რაც აუცილებლად არ უნდა იყოს იმის მანიშნებელი, რომ ასეთი დამწერლობა ადგილობრივ მოსახლეობას საერთოდ არ გააჩნდა). ანატოლიაში მცხოვრები სემიტების კულტურული გავლენა ადგილობრივ საზოგადოებაზე. შესაძლოა, გაძლიერებულიყო, სემიტი ვაჭრების საქმიანობა ანატოლიაში რომ რაღაც მიზეზთა გამო უეცრად არ შეწყვეტილიყო (იხ. ზემოთ).

**ხურიტული** (ხურიული) ეთნიკური ელემენტი ძვ. წ. II ათასწლეულის დამდეგის ცენტრალურ ანატოლიაში გაცილებით სუსტი იყო სემიტურთან შედარებით, მაგრამ როგორც განსხვავებული ეთნიკური ერთეული იგი მაინც არსებობდა სტა ეთნიკური ჯგუფების გვერდით. ამ დროისათვის ხურიტები საკმაოდ მომძლავრებული იყვნენ ჩრდლოეთ მესოპოტამიაში, საიდანაც ისინი ცოტა უფრო მოგვიანებით იჭრებოდნენ აღმოსავლეთ ანატოლიასა და ჩრდილოეთ სირიაში. „კაადოკიური“ ფირფიტების თანახმად, ხურიტული წარმოშობის სახელების მატარებელი ადამიანები ცენტრალურ ანატოლიაში სხვადასხვა საქმიანობით იყვნენ დაკავებული. აღნიშნული ხანისათვის ჯერ კიდევ არ იგრძნობოდა ისეთი მძლავრი ხურიტული გავლენა მცირეაზიულ საზოგადოებაზე, როგორც ამას ადგილი ჰქონდა მოგვიანებით, ხეტების „ძველი სამეფოს“ ხანაში (იხ. ქვემოთ), როდესაც ხურიტების მძლავრი ნაკადის შემოდწევა აღმოსავლეთ მცირე აზიაში თან ერთვოდა ხურიტული რელიგიისა და კულტურის გავლენის გაძლიერება. მაგრამ, როგორც ჩანს, ცენტრალურ ანატოლიაზე ხურიტული სამყაროს გავლენის საწყისები უფრო ადრეულ ხანებშია სავარაუდებელი. იგი უნდა არსებებულიყო „კაადოკიური“ ფირფიტების ხანაშიც, მით უმეტეს, რომ აღმოსავლეთ ანატოლიას უშუალოდ ემზობლებოდა ხურიტული სამყარო.

უახლეს სამეცნიერო ლიტერატურაში დაბეჭილებით გამოთქვამენ ვარაუდს ხურიტების წარმომავლობასთან დაკავშირებით: ხურიტები წარმოშობით ჩრდლოეთაღმოსავლურ-კავკასიური ეთნოსის წარმომადგენლები ყოფილან (ი. დიაკონოვი). მათ ადრეულ ხანებში უნდა დაე-

ტოვებინათ კავკასია და გადმოსახლებულიყვნენ სამხრეთით, ჩრდი-  
ლოეთ მესოპოტამიაში.



დაახლოებით ამგვარად გამოიყურებოდა ძვ. წ. III ათასწლეულის  
ბოლოსა და II ათასწლეულის დამდეგისათვის ცენტრალური მცირე  
აზიის ეთნიკური შემადგენლობის სურათი. დასავლეთ წინა აზიის ამ  
რეგიონში ერთმანეთის გვერდით ცხოვრობდნენ და საქმონობდნენ  
ეთნიკურად სულ სხვადასხვა წარმოშობის ადამიანები: ხათები, ინდო-  
ევროპელები (ლუვიელები, ნესიტები, ფალაელები), აღმოსავლელი თუ  
დასავლელი სემიტები, ხურიტები, ე. ი. აღნიშნული ზანის დასავლელი  
წინა აზიის იმხანად ცნობილი ყველა ეთნოსის წარმომადგენლები.  
ამასთანავე, სრულიად არ არის გამოსარიცხი იმავე ტერიტორიაზე  
ეთნიკურად კიდევ სხვა წარმოშობის ადამიანთა არსებობა (განსაკუთ-  
რებით, სამხრეთ ამიერკავკასიიდან), რომლებიც შეიძლება იგულის-  
ხმებოდნენ ისეთ სახელებში, რომელთა წარმოშობა დღეისათვის გა-  
ურკვეველია (შდრ. მაგალითად, „კაპადოკიურ“ ფირფიტებში დაცუ-  
ლი სახელწოდება მამაკაცისა „კათარზია/ქათარზია“, რომელიც შეიძ-  
ლება დაუკავშირდეს ურარტული ლურსმული წყაროების „ქათარზა“  
ქვეყნისა და ტომის სახელწოდებას).



## ხეთების აღმოჩენა და ხეთური პრობლემის გადაჭრა

„კაპადოკიური“ ფირფიტების ხანის (ძვ. წ. 1900—1750 წწ.) მომდევნო პერიოდის შემდეგ მნიშვნელოვნად შეიცვალა ცენტრალური ანატოლიის ეთნიკური, პოლიტიკური და საზოგადოებრივ ურთიერთობათა ვანვიტარების სურათი. ძვ. წ. 1650 წლისათვის ცენტრალურ მცირე აზიაში წარმოიშვა ხეთების სამეფო — ხათი, რომელმაც ძვ. წ. 1200 (ან ძვ. წ. 1190) წლამდე იარსება. ამის შემდეგ ხეთები ფაქტობრივად ექრნენ ისტორიის ასპარეზიდან. მართალია, ძვ. წ. I ათასწლეულის ძველადმოსავლურ წყაროებში, ხოლო მოგვიანებით, ბიბლიაში, კვლავ გამოჩნდნენ „ხეთები“ — „ხათის ქვეყნის“ მცხოვრებნი, მაგრამ ამ სახელწოდებაში უკვე სხვა შინაარსი იგულისხმებოდა. ანტიკურ ხანაში აღარავის ახსოვდა ხეთების არსებობა. ახალ დროში ხეთები კვლავ აღმოაჩინეს და შესაძლებლობისამებრ აღადგინეს მათი ისტორია. ოლონდ ამას დასჭირდა თითქმის მთელი ოცი საუკუნე. თუ როგორ მოხდა ეს, ამის შესახებ ქვემოთ ვისაუბრებთ.

მთრეა აზია — ნავლმართა და მოგზაურთა  
 აზრადღეინს ცინტრონი

ანტიკური ხანის ისტორიით გატაცებულმა მკვლევრებმა ჯერ კიდევ XIX ს-ის დასაწყისიდანვე თურქეთში აღმოაჩინეს ძვ. წ. II ათასწლეულის დროინდელი ძეგლები. გასული საუკუნის 30-იან წლებში ფრანგმა არქეოლოგმა და მოგზაურმა შ. ტუქსიემ ერთ-ერთმა პირველთაგანმა მოგზაურა ანატოლიაში, მოინახულა პატარა თურქული სოფელი ბოლასქოი და მასთან ახლოს მდებარე იაზილიქაიას კლდეში ნაკვეთი ბარელიეფი. 1839 წ. მან პარიზში გამოაქვეყნა წიგნი „მცირე აზიის აღწერა“, სადაც აღნიშნული იყო, რომ ხალხს, რომლის ძლიერებაზე მიუთითებდა ბოლასქოის ნანგრევები, უძველეს ხანებში უნდა ეცხოვრა მცირე აზიაში.

შ. ტუქსიეს შემდეგ ბოლასქოიში ჩავიდა ინგლისელი უ. ჰამილტონი, რომელმაც აღმოაჩინა უძველესი დროის ნანგრევები სოფელ

ალაჯა-პუიუქში. 1859—61 წწ-ში ბოლახქოი შეისწავლეს გერმანელებმა პ. ბარტმა და დ. მორდტმანმა, ხოლო 1862 წლიდან ანატოლიაში რამდენჯერმე იმოგზაურა ფრანგმა მეცნიერმა ჟორჟ პერომ. 1887 წ. მან გამოსცა ფუნდამენტური ნაშრომი „ანტიკური ხელოვნების ისტორია“, რომელშიც მოცემული იყო ცნობები ანატოლიაში შევრო-ვებული ძეგლების შესახებ. 1882 წ. კარლ ჰუმანმა, პერგამონის საკურთხეველის აღმომჩენმა, შეადგინა ბოლახ-ქოის ნანგრევების პირველი გეგმა და ჩამოასხა იაზილიქაიას ბარელიეფების პირველი მულაჟები. 90-იან წლებში ბოლახქოიში გაემგზავრა ბერლინის საიმპერიო მუზეუმის ექსპედიცია. ამავე ხანებში აქ ფრანგმა შანტრმა და გერმანელმა შეფერმა აღმოაჩინეს ლურსმული დამწერლობით შესრულებული ტექსტების რამდენიმე ფრაგმენტი.

მიუხედავად დიდი ცდებისა და მონდომებისა, ამ მეცნიერთა და მოგზაურთაგან ვერც ერთმა სწორად ვერ განსაზღვრა ცენტრალურ ანატოლიაში აღმოჩენილი ძეგლების მნიშვნელობა, კერძოდ ის, რომ ყველა ეს ძეგლი ეკუთვნოდათ ძვ. წ. II ათასწლეულის დროინდელ ხეობებს. ტექსიეს აზრით, ბოლახქოი წარმოადგენდა ანტიკურ ქალაქ ფტერიას (ფტერის), სადაც კრეზი და კიროსი შეებრძოლნენ ერთმანეთს, ხოლო იაზილიქაიას გამოსახულებებმა მას მოაგონა ამჰონებისა და პათლაგონელთა შეტაკება. არც შანტრმა და შეფერმა იცოდნენ, რომ მათ მიერ ნაპოვნი ფრაგმენტები თიხის ფირფიტისა ხეთურ ენაზე იყო შედგენილი.

XIX ს-ში მართლაც არავის შეეძლო განეხილა ბოლახქოი როგორც ხეობების სახელმწიფოს დედაქალაქი, ხოლო იაზილიქაია — ხეთურ ღვთაებათა პროცესია ცალკეულ მეფეთა პორტრეტებით. ამის მიზეზი იყო ის, რომ XIX ს-ის ბოლოსათვის, როდესაც ყურადღება მიაქცეეს ბიბლიის მონაცემებს „ხეობების შესახებ“, ხეობების ქუეყანას სპეციალისტები ათავსებდნენ არა ანატოლიაში, არამედ ჩრდილოეთ სირიაში, სადაც აღმოაჩინეს მანამდე უცნობი იეროგლიფური დამწერლობით შესრულებული მრავალი წარწერა.

ერთ-ერთი მოგზაურთაგანი, რომელმაც ყურადღება მიაქცია ამ დამწერლობით შედგენილ ტექსტებს, იყო გერმანელი ი. ბურკჰარდტი (აღმოსავლეთში მოგზაურობისას „შეიხ იბრაჰიმად“ წოდებული). XIX ს-ის დასაწყისში, ჩრდილოეთ სირიაში მოგზაურობის დროს, მან პირველმა აღწერა ჰამათის ერთ-ერთი სახლის კედელში მოთავსებული იეროგლიფური ნიშნებით მოფენილი ქვები, შემდგომ სამეცნიერო ლიტერატურაში „ჰამათის ქვებით“ ცნობილი. 1870 წ. ჰამათის ქვები ინახულა ორმა ამერიკელმა მოგზაურმა — ო. ჯონსონმა და ს. ჯესაპმა, ხოლო ორიოდე წლის შემდეგ დამასკოში მცხოვრებმა ირ-

ლანდიელმა მისიონერმა უილიამ რაიტმა შეძლო ეს ქვეები კონსტანტინოპოლს, მისი მულაყები კი ბრიტანეთის მუზეუმში გაეგზავნა. იმავე იეროგლიფებით შედგენილი ტექსტები მომდევნო ხანებში აღმოაჩინეს ინგლისელებმა ვ. სკინმა და ჯ. სმიტმა ჩრდილოეთ სირიის სხვა ადგილას — ჟერაბლუსში, ასურული ლურსმული წყაროების ქარხეშიში.

გასული საუკუნის 70-იანი წლების დასასრულისათვის მეცნიერებმა ყურადღება მიაქციეს იმ ფაქტს, რომ ჩრდილოეთ სირიაში აღმოჩენილი იეროგლიფური დამწერლობით შესრულებული იყო, აგრეთვე, რანდენიჟე წარწერა ანატოლიიდან (იახილიქიას კლდეზე, ბოლაზქოის ერთ ძველ გალავანში ნიშანთაშის კლდეზე, ივრიზში და სმირნის მიდამოებში). ამან საშუალება მისცა ოქსფორდის უნივერსიტეტის პროფესორს არჩიბალდ სეისს და უილიამ რაიტს წამოეყენებინათ მოსაზრება, რომ ჩრდილოეთ სირიასა და მცირე აზიაში აღმოჩენილი იეროგლიფური წარწერები ერთმანეთთანაა დასაკავშირებელი და ისინი ეკუთვნოდან ბიბლიაში მოხსენიებულ „ჰიტტიმს“ („ხეთებს“), რომელიც ჩრდილოეთ სირიასა და პალესტინაში იყო საძიებელი. მათ მაშინვე დაუკავშირეს ეგვიპტურ იეროგლიფურ და ასურულ წარწერებში მოხსენიებული „ხეთა“ და „ხათი“, ისევე როგორც თელ-ამარნას არქივის აქადურად შედგენილი ტექსტების „ხათი“.

ეს შეხედულება XX ს-ის დასაწყისამდე ბატონობდა სამეცნიერო ლიტერატურაში. ამასობაში კი ჩრდილოეთ სირიაში აღმოჩენილ იქნა კიდევ მრავალი იეროგლიფური წარწერა, რომლებსაც უკვე „ხეთურს“ უწოდებდნენ. 80-იან წლებში ისინი იპოვეს ზენჯირლის გათხრების დროს კ. ჰუმანმა და ფ. ლუშანმა, ხოლო მომდევნო ხანებში იეროგლიფური დამწერლობით შედგენილი ასეთი წარწერები აღმოაჩინეს ჩრდილოეთ სირიის კიდევ სხვა ადგილას (ალეპოში, მარაშში). მათი დიდი ნაწილი ლ. მესერშიდტმა გამოაქვეყნა 1900 წელს სათაურით: „ხეთური წარწერების კორპუსი“.

როგორც შემდგომ გაირკვა, ეს წარწერები, რომელთა უმრავლესობა ძვ. წ. I ათასწლეულს განეკუთვნებოდა, სრულიადაც არ წარმოადგენდნენ ნამდვილ ხეთურ ტექსტებს, ხოლო მათში მოხსენიებული „ხეთები“ სრულიადაც არ იყვნენ ნამდვილი ხეთები. ხეთური ლურსმული ტექსტები მაშინ არც კი იყო აღმოჩენილი, თუ არ ჩავთვლით ზემოაღნიშნულ ორ ლურსმულ ფრაგმენტსა და თელ-ამარნას არქივში დაცულ ე. წ. „არცავას წერილებს“ (სულ ორ ფირფიტას). სხვადასხვა ქვეყნის მეცნიერთა მრავალი წლის კვლევა-ძიებამ საბოლოოდ დაადგინა, რომ ზემოაღნიშნული იეროგლიფური ტექსტების ენაც არ იყო ხეთური (ნესიტური), თუმცა იგი ამ უკანასკნელის მონათესავე

აღმოჩნდა და ეკუთვნის ანატოლიურ ენათა ჯგუფს. წარმოადგენს რა  
ლუვიურა ლუქსულის მოგვიანო დიალექტს. ამიტომ მეცნიერები ამ  
ენას აწოდებენ „ლუვიურ იეროგლიფურს“, ხოლო წარწერებს — „ლუ-  
ვიურ იეროგლიფებს“ (ტრადიციით, ზოგჯერ კვლავ „ხეთურ იერო-  
გლიფებს“) უწოდებენ.

ასე რომ, ხეთების პრობლემა გადაუჭრელი დარჩა XX ს-ის დამ-  
დევნათვის, როცა ასირიოლოგიამ პირველ დიდ წარმატებებს მიაღ-  
წია. ხეთების საიდუმლოებას ფარდა ახადა მხოლოდ გერმანელი აღ-  
მოსაველეთმცოდნის, „პან-ბაბილონიზმის“ ერთ-ერთი ავტორის —  
ჰელგო ვანკლერის გათხრებმა, რომლებიც 1906 წ. დაიწყო ბოლახქოი-  
ში „ვერმანის აღმოსავლური საზოგადოების“ მხარდაჭერით და 1912  
წ-მდე გავრძელდა. მაგრამ ამის შესახებ ცოტა ქვემოთ.

### „ხეთები“ ბიბლიაში

ვასელი საუკუნის შუა ხანებამდე „ხეთებს“ იცნობდნენ მხოლოდ  
ბიბლიიდან, კერძოდ, ძველი აღთქმის სხვადასხვა წიგნიდან (იხ., მაგა-  
ლითად, წიგნები „დაბადებისა“, „გამოსლვათა“, „რიცხვთა“, „სჯულ-  
თა“, „მეფეთა“ და სხვ.). მაგრამ როგორც ზემოთ აღინიშნა, ბიბლიის  
„ხეთები“ არ წარმოადგენდნენ იმ „ხეთებს“, ძვ. წ. II ათასწლეულის  
მეორე ახაში რომ სახლობდნენ. ისინი უნდა ყოფილიყვნენ „ნამდვი-  
ლი ხეთების“, როგორც ჩანს, შორეული შთამომავალნი და მათი კულ-  
ტურული ტრადიციების გამგრძელებლები, რომელთაც ხეთების სამე-  
ფოს შემდეგ ანატოლიის სამხრეთ-აღმოსავლეთსა და ჩრდილოეთ  
სირიაში (ნაწილობრივ, პალესტინაშიც) უნდა დაედოთ ბინა (ძვ. წ. I  
ათასწლეულის პირველ ნახევარში); მათი აღმნიშვნელი სახელწოდე-  
ბა კი იმხანად უკვე ლეგენდად ქცეული ოდესლაც მრისხანე „ხათიდან“  
შომდინარეობდა.

ბიბლიაში „ხეთები“ დასახელებული არიან ქანაანელთა, ამორეელ-  
თა, არამეელთა, ებრაელთა და, შესაძლოა, ხურიტების გვერდით, რაც  
იმას მანაშნებელია, რომ ამ ტომთაგან „ხეთები“ ეთნიკურად სრულიად  
განასხვავებული არიან. ამიტომაც არ გამოირიცხება მათი ენის დაკავ-  
შირება „ლუვიური (ხეთური) იეროგლიფური“ ტექსტების ენასთან,  
რომელიც ხეთური (ანატოლიური) ინდოევროპული ენების მონათე-  
სავეა. ბიბლიის „ხეთები“, რომელთაც ჰყავდათ თავიანთი „ქვეყნა“  
(შედრ., მაგალითად, „მეფეთა წიგნი“, IV, 7:6: „აჰა. ესერა, მოსამე-  
იმზნა ჩუენ ზედა მეფემან ისრაელისაგან მეფე იგი ქეთელ-  
თა და მეფე იგი ეგვიპტელთა“), მოგვიანებით უნდა შერეოდნენ აღ-  
გილობრივ კარბ სემიტურ მოსახლეობას.

ებრაულ ბიბლიაში ხეთების აღმნიშვნელი სახელწოდება (რომელსაც საფუძვლად უდევს, როგორც ჩანს, ძვ. წ. I ათასწლეულის ასურული და ურარტული წყაროების „ხათი“, „ხათე“, რაც თავის მხრივ მომდინარეობს ძვ. წ. II ათასწლეულის დროინდელი ტექსტებიდან ხეთურ და აქადურ ენებზე) გადმოცემულია „პიტტიმ“ ფორმით, ხოლო ბერძნულ ბიბლიაში — როგორც „ხეტაიოი“. ევროპულ ენებზე ბიბლიის თარგმნისას სწორედ ეს დაედო საფუძვლად ხეთების აღმნიშვნელ ტერმინს: Hethiter (გერმ.), Hittites (ინგლ.), Hittites (ფრანგ.) და ა. შ. რუსულ ბიბლიაში ჩვენთვის საინტერესო სახელწოდება გადმოცემულია „хеттеи; сыны хеттовы; хеттеяне“-ს ფორმებით, საიდანაც გაჩნდა თანამედროვე რუსული და ქართული „хетты“ და „ხეთები“.

ძველი აღთქმის ქართულ თარგმანებში კი ხეთებს ერქვათ „ქეტელინი“ (ნათ. ბრ. „ქეტელთა“), ან „ძენი ქეტისნი“ (ნათ. ბრ. „ძეთთა ქეტისთა“). რაოდენ დასაანანია, რომ ქართულ ისტორიოგრაფიაში ხეთების აღსანიშნავად თავიდანვე არ დამკვიდრდა სწორედ ბიბლიიდან გადმოქართულებული, ჩვენი აზრით, ძალზედ მარჯვე ფორმები! ხეთების აღსანიშნავად ხომ ევროპასა და რუსეთში საფუძვლად დაუდეს სწორედ ბიბლიაში ნახმარი სახელწოდებები? საქართველოში ხომ ხეთების აღმნიშვნელი სახელი ცნობილი გახდა ბიბლიის ქართულად თარგმნის დროიდან, ე. ი. გაცილებით ადრე, ვიდრე ბიბლია ითარგმნა ევროპასა და რუსეთში? ქართულმა ისტორიოგრაფიამ მათ რატომღაც თავიდანვე აუარა გვერდი და რუსული სამეცნიერო ლიტერატურიდან გადმოაქართულა: „ხეთები“. აქვე დავსძენთ, რომ ახლა სრულიად უმართებულოა ქართულად ვიხმაროთ „ჰეთიტები“ (ან „ჰითიტები“), როგორც ამას ზოგიერთი ავტორი წინდაუხედავად აკეთებს, რადგან ასეთი ფორმები სხვა არაფერია თუ არა გერმანული (ან ინგლისური და ფრანგული) ბიბლიიდან აღებული ფორმების გადმოქართულება. ახლა ისევ ტრადიციას უნდა მივყვეთ და ვწეროთ „ხეთები“, მათი ქვეყნის აღსანიშნავად კი, როგორც ეს თვით ხეთურ წყაროებშია, „ხათი“ (და არა „ჰატტი“, „ხატტი“ და მისთანანი).

### „ხეთები“ ძველადმოსავლურ წყაროებში

XIX ს-ში მკვლევარებმა ბიბლიის „ხეთებს“ მაშინვე დაუკავშირეს ეგვიპტურ იეროგლიფურ და ძველ ასურულ წარწერებში მოხსენიებული „ხეთა“ და „ხათი“. ამასთანავე, ყურადღება მიაქციეს იმას, რომ ყველა ამ წარწერის „ხეთები“ განეკუთვნებოდნენ ძალზედ ადრეულ ხანას, ვიდრე ბიბლიაში მოხსენიებული „ხეთები“.

ეგვიპტურ იეროგლიფურ ტექსტებში „ხეთას“ მოხსენიება იწყებოდა XVIII დინასტიის დროიდან, როცა თუტმოს III სირიის ჩრდილოეთ რაიონებში შეიჭრა და ეფრატი გადალახა. ეგვიპტურმა წარწერებმა შემოინახეს ვრცელი მოთხრობა ქალაქ კადეშთან ეგვიპტელებისა და ხეთების მძაფრი ბრძოლისა.

ძველ ასურულ (ბაბილონურ) წყაროებში „ხათის“ უძველესი მოხსენიება განეკუთვნება სამსუღდითანას მეფობის ხანას, როცა ხეთებმა ბაბილონს ილაშქრეს და ბოლო მოუღეს ბაბილონის პირველ დინასტიას. ხეთების სამეფოსთან დაკავშირებით საყურადღებო ცნობები იყო დაცული თელ-ამარნას არქივშიც, რომელიც აქაღურ ენაზე დაწერილ ტექსტებს შეიცავდა (ეს არქივი ცნობილი გახდა 1887 წლიდან).

ყველა ამ ფაქტიდან ჩანდა, რომ „ხათი“ საღდაც ჩრდილოეთში, როგორც ზოგიერთი მეცნიერი უკვე ვარაუდობდა, მცირე აზიაში, მდებარეობდა და ძლიერ სამეფოს წარმოადგენდა. მაგრამ იმხანად სათანადო ლოგიკური კავშირი ვერ იბმებოდა ამგვარ დასკვნასა და მოგვიანო ხანის (ძვ. წ. I ათასწლეულის) ასურული წყაროების მონაცემებს შორის: ამ უკანასკნელთა თანახმად, „ხათი“ მდ. ეფრატის დასავლეთით, ჩრდილოეთ სირიისა და აღმოსავლეთ ანატოლიის მოსაზღვრე რაიონებში მდებარეობდა (იგივე აჩვენა ურარტული წყაროების გაშიფვრამაც, როდესაც გაირკვა, რომ „ხათი“ მდ. ეფრატის დასავლეთით იყო საქმზნი).

მიუხედავად ამისა, გასული საუკუნის 80-იან წლებში უკვე გამოჩნდა ნაშრომები, რომლებშიც გამოითქვა ვარაუდი ხეთების არსებობისა მცირე აზიაში (მაგალითად, ა. სეისის ნაშრომი „ხეთები მცირე აზიაში“, ლონდონი, 1880 წ.; უ. რაიტის წიგნი „ხეთების იმპერია“, ლონდონი, 1884 წ.), საღაც ხეთები თითქოს ნელ-ნელა გავრცელებულან ჩრდილოეთ სირიიდან. ასე რომ, ხეთური პრობლემა XX ს-ის დასაწყისამდე საბოლოოდ მინც ვერ გადაიჭრა. ეს მოხერხდა მხოლოდ ჰ. ვინკლერის გათხრების შემდეგ ბოლაზქოიში.

### ჟგო ვინკლერი ბოლაზქოიში

„გერმანიის აღმოსავლური საზოგადოების“ მხარდაჭერით ჰ. ვინკლერმა არქეოლოგიური გათხრები ბოლაზქოიში 1906 წელს დაიწყო საკმაოდ მძიმე პირობებში (ადგილობრივი კლიმატური პირობები, შეზღუდული თანხები, მუშახელის ნაკლებობა, სათანადო ტექნიკური აღჭურვილობის უქონლობა და ა. შ.). მისი თანაშემწე იყო თურქი მაკრიდი ბეი.

3. ვინკლერის აღმოჩენებმა ბოლაზქოიში ყოველგვარ მოლოდინს გადააჭარბა — გამოძხეურებულ იქნა ათასობით ლურსმული ფირფიტა და ფრაგმენტი, რომელთა ერთი ნაწილი შედგენილი იყო სპეციალისტებისათვის უკვე კარგად ცნობილ აქადურ (ასურულ-ბაბილონურ) ენაზე.

3. ვინკლერი გათხრების პროცესშივე შეუდგა ამ ენაზე დაწერილი ფირფიტების კითხვას და მისთვის აშკარა გახდა, რომ აღმოჩენილი ლურსმული არქივი ეკუთვნოდათ იმ ხეობებს, რომლებიც ძვ. წ. II ათასწლეულში, თელ-ამარნას ფირფიტებისა და ეგვიპტური იერო-გლიფური წარწერების ხანაში ცხოვრობდნენ მცირე აზიაში, რომ ხეობები თავიანთ ქვეყანას „ხათის“ უწოდებდნენ და რომ ბოლაზქოის ადგილას მათი დედაქალაქი უნდა ყოფილიყო. სენსაცია გამოიწვია ფარაონ რამსეს II-სა და ხეობების მეფე ხათუსილი III-ს შორის დადებულმა, აქადურ ენაზე შედგენილმა საზავო ხელშეკრულების ტექსტის პოვნამ, რადგან მისი ეგვიპტური ვარიანტი კარგა ხანია ცნობილი იყო ბოლაზქოიდან დაახლოებით 2000 კმ-ით დაშორებული კარნაკის ტაძრის ერთ-ერთი წარწერიდან ძველ ეგვიპტურ ენაზე.

3. ვინკლერის აღმოჩენა მიაკუთვნეს არქეოლოგიის ისტორიის ისეთ დიდ სასწაულთა რიცხვს. როგორც იყო პ. შლიმანის მიერ ტროას მიგნება, ა. ლეიარდის მიერ ლეგენდარული მონადირის — ნიმროდის (ქართული ბიბლიის „ნებროთის“) ქანდაკების პოვნა და ჯ. სმი-თის მიერ ნინევიაში გილგამეშის განთქმული ეპოსის ტექსტის დაკარგული ფრაგმენტების აღმოჩენა.

3. ვინკლერი იმთავითვე ვარაუდობდა, რომ ბოლაზქოის არქივის ლურსმული ფირფიტების დიდი ნაწილი, რომელთა ენას ამ აღიარებულმა და ნაცადმა ასირიოლოგმა ვერაფერი გაუგო, შედგენილი იყო ახლად აღმოჩენილი ცივილიზაციის შემქმნელი ხალხის ენაზე. ეს ვარაუდი სულ მალე ბრწყინვალედ დადასტურდა, მაგრამ არა პ. ვინკლერის დახმარებით.

ბოლაზქოის არქივის ამ უცნობ ენაზე შედგენილი ფირფიტების წაკითხვა მაშინვე შეეძლო ყველა ასირიოლოგს, რადგან ტექსტები დაწერილი იყო აქადური ლურსმული დამწერლობის ნიშნებით, რომლებსაც 1857 წლიდან — ასირიოლოგიის დაბადების დღიდან — სპეციალისტები შეუტყობლად კითხულობდნენ. აღნიშნული ტექსტების ცალკეული ასლების გამოქვეყნების შემდეგ მკვლევართაგან ვერავინ მოახერხა გაეშიფრა ტექსტების ენა, გამოველინა მისი ხასიათი, მით უმეტეს, მიეკუთვნებინა იგი მონათესავე ენათა ამა თუ იმ ჯგუფისადმი. ზოგიერთი მკვლევრის (მაგ., ი. კნუდსონის) გამოთქმულ ვარაუდს ინდოევროპული ენებისადმი მისი მიკუთვნების შესახებ მეცნიერული საზოგადოებრიობა, განსაკუთრებით, ინდოევროპეისტები, მტრულად

შეხვედნენ, რადგან მაშინ ვერ წარმოედგინათ ასე უძველეს ხანებში რომელიმე ინდოევროპული ენის, ისიც აზიაში, არსებობა. მაგრამ ყველა მათგანს „ფარ-ხმალი დააყრევინა“ ბ. პროზნიმ, რომლის აღმოჩენამ მთელი მსოფლიოს მეცნიერული საზოგადოება აალაპარაკა...

**ბადრუხ პროზნის ეპოქალური აღმოჩენა:**

„...და აურს შევაპთ, ხოლო წყალს დაღვით“

ჩვენი საუკუნის დასაწყისის ეპოქალური აღმოჩენის გმირი, რომელსაც ახლა სრულიად სამართლიანად გვერდში უყენებენ ფრანსუა შამპოლიონს, გახლდათ 36 წლის ჩეხი ასირიოლოგი, იმდროინდელი სამეცნიერო ასირიოლოგიური წრეებისათვის უკვე კარგად ცნობილი მკვლევარი, ვენის უნივერსიტეტის ექსტრაორდინალური პროფესორი ბედრუხ პროზნი. აღმოჩენა მკიდროდ იყო დაკავშირებული თანამედროვე თურქეთის სოფელ ბოლაზქოიში მიკვლეულ დიდ ლურსმულ არქივთან.

ბ. პროზნის ოფიციალურად მხოლოდ 1913 წელს, ჰ. ვინკლერის გარდაცვალების შემდეგ, შესთავაზეს ბოლაზქოის არქივის ტექსტების დამუშავება. მანამდე იგი, გაეცნო რა ტექსტების ასლებს, ვარაუდობდა, რომ მათ ენას თვით დიდი ჰ. ვინკლერი უპოვნოდა „გასაღებს“, თუმცა მისი კარგა ხნის დუმილი დიდად აოცებდა ბ. პროზნის.

ჯერ კიდევ ვენის უნივერსიტეტის ბიბლიოთეკაში ბიბლიოთეკარის თანამდებობაზე მუშაობის დროს გამოვლინდა ბ. პროზნის დაუოკებელი მისწრაფება ძველი საზოგადოებების საიდუმლოთა ამოცნობისადმი. უცხო ენების შესწავლის ფენომენალური ნიჭით დაჯილდოებული, იგი ვენაში წარმატებით სწავლობს სემიტურ ენებს და 1905 წლის ოქტომბერში საჯაროდ კითხულობს „სემიტური ენების პრივატდოცენტის“ წოდების მისაღებად სავალდებულო შესავალ ლექციას. როგორც ცნობილი ჩეხი ირანისტი იან რიბკა იხსენებდა, ამ ლექციას დაესწრო ვენის უნივერსიტეტის სტუდენტთა ერთი ჯგუფი, რომელთაგან მოგვიანებით გამოჩენილი მეცნიერები დადგნენ: თვით ი. რიბკა — ჩეხოსლოვაკიის მეცნიერებათა აკადემიის აკადემიკოსი, ექტორ ზრისტიანი — ვენის უნივერსიტეტის პროფესორი — ასირიოლოგი, ჰარი ტორჩინელი — იერუსალიმის უნივერსიტეტის პროფესორი-სემიტოლოგი და სარგის კაკაბაძე — ცნობილი ქართველი ისტორიკოსი, თბილისის სახელმწიფო უნივერსიტეტის პროფესორი.

კომბინატორული ანალიზის ბრწყინვალე ნიჭის მქონე ბ. პროზნი, რომელიც 1914 წლისათვის თავისუფლად ფლობდა აქადურ, არამეულ, არაბულ, ეთიოპურ, ებრაულ, სპარსულ, ძველ ეგვიპტურ ენებს, სანს-



კრიტს, ბერძნულსა და ლათინურს, ისევე როგორც რამდენიმე ევროპულ ენას, ბოლაზჟოის ლურსმული ტექსტების უცნობი ენის გაშიფვრის დასაწყისში ვარაუდობდა, რომ ამ ტექსტების ენა, შესაძლოა, რომელიმე სემიტური ან კავკასიური ენა ყოფილიყო. მაგრამ ტექსტების ასლების დიდი ნაწილის შესწავლის პროცესში მან უყოყმანოდ შეცვალა თავისი მოსაზრება, რადგან მის წინ გადაიშალა საოცარი და თანაც დამაჯერებელი სურათი: ბოლაზჟოის ტექსტების უცნობი ენა აშკარად ინდოევროპული იყო!

ამას ადასტურებდა ცალკეული სიტყვები თუ მარტივი წინადადებანი, ზმნის უღლებისა და სახელის ბრუნების ნიშნები, მიმღეობის ფორმები თუ ნაცვალსახელები. პირველი წინადადება, რომელიც მან გამართულად წაიკითხა, გვატყობინებდა: „... და პურს შეჰკამთ, ხოლო წყალს დაღევთ“, სადაც სიტყვები „წყალი“, „დაღევა“, „ჰკამა“ კარგად ცნობილი ინდოევროპული სიტყვები იყვნენ. თითქოს ჯაჭვური რეაქციის ძალით ნათელი მოეფინა სხვადასხვა შინაარსის გაბმულ ტექსტებს. ირკვეოდა, რომ ამ ლურსმული ტექსტების შემდგენლები თავიანთ ენას უწოდებდნენ არა „ხეთურს“, როგორც ეს სახელი უცნობ ენას შეარქვეს მეცნიერებმა, არამედ „ნესურს“ („ნესიტურს“), იმავე „ქანესურს“, რაც წარმოდგებოდა მცირეაზიული ქალაქის — ნესას (=ქანესის) სახელწოდებისაგან (ამიტომაც იყო, რომ მოგვიანებით მოითხოვდნენ კიდევ „ხეთური ენის“ შეცვლას „ნესურიით“, ანდა „ქანესურიით“, რაც არ გაიზიარა მკვლევართა უმრავლესობამ და ხეთოლოგები კვლავ ტრადიციას მიჰყვნენ); მათ დედაქალაქს ერქვა „ხათუსა“, ხოლო ქვეყანას, როგორც პ. ვინკლერი სწორად კითხულობდა აქადურ ტექსტებში, „ხათი“. თვითსახელწოდებად გამოიყენებოდა ამ უკანასკნელი ტერმინისაგან წარმოქმნილი „ხათის ქვეყნის ხალხი“, ანდა „ძენი ხათისა“ (შდრ. ბიბლიის „ძენი ქეტისნი“).

ამგვარად, ნაპოვნი იყო ის „ჯადოსნური გასაღები“. რომლის წყალობითაც ბ. პროზნიმ „გაალო“ დიდი საიდუმლოების კარი. თავისი კვლევის წინასწარი შედეგები 33 გვერდზე მან 1915 წლის 24 ნოემბერს გააცნო „წინა აზიის შემსწავლელ ბერლინის საზოგადოებას“ (იმახანად ბ. პროზნი სამხედრო მოსამსახურე იყო). სწორედ ამ დღეს უწოდა გამოჩენილმა ასირიოლოგმა ერნსტ ვაიდნერმა „ხეთოლოგიის დაბადების ჰუმბარიტი დღე“. ბ. პროზნის მოხსენების გამოქვეყნებისთანავე ცნობილმა ოტო ვებერმა ხეთური პრობლემა გადაწყვეტილად გამოაცხადა, ხოლო ძველი აღმოსავლეთის აღიარებულმა ისტორიკოსმა ედუარდ მაიერმა ბ. პროზნის აღმოჩენა კაცობრიობის უდიდეს აღმოჩენათა რიცხვს მიაკუთვნა. 1917 წელს ბ. პროზნიმ გერმანულად გამოაქვეყნა წიგნი „ხეთების ენა“, სადაც საფუძვლიანად იყო დამტკიცებული ხეთურის ინდოევროპული ხასიათი.

ასე ჩაეყარა საფუძველი ძველადმოსავლური მეცნიერების სრულიად ახალ დარგს — ხეთოლოგიას, რომელიც ამჟამად სწავლობს კაცობრიობის ცივილიზაციის ერთ-ერთი უძველესი კერის შემქმნელთა — ხეთების ისტორიას, ენას, კულტურას, რელიგიასა და სამართალს ძვ. წ. II ათასწლეულის „ხეთებიდან“ დაწყებული ძვ. წ. I ათასწლეულის „ხეთებამდე“, ე. ი. ხეთური ანუ ლუვიური იეროგლიფური, გვიან ასურული და ურარტული ლურსმული ტექსტებისა და ბიბლიაში მოხსენიებულ „ხეთებამდე“. მეცნიერების ამ დარგის შესწავლა 20-იანი წლებიდან დღემდე წარმოებს მსოფლიოს სხვადასხვა ქვეყანაში, მათ შორის საბჭოთა კავშირში, რომელსაც 1936 წელს ესტუმრა თვით ხეთოლოგიის პატრიარქი.

ბ. ჰროზნი თბილისსაც ეწვია. მოგვიანებით ჩეხურ ჟურნალ „პრაჰა-მოსკოვაში“ გამოქვეყნდა ბ. ჰროზნის აღფრთოვანებული მოგონებები საბჭოთა კავშირში მოგზაურობის შესახებ. მათი ერთი ნაწილი შემოკლებით დაიბეჭდა მოსკოვში „ვესტნიკ დრევენეი ისტორიის“ ფურცლებზე. ჩეხურ ენაზე გამოქვეყნებულ მოგონებებში ბ. ჰროზნი საკმაოდ დიდ ადგილს უთმობდა საქართველოში ყოფნის დღეებს, იხსენებდა თბილისის სახელმწიფო უნივერსიტეტისა და საკავშირო მეცნიერებათა აკადემიის საქართველოს ფილიალის გამოჩენილ მეცნიერებთან და სტუდენტებთან შეხვედრებს, მათთან კამათს. იგი აღუფრთოვანებია მცხეთას, რომლის დათვალიერების დროს ბ. ჰროზნის თან ხლებია დოცენტი გ. გოზალიშვილი — ამჟამად პროფესორი, ძველი ისტორიის ცნობილი მკვლევარი. ბ. ჰროზნი გაკვირვებით წერდა, თუ როგორ უცენიათ იგი „პრაედასა“ და „იზვესტიაში“ მის შესახებ გამოქვეყნებული ცნობების წყალობით თბილის-ერევნის მატარებლის ქართველ გამცილებელსა და სევანის ტბაზე ხომალდის სომეხ კაპიტანს, თან დასძენდა, საბჭოთა კავშირის მოსახლეობის ფართო ფენები უკეთესადაა ინფორმირებული ხეთოლოგიურ აღმოჩენათა შესახებ, ვიდრე მსოფლიოს სხვა რომელიმე ქვეყნის მცხოვრებნიო.

პროფ. ბ. ჰროზნის თბილისში ჩამოსვლამ დიდი ინტერესი გამოიწვია ჩვენ სამეცნიერო და საზოგადოებრივ წრეებში. ამ მოვლენას გამოეხმაურნენ „კომუნისტი“ და „ზარია ვოსტოკა“, რომლებმაც გამოაქვეყნეს აკად. ს. ჭანაშვიას საყურადღებო სტატია ხეთების ისტორიისა და ხეთური ენის საკითხებთან დაკავშირებით. ქართველი მეცნიერის პირად არქივში შემოინახა ს. ჭანაშვიასადმი გაგზავნილი ბ. ჰროზნის სამადლობლო წერილი (1936 წ. 29 დეკემბრით დათარი-

ლებული), რომელშიც „ხეთოლოგიის მამა“ იმედს გამოთქვამდა საბჭოთა მეცნიერებთან მომავალი შეხვედრების თაობაზე\*.

ხეთოლოგიის პატრიარქის თბილისში ჩამოსვლამ გარკვეულად შეუწყო ხელი საქართველოში ხეთოლოგიის განვითარებას, რაც კარგად გამოჩნდა 50-იანი წლებიდან, როდესაც საქართველოში დაიწყო ახალგაზრდა ხეთოლოგთა მომზადება. ნიშანდობლივია, რომ 1979 წლის მაისში, როდესაც პრალაში, იუნესკოს დადგენილების შესაბამისად, ილდესასწაულეს ბ. პროზნის დაბადების 100 წლისთავი, ხეთოლოგთა საერთაშორისო სიმპოზიუმზე მიწვეული იყვნენ ქართველი მეცნიერებიც, მათ შორის აკად. გ. მელიქიშვილი, რომელსაც სტუდენტობის დროს მოუსმენია ბ. პროზნის ლექცია თბილისში.

პრალის სახელმწიფო უნივერსიტეტმა, რომლის რექტორი იყო ბ. პროზნი ჩეხოსლოვაკიის ისტორიის ყველაზე მწარე განსაცდელის— ფაშისტური ოკუპაციის ემს (1939 წ.), და ჩეხოსლოვაკიის მეცნიერებთა აკადემიამ სახელოვნად უმასპინძლეს სიმპოზიუმის სტუმრებს, რომლებიც მსოფლიოს სხვადასხვა ქვეყანაში განაგრძობენ ბ. პროზნის მიერ დაწყებულ დიდ საქმეს. ბ. პროზნის მშობლიურ ქალაქ ლაბას ლისაში, სადაც ახლაც კოპწიად გამოიყურება სახლი, დიდი მეცნიერი რომ დაიბადა, მოწყობილია პატარა მუზეუმი, ბ. პროზნის ცხოვრებისა და შემოქმედების ამსახველი. ჩეხმა ხალხმა თავის სახელოვნ მამულიშვილს ქალაქში (ლაბას ლისაშია ბ. პროზნის საფლავიც) დაუდგა მემორიალი, რომელზედაც ლურსმულ-ხეთურად და ჩეხურად აწერია: „...და პურს შექამთ, ხოლო წყალს დაღევთ“. სწორედ ამ სიტყვების ამოკითხვამ, როგორც ზემოთ აღინიშნა. მისცა დაუღალავ მკვლევარს ის „ჯადოსნური გასაღები“, რომლითაც მან „გააღო“ დიდი საიდუმლოების კარი — ამოიცნო ხეთების სახელმწიფო არქივის ტექსტთა ენა. ბ. პროზნისათვის „პური“ და „წყალი“ გახდა იმ შორს მიმავალი და ფართო გზის საწყისი, რომელსაც ახლა ადგანან მსოფლიოს ხეთოლოგები.

ქართველი საზოგადოებრიობის ინტერესი მცირე აზიისადმი, კერძოდ, ხეთებისადმი — სავსებით გასაგებია: ხეთების სამეფო ჩამოყალიბდა და საუკუნეები იარსება სწორედ ქართველურ ტომთა უძველესი ჯანსაზღვრების მეზობლად (სამხრეთ-დასავლეთიდან). თავიანთი ძლიერების ხანაში ხეთების პოლიტიკურ გავლენაში მოექცა მთელი მცირე აზია და მის მეზობლად მდებარე მრავალი რაიონი, რომელთაც განიცადეს ხეთური კულტურის გავლენაც. ამ რეგიონთა რიცხვს მიე-

---

\* წერლის შინაარსი 1977 წ. გავაცნო აკად. ს. ჭანაშიას ვერუილმა, აწ განსვენებულმა ლაშა ჭანაშიამ, რომელიც დიდი მადლიერების გრძნობით, თანაც უსაზღვრო გულსიტყვილით, მინდა აქ მოვიხსენიო.

კუთვნიება სამხრეთ ამიერკავკასიისა და შავი ზღვის სამხრეთ-აღმოსავლეთ კუთხეში მდებარე ცალკეული ოლქები, რომლებიც ძველთაგანვე ქართველური წარმოშობის ტომებით იყვნენ დასახლებული. მცირეაზიულ, განსაკუთრებით, ხეთურ სამყაროსთან ქართველური ტომების ისტორიული, ენობრივი და კულტურული უტყუარი კონტაქტების გამოსავლინებლად ახლა იღვწიან ქართველი ისტორიკოსები, ენათმეცნიერები, არქეოლოგები.

## ხათური ეთნოსი და ხათის ძვეყანა

ანითას დროს შექმნილმა ქუსარა-ნესას სამეფომ (დაახლოებით ძვ. წ. 1750 წ.), მიუხედავად დიდი დაპყრობებისა ცენტრალურ ანატოლიაში და მის მეზობელ რაიონებში, როგორც ჩანს, დიდხანს ვერ იარსება. ანითას შემდგომ ქუსარის სამეფო პოლიტიკური და ეკონომიკური დაკნინების გზას უნდა დასდგომოდა, რაც გამოწვეული უნდა ყოფილიყო სხვადასხვა მიზეზით: აღარ ხორციელდებოდა დიდი მასშტაბის დაპყრობები, უფრო მეტიც, ქუსარას უნდა გასდგომოდნენ ანითას დროს შემოერთებული რაიონები (ხათი, ფურუსხანდა. ნესა/ქანესი და სხვანი), აღარ ხერხდებოდა სამხრეთ-აღმოსავლეთისაკენ და აღმოსავლეთისაკენ მიმავალი სავაჭრო და სამხედრო გზების გამოყენება, ხურიტების გააქტიურებას აღმოსავლეთ ანატოლიასა და ჩრდილოეთ სირიაში, ისევე როგორც უცხო ვაჭართა გაჭრობას, უნდა შეეწყვიტა კალის იმპორტი ანატოლიაში და ა. შ.

სწორედ ამ პერიოდს ცენტრალური ანატოლიისა უწოდებენ „ბნელ ხანას“. იგი თითქმის მთელ საუკუნეს გაგრძელდა (დაახლოებით ძვ. წ. 1720—1650 წწ.), მაგრამ არცერთ ძველადმოსავლურ წერილობით წყაროში არ აისახა, არქეოლოგიური მასალაც თითქმის არაფერს იძლევა მის შესახებ. არადა, ამ „ბნელ ხანაში“ ზოგიერთი დიდი მნიშვნელობის მოვლენაც უნდა მომხდარიყო. მაგალითად, სემიტის ვაჭრების მცირე აზიიდან ერთიანად წასვლის შემდეგ უნდა დასრულებულიყო რეგიონის ორი მთავარი ეთნოსის — არაინდოევროპელი ხათებისა და ინდოევროპელი ნესიტი ტომების შერევა-შეჯვარდინების პროცესი და ჩამოყალიბებულიყო ხეთური ეთნოსი; აღნიშნული პერიოდის ბოლოს პოლიტიკური და სხვა ხასიათის ურთიერთობათა ცენტრად კვლავ უნდა გამხდარიყო ქუსარა, ნესიტ ტომთა უძველესი კერა, დაახლოებით ძვ. წ. 1650 წლისათვის უნდა ჩამოყალიბებულიყო ხეთების სამეფო — მომავალში დასავლეთ წინა აზიის ერთერთი ძლიერი სახელმწიფო. მაგრამ სანამ მის პოლიტიკურ ისტორიას მიმოვიხილავთ, მანამ გავარკვიოთ რა არის ხეთური ეთნოსი და როგორია ხეთური გეოგრაფიის პრობლემა.

ხეთური ეთნოსის ჩამოყალიბების პრობლემა არსებითადაა დაკავშირებული ცენტრალური მცირე აზიის ავტოქთონურ ხათურ (პროტოხეთურ) მოსახლეობასა და უძველესი დროიდანვე მასთან მჭიდრო კონტაქტებში მყოფ ინდოევროპულ ეთნიკურ ჯგუფებს შორის არსებულ ურთიერთობებთან (ამაზე უკვე ზემოთ ვილაპარაკეთ). ახლა უკვე დადგენილია, რომ ცენტრალურ მცირე აზიაში მცხოვრებ ხათურ ტომებთან ინდოევროპელი (ნესური) ტომების მშვიდობიანი თანა-არსებობის შედეგად, რაც საუქუნეები გაგრძელდა, ხათური ენა „შთანთქა“ ნესიტურმა, რომელმაც თავის მხრივ განიცადა გარკვეული ცვლილებანი ფონეტიკაში, ლექსიკაში, მორფოლოგიაში. ასევე შეიძლება ითქვას, რომ ხათური რელიგიაც „შთანთქა“ ნესიტურმა — ნესიტური პანთეონი გამდიდრდა ხათური წარმოშობის ღმერთებით, ხათური რელიგიური რიტუალები სრულდებოდა მოვეიანებითაც, განიცადეს რა მათ უმნიშვნელო ცვლილებები ნესიტური რიტუალების გათვალისწინებით, ნესიტების რელიგიურ დღესასწაულთა დიდი ნაწილი წარმოშობით ხათური იყო და ა. შ. ნესიტურმა საზოგადოებამ შეითვისა და განავითარა ხათური საზოგადოებისათვის დამახასიათებელი არაერთი სოციალური თუ სხვა სახის მოვლენა. ზემოაღნიშნული ორი ეთნოსის შერევა-შეჯვარდინების პროცესში ცენტრალურ მცირე აზიაში ჩამოყალიბდა ხეთური ეთნოსი, ხეთების სახელმწიფოს შემქმნელი, რომელმაც მთლიანად აითვისა ხათების კულტურული ტრადიციები.

ხათური ეთნოსი, როგორც ცალკე ეთნიკური ჯგუფი, ხეთების სახელმწიფოს არსებობის პერიოდში ცენტრალურ ანატოლიაში უკვე არსად ჩანდა. შემორჩა მხოლოდ ხათური ლიტერატურული ენა, ისიც ხათურ რელიგიურ ტექსტებში და ცალკეულ ხათურ-ხეთურ ბილინგვებში ფიქსირებული. ხათების მემკვიდრეებად ზოგჯერ მიიჩნევენ ხეთების ჩრდილო-აღმოსავლეთით (პონტოში) მცხოვრებ ქასქების ტომებს, თუმცა ეს ვარაუდი დღეისათვის მხოლოდ ჰიპოთეზად რჩება.

უშუალო ტერიტორიული კონტაქტები ხეთებს ჰქონდათ ეთნიკურად მათ ახლომონათესავე ინდოევროპულ ფალაელებთან — ფალას ქვეყნის მცხოვრებლებთან (ცენტრალური მცირე აზიის ჩრდილოეთში, ან ჩრდილო-აღმოსავლეთში). ნესიტების მსგავსად, ფალაელებიც ხათებით დასახლებულ ტერიტორიაზე უნდა განსახლებულიყვნენ, რადგან მათმა ენამაც (ისევე როგორც რელიგიამ და კულტურამ) განიცადა ხათურის გარკვეული გავლენა (როგორც ჩანს, ამ შემთხვევაშიც ადგილი ჰქონდა ფალაურისა და ხათური ენების შერევა-შეჯვარედი-

ნების პროცესს, რომელიც დასრულდა ფალაური ენის გამარჯვებით, „შთანთქა“ რა ხათური).

ხეთების სამხრეთით და სამხრეთ-დასავლეთით გადაჭიმული იყო ლუვიელების ქვეყანა. ეთნიკურად ლუვიელებიც ხეთების ახლო მონათესავენი იყვნენ. მათ თითქმის არ განუტლიათ ხათების უშუალო გავლენა. რასაც ადასტურებს მონაცემები ლუვიური ენისა, რომელსაც არ გააჩნია ხათიზმები. მოგვიანებით ლუვიურმა სამყარომ დიდი გავლენა მოახდინა ხეთებზე, განსაკუთრებით, მათ რელიგიასა და კულტურაზე.

აღმოსავლეთიდან ხეთებს ემეზობლებოდნენ ხურიტები, რომლებიც მდ. ეფრატის დასავლეთით უკვე ღრმად იყვნენ შექრილი აღმოსავლეთ ანატოლიაში და, როგორც ჩანს, ხურიტების დასახლებებსაც ქმნიდნენ. ხურიტების აქტიურობა ამ რეგიონში ძალზედ ზღუდავდა ხეთების პოლიტიკური ძლიერების ზრდას, რის გამოც ხათის სამეფოს შექმნის დროიდან ხეთებს ხშირად უხდებოდათ ხურიტებთან შეტაკება არა მარტო აღმოსავლეთ ანატოლიაში, არამედ ანატოლიის სამხრეთ-აღმოსავლეთში, ჩრდილოეთ სირიის მეზობლად, სადაც ხურიტების გავლენა ძალზედ იგრძნობოდა. ხურიტებმა გარკვეული გავლენა მოახდინეს ხეთების რელიგიაზე და ხეთურ კულტურაზე.

ხეთების სამხრეთ-აღმოსავლეთით, ჩრდილოეთ სირიაში. კვლავ დასავლელი სემიტები ბატონობდნენ. მართალია, ისინი ხეთების უშუალო მეზობლები არ იყვნენ, მაგრამ ხეთების ურთიერთობა მათთან ფართოვდებოდა.

ხეთურ ეპოქაში მცირე აზიაში ცხოვრობდა აგრეთვე სხვადასხვა ტომი თუ ხალხი, რომელთა ეთნიკური ვინაობა ჭერჭერობით უცნობია. მაგალითად, ჩრდილო-აღმოსავლეთი ანატოლია (პონტო) დასახლებული იყო ზემონახსენები ქასქების ტომებით, რომლებთანაც ხეთებს ძირითადად მტრული ურთიერთობა ჰქონდათ. ქასქებს ზოგჯერ განიხილავენ როგორც ანატოლიის ერთ-ერთ ადრეულ მკვიდრთ, რაც ჭერჭერობით არ მტკიცდება, თუმცა ასევე დაუმტკიცებელია მეორე ვარაუდიც, რომლის მიხედვით ქასქები თითქოს მოგვიანო ხანებში დასახლებულან ანატოლიაში. დღეისათვის ამჟამად, რომ ისინი ხეთებისაგან განსხვავებულ ეთნიკურ ჯგუფს ქმნიდნენ. ხეთების სამეფოს ჩრდილო-აღმოსავლეთითა და აღმოსავლეთით მდებარე ტერიტორია დაკავებული იყო აგრეთვე სხვადასხვა ტომებით. ჭერჭერობით დაბეჭდვით არ ხერხდება არც მათი ეთნიკური ვინაობის გარკვევა. ხურიტების გარდა, ანატოლიის აღნიშნულ რაიონში უნდა ეცხოვრათ ინდოევროპული (ეს განსაკუთრებით ითქმის ხაიასას ქვეყნის მცხოვრებთა მიმართ, რადგან ხაიასას მიიჩნევენ როგორც სომეხთა პირველ-საცხოვრისს) და ქართველური წარმოშობის ტომებს (იხ. ქვემოთაც).

ხეთური ლურსმული ტექსტების მონაცემებით, ხეთების გეოგრაფიული თვალსაწიერი მაშინდელი ცივილიზებული სამყაროს საზღვრებით შემოიფარგლებოდა.

ჩრდილოეთით მათთვის არსებობდა მხოლოდ „ცალფას ზღვა“ — შავი ზღვა, რომლის ჩრდილოეთით მდებარე ტერიტორია ხეთებისთვის „ტერა ინკოგნიტა“ იყო. შავი ზღვა, ისევე როგორც ხმელთაშუა ზღვა, ხეთების მიერ გამოუყენებელი უნდა ყოფილიყო ნაოსნობისათვის, რადგან ისინი ზღვაოსნობას არ მისდევდნენ (წყაროებში იშვიათად იხსენიება „ხომალდები“ ზღვასთან დაკავშირებით).


ხეთებისათვის ცნობილი ყველაზე შორეული ადგილი სამხრეთით იყო ეგვიპტე (შესაძლოა, უფრო სამხრეთით მდებარე ქუში).

დასავლეთით მდებარე ყველაზე შორეული პუნქტი მათთვის უნდა ყოფილიყო ახიავა, რომელიც საძებნია მცირე აზიის უკიდურეს დასავლეთში, ან მიკენურ საბერძნეთში. უფრო დასავლეთით გადაჭიმული ტერიტორია ევროპის კონტინენტისა ხეთების გეოგრაფიულ არეში, წერილობითი წყაროების მონაცემებიდან გამომდინარე, არ შედიოდა.

რაც შეეხება აღმოსავლეთს, ხეთების თვალსაწიერი ამ მიმართულებით ბაბილონის აღმოსავლეთით მდებარე ელამამდე აღწევდა (შესაძლოა, უფრო შორსაც).

აღქმული ჰქონდათ თუ არა ხეთებს, რომ მათი ქვეყანა მდებარეობდა უზარმაზარ ნახევარკუნძულზე, რომელსაც სამი მხრიდან ზღვა ერტყა, ჩვენ არ ვიცით. როგორც ხეთური საისტორიო მწერლობის წყალობით გახდა ცნობილი, ხეთებს წარმოდგენა ჰქონდათ მხოლოდ მათ მეზობლად მდებარე ორ ზღვაზე — შავზე და ხმელთაშუაზე, რაც დასტურდება სიტყვებით: ხეთების მეფე ლაბარნამ „ამ მხრიდან (ხათის) საზღვრად ზღვა ქმნა და იმ მხრიდან (ქვეყნის) საზღვრად ზღვა ქმნა“. ასეთ შემთხვევაში „ამ მხრიდან“ და „იმ მხრიდან“ თანამედროვე ტერმინოლოგიით ტოლია „ჩრდილოეთისა“ და „სამხრეთისა“ (ან პირუქუ). მათ ჩრდილოეთით მდებარე ზღვას, როგორც უკვე აღვნიშნეთ, „ცალფას ზღვას“ ეძახდნენ, რადგან უშუალოდ ხათის ქვეყანასა და შავ ზღვას შორის „ცალფას ქვეყანა“ მდებარეობდა (ეს სულ ახლახან გაირკვა). როგორც ჩანს, ხეთები იცნობდნენ რომელიღაც სხვა „ზღვასაც“, საიდანაც „მზე ამოდიოდა“, ე. ი. აღმოსავლეთით მდებარე რომელიღაც (ანდა დიდ ტბას, რადგან ხეთურად „ზღვა“ და „ტბა“ ერთი სიტყვით აღინიშნებოდა — „არუნა“). მაგრამ სად იყო იგი — უცნობია. მკვლევრებმა გამოიკვსეს კასპიის ზღვა.





מצרים  
ירדן  
סוריה  
לבנון  
ירושלים  
פלשתינה  
ירדן  
עיראק  
טורקיה  
איראן  
פקיסטן  
הודו

მიუხედავად ხეთოლოგიაში მოპოვებული დიდი წარმატებებისა ხეთური გეოგრაფიის არაერთი საკითხი, კერძოდ, თვით ხეთების ამ თუ იმ დასახლებული პუნქტისა და „ქვეყნის“ ზუსტი ლოკალიზები! საკითხი პრობლემატურია. საბოლოოდ დადგენილია მხოლოდ რამდენიმე გეოგრაფიული ერთეულის ადგილმდებარეობა: ხეთების დედაქალაქი ხათუსა თანამედროვე ბოლაშქოის ადგილას იყო. 1925 წ. ბ. პროზნიმ გათხრების შემდეგ მიაკვლია ქანესს, ანუ იმავე ნესას — კაისერის ახლოს მდებარე ბორცვ ქიულთფევს. თანამედროვე მაშათ-პუიუქი (ზილესთან ახლოს) ყოფილა ხეთური წყაროების თაფიქა (თაფიგა), სადაც ათიოდე წლის წინ აღმოჩნდა სასასლე ხეთურ ენაზე შედგენილი ლურსმული ტექსტების მცირე არქივით (ნაპოვნია სულ 114 წარწერა). ექვს არ იწვევს აღასიას გაიგივება კუნძულ კვიპროსთან. მდ. ყიზილ-ირმაკს (კლასიკური ხანის ჰალისი) ხეთურად მარასანთა, მარასანთია ერქვა, ხოლო მდ. ეფერატს — მალა. ადგილმდებარეობა ხეთების ისეთი დიდი რელიგიური ცენტრებისა, როგორც იყვნენ არინა, ნერიქი, ციფლანთა — დაუდგენელია (საძებნია ხათუსას ჩრდილოეთით ან ჩრდილო-აღმოსავლეთით). მხოლოდ ვარაუდობენ, რომ ხეთური წყაროების ანქუვა (ამქუვა) თანამედროვე ალიშარ-პუიუქის ადგილას მდებარეობდა, ხოლო თავინია იყო კლასიკური ხანის თავიუმი, თუვანუვა — თიანა, ხუფისნა — კიბისტრა, გაციურა (გაზიურა) — გაზიურა, ხაქმისა — ამასია, ქუმახა — კემახი, ანცილია (ანზილია) — ზილე და ა. შ. ვარაუდით, ხეთური წყაროების მიღვანთა შეიძლება იყოს კლასიკური ხანის მილეტი, თარუისა — ტროა, ვილუსა — ილიონი (იგივე ტროა). დასახლებული გეოგრაფიული ერთეულების ადგილმდებარეობიდან ამოღიან ხეთური გეოგრაფიის სხვადასხვა პუნქტის ლოკალიზების დროს.

ხეთების მეზობელი ქვეყნები ჩვენთვის კარგადაა ცნობილი მათი სახელწოდებების მიხედვით, მაგრამ მათი ზუსტი ადგილმდებარეობის დადგენა დღესაც არ ხერხდება.

ხეთების სამხრეთით და სამხრეთ-დასავლეთით გადაჭიმულ ტერიტორიაზე განივრცობოდა ლუვია (იგივე არცავა), რომელიც, როგორც ზემოთ ითქვა, ხეთების მონათესავე ლუვიელებით იყო დასახლებული. ჩრდილოეთით თუ ჩრდილო-აღმოსავლეთით ასევე მათი მონათესავენი — ფალაელები ცხოვრობდნენ ფალას ქვეყანაში. ხურის — ხურიტების ძირითადი ტერიტორია ხეთებს ემეზობლებოდა, ერთი მხრით, აღმოსავლეთიდან (მდ. ეფერატის შუა დინებასთან), ხოლო მეორე მხრით, სამხრეთ-აღმოსავლეთიდან — ჩრდილოეთ სირიის მხრიდან, საიდანაც იწყებოდა დასავლელი სემიტი ტომების ძირითადი ტერიტორია. კილიკიის ტერიტორია ეკავა ქიუვათნას.

(ქიკვათნას), სადაც ლუვიური და ხურიტული წარმოშობის ტომები ცხოვრობდნენ (ნესიტებთან ერთად). ასე რომ, ამ რეგიონში საუკუნეების მანძილზე მეზობლობდა ძველი წინა აზიის სამი უდიდესი ეთნოსი — ინდოევროპული, ხურიტული და დასავლურ-სემიტური.

ხეთების აღმოსავლეთით, მდ. ეფრატის მარცხენა მხარეში, დაწყვილებული ქვეყნის — აცისა და ხაიასას ტერიტორიაა საქმენი. დღემდე მკვლევრები ვერ შეთანხმებულან აცი-ხაიასა ვანის ტბასთან მოათავსონ, თუ მისი ტერიტორია შავ ზღვას მიუახლოვონ (ხეთური წყაროების მონაცემებით, აცის მთავარი ქალაქი — არიფსა „ზღვასთან“ იყო).

ზემოთ უკვე აღინიშნა, რომ მცირე აზიის ჩრდილო-აღმოსავლეთში ცხოვრობდნენ ხეთების მეზობლები და მათი დაუძინებელი მტრები — ქასქები (ქაშქები). ხეთების მეფეებს მრავალრიცხოვანი ლაშქრით არაერთხელ ულაშქრიათ ანატოლიის ამ რეგიონის ვრცელ ტერიტორიაზე (განსაკუთრებით, შავი ზღვის სამხრეთ და სამხრეთ-აღმოსავლეთ სანაპიროებისაკენ, ისევე როგორც მდ. ქოროხისა და ზემო ეფრატის, იმავე ყარა-სუს რაიონებისაკენ), ქასქების არაერთი დასახლებული პუნქტი („ქალაქი“) და „ქვეყანა“ აღოხრებიათ, მათზე ხარკი დაუქისრებიათ და ხეთებისათვის მეომარი რაზმების მიწოდებაც დაუვალბიათ. ყოველივე ამის წყალობით, მრავალი მათგანის სახელწოდებაა შემონახული ხეთურ წყაროებში. მაგრამ, როგორც ჩანს, ხეთების ლაშქარი არ შეჭრილა ძალზედ ღრმად ზემოაღნიშნულ ტერიტორიაზე, სადაც ძველთაგანვე მდებარეობდნენ ქართველურ ტომთა პოლიტიკური და ეთნიკური გაერთიანებანი — მ უ შ ქ ა ი ა/მ უ შ ქ უ (მოგვიანო ხანის მოსხები), დ ა ი ა ე ნ ი ანუ დიაუხი (მოგვიანო პერიოდის ტაო), კ უ ლ ხ ა (კოლხიდა) და სხვანი, რომელნიც ხეთების სამეფოს დაცემისთანავე და მის მომდევნო ხანებში (ძვ. წ. XII—IX სს.) გამოდიან ისტორიის ასპარეზზე (ასურული, ლუვიური იეროგლიფური და ურარტული წყაროების მიხედვით). მხოლოდ ამით უნდა აიხსნას ის, რომ ეს სახელწოდებანი არ ჩანან დღეისათვის ცნობილ ხეთურ ლურსმულ ტექსტებში. ხეთების ჩრდილო-აღმოსავლეთით მდებარე ტერიტორიაზე მოსათავსებელი გეოგრაფიული პუნქტების ზუსტი ლოკალიზება, რაც მომავალში, ალბათ, განხორციელდება. უფრო ნათლად წარმოაჩენს ჩვენთვის საინტერესო რეგიონის გეოგრაფიას.

ხეთურ-ქაშქურული ლექსიკონი პარალელურად

ზემოაღნიშნულ პრობლემებთან უშუალოდაა დაკავშირებული ქართველური და ინდოევროპული ენების კონტაქტების საკითხი, რა-

საც მკვლევარები კარგა ხანია აქცევენ ყურადღებას. ამ მხრივ ძალზედ საგულისხმოა ხეთური ენის მონაცემები: ანატოლიურ ხეთურ (ნე-სიტურ, ლუვიურ, ფალაურ) და ქართველურ ენებში ვლინდება არსებითი, ზედსართავი და რიცხვითი სახელების ზოგიერთი ბრუნების ნიშნის მსგავსება ან სრული იდენტურობა (განსაკუთრებით შდრ. მხოლოებითი და მრავლობითი რიცხვის მოქმედებითი ბრუნვის ფორმანტი ხეთურში -ით და ქართვ., ენების -ით(ა),-თ); ხეთური ზმნის აწმყო დროის მხოლოდობითი რიცხვის პირველი და მეორე პირის დაბოლოებანი -მი, -ში(-სი) ბგერითი შემადგენლობით გავს ან იდენტურია ქართველურ ენათა მხოლოდობითი რიცხვის პირის ნაცვალსახელებისა „მე“, „შენ“, ხოლო ხეთური ზმნის მრავლობითი რიცხვის პირველი და მეორე პირის დაბოლოებანი -ვენი, -თენი გარკვეულ მსგავსებას იჩენს ქართველური ენების მრავლობითი რიცხვის პირველი და მეორე პირის ნაცვალსახელებთან „ჩვენ“, „თქვენ“ (შდრ. აგრეთვე კუთვნილებითი ნაცვალსახელები ქართველურ ენებში „ჩვენი“ და „თქვენი“). ყურადღასაც აგრეთვე ხეთური ზმნის წარსული დროის მრავლობითი რიცხვის პირველი და მეორე პირის დაბოლოებანი -ვენ, -თენ და ქართველური პირის ნაცვალსახელები „ჩვენ“, „თქვენ“; საინტერესო სურათს იძლევა ინდოევროპულ-ხეთურ-ქართველური ლექსიკური პარალელები: ხეთ. „ესხარ“ — ქართვ. „სისხლი“; ხეთ. „ისთამანა“ („ყური“) — ქართვ. „(მო)სმენა“; ხეთ. „კარდ“ („გული“) — ქართვ. „მკერდი“; ხეთ. „გიმმნათარია“ („გამოზამთრება“, შდრ. რუს. „ზიმა“) — ქართვ. „ზამთარი“; ხეთ. „სუფფი“ („წმინდა“) — ქართვ. „სუფთა“; ხეთ. „ველლუ“ („მდელი“) — ქართ. „ველი“; ხეთ. „ვიანა“ — ქართვ. „ღვინო“; ხეთ. „დუდდუმილი“ („ჩუმაღ, ფარულად“) — ქართვ. „დუმილი“, ხეთ. „აქუ“ — ქართვ. „ქუა/ქვა“ და სხვა მრავალი.

როგორც ჩანს, ამ მსგავსებათა და პარალელთა ძირითადი ნაწილი საერთო ქართველურში განსახილველია როგორც უძველესი ინდოევროპული ნასესხობანი, რომლებიც არ განეკუთვნებიან ანატოლიურ ინდოევროპულ ენათა ხანას (სავსებით დასაშვებია მათი მიკუთვნება საერთო ქართველურ, საერთო ინდოევროპულ და საერთო სემიტურ ურთიერთობათა პერიოდისადმი). მათი გარკვეული ნაწილი კი, ჩვენი აზრით, წარმოადგენს სწორედ ისეთ მსგავსებებსა და ლექსიკურ პარალელებს, რომელთაც ადგილი უნდა ჰქონოდათ მრავალსაუკუნოვანი კონტაქტების შედეგად ან ხეთურსა და ქართველურ (საერთო ქართველურ) ენებს შორის არაუადრეს ძვ. წ. II ათასწლეულისა, ანდა საერთო ანატოლიურსა და საერთო ქართველურ ენობრივ ერთეულებს შორის ძვ. წ. III ათასწლეულის მანძილზე. ქართველურ ტომთა გან-

სახლების ძირითადი უძველესი კერები, რომელთა შესახებ ზემოთ იყო  
საუბარი, სამხრეთ-დასავლეთიდან ემეზობლებოდნენ სწორედ ანატო-  
ლიურ ინდოევროპულ ენობრივ თუ კულტურულ საწყაროს. ინდოევ-  
როპელთა თანდათან გავრცელება მცირე აზიის ჩრდილოეთსა და  
ჩრდილო-აღმოსავლეთში კი, როგორც ზემოთ აღინიშნა, დამაჯერებ-  
ლადაა დადასტურებული ხეთური ლურსმული ტექსტების მონაცე-  
მებით.

## ხათის გამორჩენა წინა აზიის კოლიტიკურ ასპარეზზე. ხეთების „ძველი სამეფო“

ძვ. წ. 1650 წლისათვის იწყება ქუსარის კვლავ აღორძინება, რამაც განაპირობა იმ სამეფოს წარმოქმნა, რომელსაც „ხეთების სამეფოს“ ვუწოდებთ. ხეთური წერილობითი ტრადიციის თანახმად, ქუსარა იყო ინდოევროპელი ნესიტი ტომების პოლიტიკური ცენტრი მცირე აზიაში. მოგვიანო ისტორიული ტრადიციაც ხეთების ისტორიის ადრინდელ პერიოდს უკავშირებს ქუსარას, მაგრამ იგავე ტრადიცია ხეთების სახელმწიფოს ფუძემდებლად მიიჩნევს არა ანითას (ან მამამისს — ფითხანას, ანდა ქუსარასთან დაკავშირებულ სხვა პიროვნებებს), არამედ ქუსარის მმართველ ლაბარნა I-ს, რომელიც ანითასაგან მთელი საუკუნითაა დაშორებული და დაახლოებით ძვ. წ. 1650 წლისათვის გამეფდა ქუსარაში, როდესაც უკვე ჩამოყალიბებული იყო ხეთური ეთნოსი. ამიტომაცაა, რომ მკვლევარნი სწორედ აქედან იწყებენ ხეთების სამეფოს ისტორიას, მანამდე არსებულ პერიოდს მიაკუთვნებენ რა ხეთების წინარე ხანას. ლაბარნადან იწყება, თანამედროვე მეცნიერთა ტერმინოლოგიით, ხეთების „ძველი სამეფო“, რომელსაც მოგვიანებით მოჰყვა ხეთების „შუა“ და „ახალი“ სამეფოები.

„ჰეჰანა კი ჰატარა იყო...“

ხეთების „ძველი სამეფოს“ ისტორიის არაერთი მომენტი ასახულია ამავე სამეფოს უკანასკნელი მმართველის — თელიფინუს შედგენილ ერთ-ერთ ტექსტში. იგი ძირითადად სამეფო ტახტის მემკვიდრეობის მოწესრიგებას ეხება, მაგრამ მასში დატულია უტყუარი ცნობები „ძველი სამეფოს“ ცალკეულ მმართველთა საქმიანობის, პოლიტიკური ისტორიის, საზოგადოების სოციალურ-ეკონომიკური მდგომარეობის შესახებ.

სამეფოს პირველ მმართველად „თელიფინუს ტექსტში“ დასახელებულია ლაბარნა, „დიდი მეფე“. მის დროს „ძენი მისი, ძმანი-

მისი, და მოყვასნი მისი, ბვისტომნი მისი და ლაშქარი მისი გავრთონებული (ერთობით) იყვნენ. ქვეყანა კი პატარა იყო. მაგრამ საითაც იგი სალაშქროდ წავიდოდა, მტრის ქვეყანას (ძლიერი) ხელით ამარცხებდა. და (მტრის) ქვეყნებს ანადგურებდა და (ამ) ქვეყნებს ასუსტებდა, იგი მათ ზღვის საზღვრებად ქმნიდა. ხოლო როდესაც იგი ლაშქრობიდან უკან ბრუნდებოდა, თითოეული მისი ძეთაგანი რომელიმე (ამ) ქვეყანაში მიდიოდა: ხუფისნაში, თუვანუვაში, ნენასაში, ლანდაში, ცალარაში, ფარსუხანდაში, (ან) ლუსნაში და ისინი (ე. ი. უფლისწულნი) (ამ) ქვეყნებს მართავდნენ ხოლმე. დიდ-დიდი ქალაქებიც ასევე (მათი) მორჩილნი იყვნენ“.

მოტანილი ნაწყვეტიდან კარგად ჩანს, თუ როგორ დაიწყო „პატარა ქვეყნის“ ზრდა: სამეფო გვარის, დიდებულთა და ლაშქრის ერთსულოვნებით, რაც შესაძლებელი იქნებოდა მხოლოდ მეფის ხელისუფლების გაძლიერების პირობებში, ლაბარნა შეუდგა თავისი ქვეყნის საზღვრების გაფართოებას. იგი ძალითა და იარაღით იმორჩილებს „ქვეყნებს“ და „დიდ-დიდ ქალაქებს“. ტექსტში დასახელებული გეოგრაფიული პუნქტების მიხედვით თუ ვიმსჯელებთ, მათი ნაწილი ქუსარას მეზობლად მდებარეობდა, ნაწილი კი — მცირე აზიის სამხრეთსა და ჩრდილოეთში, ზღვების მიმართულებით. თავიდანვე მიექცა ყურადღება დაპყრობილი „ქვეყნებისა“ და „ქალაქების“ მართვა-გამგეობასაც: მათ სამართავად იგზავნებოდნენ უფლისწულნი, რომლებიც განიხილებოდნენ როგორც „პატარა მეფენი“. ლაბარნას დროს ქუსარამ მიაღწია ისეთ ძლიერებას, რომელიც საფუძველი გახდა ხეთების მრავალი წარმატებისა „ძველი სამეფოს“ ხანაში, როდესაც ქუსარის „პატარა ქვეყნიდან“ ხათი გადაიქცა მძლავრ სახელმწიფოდ მთელს დასავლეთ წინა აზიაში.

ალალანი, ხალაფი, ბაგილონი და სხვანი

ლაბარნას შემდეგ ქუსარაში გამეფდა ხათუსილი I, იგივე ლაბარნა II. მაგრამ მალე მან, სტრატეგიული მოსაზრების გამო, სამეფო ცენტრი ქუსარიდან გადაიტანა ხათუსას, რომელიც (ხათის ქვეყანასთან ერთად) ან ხათუსილიმ კვლავ შემოიმტკიცა, ანდა იგი ლაბარნას მეფობიდან ემორჩილებოდა ქუსარას. ამ ქალაქის სახელწოდებიდან წარმოსდგება თვით მეფის სახელი — „ხათუსილი“ (რაც „ხათუსელს“ ნიშნავს), რომელიც შესაძლოა, მას უნდა დაერქმეოდა ხათუსაში გადმოსახლებასთან დაკავშირებით.

სწორედ ამ დროიდან გახდა ხათუსა ხეთების დედაქალაქი, რომელმაც ხეთების სახელმწიფოს დაცემამდე იარსება. ხოლო სახელ-

წოდება „ხათი“ ხეთების მთელი სამეფოს აღმნიშვნელად გადაიქცა. ამიერიდან ქესარამ დაკარგა თავისი მნიშვნელობა.

„ძველი სამეფოს“ ადრეულ მმართველთა ფართო დაპყრობითი საგარეო პოლიტიკა მიმართული იყო. პირველ რიგში, მცირე აზიის ცალკეულ პოლიტიკურ გაერთიანებებზე — ხათის ქვეყნის ბატონობის დამყარებისაკენ. ამას წარმატებით ახორციელებდა არა მარტო ხათუსილი I, არამედ მისი მომდევნო მეფე მურსილი I (იგი უკვე ხათუსაში გამეფდა). ეს პოლიტიკა მიზნად ისახავდა ხეთების გავლენის გავრცელებას მცირე აზიის ფარგლებს გარეთაც. ამ პერიოდში ხეთების ყურადღება მიპყრობილი იყო ორი დიდი რაიონისაკენ — ჩრდილოეთ სირიისაკენ, სადაც მაშინდელი ახლო აღმოსავლეთის ერთ-ერთი მძლავრი სამეფოთაგანი — ხალფი (ალემო), იგივე იამხადი, მდებარეობდა და, ხურის ქვეყნისაკენ, რომელმაც კარგა ხანია იწყო ექსპანსია მდ. ეფრატის მარჯვენა მხარეში.

სწორედ ამ ხანებში მოხდა ერთი მეტად საყურადღებო მოვლენა, რამაც მნიშვნელოვნად განაპირობა ხეთების წარმატებანი საგარეო პოლიტიკაში, გააფართოვა რა მათი საომარი მოქმედების ასპარეზი. ეს იყო ცხენიანი საბრძოლო ეტლის გამოჩენა, რომელმაც უდიდესი როლი შეასრულა სამხედრო საქმეში არა მარტო ხეთებთან, არამედ ახლო აღმოსავლეთის სხვა ხალხებშიც. ამ პერიოდისათვის ხეთებს უნდა ჰყოლოდათ კარგად ორგანიზებული ლაშქარიც.

დიდი ინტერესები ჰქონდათ ხეთებს ჩრდილოეთ სირიაში, რომლისათვის ბრძოლამ საჭირო გახადა მცირე აზიის სამხრეთ-აღმოსავლეთ კუთხეში მდებარე გზების დაუფლებაც (ამით კალის ექსპორტის საკითხიც გადაიჭრებოდა). ხეთების მისწრაფება სირიისაკენ გამოწვეული იყო ამ ქვეყნის სტრატეგიული მდებარეობით, ქვეყნის მატერიალური სიმდიდრით და ა. შ.

ჩრდილოეთ სირიისათვის ბრძოლა დაიწყო ხათუსილი I-მა, რომელმაც თავისი მეფობის დასაწყისშივე ილაშქრა აღნიშნული მხარის ერთ-ერთ ძლიერ სამეფოში — ალალახში (თანამ. თელ-აჟანა). ხათუსილიმ დიდი ხნის ალყის შემდეგ შეძლო ქ. ურშუს (ხეთ. ვარსუვას) დამორჩილებაც. მან წარმატებით დაამთავრა ბრძოლა ქ. ხაშუსათვის (ხეთ. ხასუვა) და დაამარცხა ჩრდილოეთ სირიის კიდევ სხვა პოლიტიკური გაერთიანებანიც. ამასთანავე იგი წარმატებით აწარმოებდა ბრძოლებს თვით მცირე აზიაში, დაიმორჩილა რა არცაჟა, ულმა, სანახვითა და ხათუსას ჩრდილოეთით მდებარე ცალფა (ცალფუვა). ყოველივე ეს აისახა ხათუსილის შედგენილ სხვადასხვა ტექსტში, განსაკუთრებით, მის „ანალებში“ (შემოინახა ამ წყაროს ორივე ვარიანტი: აქადური და ხეთური). ერთ-ერთ მის ტექსტში ძველ ხეთურ ენაზე, ხათუსილის მთავარი დაპყრობების შესახებ ასეა გადმოცემუ-



ლი: „კაცმა ქ. ცალფუვა(დან) მამის (—იგულისხმება თვით ხათუსილი) სიტყვა უკუაგდო. აი იგი, ცალფა! კაცმა ქ. ხასუვა(დან) მამის სიტყვა უკუაგდო. და აი იგი, ხასუვა! ასევე, კაცმა ქ. ხალფუვა(დან) მამის სიტყვა უკუაგდო. ხალფაც (ხალფიც) განადგურდება!“

მართლაც, ხათუსილიმ შეუტია ხალფას (იამხადს), რომლის მეფე იარიმლიმ III მანამდეც იღებდა მონაწილეობას ხეთების საწინააღმდეგო კოალციაში (ხასუვასთან). მაგრამ ხათუსილიმ ხალფას წინააღმდეგ ბრძოლა ბოლომდე ვერ მიიყვანა, თუმცა მან ეს სამეფო საკმაროდ დაასუსტა. ხალფის განადგურება შეძლო მხოლოდ მისმა მემკვიდრემ მურსილი I-მა, რასაც შედეგად მოჰყვა ამ სამეფოს დამოუკიდებლობის დაკარგვა.

ამის შემდეგ მურსილი გაემართა შორეულ ბაბილონს, რომელსაც სამსუღითანა მართავდა. ეს ქალაქი მან მიწასთან გაასწორა და ნადავლით ხათუსაში გამობრუნდა. სწორედ ამ ლაშქრობის დროს მოელო ბოლო ბაბილონის I დინასტიას, რაც უნდა მომხდარიყო დაახლ. ძვ. წ. 1595 წლისათვის. ხალფსა და ბაბილონში ლაშქრობისას მურსილიმ ხურიტებიც გაანადგურა. „თელიფინუს ტექსტი“ ამ მოვლენებს ლაკონურად ასე გადმოსცემს: „იგი (ე. ი. მურსილი) ხალფას გაემართა და ხალფა დაანგრია, ხოლო ხალფას ნამრა (=დებორტირებულები) და მისი ავლა-დიდება ხათუსაში ჩამოიტანა. შემდგომად (ამისა) კი იგი ქ. ბაბილონს გაემართა და ბაბილონი დაანგრია. ხურიტების რაზმებსაც შეებრძოლა. ბაბილონის ნამრა და ავლა-დიდება ხათუსას ჩამოიტანა“.

ხათუსილისა და მურსილის ზემოაღნიშნულმა ლაშქრობებმა დიდი გავლენა იქონიეს ახლო აღმოსავლეთის პოლიტიკურ მოვლენათა მსვლელობაზე. მურსილის გამარჯვებამ ხალფში საფუძველი ჩაუყარა ხეთების ბატონობას ჩრდილოეთ სირიაში. ამ ხანებიდან ჩრდილოეთ სირიის საკითხი ყოველთვის იდგა ხეთების საგარეო პოლიტიკაში. სწორედ ამან გამოიწვია დიდი წინააღმდეგობანი ხათსა და ეგვიპტეს შორის „ახალი სამეფოს“ დროს.

მურსილის გამარჯვებამ ბაბილონზე, როცა 300-წლიანი ბატონობის შემდეგ დაეცა ბაბილონის I დინასტია, ხელი შეუწყო კასიტების მიერ ხელისუფლების ჩაგდებას ბაბილონში.

ამ სამხედრო ოპერაციებს დიდი მნიშვნელობა ჰქონდათ თვით ხეთებისათვის: ამიერიდან ხათი ჩადგა ახლო აღმოსავლეთის დიდ სახელმწიფოთა რიგში. უფრო მეტიც, ხათუსილი-მურსილის დროს ხათი გადაიქცა ძლიერ სამხედრო ძალად, რომელსაც წინ ვერ აღუდგნენ მაშინდელი წინა აზიის ისეთი ქვეყნები, როგორც იყვნენ ხალფი (იამხადი) და ბაბილონი.

შეიქმნა აზიის სამხრეთ-აღმოსავლეთი რაიონების დაპყრობისა და ჩრდილოეთ სირიაში ლაშქრობების დროს დაიწყო ხეთებისა და ხურიტების საომარი შეტაკებანიც. ამავე პერიოდთან იწყება აგრეთვე ხურიტების შემოსევა ხათში და აღმოსავლეთი რაიონების აოხრება.

ხათუსილი-მურსილის ხანისათვის ხურიტები უკვე ჩანან ევფრატის დასავლეთით მდებარე ქვეყნებში, განსაკუთრებით, ჩრდილოეთ სირიაში, სადაც ისინი იჭრებოდნენ თანდათანობით, უმეტესწილად, მშვიდობიანი გზით. ხურიტები იყვნენ ალააზში, ხალაფში, ურშუში, ხაშუში და სხვაგან, რომელთა წინააღმდეგ ხეთებს უხდებოდათ გალაშქრება ადგილობრივი სემიტი მოსახლეობის წინააღმდეგ. ამიტომ ჩრდილოეთ სირიისათვის ბრძოლა განსახილველია როგორც ნაწილი ხურიტებთან შეტაკებებისა, მით უმეტეს, რომ ამ ბრძოლების დროს ზოგჯერ ხურიტების რაზმებიც გამოდიოდნენ მოკავშირეთა დასახმარებლად.

ხურიტების შემოსევა ხათის ქვეყანაში ხათუსილი I-ის დროიდან დაიწყო. მისი მეფობის მეოთხე წელს, როდესაც ხეთების ლაშქარი მეფეს არცაეაში ჰყავდა წაყვანილი, ხურიტები შეიჭრნენ ხათის აღმოსავლეთ ნაწილში. ამით ისარგებლეს მტრის სხვა ქვეყნებმაც და, როგორც ჩანს, მათთან ერთად ააოხრეს ხათის ტერიტორია, თვით ხათუსას გამოკლებით. მათ უნდა დაერბიათ ქუსარა, რაც უნდა გამხდარიყო ერთ-ერთი მიზეზი იმისა, რომ ხათუსილი გადასულიყო ხათუსაში, რომელიც ამიერიდან ხეთების დედაქალაქი გახდა. ხეთებმა უკუაგდეს ჩრდილოეთ მესოპოტამიიდან, კერძოდ, ხანიგალბათიდან მოსული ხურიტები.

ზოგჯერ ხურიტები ჩრდილოეთ სირიის მხრიდან უტევდნენ ხეთებს, რომლებიც დიდხანს იბრძოდნენ მცირე აზიის სამხრეთ-აღმოსავლეთ კუთხეში, სახელდობრ, ქიუუვათნაში (კილიკიაში) მდებარე სტრატეგიული მნიშვნელობის პუნქტების დამორჩილებისათვის. ხურიტების მოქმედების ზონა ამ რაიონში თანდათან ფართოვდებოდა, რაც იწვევდა ხეთებთან შეტაკებას.

ხურიტები ხათის ქვეყანას შეესივნენ მურსილი I-ის მომდევნო მეფის — ხ ა ნ თ ი ლ ი ს დროს, როცა კვლავ ააოხრეს აღმოსავლეთი პერიფერია. „თელიფინუს ტექსტშიც“ თავისებურად აისახა მათი გამოჩენა ხათის ქვეყანაში: „...ხურის რაზმები, მელიები, რომლებიც ჭაგნარში შეჰყარეს, გაჰყვიროდნენ. [ხური-მტერი] ხათის ქვეყანაში მოვიდა და...“. ხეთებმა განდევნეს ხურიტები. სწორედ ამ ხანებში დატრიალდა სუქციაში ამბები, რომლებიც შესაძლოა ხურიტებთანაა

დასაკავშირებელი: სუქციის დედოფალი შეიპყრეს და მის ვაჟიშვილებთან ერთად დახოცეს.

მტრული კონტაქტების მიუხედავად, „ძველი სამეფოდან“ დაწყებული ხეტები განიცდიდნენ ხურიტების მძლავრ გავლენას, რაც განსაკუთრებით აისახა რელიგიაში, კულტურაში (იხ. ქვემოთ).

„მსახურთა ჩამთა გვარი, და,  
პრთიანი იჟოს ვითარცა მგლისა!“

ძველი სამეფოს მთელს მანძილზე მძაფრი ბრძოლა მიმდინარეობდა სამეფო ხელისუფლების განმტკიცებისათვის. ეს გამოწვეული იყო იმით, რომ ადრეულ ხანებში მეფის ხელისუფლებას საგრძნობლად ზღუდავდა სახალხო კრება — ფანქუ, რომელსაც დიდი ფუნქციები ეკისრა.

თავდაპირველად იგი აერთიანებდა ყველა მამაკაცს, ვისაც კი იარაღის ტარება შეეძლო. შემდგომში სახალხო კრებაში შემაჯავალ პირთა წრე საკმაოდ შეიზღუდა, როგორც ჩანს, დიდგვარიანთა უმაღლესი ფენების წარმომადგენლებით. პირველ ხანებში მხოლოდ მას ჰქონდა უფლება დაენიშნა ტახტის მემკვიდრე, განეგო სასამართლო თუ სხვა საქმენი. ლაბარნას დროიდან იწყება ბრძოლა სამეფო ხელისუფლების გაძლიერებისათვის. ამ დროიდან მეფე ატარებს ხათური წარმოშობის ტიტულს „თაბარნა“, ზოგჯერ „ლაბარნა“. ეს უკანასკნელი ტერმინი იხმარებოდა აგრეთვე ახალგაზრდა ტახტის მემკვიდრის აღსანიშნავად. მეფესთან ერთად დიდ როლს თამაშობდა დედოფალი, რომელიც, აგრეთვე, ხათურ ტიტულს „თავანანას“ ატარებდა (ამავე ტიტულით აღინიშნებოდა, როგორც წესი, ტახტის მემკვიდრის დედა საერთოდ, იყო იგი დედოფალი, თუ არა).

სამეფო ხელისუფლების განმტკიცებისათვის საჭირო იყო. პირველ რიგში, სამეფო გვარის ერთიანობის დაცვა, რაც ყოველთვის როდი ხერხდებოდა. უკვე ხათუსილი I-ის დროიდან სამეფო გვარის წარმომადგენელთა შორის ჩნდება ბზარი, სამეფო ტახტზე ასცლასთან დაკავშირებული.

ტახტის მემკვიდრის შერჩევის პროცესში განსაკუთრებით გართულებულა მდგომარეობა ხათუსილისა და „თავანანას“ შორის (დღემდე გაურკვეველია. ეს „თავანანა“ ლაბარნას დროინდელი „თავანანა“ იყო, თუ ხათუსილის მეუღლე — ხათის დედოფალი). „თავანანა“ მეფის სურვილის წინააღმდეგ წასულა და რაღაც „ბოროტება ჩაუდენია“ ტახტის ერთ-ერთ მემკვიდრესთან, ხათუსილის ვაჟიშვილთან დაკავშირებით, რისთვისაც იგი მეფეს მკაცრად დაუსჯია. ხათუსილის სახე-

ლით შედგენილ ერთ-ერთ ძველ ხეთურ ტექსტში იმხანად შექმნილი მდგომარეობა ასეა გადმოცემული:

„...აწ და მარადის: თავანანას [სახელი] არავინ თქვას! მის ძეთა [სახელი არავინ თქვას!] სახელი მათი არავინ თქვას! თუ (ჩემს) ძეთაგან [ვინმე იტყვის—] ყელი მისი გამოჰრან და იგი (დამნაშავე) მის ჰიშკარზე ჩამოჰკიდონ! თუ ჩემს მსახურთა შორის მათ სახელს ვინმე იტყვის — დაე, იგი ჩემი მსახური არ იყოს! ყელი მისი გამოჰრან და იგი მის ჰიშკარზე ჩამოჰკიდონ! ... თქვენი — მსახურთა ჩემთა — გვარი, დაე, ერთიანი იყოს ვითარცა მგლისა!... თუ ჩემს სიტყვებს დაიცავთ და აგრეთვე ჩემს ქვეყანას დაიცავთ, (მაშინ) კერაში ცუცხლს გააღვივებთ. თუ არა და, თუკი ჩემს სიტყვებს დაარღვევთ, მაშინ კერაში ცუცხლს ვერ გააღვივებთ. და იგი მოვა, [ხათუსას] გველი შემოეხვევა...“

მდგომარეობა იქამდე გამწვავებულა, რომ ხათუსილის მიუმართავს ფანქუსადმი. სწორედ ამასთან დაკავშირებით შეიქმნა ძველი ხეთური ლიტერატურის თვალსაჩინო ნიმუში, ე. წ. „ხათუსილის ანდერძი“ (აქადურ და ხეთურ ენებზე).

ანდერძი წარმოადგენს უკვე ავადმყოფ მეფე-თაბარნას მიმართვას ფანქუსადმი — მეომრებისა და დიდებულთა საკრებულოსადმი, რომელსაც ხათუსილი უხსნის საქმის ვითარებას: ადრე მას დაუსახელებია ტახტის მემკვიდრე, როგორც ჩანს, თავისი დისწული (იგი უნდა ეშვილა ხათუსილის), რადგან საკუთარ შვილს (ხუციას). ვითარცა ქ. თაფასანდას მმართველს (ისევე როგორც ქალიშვილს) გაუცრუებია მამის იმედები — მეფის მოწინააღმდეგე ძალებს აპყოლია. მაგრამ დისწულსაც, რომლის დედას (ე. ი. საკუთარ დას) ხათუსილი უწოდებს „გველს“, ჩაუდენია რაღაც მეფის საწინააღმდეგო „ბოროტება“ და მეფეს მისთვის წაურთმევია უფლება ტახტზე ასვლისა. ამას გაუმწარებია დედა, რომელსაც ხათუსილი ზემომოყვანილ ტექსტში „თავანანას“ უწოდებს.

ხათუსილიმ ფანქუს წარუდგინა ტახტის მემკვიდრის ახალი კანდიდატურა — მურსილი, როგორც ვარაუდობენ. თავისივე შვილიშვილი (ხათუსილის ისიც უნდა ეშვილებინა). მან ფანქუს მოსთხოვა, ეცნო არასრულწლოვანი მემკვიდრე ტახტისა, მოევლოთ მომავალი მეფისათვის. მის ირგვლივ შემოკრებილიყვნენ („დაე, გვარა თქვენი იყოს ერთიანი ვითარცა მგლისა! დაე, მასში მტრობა აღკვეთილიყოს!“). ხათუსილიმ მოუწოდა თავის „უპირველეს ქვეშევრდომთ“, აღასრულონ მისი სიტყვები, რაც ხათუსას აღზევების პირობა იქნებოდა.

მართალია, ფანქუმ მიიღო ხათუსილის თხოვნა. რაც იქიდან ჩანს, რომ ხათუსილის შემდეგ ხათუსაში მართლაც გამეფდა მურსილი I, მაგრამ სამეფო ტახტისათვის ბრძოლა მომავალში ამით არ შენელებულა.

ლა. პირიქით, მომდევნო ხანებში იგი გამძაფრდა. მხოლოდ „ძველი-სამეფოს“ დასასრულს — თელიფინუს დროს დადგინდა ტახტის მემკვიდრეობის წესი. ადრეულ ხანებში კი მეფეს უფლება ჰქონდა მხოლოდ და მხოლოდ დაესახელებინა ტახტის მემკვიდრის კანდიდატურა, რომელსაც სახალხო კრება დაამტკიცებდა ან უარყოფდა. მურსილის დროსვე ხათუსაში იწყება „ბოროტი საქმენი“, რაც თელიფინუმდე გაგრძელდა. ამ „საქმეთა“ პირველი მსხვერპლი თვით მურსილი გახდა.

„ნახმ, ხათუსაში სისხლი მომრავლდა“

„ძველი სამეფოს“ ხანაში, როგორც ვარაუდობენ, სამეფო ტახტზე ასვლის მკაცრად დადგენილი წესი (განსაკუთრებით, მამიდან შვილზე ტახტის გადაცემისა) არ არსებობდა. ტახტის ძირითადი კანდიდატები, მართალია, მაინც უფლისწულები იყვნენ, მაგრამ თუკი მოახერხებდნენ, ტახტზე აქვლა შეეძლოთ მეფის შვილიშვილებს, მეფის დისწულს, მისი დის ქმარს (სიძეს) ან ქალიშვილის ქმარს, ასევე სიძეს (ხათუსილი I კი თავანანას ძმისწული იყო). ამიტომაც იყო, რომ ტახტზე ასვლის პრეტენდენტები ხშირად მიმართავდნენ უზურპაციას და თავიდან იცილებდნენ ტახტის მემკვიდრეთა ყველაზე უფრო საშიშ მებრძოლებს — უფლისწულებს. ასეთ შემთხვევებში უზურპატორები აღარ იწვევდნენ ფანქუს, რადგან ეს უკანასკნელი არ მოიწონებდა. იმათ მოქმედებას, ვინც ძალით იგდებდა ხელში სამეფო ტახტს.

უზურპაციის პირველი მსხვერპლი გახდა მურსილი I — „ხანთილი მწღე (მერიქიფე) იყო, მას ხარაფსეკი, მურსილის და. ცოლად ჰყავდა. ციდანთა (ფარულად) შეუთანხმდა ხანთილის და მათ ბოროტი საქმე ჩაიდინეს: მურსილი მოკლეს, მისი სისხლი დაღვარეს“ — აღნიშნულია „თელიფინუს ტექსტში“. ამ მკვლელობის შედეგად ხათის მეფე გახდა ხანთილი, მურსილის სიძე (დის ქმარი), რომელსაც სამხედრო წარმატებანი არ მოუპოვებია. „საითაც წაეიდოდა (საბრძოლველად), (ის) ქვეყანა განუდგებოდა: აშთათა, სუქცია, ხურფანა, ქარგამიში ხათის ქვეყანას დამხმარე [რაზმებს აღარ] უგზავნიდნენ...“ — მოგვითხრობს იგივე „თელიფინუს ტექსტი“. ამ დროისათვის ხანთილი უკვე ხანშესული უნდა ყოფილიყო, იგი მალე გარდაიცვალა.

მისი გარდაცვალებისთანავე ახალი სისხლი დაიდგარა: „და როდესაც ხანთილი მოხუცდა და ღვთაებად გახდომა იწყო, ციდანთამ ფისენი, ხანთილის ძე, მის ვაჟიშვილებთან ერთად მოკლა. მისი უპირველესი მსახურნიც დახოცა. ახლა ციდანთა გამეფდა“ — დასძენს ჩვენთვის საინტერესო ტექსტი.

მკრამ ღვთაებებს „უთხოვიათ“ ფისენის, ხანთილის ძის, სისხლზე შურისძიება და „ღვთაებებმა მას (ე. ი. ციდანთას) მტრად ამუნა, ძე მისი, მოუვლინეს. და მან მოკლა ციდანთა, მამა თვისი. ახლა ამ უნა გამეფდა“. მას ბევრი ქვეყანა მტრად გახდომია, მის ლაშქრობებს წარმატებანი არ მოჰყოლია.

ამუნას „ღვთაებად გახდომის“ (გარდაცვალების) შემდეგ უზურპაციის ახალი ფაქტი გამოვლინდა: ფარულად გაუსწორდნენ ამუნას მემკვიდრეებს — უფლისწულებს, სამეფო ტახტის ყველაზე საშიშ კანდიდატებს და „ახლა ხუცია გამეფდა“.

როგორც ჩანს, ეს უკანასკნელიც უზურპაციის მსხვერპლი უნდა გამხდარიყო: იმის მომიზეზებით, რომ ხუციამ თითქოს მოინდომა საკუთარი დის — ისთაფარიას და სიძის — თელიფინუს მოკვლა. ამ უკანასკნელმა დაასწრო (მას შემდეგ, რაც „ხუციას ზრახვა ცნობილი გახდა“) და ხუცია, ალბათ, თავიდან მოიცილა, თვითონ კი „მამაჰისის ტახტზე დაჯდა“ (ხუცია სრულიადაც არ იყო თელიფინუს მამა, იგი მხოლოდ თელიფინუს წინა მეფე იყო. ამ „წინა მეფეს“ მომდევნო მეფე „მამას“ ეძახდა). ამგვარად, უზურპატორის როლში გამოდის მეფე თელიფინუსი, რომელთანაც დაკავშირებულია ხათის ძლიერების აღდგენა „ძველი სამეფოს“ დასასრულს.

თელიფინუს გამეფების შემდეგ გრძელდებოდა სამეფო გვარის წარმომადგენელთა მიმართ „ბოროტების ჩადენა“. ამას თან დაერთო ისიც, რომ გარდაიცვალნენ დედოფალი ისთაფარია და უფლისწული ამუნა. სწორედ ამ ხანებში ამბობდნენ „ღვთის კაცი“ (ტაძრის მსახურნი): „ნახე, ხათუსაში სისხლი მომრავლდა!“ („თელიფინუს ტექსტის“ სხვა ადგილასაც აღნიშნულია, რომ „წინათ სისხლის ღვრა ხათუსაში ხშირი იყო“). ყოველივე ეს გახდა მიზეზი იმისა, რომ მეფე თელიფინუს ხათუსაში მოეწვია დიდი საკრებულო — თ უ ლ რ ა, რომელზედაც დაადგინეს: „ამიერიდან ხათუსაში (სამეფო) გვარის ძეს ბოროტება არავინ უყოს და მის (წინააღმდეგ) სატევარი არავინ იშიშვლოს!... შემდგომში ვინც მეფედ გახდება და ძმას ან დას ბოროტებას მიაყენებს, თქვენ იქნებით მისი ფანქუ...“ („თელიფინუს ტექსტი“).

ამავე თულიჯზე დადგინდა სამეფო ტახტზე ასვლის კანონი, რომელიც გამორიცხავდა ყოველგვარ უზურპაციას სამეფო გვარის წარმომადგენელთა მხრიდან. ყოველი გამოვლენა უზურპაციისა თულიასა და ფანქუს (სისხლის ღვრის პერიოდში ფანქუს აღარავინ იწვევდა) მსჯელობის საგანი უნდა გამხდარიყო.

„დაე, მეფედ მხოლოდ უპირველესი (უფროსი) უფლისწული (დუბლიკატში „უფლისწულთაგან“) გახდეს. უკეთუ უპირველესი უფლისწული არ არის, მაშინ ის ძე, რომელიც მეორე (მომდევნო) ადგილზეა (ასაკით). დაე, მეფედ იგი გახდეს. მაგრამ თუკი უფლისწული მემკვიდრე არ არის, მაშინ იმისთვის, ვინც უპირველესი (უფროსი) ქალიშვილია, ზედისძე აიყვანონ და, დაე, მეფედ იგი გახდეს“\*.

ასალი კანონმდებლობის ძალით ამიერიდან სამეფო ტახტზე ასვლის უფლება ეძლეოდათ მხოლოდ და მხოლოდ მეფისწულებს — მეფის პირდაპირ შთამომავლებს. თუ შვილთაგან მეფეს არ გააჩნდა მამრობითი სქესის წარმომადგენელი, ტახტზე ასვლა შეეძლო მხოლოდ მისი ქალიშვილის ქმარს — სიძეს. დანარჩენები (დისწული, დის ქმარი და ა. შ.) თელიფინუმ საერთოდ გამოირიცხა ტახტის პრეტენდენტთა რიცხვიდან.

თელიფინუმ მოუწოდა თავის მემკვიდრეებს: „აწ და მარადის: ვინც ჩემს შემდგომ მეფედ გახდება, დაე, ძმანი მისი, ძენი მისი, მოყვასნი მისი, თვისტომნი მისი და ლაშქარი მისი გაერთიანებული იყვენ...“  
 „შენს თვისტომთაგან არავინ არ ჰქლა...“. ამავე დროს, მან მოითხოვა კოლექტიური პასუხისმგებლობის შეცვლა პირადი პასუხისმგებლობით: „ვინც ძმებსა და დებს შორის ბოროტებას ჩაიდენს და მეფის თავს გაუხსნორდება, (მისთვის) მოიწვიეთ თულია. თუკი მისი (ჩადენილი) საქმე დადასტურდა, დაე, იგი (საკუთარი) თავით დაისაჯოს. ფარულად კი ... არ მოჰქლან. მის სახლს, მის ცოლს, მის ვაჟიშვილებს ბოროტება არ უყონ. უკეთუ უფლისწული შესცოდებს, დაე, იგი მხოლოდ (საკუთარი) თავით დაისაჯოს, ხოლო მის სახლს და მის

\* მოყვანილ ადგილს „თელიფინუს ტექსტიდან“ მკვლევართა ნაწილი სხვანაირ ინტერპრეტაციას აძლევს, რაც ამ ადგილის განსხვავებულ თარგმანზეა დამოკიდებული. მათი აზრით, „უპირველესი (უფროსი) უფლისწულს“, ისევე როგორც „უპირველესი (უფროსი) ქალიშვილის“ მაგიერად ტექსტში იგულისხმება „პირველი რანგის უფლისწული“ და „პირველი რანგის ქალიშვილი“, ხოლო „ძე, რომელიც მეორე (მომდევნო) ადგილზეა“, სთარგმნია როგორც მეორე რანგის ძე“. ამასთანავე, „პირველი რანგის შვილებში“ გულისხმობენ შვილებს კანონიერი მეუღლისაგან — დედოფლისაგან, ხოლო „მეორე რანგის ძეში“ — შვილს არაკანონიერი ცოლისაგან. მაგრამ ასეთ შემთხვევებში გასათვალისწინებელია, რომ ხეთური ტექსტების სხვა მონაცემთა თანახმად, სიტყვა „უპირველესი“ (ხეთურად ხანთეც-ცი) სწორედ „უფროსის“ (მთავარის“) აღმნიშვნელია. გარდა ამისა, მეფისწულთა, ისევე როგორც მეფის მეუღლეთა დაყოფა „რანგებად“ შეინიშნება მხოლოდ „ახალი სამეფოს“ დროისათვის. ძველ ხეთურ ტექსტებშიც არ დასტურდება ასეთი დაყოფა.

ვაიშვილებს ბოროტება არ მიაყენონ. უფლისწულები (ჩვეულებრივ რის გამოც იღუპებიან, ეს არ (უნდა შეეხოს) მათ სახლებს, მათ ველ-მინდვრებს, მათ ვენახებს, მათ მსახურთ, მათ შინაყმებს, მათ მსხვილ-ფეხა და წვრილფეხა საქონელს...“.

თელიფინუს კანონმდებლობა ძალაში იყო ხეთების ისტორიის მთელს მანძილზე. მიუხედავად იმისა, რომ თელიფინუს დროს გან-მტკიცდა სამეფო ხელისუფლება, მეფე მაინც არ გახდა ქვეყნის უზენ-ნაესი მმართველი. იგი რამდენადმე შეზღუდული იყო თულიათი და ფანქეთი, თუმცა ამ უკანასკნელთა ფუნქციონირება თანდათან სუსტ-დებოდა. „ახალი სამეფოს“ ხანაში კი ეს ორივე საკრებულო სულ გაუქმდა — მეფე უზენაესი მმართველი გახდა.

### ხათი „ძველი სამეფოს“ მიწურულს

ხანთილის დროიდან ხათი ჰკარგავს პოლიტიკურ ძლიერებას. ამ მეფის ლაშქრობებს წარმატება არ მოჰყოლია, ხეთებს განუდღენ ად-რე დაპყრობილი ქვეყნები (ხაკკა, მათილა, გალმია, ადანია, არცაეია = არცაეა, სალაფა, ფარდუვათა, ახულა და მრავალი სხვა). ხათის და-სუსტებით უნდა ესარგებლად ქასქების ტომებს. რომლებმაც ააოხრეს სასაზღვრო რაიონები, განსაკუთრებით, თილიურა (იგი დაუსახლებე-ლი დარჩა ხათუსილი III-ის მეფობამდე). აღმოსავლეთში ძალზედ გააქტიურდნენ ხურიტები.

შეტქმულებათა და უზურპაციის პერიოდში ხათი საგრძნობლად დაეცა, იგი დროებით გამოაკლდა წინა აზიის დიდ სახელმწიფოთა რიგს.

თელიფინუმ თავისი სამხედრო საქმიანობა ჩრდილოეთ სირიიდან დაიწყო — ბრძოლით კვლავ შემოიმტკიცა ხასუვა, პოზიციები გაი-მაგრა ქიცუვათნაში — ამბოხება ჩააქრო ლავაცანთიაში და საქმეი-დობო ზელმეკარულა დადო ქიცუვათნას მეფე ისფუთახსუსთან, რაც იმას ნიშნავდა, რომ ამ დროიდან ქიცუვათნამ ორიენტაცია აიღო ხა-თის სამეფოზე, გაემიჯნა რა ხალაფსა და ხურის (თვით ხალაფში კი თელიფინუმ ვეღარ აღადგინა პოზიციები). ხათის სამფლობელოები გაფართოვდა ცენტრალური ანატოლიის მეზობელი რაიონების შემო-ერთებით. შინაარსი შეიცვალა თვით ტერმინმა „ხათი“ — იგი ახლა აღნიშნავდა უზარმაზარ ტერიტორიას.

თელიფინუს დროს იწყება მსხვილი სახელმწიფო მეურნეობების ჩამოყალიბება, ხდებოდა რა სახელმწიფოს მიერ ცალკეული თემების დამორჩილება, სახელმწიფო დამოკიდებულებაში მოქცევა იმ თემები-სა, რომლებიც მანამდე თავისუფალი იყვნენ. „თელიფინუს ტექსტში“



დადასტურებული ფაქტის თანახმად, მარტო ე. წ. „ბეჭდის სახლის“ მეურნეობაში მოექცა 94 თემი.

როგორც ვარაუდობენ, თელიფინუს მეფობის პერიოდში უნდა მომხდარიყო ჩვენამდე მოღწეული „ხეთური კანონების“ ერთ-ერთი ძველი ვერსიის რედაქტირება.

ხათი კვლავ ერთ-ერთ ძლიერ სამეფოდ გადაიქცა დასავლეთ წინა აზიაში, თუმცა ხათის პირველ სამ მმართველთა (ლაბარნა, ხათუსილი I, მურსილი I) დროინდელი სიძლიერე მან მაინც ვერ აღიდგინა. ასეთ სიძლიერეს მან მიაღწია ხეთების „ახალი სამეფოს“ ხანაში, რასაც ქვემოთ დავინახავთ. მანამდე კი მოკლედ შევჩერდეთ ხეთების „შუა სამეფოზე“.

## VII

### ხეთების „შუა სამეფო“.

#### ხათი — კვლავ განსაცდელში

თელიფინუს მემკვიდრებმა, რომლებიც „შუა სამეფოს“ ხანაში (დაახლოებით ძვ. წ: 1500—1400 წწ.) ბატონობდნენ ხათუსაში, როგორც ჩანს, ვერ შეინარჩუნეს ხათის ძლიერება. ხეთებს უნდა დაეთმოთ პოზიციები ჩრდილოეთ სირიაში, განსაკუთრებით, ხალაფში, ისევე როგორც აღმოსავლეთ პერიფერიაზე. ამის მიზეზი უნდა ყოფილიყო ჩრდილოეთ სირიის წვრილ სამთავროთა გაძლიერება, ერთი მხრივ, და ხურის ქვეყნის (ხანიგალბათის) მომძლავრება, მეორე მხრივ.

ხათის სამეფოს თავისი პოზიციები უნდა შეენარჩუნებინა ანატოლიის სამხრეთ-აღმოსავლეთში, ქიციუვათნაში: ციდანთა II-ემ ხელშეკრულება დადო ქიციუვათნას მეფე ფილიასთან, ხოლო ხათის რომელიღაც მეფემ — ფადათისუსთან, ასევე ქიციუვათნას მეფესთან. ამ ხელშეკრულებათა მიზანი უნდა ყოფილიყო ქიციუვათნას საბოლოო გადაბირება ხათის მხარეზე და ჩრდილოეთ სირიის სამეფოებისა და ხურიტებისათვის ზურგის შექცევა. ეს უძველესი ხელშეკრულებანი, აქადურ და ხეთურ ენებზე შედგენილი, ფორმდებოდნენ პარიტეტის პრინციპზე, რაც მხარეთა თანასწორობას გულისხმობდა.

სწორედ ამ ხანებში დასავლეთ წინა აზიის ერთ-ერთ გაბატონებულ ძალად იქცა ხურიტების მძლავრი გაერთიანება — მითანი (ხანიგალბათი, ხური). მითანის მეფეთა მისწრაფება ცხადზე უცხადესი იყო: დაეწესებინათ კონტროლი ყველა სავაჭრო გზაზე ეფრატის გაყოლებით. მითანის გავლენა დღითიდღე იზრდებოდა ჩრდილოეთ სირიაში. საიმედო მოკავშირეებად მათ გამოიყენეს ჩრდილოეთ სირიის წვრილ სამთავროთა მმართველნი, რომლებიც იმხანად სამხრეთიდან მრისხანე მტრის წინაშე აღმოჩნდნენ. ეს იყო ეგვიპტე.

ჩრდილოეთ სირიაში ეგვიპტის ძველი პოზიციების აღდგენისათვის იბრძოდა თუტმოს III, რომელმაც დაახლოებით ძვ. წ. 1471 წლისათვის, ამ ფარაონის მეფობის მე-8 წელს, ილაშქრა ჩრდილოეთ სირიაში და გაანადგურა ხალაფი. ფარაონმა ბოლო მოუღო ხურიტების ბატონობას ამ ქვეყანაში, სადაც ეგვიპტელთა გავლენა არ შესუსტე-

ბულა თითქმის მთელი 30 წლის მანძილზე (როგორც ჩანს, სწორედ ამ ხანებში „დიდი ხეთა“ უგზავნიდა თუტმოსს ძღვენს). მაგრამ თუტმოსის შემდეგ მდგომარეობა იცვლება: ამენხოტეპ II-მ ველარ მოახერხა წარმატებით გამკლავებოდა ხურიტების შემოტევას ჩრდილოეთ სირიაში, სადაც მითანი სულ უფრო მეტად იმაგრებდა ფეხს. მაგრამ მალე მითანის მოქმედებას ამ მხარეში ბოლო მოუღეს ხეთებმა (დაახლოებით ძვ. წ. 1450 წლისათვის).

ეგვიპტის პოზიციების დასუსტებას ხალაფში თან დაემთხვა თუთხალია II-ის (ზოგიერთი მკვლევრის ვარაუდით, I-ის) გამეფება ხათში. ანაე დროს, ხალაფის მეფეს დაუწყია ხეთების საწინააღმდეგო მოქმედებანი (სახელდობრ, რაში გამოიხატა ეს — არ ვიცი). თუთხალიამ ჭერ ურთიერთობა აღადგინა ქიციუვათანთან, ხოლო შემდეგ მოულოდნელად შეუტია ხალაფსა და მის მოკავშირეებს. მოგვიანო ხანებში ხალაფთან დადებული ხელშეკრულების შესავალ (ისტორიულ) ნაწილში (ტექსტი აქადურადაა შედგენილი) აღნიშნულია: „როდესაც თუთხალია, დიდი მეფე, თავის სამეფო ტახტზე ავიდა, ხალაფის მეფე მის წინააღმდეგ აღსდგა. ხალაფის მეფე ხანიგალბათის ქვეყნის (=მითანის) მეფეს შეუთანხმდა. მაგრამ მან (ე. ი. თუთხალიამ) ამის გამო ხანიგალბათის მეფე და ხალაფის მეფე, თავიანთ ქვეყნებთან ერთად, გაანადგურა და ქალაქი ხალაფი დაანგრია“.

ხათის წინააღმდეგ მოწყობილი კოალიცია ხალაფის მეთავეობით თუთხალიამ გაანადგურა, რასაც უნდა მოჰყოლოდა ხათის პოლიტიკის აღდგენა ჩრდილოეთ სირიაში. როგორც ჩანს, სამხრეთ-აღმოსავლეთის დიდ სავაჭრო და სამხედრო გზას ხეთები კვლავ დაეპატრონენ. მაგრამ ასეთი მდგომარეობა დიდხანს არ უნდა გაგრძელებულიყო.

თუკი იმ ხეთურ ტექსტთა გარკვეული ნაწილი, რომელსაც აქამდე აკუთვნებდნენ ხეთების „ახალი სამეფოს“ დასაბრუნების ერთ-ერთ მმართველს — თუთხალია IV-ს, მართლაც შედგენილია არა ამ უკანასკნელის, არამედ თუთხალია II-ის სახელით (რაშიც ეჭვი ბევრს უკვე აღარ ეპარება), მაშინ „შუა სამეფოს“ ისტორიულ მოვლენათა ჩარჩო, განსაკუთრებით, თუთხალია II-ის ხანისა, მნიშვნელოვნად გაფართოვდება.

ამ ტექსტთა თანახმად, საომარი ოპერაციები თუთხალია II-ს უწარმოებია აგრეთვე მცირე აზიის სამხრეთ-დასავლეთსა და დასავლეთში, ისევე როგორც ჩრდილო-აღმოსავლეთში და აღმოსავლეთში, როგორც ამას ვიგებთ მის მიერ შედგენილი „ანალებიდან“.

სრულიად არ იყო მოულოდნელი თუთხალიას გამოჩენა არცაჲს ქვეყანაში. ამ მხარეში უკვე საფუძველი ეყრებოდა ხეთების საწინააღმდეგო მოქმედებას, რაც განპირობებული იყო არცაჲს გაძლიერებით და დამოუკიდებლობის მოპოვების სურვილით. არცაჲს ურ-

თიერთობა დაამყარა ეგვიპტესთან. ეს დასტურდება თელ-ამარნას არქივში ნაპოვნი წერილებით, რომლებსაც ფარაონი უგზავნიდა არცაევს მეფეს. ხეტების დამარცხებაში არცაევს მმართველთ, როგორც ჩანს, იმედი უნდა ჰქონოდათ დასავლეთ მცირე აზიის ქვეყნებისა, სადაც აგრეთვე ხეტების საწინააღმდეგო მოქმედებანი მზადდებოდა (ასუვაში, თარუსისაში, ვილუსაში, მდ. სეხას ქვეყანაში და სხვაგან). სწორედ ამ ხანებში დასავლეთში საომარ მზადებას იწყებს ახიავს მეფე.

თუთხალიამ დაამარცხა არცაევს ქვეყნის მეფე მოკავშირეებითურთ, შემდეგ კი მდ. სეხას ქვეყანას გაუსწორდა (ამ ამბების აღწერისას ტექსტში აღნიშნულია, რომ „ახიავს ქვეყნის მეფე განერიდა“, ე. ი. ბრძოლას), დიდი ნადავლითა და ნაშროთი ხათუსას დაბრუნდა. ამ მხარეში ბრძოლები მან კვლავ განაახლა, როდესაც დაამარცხა ასუევს ქვეყანა და სხვანი და ასევე დიდი ნადავლით (10 000 ნამრა, 600 ცხენი) ხათუსას გამოემართა.

დასავლეთიდან და სამხრეთ-დასავლეთიდან თუთხალიამ ბრძოლები გადიტანა ჩრდილო-აღმოსავლეთში, სადაც ქასქებს უსარგებლიათ ხეტების მეფის ლაშქრობით ასუვაში და ხათის ქვეყანას შესევინან, აუოხრებიათ რა იგი. თუთხალია გაუსწორდა ქასქებს თავიანთივე ქვეყანაში. ცოტა ხნის შემდეგ იგი შეებრძოლა ხურიტებს ისუევს ქვეყანაში.

თუთხალიას შემკვიდრებებს (არნუვანდა I, ხათუსილი II) ძალზედ გაუჭირდათ ხათის მონაპოვართა შენარჩუნება, რადგან ქვეყანა მზად არ იყო დიდი სავარეო პოლიტიკის წარმოებისათვის. მითანის, არცაევს, ჩრდილოეთ სირიის წვრილ სამთავროთა წინააღმდეგ ბრძოლამ ქვეყანა კრიზისულ მდგომარეობამდე მიიყვანა. ხათის კვლავ განუდგნენ მეზობელი ქვეყნები (ისევე როგორც ჩრდილოეთ სირიის სამთავროები), რომლებმაც მას ახალი ძალით შემოუტყეს. მოგვიანებით შედგენილ ერთ ხეთურ წყაროში ხათის უმწეო მდგომარეობა ასეა გადმოცემული: „წინათ ხათის ქვეყნები მტრისგან აოხრებული იყვნენ: ამ მხრიდან ქასქა-მტერი მოვიდა და ხათის ქვეყნები ააოხრა. ხოლო ქ. ნენასა საზღვრად ქმნა. იმ მხრიდან, „ქვედა ქვეყნიდან“, არცაევ-მტერი მოვიდა და ამან ხათის ქვეყნები ააოხრა, ხოლო ქ. თუვანუვა და ქ. უდა საზღვრად ქმნა. ამ მხრიდან არაუნა-მტერი მოვიდა და ქასიას ქვეყანა მთლიანად ააოხრა, იმ მხრიდან კი აცი-მტერი მოვიდა და „ზემო ქვეყნები“ მთლად ააოხრა, ხოლო ქ. სამუხა საზღვრად ქმნა. აგრეთვე ისუვა-მტერი მოვიდა და თეგარამას ქვეყანა ააოხრა. ამ მხრიდან არმათანა-მტერი მოვიდა და ამან ხათის ქვეყნები ააოხრა, ხოლო ქ. ქიცუვათნა მოსაზღვრე ქალაქად ქმნა. ხათუსა, თვით ქალაქი,

გადამწვარი იყო და მხოლოდ ... და ხე სთა-სახლი იყო გადარჩენილი“  
(ტექსტში ნახსენები აცი იგივეა, რაც ხაიასა. თეგარამა მო-  
გვიანო ხანების თოგარამა).

ხათის სისუსტის ხანა დიდხანს აღარ გაგრძელებულა. სუფილუ-  
ლიუმას დროიდან იგი კვლავ იბრუნებს თავის ძველ დიდებას.

## VIII

### „ახალი სამეფო“. ხეთების საგარეო პოლიტიკის ძირითადი მომენტები

ამ ხანაში (დაახლოებით ძვ. წ. 1400—1200 წწ.) ხათი განიხილებოდა როგორც ეგვიპტის, ბაბილონისა და ასურეთის ტოლი სახელმწიფო. იგი მნიშვნელოვან როლს ასრულებდა მაშინდელი წინა აზიის პოლიტიკურ ცხოვრებაში. მას კვლავ დაუბრუნდა ძველი დიდება.

#### სუფილულიუმა I:

მითანი, ჩრდილოეთ სირია, ხაიასა ...

„ახალი სამეფოს“ დასაწყისში, თუთხალია III-ის მეფობის დროს, ხათის ქვეყანაში იწყება კონსოლიდაციის პროცესი, რომლის შესახებ ჩვენ ბევრი რამ არ ვიცით, თუმცა მისმა შედეგებმა სულ მალე იჩინა თავი — ხათი კვლავ გამოჩნდა დასავლეთ წინა აზიის პოლიტიკურ ასპარეზზე (ამ პერიოდს აკუთვნებენ, მაგალითად, ხათუსას სამხრეთ ნაწილში დიდი თავდაცვითი კედლისა და დედაქალაქის სხვა ნაგებობათა აგებას).

საბრძოლო ნათლობა ახალგაზრდა სუფილულიუმამ მიიღო ჯერ კიდევ სამეფო ტახტზე ასვლამდე, როდესაც იგი მამამისს, თუთხალია III-ს, თან ახლდა ბრძოლებში მცირე აზიის ჩრდილო-აღმოსავლეთში, სამხრეთ-დასავლეთში და სხვაგან. გამეფებისთანავე (დაახლოებით ძვ. წ. 1380 წ.) სუფილულიუმა I შეუდგა მისი საგარეო პოლიტიკის უპირველესი ამოცანის გადაწყვეტას — მითანის სახელმწიფოსთან ანგარიშის გასწორებას.

მართალია, მისი პირველი ლაშქრობა მითანიში ჩრდილოეთ სირიის მხრიდან წარუმატებლად დამთავრდა — მითანის მეფე თუმშრათამ მოიგერია ხეთების შემოტევა, მაგრამ მომდევნო ლაშქრობამ ევფრატს გადაღმა დიდი წარმატება მოუტანა ხეთებს.

სუფილულიუმამ ამჯერად მოქმედების სხვა გეგმა აირჩია — ევფრატი გადალახა მალატიასთან (ხეთური წყაროების მ ა ლ დ ი-

ასთან) და შეიჭრა ხურის ქვეყნის ერთ-ერთი გაერთიანების — ისუვას ტერიტორიაზე, რომლის სამხრეთით სწორედ მითანი განივრცობოდა. შემოიმატეცა თუ არა ისუვა, სუფილულიუმა მოულოდნელად დაეშვა სამხრეთით, ჩრდილოეთ შუამდინარეთში და, მიაღწა მითანის დედაქალაქს ვაშუქანის (ადგილმდებარეობა უცნობია), რომელიც ხეთების ლაშქარმა გაძარცვა და დაანგრია. სუფილულიუმა მითანის სამეფო ტახტზე ასაყვანად მოამზადა თავისი ვასალი მითანელი შათივაზა, რომელსაც თავისი ქალიშვილიც მიათხოვა (შათივაზას მან ხელშეკრულებაც დაუდო — აქადურ ენაზე). მართალია, ამ ხანებში მითანის სამეფოს დიპლომატიური ურთიერთობა ჰქონდა ეგვიპტესთან (რაც განმტკიცებული იყო ორი სამეფოს დინასტიური ქორწინებით), მაგრამ ამან საქმეს ვერ უშველა. თუშრაათას წინააღმდეგ შეთქმულება მზადდებოდა იმათი მხრიდან, ვინც დასახმარებლად მიმართა ასურეთის მმართველ აშურუბალიტს. საბოლოოდ, თუშრაათა მოკლეს ანტიხეთური კოალიციის შეთქმულებმა და სამეფო ტახტზე არათათამა აიყვანეს. შემდეგ კი მითანი დაუძლურდა ისე, რომ აღარ შეეძლო ასურეთის დარტყმების მოგერიებაც. მოგვიანებით (ადად-ნირარ I-ისა და სალმანასარ I-ის ლაშქრობის შემდეგ) იგი ასურეთის პროვინციად იქცა.

მითანის დამარცხებამ სუფილულიუმას ხელ-ფეხი გაუხსნა ჩრდილოეთ სირიაში სამოქმედოდ. ვაშუქანიდან იგი დაიძრა ჩრდილოეთ სირიისაკენ. გადმოლახა რა ევფრატის ხეობის ლაშქარმა ბრძოლა გაუმართა კადემის მეფეს. მისი დამარცხების შემდეგ ხეთების ლაშქარი უფრო სამხრეთით გაიჭრა. ხეთების მხარეზე გადავიდნენ ხალფა (იგივე ხალფი) და ალალახი, წერილი სამთავროები ნუხაშუ, ამურუ და სხვანი (როგორც ჩანს, ხეთებმა ამავე ხანებში აღნიშნულ სამეფოებთან დადეს ხელშეკრულებანი, რომლებმაც ჩვენამდე მოაღწიეს). სუფილულიუმას ამ შედეგიანმა ლაშქრობამ (დაახლოებით ძვ. წ. 1370 წ.) ხეთების ბატონობა ჩრდილოეთ სირიაში კვლავ აღადგინა, თუმცა ისეთი ძლიერი ქალაქ-სახელმწიფო, როგორც იყო ქარგამიში (ქარხემიში) ევფრატის შუა წელზე, კვლავ დამოუკიდებელი რჩებოდა. მოგვიანებით სუფილულიუმა კვლავ გამოჩნდა ჩრდილოეთ სირიაში, ამჯერად ქარგამიშის დასაპყრობად.

რეაღიანი ალყის შემდეგ ქარგამიშის ციხე-სიმაგრე დაეცა. ევფრატისა და ხმელთაშუა ზღვას შორის მდებარე ტერიტორია ხეთების პოლიტიკურ სფეროში მოექცა. სუფილულიუმამ ერთ-ერთი თავისი უფლისწული — თელიფინუ ხალფას მეფედ დასვა, ხოლო მეორე უფლისწული, ფიასილი, ქარგამიშის მეფედ გამოაცხადა. ამის შემდეგ ხალფა და ქარგამიში სამუდამოდ პროხეთურ ორიენტაციას დაადგინენ, გადაიქცნენ რა ხათის ვასალურ ქალაქ-სახელმწიფოებად, რაც

მოგვიანებით გარკვეული საბაზი გახდა ეგვიპტე-ხათის ურთიერთობათა გართულებაში.

მითანიში და ჩრდილოეთ სირიაში მოპოვებულმა ღიღმა გამარჯვებებმა გამოიწვიეს ხეთების სამხედრო ძალის აღიარება მთელს ახლო აღმოსავლეთში, განსაკუთრებით ეგვიპტეში. როგორც ვარაუდობენ, სწორედ ამიტომ არ უნდა ყოფილიყო შემთხვევითი 18 წლის ასაკში გარდაცვლილი ფარაონის — თუთანჰამონის ქვრივის, ახალგაზრდა დედოფალ ანჰესენამუნის მიერ წერილების გაგზავნა სუფილულიუმისადმი მუდარით: „ქმარი ჩემი გარდაიცვალა, ვაჟიშვილი კი არა მყავს. შენზე ამბობენ, ბევრი ძე ჰყავსო. შენ რომ გამომიგზავნო ერთ-ერთი შენი ძეთაგანი, იგი ჩემი ქმარი გახდება. მე არაფრით არ ავიყვან ქმარს ჩემს ქვეშევრდომთაგან...“. ანდა: „ის, ვინც ჩემი ქმარი იყო, მოკვდა და მე ძე არა მყავს... ყველა ამბობს, მას ბევრი ძე ჰყავსო. გამომიგზავნე ერთ-ერთი შენი შვილთაგანი, რათა იგი ჩემი ქმარი გახდეს...“. სუფილულიუმას გაუთვალისწინებია ეგვიპტის დედოფლის თხოვნა, მისთვის უფლისწულიც გაუგზავნია, მაგრამ მას ეგვიპტემდე არც მიუღწევია — ხეთი უფლისწული გზაში მოუკლავთ (შესაძლოა, ანტიხეთური განწყობის ეგვიპტელ მომხრეებს). ამ ინციდენტს ეგვიპტე-ხათის ურთიერთობა არ გაუმწვავებია (ამ ორ სახელმწიფოს მმართველთა შორის ურთიერთობა არც ადრე ყოფილა გამწვავებული, რასაც ადასტურებს სუფილულიუმას მიერ ეხნატონისადმი გაგზავნილი წერილი ამ ფარაონის ტახტზე ასვლასთან დაკავშირებით).

მითანისა და ჩრდილოეთ სირიის საქმეებით დაკავებულმა სუფილულიუმამ სათანადო დაპურობითი პოლიტიკის წარმოება ვეღარ შეძლო მცირე აზიის სამხრეთსა და სამხრეთ-დასავლეთში, სადაც ერთხანს ხეთების საწინააღმდეგო პოლიტიკური სიტუაციაც შეიქმნა მილავანდას, არცაევას, მირასა და მდ. სეხას ქვეყნის მხრიდან. ანტიხეთურ კოალიციაში, რომელმაც სუფილულიუმას მემკვიდრის — მურსილი II-ის გამეფებამდე იარსება, ახიავასაც უნდა მიეღო მონაწილეობა.

აღმოსავლეთში კი სუფილულიუმას საქმეები მოგვარებული ჰქონდა: მითანი გაანადგურა, ისუვა ხეთების ვასალი გახდა. შუამდინარეთიდან იგი რაიმე საფრთხეს არ ელოდა — მას ბაბილონის მეფის ქალიშვილი ცოლად ჰყავდა. ასურეთი ჯერ კიდევ გაძლიერებული არ იყო იმდენად, რომ ხათის სამფლობელოებს დამუქრებოდა.

სუფილულიუმა რაიმე საფრთხეს არ ელოდა არც ხაიასას მხრიდან — მდ. ეფრატის ზემო დინების რაიონიდან (ზოგიერთი მკვლევარის ვარაუდით, ხაიასას ტერიტორია აღმოსავლეთი მიმართულებით ძალზედ შორს — ვანის ტბამდეა მოსათავსებელი და განსაზიღველია



როგორც ძველ სომეხ ტომთა ადრეული კერა). ხაიასასთან დაკავშირებული იყო აცის ქვეყანა, რის გამოც მეცნიერები ამ ორ გეოგრაფიულ ერთეულს ზოგჯერ აცი-ხაიასას სახელითაც იხსენიებენ (როგორც ზემოთ აღინიშნა, საკუთრივ აცი აღწევდა „ზღვამდე“, ზოგიერთის ვარაუდით — შავ ზღვამდე, ზოგიერთისა — ვანის ტბამდე).

სუფილულიუმას ვრცელი და საიმედო ხელშეკრულება ჰქონდა დადებული (ხეთურ ენაზე) ხაიასას მომავალ მმართველთან — ხუკანასთან და ხაიასას „კაცებთან“. ხელშეკრულებიდან არ ჩანს, იყო თუ არა ხუკანა სამეფო გვარის წარმომადგენელი, ანდა არსებობდა თუ არა საერთოდ მეფობა ხაიასაში (ხელშეკრულების ერთი ადგილის მიხედვით, ხაიასა „ჩამორჩენილი, განუვითარებელი“ ყოფილა), სადაც ქვეყნის ბატონ-პატრონებად ჩანან „ხაიასას კაცები“, ე. ი. მცხოვრებლები, მეთემენი, ან კიდევ, საკითხავია, საიდან გაჩნდა ხუკანა ხათუსაში? არ არის გამორიცხული, რომ სუფილულიუმამ ილაშქრა ხაიასაში, რომლის დამარცხების შემდეგ იგი მფარველობდა ვინმე ხაიასელ ხუკანას, მომავალში მის ვასალს. ხელშეკრულების დასაწყისში ხუკანა „უბრალო მეომრადაა“ გამოცხადებული: „ასე (ამბობს) „მზე“ სუფილულიუმამ, ხათის ქვეყნის მეფე: ხედავ, შენ, ხუკანა, უბრალო მეომარი აგიყვანე და წარჩინებული გაგხადე! მე შენ ხათუსაში და ხაიასას კაცებს შორის კეთილად წარმოგაჩინე, ხოლო შენ ჩემი და ცოლად მოგეცი“.

ხეთების „ათასი ღვთაების“ წინაშე დადებული ფიცი განსაზღვრავდა მხარეთა ურთიერთობებს: ხუკანას ვალდებულებებში შედიოდა „მზისადმი“ მორჩილება და ერთგულება, მისი პატივისცემა და დაცვა შვილებითურთ, სამხედრო დახმარების აღმოჩენა. „მზისათვის“ შეტყობინება ყოველგვარი „ბოროტი საქმისა“ — მეფის საწინააღმდეგო მოქმედებისა, ლტოლვილთა გაცემა, სასახლეში გარკვეული ეთიკის დაცვა და ა. შ. თვითონ სუფილულიუმამ ვალდებულებას იღებდა საჭიროების შემთხვევაში დაეცვა ხუკანა და „ხაიასას კაცი“.

დიდ ბრძოლებში ნაცადმა სუფილულიუმამ ვერაფერი გააწყო ჩრდილოეთით და ჩრდილო-აღმოსავლეთით მცხოვრებ ქასქებთან, რომლებიც ხეთების მოსაზღვრე რაიონებს აოხრებდნენ. მის საომარ მოქმედებებს ქასქების წინააღმდეგ საბოლოო წარმატება არ მოჰყოლია.

ხანდაზმული და დიდ ბრძოლებს გადატანილი სუფილულიუმამ იმსხვერპლა, როგორც ვარაუდობენ, შავმა ჭირმა, ეგვიპტიდან და ჩრდილოეთ სირიიდან რომ ხათში მისმა მეომრებმა შემოიტანეს. ამავე სენმა იმსხვერპლა, აგრეთვე, სუფილულიუმას უფროსი ვაჟიშვილი

არწუვანდა, რომელმაც მცირე ხანს იმეფა ხათუსაში. მის შემდგომ კი ხათის სამეფო ტახტი კვლავ ძლიერი მმართველის ხელში აღმოჩნდა. ეს იყო მურსილი II.

მურსილი II:

არცაჲა, ჰასჰა და სხვანი

მურსილის გამეფების დროისათვის ხათის საგარეო პოლიტიკა ერთგვარად შეიცვალა: თუკი სუფილულიუმას მეფობის დასაწყისში ხეთების ყურადღება ძირითადად მიმართული იყო ჩრდილოეთ სირიისაკენ და მითანისაკენ, მურსილი II-ის დროს ყურადღება გადატანილი იქნა უკვე მცირე აზიის სამხრეთ-დასავლეთისა და დასავლეთში, სადაც ხათის პოზიციები ძალზედ შესუსტდა. არცაჲას მეთაურობით ხათის წინააღმდეგ შექმნილი კოალიცია ხაფალას, მირა-ქუევალიას, მდ. სუხას ქვეყნისა და სხვათა შემადგენლობით, როგორც ჩანს, გარკვეულ მხარდაჭერას იღებდა ახიავას მხრიდან.

ჰერ „ქვემო ქვეყანას“ შემოუტია „არცაჲას მტერმა“. რომელიც უკუაგდო ხეთების ლაშქარმა. შემდეგ ხეთებს, როგორც ჩანს, განუდგა მილაჲანდა (არცაჲას მეფის — უხა-ცითვის წაქეზებით), თუმცა იგი მალე კვლავ შემოიბრტყია ხეთების ლაშქარმა. ასეთ ვითარებაში არცაჲას ერთ-ერთი ქვეყნის — მირას მმართველი მასხუილუჲა იკავებს მილაჲანდას მიტაცებულ პუნქტს იმფას, რამაც ერთ დროს გაამწვავა მდგომარეობა მილაჲანდასა და მირას შორის. ხეთებმა მხარი დაუჭირეს მასხუილუჲას.

ამ ხანებში ახალი შემოტევა დაიწყო არცაჲას მმართველმა უხა-ციტომ. მურსილი ილაშქრებს მის წინააღმდეგ და არცაჲას, დედაქალაქითურთ (=აფსას), ამარცხებს. უხა-ციტიმ, თავისი ლაშქრის ნაწილთან ერთად, თავს გაქცევით უშველა — მან ზღვას მიაშურა (როგორც ჩანს, რომელიდაც კუნძულზე. თვითონ არცაჲა „ზღვამდე“ — ხმელთაშუა ზღვამდე ვრცელდებოდა), სადაც იგი მალე გარდაიცვალა კიდევ. არცაჲას ლაშქრის ნაწილი კი არინანდას მთაზე გამაგრდა (ეს მთა „კლოფანი“ ყოფილა და ეშვებოდა „ზღვაში“). მურსილიმ გაანადგურა არინანდას მთაზე გამაგრებული არცაჲელები და 15500 ნამრა ხათუსაში გაგზავნა, თვითონ კი არცაჲას ქვეყნის სხვა პუნქტების განადგურებას შეუდგა.

ამ მხარეში ხეთების ლაშქრობის მიზეზი ახსნილია ამავე მეფის ე. წ. „ათწლიან ანალებში“. ფურანდაში ლაშქრობის წინ ამ ქალაქის მცხოვრებთ მურსილიმ აცნობა: „თქვენ მამაჩემის მორჩილნი იყავით. მამაჩემმა აგიყვანათ და უხა-ციტის მორჩილებაში გადაგკათ. იგი კი

[ახი]უვას (=ახიავას) ქვეყნის მეფეს მიემხრო და ამბობდა. მაგრამ თქვენ კვლავ ჩემს მხარეს გადმოდით და უხა-ციოთის მეტი აღარ მიემხროთ! ჩემი მონები რომლებიც არიან — ხურსანასას ნამრა, სურუთას ნამრა და ათარიმას ნამრა — და თქვენთან გადმოვიდნენ, ისინი შე უკან დამიბრუნეთ“.

მალე ფურანდელებს შეუერთდა გარდაცვლილი უხა-ციოთის მემკვიდრე თავალაუცნავალი, მაგრამ ხეთების ლაშქარს წინ ველარავინ აღუდგა — არცავას ქვეყანა ხეთების მორჩილი გახდა (მურსილიმ ფურანდადან 15 ათასამდე ნამრა გაგზავნა ხეთების დედაქალაქში).

არცავას შემდეგ ხეთების ლაშქარი გაემართა მდ. სეხას ქვეყანაში, რომელიც არცავას დიდი გაერთიანების ერთ-ერთი წევრი იყო. ცოტა ხნის წინ ამ ქვეყნის მეფე მანათა-დათა მის ძმებს სეხადან გაუგდიათ, მაგრამ მას მაშინ მურსილი II დახმარებია და სეხაში მეფედ დაუბრუნებია. არცავას ომში მანათა-დათას უხა-ციოთის მხარე დაუჭერია, რის გამოც მურსილი გაეშურა სეხაში მანათა-დათას დასასჯელად. სეხას მეფემ ხეთების მბრძანებელს მაშინვე სთხოვა პატიება, რაც მურსილიმ არ მიიღო. შეშინებულმა მანათა-დათამ ხერხს მიმართა: მურსილის მიუგზავნა დედამისი (პარალელურ ტექსტში „დედამისი და უხუცესი მამაკაცები და ქალები“), რომელიც ხეთების მეფის ფერხთ დაემხო და პატიება ითხოვა. „რადგანაც ჩემს შესახვედრად დიაცი გამოემართა და რგი ჩემს ფერხთ დაემხო. დიაცს თხოვნა შევესრულე და (ამის) შემდეგ მდ. სეხას ქვეყანაში აღარ გავემართე“ — თავაზიანად აცხადებს მურსილი, თუმცა ბრძოლის ვარეშე მან ამ ქვეყნიდან 4 ათასი ნამრა გაგზავნა ხათუსას, ხოლო სეხა მორჩილად გაიხადა.

დიდი არცავას ისეთი წევრები, როგორც იყვნენ მირა-ქუვალიას და ხათალას ქვეყნები მურსილიმ ასევე მშვიდობიანად ხათის მორჩილად, ხოლო მათი მეფენი — მასხუილუვა და თარგასნალი ხათის ვასალებად გახადა: „...მირას ქვეყანაში გავემართე და მირას ქვეყანა მასხუილუვას მივეცი: მდ. სეხას ქვეყანა მანათა-დათას მივეცი, ხათალა კი თარგასნალის მივეცი. და ეს ქვეყნები თავ-თავიანთ ადგილას დავიმორჩილე, მათ მეომარი რაზმების მოწოდება დავაკისრე — ისინიც მეომარ რაზმებს უწყვეტლივ მიგზავნიდნენ“. ამგვარად, არცავას თითოეული ქვეყანა ხეთების მორჩილი გახდა. ამ ქვეყნებიდან ხათუსას სა ახლესი გაგზავნილი ნამრას რაოდენობამ კი 66 ათასს მიაღწია („უთვალავი“ ნამრა წაიყვანეს, აგრეთვე, მურსილის სარდლებმა და მეომრებმა).

არცავას ქვეყნების დამორჩილების ოპერაცია დამთავრდა ხალაფის მირა-ქუვალიას და მდ. სეხას ქვეყნების მეფეებთან ხელშეკრულებების დადებით (შესაძლოა, მსგავსი ხელშეკრულება დაიდო სა-

კუთრივ არცავეს ქვეყნის მეფესთანაც, მაგრამ იგი არ შემოინახა), რომლებშიც ვასალთა მოვალეობანი დაწვრილებითაა აღწერილი: ხათისათვის დამხმარე მეომარი რაზმების (საომარ ეტლებთან ერთად) სისტემატურად მიწოდება, ხარკის გადახდა, მტრის მხრიდან შემოსევის საშიშროების, ან ამბოხების დროულად შეტყობინება, ხეთ ლტოლვილთა უკან დაბრუნება და ა. შ. მომავალში ეს ხელშეკრულებები იშვიათად თუ ირღვეოდა.

თავისი მეფობის არაერთი წელი მურსილი II-მ ქასქებთან ბრძოლაში გაატარა. მან დალაშქრა ქასქების მთავარი ქვეყნები — ხალილა და ღუღუშქა, მოიგერია ქასქების შემოსევები ღურშითას, ისხუფითას, ასხარფათას მთის, თუმანას, თიმუხალასა და სხვათა მხრიდან, დაამარცხა თიფიას, ფალხუისას, ციხარაის, თარიქარიმუს, ფიგაინარესასა და სხვა პუნქტთა ქასქები, მაგრამ საბოლოოდ ვერც მან მოახერხა დამორჩილება ამ მეომარი ტომებისა, რომლებიც განუწყვეტლივ უტევდნენ ხეთებს მთელს სასაზღვრო ზოლში. მურსილს დაეწიდა მოუხდა ხაისასიცი, რომელიც დროებით განუდგა ხეთებს.

მურსილი II რამდენჯერმე გამოჩნდა მოკლე ხნით ჩრდილოეთ სირიაში: არეულობანი დაიწყო ნუხაშეში, ამურუში, ქინზაში, თუმცა ამას ხათისაგან განდგომა არ მოჰყოლია. მურსილიმ ქარგამიშსა და ხალფაში ტახტზე დასვა ახალი მეფენი, რომლებიც ხეთებისადმი ერთგულებას ინარჩუნებდნენ. სწორედ ამ ხანებში დაიდო ხელშეკრულება ამურუსთან, რამაც კიდევ უფრო განამტკიცა ხეთების პოზიციები ჩრდილოეთ სირიაში, თუმცა უკვე მომძლავრებულმა ასურეთმა იწყო ამ პოზიციების შევიწროება ჩრდილოეთ სირიაში: ასურეთის მეფემ ქარგამიშს შეუტია. სწორედ ასურეთის ამ მოქმედებასთან დაკავშირებით იყო ჩამოსული მურსილი ჩრდილოეთ სირიაში, კერძოდ, ქარგამიშში.

ჩრდილოეთ სირიაში ყოფნისას მურსილიმ პირველად შეიტყო, რომ ეგვიპტელთა რაზმები ამ ქვეყნის სამხრეთ საზღვრებთან გამოჩნდნენ. მართალია, ისინი მურსილის გარეშე დაამარცხეს და უკან გააბრუნეს, მაგრამ ეგვიპტელთა გამოჩენა თავისთავად მაუწყებელი იყო ეგვიპტელთა აქტიურობის განახლებისა ჩრდილოეთ სირიაში, რაც სულ მალე დადასტურდა.

მუშაათალი:

ეგვიპტე, კადეში, ღათასა

ჩრდილოეთ სირიაში გატარებულმა პოლიტიკამ ხათი მიიყვანა ეგვიპტესთან შეტაკებამდე. მანამდე ამ ორ დიდ ქვეყანას შორის არ არსებობდა დაძაბული ურთიერთობა.

მაგრამ ეგვიპტესთან შეტაკებამდე მუვათალის მოუხდა მცირე აზიის სამხრეთ-დასავლეთსა და დასავლეთში გალაშქრება. მიუხედავად მურსილი II-ის წარმატებითი ლაშქრობებისა არცავეს ქვეყნებში, ვასალურ ურთიერთობათა პირობები ხათის მიმართ მაინც ირღვეოდა — არცავე არ ცხრებოდა, მთელი დასავლეთი ანატოლია ხეთებისათვის კვლავ პოტენციური საფრთხის კერად რჩებოდა.

მომავალი შეტაკებანი ეგვიპტესთან კარზე იყო მომდგარი. ეგვიპტესთან ბრძოლების წინ მუვათალის ზურგი უნდა ჰქონოდა გამაგრებული თვით ანატოლიაში. ამიტომაც გასწია მან სალაშქროდ არცავეს მხარეში, სადაც ლაბარნას დროიდან ხეთებისადმი ერთგულად განწყობილი ვილუსა (მურსილი II-ს ამ ქვეყანაში არ ულაშქრია), როგორც ჩანს, ყველაზე მეტად აქტიურობდა. მუვათალიმ გაამაგრა ხეთების პოზიციები დასავლეთში, ვილუსა კვლავ ხათის მორჩილი გახდა, რაც გამოიხატა ვასალური ხელშეკრულების დადებაში. ამ ხელშეკრულების ტექსტი მთლიანად ემთხვევა არცავეს სხვა ქვეყნებთან დადებულ ხელშეკრულებათა ტრაფარეტს, მხოლოდ აქა-იქ შეიძინევა ზოგიერთი განსხვავება, განსაკუთრებით, ტექსტის იმ ნაწილში, სადაც მეომართა რაზმების რეგულარულად მოწოდებაზეა საუბარი, ჩამოთვლილია „მზის“ — მუვათალის ტოლი მეფენი: „ეგვიპტის ქვეყნის მეფე“, „შანხარას (ე. ი. ბაბილონის) ქვეყნის მეფე“, „ხანიგალბათის (=მითანის) ქვეყნის მეფე“ და „ასურის ქვეყნის მეფე“. იქვე კი ტექსტის შემდგენელი დასძენს: „თუკი იქ (ე. ი. ზემოჩამოთვლილ მეფეთა ქვეყნებში) ვინმე (ჩემს წინააღმდეგ) საბრძოლველად აღსდგება... თქვენ ქვეითი რაზმებითა და საომარი ეტლებით მაშინვე ჩემს დასახმარებლად გამოეშურეთო“. როგორც ვხედავთ, ტექსტის შემდგენელი უკვე უშვებს შესაძლებლობას, რომ „ეგვიპტის ქვეყნის მეფე“ საბრძოლველად აღსდგება „მზის“ წინააღმდეგ, რაც მართლაც მალე გამართლდა.

XIX დინასტიის დროიდან ეგვიპტის წინაშე დადგა ამოცანა ძველი გავლენის აღდგენისა პალესტინაში, ფინიკიასა და სირიაში. ეგვიპტის მთავარი მეტოქე აზიაში იყო ხათი, რომლის ბატონობა დღითიდღე იზრდებოდა ჩრდილოეთ სირიაში. ფარაონ სეთი I-ის ლაშქარი დაიძრა ჩრდილოეთისაკენ და მიადწია კადეშს (მდ. ორონტზე). რამსეს II-მ განაახლა მოქმედებანი ამ მხარეში. თავისი მეფობის მეხუთე წელს (დაახლოებით ძვ. წ. 1312, ან 1286/5 წ.) მან შეკრიბა 20 ათასიანი ლაშქარი და გაემართა სირიისაკენ, სადაც მის შესახვედრად ემზადებოდა მუვათალი 30 ათასიანი მეომრისაგან შემდგარი ლაშქრით.

მუვათალის ლაშქარი შედგენილი იყო იმ ქვეყნების მეომრებით, რომლებიც ეგვიპტური იეროგლიფური ტექსტების მონაცემთა მიხედ-

ვით, „ზღვის დასასრულიდან (ე. ი. ანატოლიის დასავლეთიდან) ხეთას ქვეყანამდე“ მდებარეობდნენ. ესენი უნდა ყოფილიყვნენ, პირველ რიგში, არცავას დიდ გავრთიანებაში შემავალი ქვეყნები. ეგვიპტური წყარო, რომელიც აღწერს ეგვიპტელთა და ხეთების მომავალ შერკინებას, ასახელებს ხეთების სხვა მოკავშირეებს სამხრეთ-დასავლეთ მცირე აზიიდან: მასას, კარკისას, ლუქას და სხვას. მათ გვერდით დასახელებულია დარდანები, პომეროსის „ილიადაში“ რომ მოიხსენებიან. იმავე წყაროს მონაცემებით თუ ვიმსჯელებთ, ხეთების ლაშქარში ყოფილან სირიის ვასალური ქვეყნების (ქარგამიშის, ხალფას, კადეშის, იმავე ქინზას, ნუხაშის) მეომრებიც, აგრეთვე: მებრძოლები ქიციუვათნადან, ქასქას ქვეყნიდან, მითანიდან (= ნაპარინადან). ამიტომაცაა, რომ აღნიშნულ ეგვიპტურ ტექსტში გესლიანადაა გამოცხადებულნი: „საძაგელი და საზიზლარი მმართველი ხეთას ქვეყნისა მოვიდა, როცა შეკრიბა ყველა უცხო ქვეყანაო“.

მიადგა თუ არა მდ. ორონტის მარჯვენა ნაპირს. რამსესი დაბანაკდა ქ. კადეშში, რომელიც ერთი დღის სავალზე იყო ნაპირიდან. ხეთების მიერ მოგზავნილმა ჯაშუშებმა ეგვიპტელებს აცნობეს, თითქოს ხეთების ლაშქარი გაეცალა კადეშს და შორს. ჩრდილოეთისაკენ გაემართა. ახალგაზრდა რამსესმა გადაწყვიტა, მაშინვე აეღო ეს ქალაქი, მაგრამ მხეხუი გაება. იქვე ჩასაფრებულმა ხეთების ლაშქარმა სასტიკად გაანადგურა ეგვიპტელთა რაზმები, თვითონ რამსესს კი ალყა შემოარტყა. ფარაონი იხსნა მისმა ვაჟაკობამ, აგრეთვე, იმან, რომ ხეთების ლაშქარმა ეგვიპტელთა ბანაჟის ძარცვას მიჰყო ხელი და საშუალება მისცა ეგვიპტელებს გაერღვიათ ალყა. რამსესმა საბოლოოდ ვერ შეძლო ვერც ხეთების დამარცხება. ვერც კადეშის აღება. ხეთების ლაშქარმაც ვერ მოახერხა უფრო სამხრეთისკენ წაწევა. თუმცა ხეთებს არ დაუქარგავთ თავიანთი პოზიციები ჩრდილოეთ სირიაში: ისინი კიდევ კარგა ხანს ბატონობდნენ ამ რეგიონში.

კადეშის ბრძოლის დაწყების წინ კი მუვათალი დათასაში (დაახლოებით, თანამედროვე ქ. ყარამანთან) თავისივე ღვთაებებით გადმოსახლებულა. ხათუასადან საკმაოდ სამხრეთით. „ქვემო ქვეყანაში“, სამეფო რეზიდენციის გადმოტანა გარკვეული სტრატეგიული მოსაზრებით უნდა ყოფილიყო ნაკარანახევი: მუვათალი გამალებით ემზადებოდა ეგვიპტესთან ბრძოლისთვის და საჭირო იყო მომავალი საომარი ოპერაციების რაიონთან მიახლოება. როგორც ჩანს, დათასადან მოუწოდებდა მუვათალი თავის მცირეაზიელ მოკავშირეებს, გამოეგზავნათ დამხმარე რაზმები ეგვიპტის მრისხანე ლაშქართან საბრძოლველად.

აღნიშნულთან ერთად, სხვაც ივარაუდება: ეგვიპტესთან ბრძოლის დაწყების წინ, ისევე როგორც ამ ბრძოლის მიმდინარეობის პერიოდ-

ში, ქაქებმა გაახშირეს შემოსევები ხეტების ტერიტორიაზე, ისარგებლეს რა მათთვის ხელსაყრელი მომენტით — ხეტების მთელი ლაშქრის ჩრდილოეთ სირიაში ყოფნით. როგორც ჩანს, ისინი ემუქრებოდნენ დედაქალაქსაც, საიდანაც მუვეათალი დროებით უნდა გადასახლებულიყო სამხრეთში, მით უმეტეს, რომ მომავალი სამხედრო ოპერაციების მოლოდინში ხეტების მეფე, ვითარცა მთავარსარდალი, მაინც უნდა მიახლოებოდა ჩრდილოეთ სირიას. ასეა თუ ისე, გარკვეული დროის მანძილზე ხეტების სამეფო რეზიდენცია დათასაში იყო გადმოტანილი. მუვეათალის მომდევნო მეფენი კი კვლავ ხათუსაში მზარხანებლობდნენ.

### ხათუსილი III:

სამეფო კარის მეჯინიბიდან — დიდ მეფეზე.

შეძველილი საჯავო ხელშეკრულება

მურსილი II-ის უმცროსი ვაჟიშვილი — ხათუსილი მამამისმა ბავშვობაშივე განაწესა სამეფო კარის მეჯინიბედ (ეს იმხანად საპატიო ადგილად ითვლებოდა), რაც იმას ნიშნავდა, რომ სამეფო ტახტისაკენ მიმავალი გზა მას გადაჭრილი ჰქონდა. მით უმეტეს, რომ არსებობდა და მხნედ იყო ტახტის კანონიერი მემკვიდრე — მურსილის უფროსი ვაჟიშვილი მუვეათალი, რომელიც მამამისის გარდაცვალებისთანავე ავიდა ტახტზე.

ძმებს შორის რაიმე უსიამოვნება არ მომხდარა: მეფე მუვეათალიმ უმცროსი ძმა სარდლად და სამეფო კარის მეშველთა მთავრად დანიშნა, თანაც საპარათავად საკმაოდ დიდი ტერიტორია — „ზემო ქვეყანა“ ჩააბარა. ყოველივე ამას ქალღმერთ იშთარის, ხათუსილის მფარველი ღვთაების. დიდი კეთილგანწყობა „გამოუწყვეია“.

ამ ქალღვთაებას ხათუსილისათვის თურმე ბავშვობიდანვე მიუქცევია ყურადღება, როდესაც მას მეფე მურსილისათვის მიუშართავს: „ხათუსილის წლები მოკლეა. იგი ვერ იცოცხლებს. ამიტომ გადმომეცი მე იგი. დაე, იგი ჩემი ქურუმი იყოს! მაშინ იგი ცოცხალი დარჩება!“ გახდა რა იშთარის ქურუმი, ხათუსილის ამის შემდეგ „აღარ მოჰკლებია ამ ღვთაების მზრუნველობა და მხარდაჭერა. სწორედ იშთარის წყალობით განვლო თურმე ხათუსილიმ ბრწყინვალე კარიერა — სამეფო კარის მეჯინიბიდან დიდ მეფემდე. სწორედ მისი დახმარებით ჩაუდენია მას სრულიად „კანონიერი“ მოქმედება — სამეფო ტახტის მიტაცება.

ამას გვარწმუნებს ხათუსილის მიერ შედგენილი ე. წ. „ავტობიოგრაფია“. რომელიც უფრო მეტად ხათუსილის „აღსარებას“ წააგავს,

ვიდრე აღნიშნული ქანრის ნაწარმოებს. მისი ავტორი ცდილობს თავი გაიმართლოს ჩადენილი დანაშაულის — უზურპაციის გამო.

მას შემდეგ, რაც მუვათალი ეგვიპტელებთან ბრძოლის წინ „ქვემო ქვეყანაში“ გადასახლდა ღვთაებებითურთ, ხათუსილის მან ჩააბარა ქვეითი ლაშქარი და საბრძოლო ეტლები, რომელთა დახმარებით ხათუსილიმ წარმატებით მოიგერია მტრის, განსაკუთრებით, ქასქების თავდასხმები, არაერთხელ თვითონაც გაილაშქრა მტერზე და თავი გამოიჩინა როგორც კარგმა სარდალმა. ამ სამხედრო წარმატებების აღსანიშნავად „დიდ მეფეს“ მისთვის სამართავად გადაუცია კიდევ არაერთი „ქვეყანა“, მათ შორის, ხაქფისას ქვეყანაც და, ხათუსილი „ხაქფისას მეფედ“ გამოუცხადებია. ეგვიპტესთან ბრძოლის დროს კი იგი თავისი ლაშქრით ეახლა ძმას და დიდ ბრძოლაშიც მიიღო მონაწილეობა. ჩრდილოეთ სირიიდან დაბრუნებისას ხათუსილი ქიცუვათნას ქალაქ ლავაცანთიაში შეჩერდა, სადაც დაქორწინდა ამ ქალაქის ქურუმის ქალიშვილზე — ფულუხეფაზე, რომელიც „ხაქფისას ქვეყნის დედოფალი“ გახდა.

წარმატებით გაბრუნებულ ხათუსილის, როგორც ჩანს, გაუჩნდა განზრახვა გამხდარიყო „დიდი მეფე“. მის ამ ზრახვას აღვივებდა ისიც, რომ მეფე მუვათალის არ ჰყავდა უფლისწული (ალბათ, არც ქალიშვილი). მაგრამ მუვათალის გარდაცვალების შემდეგ ხათუსილიმ ერთგვარ ფანდს მიმართა: ხათის სამეფო ტახტზე ჯერ აიყვანა მუვათალის ვაჟიშვილი არაკანონიერი ცოლისგან — ურხითესუფი, იგივე მურსილი III, შემდეგ კი დაიწყო მის წინააღმდეგ ფარული მოქმედება. ურხითესუფს გაუგია რა იშთარის „კეთილგანწყობა“ ხათუსილის მიმართ, რაც უნდა გამოსატულიყო დიდი მეფისადმი მიმართულ საწინააღმდეგო მოქმედებაში, ხათუსილი მას „მტრად გაუხდია“, ნერიქისა და ხაქფისას გარდა მისთვის ყველა „ქვეყანა“ ჩამოურთმევია, და დაუმცირებია. შვიდი წელი უთმენია ხათუსილის. მხოლოდ მას შემდეგ, რაც დიდ მეფეს მისთვის ხაქფისაც და ნერიქიც ჩამოურთმევია, იშთარის „დახმარებითვე“ ხათუსილის შეუპყრია ურხითესუფი და ნუხამეს ქვეყანაში (ჩრდილოეთ სირიაში) გადაუსახლებია. ასე დამთავრდა ბიძისა და ძმისწულის ქიშპობის „დღეტი“, ხათუსილი კი, ვითარცა „ხათის დიდი მეფე“ ხათუსილი (III), ავიდა ხათის სამეფო ტახტზე, რომელსაც იგი, უკვე „ხათის დიდ დედოფალ“ ფულუხეფასთან ერთად, კარგა ხანს მართავდა. ეს იყო ერთადერთი შემთხვევა უზურპაციისა, რომელსაც ადგილი ჰქონდა თელიფინუს შემდეგ. მომავალში იგი აღარ გამეორებულა.

ხათის „დიდი მეფის“ ტახტზე ხათუსილი III-მ გამოავლინა სახელმწიფოს მართვის დიდი ნიჭი. იგი იყო უნარიანი მმართველი უზარმაზარი სამეფოსი, საკმაოდ მოცილობილი სარდალი, ხათის ქურუმ-



თა შორის უზენაესი. მისი მეფობის დროს ხათის ქვეყანაში დამკვიდრდა მშვიდობიანობა, რაც მოხმარდა სახელმწიფოს გაძლიერებას, დედაქალაქი ხათუსა და მტრისგან გაჩანაგებული ხათის სხვა ქალაქებში საფუძვლიანად იქნა აღდგენილი, მომრავლდა ქვეყნის დოვლათი, მოწესრიგდა სამეფო არქივები, სადაც გადაწერეს უძველეს ტექსტთა ასლები, დედოფალ ფულუხეფასთან ერთად გამოცემულ იქნა ახალი რელიგიური თუ ადმინისტრაციული ხასიათის დადგენილებანი.

ხათუსილი III შორსმკვერტელი პოლიტიკოსიც აღმოჩნდა. ხათის საგარეო პოლიტიკის ერთ-ერთი მნიშვნელოვანი საკითხი — ეგვიპტე-ხათის ურთიერთობა მან მშვიდობიანი გზით მოაწესრიგა.

გადაწყვიტა რა ბოლო მოეღო ეგვიპტელებისა და ხეთების კონფლიქტს სირიაში, ხათუსილიმ სპეციალური წარმომადგენლები გაგზავნა ეგვიპტეს, რათა ფარაონისთვის ემცნოთ, რომ ხეთების მხარე მზად იყო საზავო ხელშეკრულების დასადებად სირიაში მოსალოდნელი კონფლიქტების თავიდან აცილების მიზნით. ეგვიპტესთან დამეგობრება სხვა მიზეზითაც იყო ნაკარნახევი. ჩრდილოეთ მესოპოტამიიდან არასახარბიელო ამბები მოდიოდა: გაძლიერებული ასურეთი შუა ევფრატის მხარეში მდებარე ტერიტორიებს უტევდა, რის გამოც ხეთებისა და ასურეთის შეტაკება გარდუვალი ხდებოდა. ეგვიპტის გახდომა ხათის მოკავშირედ კი აღმოსავლეთიდან მოსალოდნელ საფრთხეს შეანელებდა.

ხათუსილის მხრიდან შემოთავაზებული ზავი რამსეს II-მ უყოყმანოდ მიიღო. მისი მეფობის 21-ე წელს, დაახლოებით ძვ. წ. 1296 წ. (სხვა ქრონოლოგიით — 1269 წ.), წინა აზიის ორ დიდ სახელმწიფოს მმართველთა შორის დაიდო საზავო ხელშეკრულება, რომელიც ერთ-ერთ უძველეს სამშვიდობო ხელშეკრულებადაა აღიარებული. ხეთების მხრიდან იგი აქადურ ენაზე ყოფილა შედგენილი, მისი ტექსტი, თიხის ფირფიტებზე ნაწერი, პ. ვინკლერმა აღმოაჩინა ბოლაზქოიში (იხ. ზემოთ. სწორედ ამ ხელშეკრულების აქადური ვერსიის ერთ-ერთი ფრაგმენტი დაცულია ა. პუშკინის სახ. სახვითი ხელოვნების მუზეუმში მოსკოვში. იგი 1921 წ. გამოაქვეყნა გამოჩენილმა ასირიოლოგმა ვ. შილეიკომ). იგივე ვერსია, რამსესს რომ გადასცეს, ვერცხლის ფირფიტაზეც ყოფილა ამოკაწრული (არ არის გამორიცხული, რომ იგი ხეთურ ენაზე ყოფილიყო დაწერილი). მან ჩვენამდე არ მოაღწია. თითქმის იდენტური ეგვიპტური ვერსია კი, ეგვიპტური იეროგლიფებით შედგენილი, შემორჩენილია რამსესუმისა და კარნაკის ტაძრების კედლებზე.

პარიტეტის პრინციპზე აგებული ხელშეკრულების პრეამბულაში ზოტბა ესხმება ხათისა და ეგვიპტის მბრძანებლებს, რომლებიც თა-

ნასწორ ხელშეწყობად არიან გამოცხადებული. ხელშეკრულება შეფასებულია როგორც ხეთებსა და ეგვიპტეს შორის სამარადისო მშვიდობისა და ძმობის დოკუმენტი. იგი გამორიცხავს ყოველგვარ შეტაკებას ორი დიდი ქვეყნის მმართველთა შორის. სირიის მიმართ, როგორც ჩანს, ალიარებულ იქნა „სტატუს-კვო“ — ძალაში დარჩა წინანდელი დაყოფა სირიისა „გავლენის სფეროებად“: ეგვიპტელები კვლავინდებურად იბატონებდნენ სამხრეთ სირიაში, ხეთები კი — ჩრდილოეთ სირიაში. ხელშეკრულება ითვალისწინებდა ურთიერთდაცვის საკითხს — მხარეთა ერთმანეთისადმი დახმარებას, თუკი ამას საჭიროება მოითხოვდა. სპეციალური მუხლი ეხებოდა პოლიტიკურ ლტოლვილებს, თანაც საყურადღებო განმარტებით: ეგვიპტიდან ხათის ქვეყანაში გაქცეული ხეთების მეფეს ფარაონისთვის უნდა დაებრუნებინა, ხოლო ხათიდან ეგვიპტეში გამოქცეული ფარაონს ხეთების მეფისთვის უნდა გადაეცა. ორივე შემთხვევაში გათვალისწინებული იყო პირობა — ლტოლვილი, ისევე როგორც მისი ოჯახის წევრი, არ უნდა დასჯილიყო... „თავისი შეცდომისთვის“: მისთვის არ უნდა დაეთხარათ თვალები, არ უნდა მოექრათ ყურები, ბაგეები, ფეხები და ა. შ. ხელშეკრულების დასკვნით პარაგრაფში მოცემული იყო წყევლა და ლოცვა იმათ მიმართ, ვინც ხელშეკრულებას პატივს არ სცემდა, ანდა განადიდებდა. მონუმობილი იყო ხათისა და ეგვიპტის ათასი ღვთაება.

ხელშეკრულებამ ეგვიპტელ და ხეთ ხალხებს ახლო აღმოსავლეთის ერთ-ერთ მნიშვნელოვან რეგიონში მრავალი წლის მშვიდობიანობა მოუტანა. ათიოდე წლის შემდეგ ეგვიპტე-ხათის მეგობრობა კიდევ უფრო განმტკიცდა: რამსესმა ცოლად შეირთო ხათუსილი III-ის ასული, რომელიც ფარაონს პირველ ცოლად მიუჩნევია. აბუსიზბელის ტაძრის ერთ სტელაზე უკვდავყოფილია ლამაზი ხეთი პრინცესას მოსვლა ეგვიპტეში: სტელაზე ერთად არიან გამოსახული ფარაონი, ხათის მეფის ასული და ხათუსილი.

ეგვიპტე-ხათის ეს ხელშეკრულება და დინასტიური ქორწინება, რომელმაც დააკვირგვინა იმდროინდელი ორი დიდი ხალხის მეგობრობა, წარმოადგენდა ხეთების სამეფოს აპოგეას. ამის შემდეგ ხეთების სიძლიერე თანდათან ქრება.

ჰეპა-ჰუხილისწინა მშუდროება:

თუთხალია IV და მისი მემკვიდრენი

ხათუსილის მემკვიდრის — თუთხალია IV-ის დროს ერთგვარად შეფერხდა ხათის წინა მმართველთა დიდი საგარეო პოლიტიკის წარმოება. შესაძლოა, ამის მიზეზი იყო ის, რომ ხათის ვასალური

ქვეყნები თუთხალიას მიმართ ჭერ კიდევ ერთგულად იყვნენ განწყობილი, განაგრძობდნენ რა ვასალური ხელშეკრულებებით გათვალისწინებული პირობების შესრულებას.

სამაგიეროდ მშვიდობიანობის პერიოდი თუთხალიამ სხვა სფეროში გამოიყენა. ვითარცა სახელმწიფოს უზენაესი ქურუმი, მან სათანადო რელიგიური რეფორმები გაატარა მთელს ქვეყანაში. ხანგრძლივი ომების შემდეგ საჭირო უნდა ყოფილიყო, პირველ რიგში, სატაძრო მეურნეობის ეკონომიკურად მომძლავრება, სატაძრო მიწის ფონდის გაფართოება. ეს უნდა მომხდარიყო ტაძრებისათვის მიწის ახალი ნაკვეთების გამოყოფის, ან შეწირვების ხარჯზე. თუთხალიას დროს გაძლიერდა კულტის მომსახურება, შეადგინეს ე. წ. „საინვენტარო“ და „სადღესასწაულო ტექსტები“ იმ მიზნით, რომ შეემოწმებინათ ტაძრების კუთვნილი ინვენტარის დაცვის მდგომარეობა, საჭიროების შემთხვევაში აღედგინათ დანგრეული ტაძრები და ძველი კერპები, აეგოთ ახალი ტაძრები და ღია კერპთსალოცავეები, ზუსტად დაეცვათ რელიგიურ დღესასწაულთა ჩატარების დრო და რიტუალთა მიმდინარეობა და ა. შ. როგორც ვარაუდობენ, იაზილიქაიას რელიეფური გამოსახულებანი კლდეზე სწორედ თუთხალია IV-ის დროს უნდა ამოეკვეთათ (ამ გამოსახულებათა შორის აღბეჭდილია თვით ეს ხეტების მეფეც). მასვე ეკუთვნის ხათუსას „ბიბლიოთეკის“ შემდგომი განახლება — ძველ ლურსმულ ტექსტთაგან ახალი ასლების დამზადება, ახალი ტექსტების შედგენა და სხვ.

მაგრამ თუთხალიამ თავისი მეფობა სულ მშვიდობიან ვითარებაში როდი გაატარა. ჭერ იყო და სამეფოს აღმოსავლეთ პერიფერიაზე ასირიელებმა შემოუტიეს ეფრატისპირა ქვეყნებს, რომლებიც ხეტებს მორჩილებდნენ. მოაღწიეს მალატიამდე, სადაც ისინი შეებრძოლნენ ხეტებს. ამის შემდეგ ისუვას ქვეყანაც ასირიელების გავლენაში აღმოჩნდა, რაც მძიმე დანაკლისი იყო ხეტებისათვის. ხეტებმა მოახერხეს ასირიელთა შეჩერება მხოლოდ ქარხემიშთან, რომელიც კვლავ ხეტების ერთგული რჩებოდა.

შემდეგ კი ხეტებს მოუხდათ კუნძულ კვიპროსის (ალასიას) შემოტკიცება. თუთხალია უნდა გალაშქრებულყო კვიპროსის წინააღმდეგ, რომელიც ხათუსილი III-ის დროიდან ხეტების სამფლობელოდ განიხილებოდა. კვიპროსი კვლავ დამორჩილდა ხეტებს, თუმცა დროებით. ამავე ხანებში თუთხალია ურთიერთობებს აწესრიგებს ამურუსთან (ჩრდილოეთ სირიაში), რომლის მმართველ შაუშგამუევასთან იგი ხელშეკრულებას დებს.

თუთხალია IV-ის მეფობის დროიდან ნახლდება ანატოლიის დასავლეთში მდებარე ქვეყნების საგრძნობი გააქტიურება, რაშიც დიდ როლს თამაშობდა, როგორც ჩანს, არა მარტო არცაეა, არამედ ახია-

ვაც. სათანადო საპასუხო მოქმედებანი კი ხათის მხრიდან არ უნდა განხორციელებულიყო.

ხათის შემდგომი მმართველის — არნუვანდა III-ის მეფობის დროს ხათის სამხედრო ძლიერება კიდევ უფრო შესუსტდა. ამ ხანებში ასირიელები კვლავ უტევენ ხეთების სამფლობელოებს აღმოსავლეთ პერიფერიაზე. თუქულთი-ნინურთა I-მა თავისი ლაშქრით გადალახა ევფრატი და ააოხრა იქვე მდებარე რაიონები, საიდანაც მან, როგორც თვითონ იკვეხნის, „28800 მცხოვრები ხეთების ქვეყნისა მდ. ევფრატის იქეთა (ე. ი. დასავლეთი) მხრიდან“, ასურეთში გადმოსახლა (მკვლევართა ვარაუდით, დეპორტირებულთა რაოდენობა გაზვიადებულია). ანატოლიის სამხრეთ და დასავლეთ რაიონებში კი მდგომარეობა კიდევ უფრო უნდა დაძაბულიყო, მაგრამ არ ვიცით, რა განახორციელეს ხეთებმა დასავლეთიდან მომავალი საფრთხის თავიდან ასაცილებლად.

ქვეყნის შიგნით კი ხათის მცხოვრებთა შორის რაღაც უკმაყოფილება უნდა არსებულიყო, რაც გამოიხატა „ამბოხებაში“, ხეთური ტექსტები რომ აღნიშნავენ. ეს თითქოს იმით ყოფილა გამოწვეული, როგორც წყაროები დასძენენ, რომ არნუვანდა III-ს არ ჰყოლია ვაჟიშვილი, სამეფო ტახტზე რომ ასულიყო. მაგრამ ეს უკმაყოფილება ყველაზე მეტად გამოწვეული უნდა ყოფილიყო ხათის ქვეყნის ეკონომიკური დაძაბუნებით, დიდი სამხედრო ლაშქრობების შეწყვეტით, რის გამოც აღარ ხდებოდა ქვეყანაში მდიდარი ალაფის შემოტანა და მრავალრიცხოვანი დეპორტირებულების გადმოსახლება.

ხეთური წყაროების ცნობა, რომლის მიხედვით არნუვანდა III-ს ვაჟიშვილი არ გააჩნდა, დასტურდება იმით, რომ ამ მეფის გარდაცვალების შემდეგ ხათის სამეფო ტახტზე ავიდა მისი ძმა სუფილულიუმა II, ხეთურ ტექსტებში ს უ ფ ი ლ უ ლ ი ა მ ა ს სახელით ცნობილი (უზურბაციის შესახებ ირიბი ცნობაც კი წყაროებში არ ასახულა). მან ილაშქრა ჩრდილოეთ შუამდინარეთში და, შესაძლოა, კვლავ შემოიშრტკიცა ისუვა. რამდენადმე განამტკიცა სირიელი ვასალების ერთგულება ხათისადმი. მას მოუხდა კვლავ ამბოხებულ ალასიაში გალაშქრება, თანაც ზღვით: „...და მე სწრაფად ზღვას მივაშურე. ალასიის ქვეყნის ხომალდები ჩემს წინააღმდეგ საბრძოლველად სამჭერ ზღვით გამოემართნენ. ისინი მე გავანადგურე, ხომალდები კი ხელთ ვიგდე და შუა ზღვაში დაწვი...“ (ამის შემდეგ იგი შეებრძოლა „ალასიელ მტრებს“, როგორც ჩანს, თვით კუნძულზე). დამარცხებულ ალასიაზე სუფილულიუმა II-მ ააგო დიდი ხეთური სამლოცველო („ხექურ“), რომელსაც მიამაგრა 700 დასახლება, გაანთავისუფლა რა იგი სახელმწიფო ბეგარისაგან. მაგრამ გაურკვეველი რჩება, ყოველივე ამას რა

მოჰყვა შედეგად. დასავლეთ მცირე აზიაში დაწყებული დიდი მოძრაობის ტალღას ალასიამდეც უნდა მიედნია. როგორც ვარაუდობენ, მიუხედავად ზღვაზე მოგებული შეტაკებისა (იგი ხეტების პირველი ბრძოლაა ზღვაზე, ხეტურ წყაროებში აღწერილი), საბოლოო ჯამში ხეტებს უნდა დაეკარგათ ალასია, რომელსაც, შესაძლოა, ზურგს უმაგრებდა უგარიითი (ჩრდილოეთსირიული ქალაქ-სახელმწიფო ხმელთაშუა ზღვის აღმოსავლეთ სანაპიროზე, თანამედროვე რას-შამრას ადგილას). სულ მალე დასავლეთიდან დაიძრა მძვინვარე ქარიშხალი, რომელმაც მიწა-თან გაასწორა არა მარტო ხათი, არამედ ყველა მისი ვასალური თუ მტრული ქვეყანა ანატოლიის უმეტეს ნაწილებში, ისევე როგორც ჩრდილოეთ სირიაში.

ხათის აღსასრული:

სხვადა. „ზღვის ხალხები“. ჟანკაბი

ანატოლიის სამხრეთსა და დასავლეთში ხათის საწინააღმდეგო მოქმედებანი ამ რეგიონში მცხოვრებ ტომთა მხრიდან, როგორც ზემოთაც აღინიშნა, უფრო ადრეულ ხანებშიც შეინიშნებოდა. არცაეას ქვეყნები საერთოდ ხათის ვასალებად ითვლებოდნენ. მაგრამ ხელსაყრელი მომენტის გამოჩენისთანავე ისინი მეზობელ ხეტებს მაშინვე განუდგებოდნენ და მათ მტრად ხდებოდნენ. ხოლო მას შემდეგ, რაც ხეტური წყაროების თანახმად, ახლო აღმოსავლეთის პოლიტიკურ ასპარეზზე გამოჩნდა ახიავა (ძვ. წ. XV ს-დან), მომავალი შემოტევების საფრთხე ხეტებს დასავლეთშიც შეექმნათ.

ხეტური წყაროების მიხედვით, ახიავა მოიხსენიება მცირე აზიის ისეთ ქვეყნებთან კავშირში, როგორიცაა არცაეა, მდ. სეხას ქვეყანა, ლუკა. ციფასლა, ასუვა და მილავანდა (მცირე აზიის გარეთ ახიავას ურთიერთობა ჰქონდა კუნძულ ალასიასთან). ხათის ქვეყანას ახიავა უშუალოდ არ ესაზღვრებოდა, ხეტების არცერთ მმართველს არ ულაშქრია ახიავაში, ისევე როგორც ახიავას რომელიმე მეფეს — ხათში.

ახიავასა და ხათის ქვეყანას შორის არსებული ურთიერთობანი დადასტურებულია ხეტურ წყაროებში „შუა სამეფოს“ დროიდან. ხეტების მმართველები ანგარიშს უწევდნენ ახიავას მეფეს და თავის ტოლად მიიჩნევდნენ (ერთ-ერთი ხეტების მეფე მას „ჩემს ძმას“ უწოდებდა). ახიავას და ხათის ინტერესები ძირითადად ქ. მილავანდაში ხვდებოდა. ამ ორ ქვეყანას ერთმანეთში ძირითადად მშვიდობიანი ურთიერთობა ჰქონდა, რაც ზოგჯერ ირღვეოდა ახიავას აქტიურობის გამო. ახიავა ცდილობდა მომავარებულები ანატოლიის სამხრეთსა და

დასავლეთ ნაწილში, ისევე როგორც აღასიაზე. ამას არ შეეძლო არ დაეძაბა ურთიერთობა ხეთებთან, მით უმეტეს, რომ ხეთების ზოგიერთ ვასალურ ქვეყანაში, მაგალითად, ციფასლაში, საკმაოდ მოურიდებლად მოქმედებდა „ახიას (იმავე ახიავას) კაცი“, ე. ი. ახიავას მმართველი, სახელად ათარისია (მადლეათას დროს).

მიუხედავად იმისა, რომ „ახიავა“ სახელწოდებას მკვლევრები ხშირად აიგივებენ ჰომეროსის Ἄχαιε -სთან, რომელიც ძველ ბერძენ ტომთა კავშირის აღმნიშვნელია, ახიავას სამეფოს ადგილმდებარეობის საკითხში დღესაც არ არის აზრთა ერთიანობა. მკვლევართა ცდები — ახიავა მოათავსონ კუნძულ როდოსზე, კვიპროსზე, კრეტაზე თუ მცირე აზიაში (მის სამხრეთ ან დასავლეთ ნაწილში), არ დამთავრებულა წარმატებით. ბევრი მიმდევარი გაუჩნდა ჯერ კიდევ ე. ფორერის მიერ 1924 წ. წამოყენებულ დებულებას მიკენურ საბერძნეთთან ახიავას გაიგივების შესახებ, რაც ყველაზე უფრო ახლოს უნდა იყოს სინამდვილესთან, თუმცა მეცნიერთა ნაწილი მაინც იკავებს თავს ამ გაიგივებისაგან.

მკვლევრებმა თავიდანვე შენიშნეს, რომ ხეთური წყაროების „ახიავა“ დასაკავშირებელია ფარაონ მერნეპტაჰის დროინდელ (დაახლოებით ძვ. წ. 1220 წ.) ეგვიპტურ ტექსტებში მოხსენიებულ ეთნიკურ სახელწოდებასთან „აკა-(ი)ვაშა“ (კვშ), რომელიც იმავე ეგვიპტური წყაროების ე. წ. „ზღვის ხალხების“ რიცხვში შედიოდა. ეს „ხალხები“ თარეშობდნენ მთელს ხმელთაშუა ზღვისპირეთში და შიშის ზარს ჰგვირდნენ სანაპიროთა ბინადართ. როგორც ვარაუდობენ, ისინი წარმოსდგებოდნენ ხმელთაშუა ზღვისპირეთის, ძირითადად ეგეოსის, კუნძულებიდან და მატერიკული საბერძნეთის სამხრეთიდან. მათ შორის იყვნენ მცირე აზიის დასავლეთი სანაპიროს მცხოვრებნიც.

ეგვიპტური წყაროების მიხედვით, „ზღვის ხალხების“ შემადგენლობაში შედიოდნენ შ რ დ ნ (— ზოგჯერ აიგივებენ კუნძულ სარდინიაში მცხოვრებ ს ა რ დ ე ბ თ ა ნ, ზოგჯერ კი — ლიდის ს ა რ დ თ ა ნ), შ კ რ შ (— შესაძლოა, კუნძულ სიცილიის მცხოვრებნი. ს ი კ ე უ ლ ე ბ ი), 'კ ე შ (ე. ი. ბერძენი-აქეელები, იხ. ზემოთ), რ კ ა ნ უ ლ კ (— ხეთური წყაროების ლ უ კ ა, სამხრეთ-დასავლეთ მცირე აზიაში, შესაძლოა, მოგვიანო ხანის ლ ი კ ი ე ლ ე ბ ი), ტ რ შ (— ვარაუდით, ტირსენები, ეტრუსკთა წინაპარნი) და სხვანი.

ძვ. წ. XIII—XII ს-ის მიჯნაზე „ზღვის ხალხთა“ დიდ ტალღა, რომელიც უფრო ხალხთა გადასახლების ხასიათს ატარებდა, შემოიჭრა მცირე აზიის დასავლეთიდან და მოულოდნელად გადაუარა მთელს დასავლეთ და ცენტრალურ ანატოლიას, შემდეგ კი დაიძრა სამხრეთი-საკენ და მიაღწია ეგვიპტეს, სადაც მათ განიცადეს მარცხი. მოემარ-

თებოდნენ რა მთელი ალალით, ქალებით, ბავშვებით, გადმოსახლებულნი გზადაგზა ყველაფერს ანადგურებდნენ. ამ მოახლოებული საფრთხის რაიმე მათუწყებელი ხეთურ წყაროებში არ აისახა (ალბათ, მისი მოულოდნელობის გამო). ახიავა უნდა გამხდარიყო დასავლეთიდან კარს მომდგარი ამ კატასტროფის ერთ-ერთი მონაწილე.

რამსეს III-ის მეფობის დროინდელ ეგვიპტურ წყაროებში (ძვ. წ. XII ს-ის დამდეგი) ასეა აღწერილი შემოსევის ხასიათი: „მათ ვერ გაუმკლავდა ვერც ერთი ქვეყანა, თვით ხეთაც: კ ე დ ე (— შესაძლოა, იგივე კ დ ვ დ ანუ ქიცუვათნა/ქიცვათნა), ქარხემიში, არცავა, ალასია გაანადგურეს. შუა ამურუში (— იგულისხმება სირია) მათ კარვები მოაწყეს, მისი მცხოვრებნი გაელიტეს, თითქოს ისინი არც არსებობდნენ. შემდეგ ისინი დაიძრნენ ეგვიპტისკენ... მათი მოკავშირენი იყვნენ: ფ რ ს თ (— ფილისტიმელები, რომელთაც ისტორიული ტრადიცია განიხილავს როგორც კრეტადან, ეგვიპტური წყაროების „ქაფთორიდან“, გამოსულებს), ჩ კ რ, შ კ რ შ, დ ნ (— როგორც ვარაუდობენ, დანაელები. ე. ი. ბერძენი-აქელები) და ვ შ შ...“ (აქ ჩამოთვლილთაგან ფილისტიმელები და ჩ კ რ მოგვიანებით დასახლებულან პალესტინაში, რომლის სახელწოდება მომდინარეობს ფ რ ს თ დან, ხოლო დანაელები — კილიკიაში).

ამგვარად, ძვ. წ. 1200 წლისათვის, სუფილულიუმა II-ის, ან მისი მემკვიდრის მეფობის დროს, ოდესღაც მრისხანე ხათი თავისი დედაქალაქითურთ სამუდამოდ დაეცა. კატასტროფა იმდენად მოულოდნელი ყოფილა, რომ ხათუსას მწერლებმა ვერც მოასწრეს რაიმე ცნობის დაფიქსირება. მთელი დედაქალაქი მიწასთან გაასწორეს. ხანძარმა შთანთქა ხათუსას სასახლე და ტაძრები ისე, რომ დედაქალაქის ნანგრევებზე აღარავინ დასახლებულა. საუკუნეებს შემორჩათ მხოლოდ ნანგრევებით დაფარული, ცეცხლისგან გამაგრებული თიხის ფირფიტები, რომლებიც დიდი ხნის შემდეგ — ისიც, მეცნიერთა დაზნარებით — „ალაპარაკდნენ“ და ხათი კვლავ „გააცოცხლეს“.

მაგრამ მარტო „ზღვის ხალხების“ შემოსევა არ უნდა გამხდარიყო ხათის აღსასრულის მიზეზი. ქვეყნის შიგნით გამეფებული კრიზისით დაუსტებული (ამის შესახებ იხ. აგრეთვე ქვემოთ) ხათისთვის მომაკვდინებელი დარტყმა უნდა მიეყენებინათ ქასქებს — მათაც უნდა „შეეტანათ“ თავიანთი „წვლილი“ ხათუსას დანგრევაში, რაც მათ აღრე არაერთხელ მოუხდენიათ. ხეთების სამეფოს არსებობის მთელს მანძილზე ქასქები დაუძინებელი მტრები იყვნენ მათი ძლიერი მეზობლებისა. მიუხედავად ქასქებთან მრავალგზის დადებული ხელშეკრულებებისა, ხეთებმა ვერასგზით დაიმორჩილეს პონტოს მთებში მცხოვრები ეს ტომები, რომელთა ეთნიკური ვინაობა საბოლოოდ დღესაც დაუდგენელია. ეთნიკურად უკავშირებენ რა მათ ჩრდი-

ლო-დასავლეთ კავკასიაში მობინადრე აფხაზურ-ადიღეურ ტომებს, მკვლევართა ნაწილი ახლა სამართლიანად ვარაუდობს, რომ ქსნების დიდი ტომობრივი გაერთიანება პოიცავდა ქართველური, დასავლურ-ქართული (მეგრულ-ჭანური) წარმოშობის ტომებსაც. ასე რომ. თუკი ეს უკანასკნელი ვარაუდი გამართლდება, მაშინ გაირკვევა, რომ ხათის დაცემაში ქართველური წარმოშობის ტომებსაც მიუღიათ მონაწილეობა.



## IX

### ხეთების სამეურნეო საქმიანობა და საზოგადოებრივი ურთიერთობანი

ხათის საზოგადოებაში სასოფლო-სამეურნეო წარმოება, უშუალოდ დამოკიდებული გეოგრაფიულ და კლიმატურ ფაქტორებზე, რაც განსაზღვრავდა ხეთური საზოგადოების სპეციფიკურ თვისებებსა და მიმართულებას, როგორც ცნობილია, არ ემყარებოდა ირიგაციულ სისტემას, თუმცა ხეთები სრულიად არ უგულებელყოფდნენ ხელოვნურ მორწყვას. მდინარეებში წყლის უკმარისობა, მდინარის ხეობათა სივიწროვე და ცენტრალური მცირე აზიის მთიანი რელიეფი საშუალებას არ იძლეოდა ფართოდ განვითარებულყო სარწყავი სისტემა, ისე, როგორც ეს იყო ირიგაციაზე დამყარებულ საზოგადოებებში (შუამდინარეთი, ეგვიპტე, ინდოეთი, ჩინეთი).

მაგრამ ცენტრალურ ანატოლიაში მოსახლე ტომთა განსახლების ტერიტორია უვარგისი ბაზა როდი იყო მიწათმოქმედებისა და მესაქონლეობის, ისევე როგორც ხელოსნობის განვითარებისათვის. სასოფლო-სამეურნეო წარმოება თითქმის მთლიანად ნთქავდა ხეთი მოსახლეობის მშრომელი ნაწილის შრომას და წარმოადგენდა ცენტრალური ანატოლიის მთელი საზოგადოების არსებობის საფუძველს.

მიწათმოქმედება და მესაქონლეობა.

ხელოსნური წარმოება და ვაჭრობა

ხათის ქვეყანაში მიწათმოქმედებამ მიაღწია იმ დროისათვის მნიშვნელოვან განვითარებას და გადაიქცა მრავალდარგიან მეურნეობად მეზღლეობის, მევენახეობის, ზეთოვანი კულტურებისა და სხვათა წარმოებით. არსებობდა სულ სხვადასხვა სახის მიწის ნაკვეთები თავიანთი დანიშნულებისდა მიხედვით (მინდვრები, ბაღები, ვენახები, მდელოები, საძოვრები, ტყეები, მთა-გორიანი ნაკვეთები, საბოსტნეები, მინდვრები საბაღჩე კულტურებისათვის და ბოსტნეულათვის და ა. შ.). ყურადღება ექცეოდა მიწის ნაკვეთთა განლაგებას, ნიადაგის

ჩასიათს. წყლის სიახლოვეს, მორწყვის შესაძლებლობას, კულტივირებულ მცენარეთა სახეებს, აგებდნენ მცირე ჯებირებს, არხებს, წვიმის წყლის შესანახ რეზერვუარებს. სახელმწიფო ხელისუფლება ზრუნავდა ამგვარ ნაებობათა აშენებაზე, შეკეთებაზე, გამოყენებაზე, გასუფთავებასა და დაცვაზე და კრძალავდა მათ ნგრევას. მიწის დამუშავება ხდებოდა თოხის, ნიჩბისა და (ზოგჯერ ლითონის) სახნისიანი კუთნით, რომელშიც ხარებს აბამდნენ.

სასოფლო-სამეურნეო კულტურების საფუძველი იყო პურეული მარცვლოვანები (ქერი, რომელიც განიხილებოდა როგორც ღირებულების საზომი, ხორბალი, ემერი, სპელტა, ბარდა, ლობიო). დიდი ყურადღება ექცეოდა საბალო კულტურებს (ხეხილი, ზეთის ხილის ხე და სხვ.). ხეთური კანონების დიდი ნაწილი ეძღვნება უშუალოდ სასოფლო-სამეურნეო კულტურებსა და შეიცავს სხვადასხვა სასჯელს მათი დაზიანებისათვის.

სოფლის მეურნეობის მნიშვნელოვან დარგად ხეთებში ითვლებოდა მესაქონლეობა. ცხოველებს ისინი ყოველთვის ჰყოფდნენ მსხვილ (ხარები, ძროხები, ჯორები, სახედრები და სხვ.) და წვრილფეხა (ცხვარი, თხა, ღორი და ა. შ.) საქონლად. განსაკუთრებით გამოჰყოფდნენ ცხენებს, რომლებიც დიდ როლს თამაშობდნენ როგორც მეურნეობაში, ასევე სამხედრო საქმეში: საომარი ეტლების გამოჩენა და ფართო გამოყენება დაკავშირებული იყო სწორედ მეცხენეობის განვითარებასთან. ბრძოლებში გამოსაყენებელი ცხენების წვრთნას ხეთები აწარმოებდნენ იმ მეთოდით, რომელიც ხურიტულ სახელმძღვანელოში იყო აღწერილი. ეს სახელმძღვანელო ხეთურ ენაზე გადათარგმნეს ხურიტი მეცხენის — კიკულის სახელმძღვანელოდან.

ხეთები საქონელს ჰყოფდნენ, აგრეთვე, ასაკის, ჯიშისა და დანიშნულების მიხედვით, ამ დაყოფას კი საფუძვლად ედო ისეთი „ერთეული“, როგორიცაა ხარი ან ცხვარი. ეს უკანასკნელი წარმოადგენდა ღირებულების საზომს და უტოლდებოდა „ფულად“ ერთეულს — 1 სიკლ ვერცხლს. დიდი ფასი ჰქონდა სახნავად გამოსაყენებელ ხარს, ისევე როგორც სანაშენო ხარსა და სანაშენო ცხენს, რომელთა მობარკვისათვის დადგენილი იყო უზარმაზარი კომპენსაცია (10—15 ჯერადი ანაზღაურება). საერთოდ, საქონელს ხეთებთან კანონი იცავდა. საქონლის ქურდობისთვის, ისევე როგორც საქონელთან დაკავშირებული სხვა დანაშაულისათვის, ისჯებოდნენ საკმაოდ მკაცრად.

ხათის ქვეყანაში ძლიერ იყო განვითარებული მეფრინველეობა და მეფუტკრეობა. მისდევდნენ აგრეთვე მეთევზეობასა და ნადირობას.

სოფლის მეურნეობის სხვადასხვა დარგის განვითარებას დიდი მნიშვნელობა ჰქონდა მოსახლეობის ეკონომიკური კეთილდღეობისათვის და მის მოთხოვნილებათა დაკმაყოფილებისათვის. მიწათმოქმე-

დებისა და მესაქონლეობის პროდუქტები იხმარებოდა არა მარტო ხათის მცხოვრებთა საჭიროების დასაკმაყოფილებლად (მათ შორის, რელიგიურ სფეროში სხვადასხვა რიტუალებისა და შეწირვებისთვის), არამედ სასაქონლო წარმოებისთვის, საშინაო და საგარეო ბაზარს რომ ემსახურებოდა.

განვითარების მაღალ დონეს მიაღწია სხვადასხვა ხელოსნურმა წარმოებამ, განსაკუთრებით, სამეთუნეო საქმემ და მეტალურგიამ. წერილობით წყაროებში კარგად ჩანს ხუროების, კალატოზების, ოქრო-მჭედელთა, მეთუნეების, მცხობელთა, ხარაზების, მრთველთა, მკერავთა, მქსოველთა, მზარეულთა, მეთევზეთა, მესპილენძეთა, სხვადასხვა ლითონის „მკეთებელთა“ და სხვათა მოღვაწეობა. არქეოლოგიური გათხრებისას ზოგჯერ წააწყდნენ კვარტალებს, რომლებიც შეიძლება განისაზღვროს როგორც პროტეოსონალური სახელოსნოები. ალაჯა-პიუქის ახლოს გათხარეს მეთუნეთა უბანი სამეთუნეო ნაწარმის გამოსაწვავი ორი ღუმელით. ბოლახქოიში მიაკვლიეს უბანს, რომლის სახელოსნოში დარჩენილი იყო დიდი რაოდენობის ლითონის წიდა. ზოგიერთ ხელობას საშინაო ხაზითი ჰქონდა — რთვა და ქსოვა სახლებში ხდებოდა: თითისტართა და კვირისტავთა დიდი რაოდენობა იპოვეს ცენტრალური ანატოლიის მრავალი დასახლების გათხრისას.

მთელს მცირე აზიაში არ არსებობდა კერამიკული ნაწარმის ერთიანი სტილი. კერამიკის ე. წ. „ხეთური“ სტილი (თიხის ერთფერიანი ნაკეთობანი ყავისფერი, მოწითალო-მოყავისფრო და წითელი ფერისა) ფართოდ იყო გავრცელებული ცენტრალურ ანატოლიასა და მეზობელ რაიონებში. ჭურჭლებისათვის დამახასიათებელი ფორმებია მრგვალი, ვიწროყელიანი და სახელურიანი ცხვირიანი ხელადები. ასპისებური ჭურჭლები, სხვადასხვა ფორმის თასები, ნავის ფორმებიანი ფიალები, ორნამენტური ლანგარები და სხვა მრავალი.

საეპრო ურთიერთობანი ხათის ქვეყანაში ვითარდებოდა, მართალია. არა ისე ინტენსიურად, როგორც „კაპადოკიური“ ფიორტიების დროინდელ ანატოლიაში (იხ. ზემოთ), მაგრამ ვაჭრობა ხეტების სახელმწიფოში საკმაოდ მაღალ დონეზე იყო ასული. თუკი ასურელთა საეპრო კოლონიების დროს მცირე აზიაში წამყვან როლს ვაჭრობაში ასრულებდნენ უცხოელი ვაჭრები, ხეთურ ხანაში მდგომარეობა სრულიად შეიცვალა: ძირითად საეპრო ოპერაციებს ხათის ქვეყანაში აწარმოებდნენ ხეთი ვაჭრები, რომელთაც კანონი იცავდა. „უკეთუ ვინმე ხეთ ვაჭარს მოკლავს, — ვკითხულობთ ხეთური კანონების I ფირფიტის § 5-ში, — 100 მინა ვერცხლს გაიღებს და მის [სახლს] ჩააბარებს. თუკი (ეს მოხდება) ლუვიას ქვეყანაში ანდა ფალას ქვეყანაში, იგი 100 მინა ვერცხლს გაიღებს და მის დოვლათსაც აანაზღაურ-

რებს. როდესაც ეს ხათის ქვეყანაში (მოხდება), იგი (მოკლულ) ვაჭარსაც (შინ) მიიტანს“.

ყიდვა-გაყიდვის ობიექტებად გვევლინებიან ქსოვილები, ტანსაცმელი, საქონელი, ლითონები და ძვირფასი ქვები, მონები (ძირითადად, დებორტირებულები), მიწის ნაკვეთები, ხორცი და რძის ნაწარმი, საკვები, სხვადასხვა სასოფლო-სამეურნეო პროდუქტი და მრავალი სხვა ობიექტი ვაჭრობისა. ხეთი ვაჭრები აქტიურად იყენენ ჩაბმული საგარეო ვაჭრობის ოპერაციებში, რომლებიც მოიცავდნენ ახლო აღმოსავლეთის არაერთ ქვეყანას. ფულის ფუნქციას ვერცხლი ასრულებდა, მისი ეკვივალენტი ხშირად ცხვარი იყო (ღირებულება შეიძლება შეფასებულიყო ხორბლითაც). ძალზედ იშვიათად ფულის როლში გამოდიოდა ოქრო და სპილენძი (პირველი — სიძვირის, მეორე — სიიფის გამო). დადგენილი იყო ფასები მრავალნაირ საქონელზე, რაც თავის მხრივ მიუთითებს სასაქონლო-ფულად ურთიერთობათა განვითარების მაღალ დონეზე, ვაჭრობის მნიშვნელოვან როლზე ქვეყნის სამეურნეო-ეკონომიკურ ცხოვრებაში. ინტერესს არ იქნება მოკლებული თვალი გადავავლოთ ფასების ცხრილს, ხეთური კანონებით დადგენილს:

### 1. საქონლის ფასები (სიკლი — 8,4 გრამი)

	ღირდა	12 სიკლი ვერცხლი
საგუთნე ხარი	—	10 სიკლი
სანაშენე ხარი	—	5 სიკლი
საგუთნე ხარი (1 წლის)	—	7 სიკლი
ძროხა (მოზრდილი)	—	8 სიკლი
ძროხა (მაკე)	—	5 სიკლი
ძროხა (1 წლის)	—	4 სიკლი
ბბო	—	8 სიკლი
ვირი, შესაბამელი ვირი	—	8 სიკლი
ჯორი	—	1 მინა
ცხენი შესაბამელი	—	20 სიკლი
ცხენი (მოზრდილი)	—	15 სიკლი
ულაყი (1 წლის)	—	10 სიკლი
ფაშატი (1 წლის)	—	15 სიკლი
ულაყი და ფაშატი (ძუძუმწოვარა)	—	4 სიკლი
ცხვარი	—	1 სიკლი
3 თხა	—	2 სიკლი
2 ბატკანი	—	1 სიკლი
2 თიკანი	—	0,5 სიკლი

## 2. ქსოვილები და ტანსაცმლის ფასები

ქსოვილი ხაფუხანთა	ლირდა	12 სიკლი ვერცხლი
თხელი ქსოვილი	—	30 სიკლი
ლურჯი შალის ქსოვილი	—	20 სიკლი
ქსოვილი ადუფლი	—	10 სიკლი
ქსოვილი ...	—	4 სიკლი
ქსოვილი ისქალისარ	—	3 სიკლი
1 ნაჭერი ქსოვილისა (7 მინა წონისა)	—	9 სიკლი
1 (დიდი) ნაჭერი ქსოვილისა	—	5 სიკლი
ტანსაცმელი, მსუბუქი	—	3 სიკლი
ტანსაცმელი (ჩვეულებრივი)	—	9 სიკლი

## 3. სასოფლო-სამეურნეო პროდუქტთა ფასები

ზეთი, მცენარეული	ლირდა	2 სიკლი ვერცხლი
1 ციფითანი ქონი	—	1 სიკლი
1 ციფითანი კარაქი	—	1 სიკლი
1 ციფითანი თაფლი	—	1 სიკლი
2 (თავი) ყველი	—	1 სიკლი
3 (წილი) საფუარი	—	1 სიკლი
3 საწყაო სპელტა	—	1 სიკლი
1 საწყაო ღვინო	—	0,5 სიკლი

## 4. ხორცის ფასები

	ლირდა	1 ცხვარი
2 ხარის ხორცი	—	1 ცხვარი
2 ერთწლიანი ხარის ხორცი	—	1 ცხვარი
5 ძუძუმწოვარა ხბოს ხორცი	—	1 ცხვარი
10 ხბოს ხორცი	—	1 ცხვარი
10 ცხვრის ხორცი	—	1 ცხვარი
20 ბატკნის ხორცი	—	1 ცხვარი
20 თიკნის ხორცი	—	1 ცხვარი

## 5. ტყავის ფასები

დიდი ხარის ტყავი	ლირდა	1 სიკლი ვერცხლი
5 ხბოს ტყავი	—	1 სიკლი
10 ხარის ტყავი	—	1 მინა
დიდთმიანი ცხვრის ტყავი	—	1 სიკლი
10 გაცვენილთმიანი ცხვრის ტყავი	—	1 სიკლი

4 თხის ტყავი	—	1 სიკლი
15 გაკრეპილი თხის ტყავი	—	1 სიკლი
20 ბატკნის ტყავი	—	1 სიკლი
20 თიჯნის ტყავი	—	1 სიკლი

## 6. მიწის ნაკვეთების ფასები

1 იქუ ... მინდორი	ღირდა	3 სიკლი ვერცხლი
1 იქუ ... მინდორი	—	3 სიკლი
1 იქუ დამუშავებული მინდორი	—	2 სიკლი
მინდორი, შორს მდებარე	—	1 სიკლი
1 იქუ ვენახი	—	1 მინა

ლითონების მოკოვება და დაფუძავება:

რკინა ხათაბთან

მცირე აზიის მოსახლეობის სამეურნეო ცხოვრებაში ლითონებისა (სპილენძის, ბრინჯაოს, ოქროს, ვერცხლის, ტყვიის, რკინის) და ძვირფასი ქვების (ლილაქვის, მარმარილოს, იასპის, დიორიტის) მოპოვება-დამუშავებას ძველთაგანვე მნიშვნელოვანი ადგილი ეჭირა. ხეტებში ყველაზე უფრო გავრცელებულ ლითონებად ითვლებოდა სპილენძი და ბრინჯაო, რომლებითაც ამზადებდნენ ძირითადი სახის წარმოების საშუალებებს, იარაღს, ჭურჭელს, საკულტო ინვენტარს, სამკაულს და სხვ. მათი დიდი უმრავლესობა გამოიყენებოდა ყოველდღიურ ცხოვრებაში (ჭურჭელი, ფიალები, თასები, დანები, სატეჯრები. ეულები, ფარები, მშვილდები და ა. შ.). ოქროსა და ვერცხლს შედარებით ნაკლები პრაქტიკული მნიშვნელობა ჰქონდათ, მხედველობაში თუ არ მივიღებთ მათ დიდ გამოყენებას (განსაკუთრებით, ვერცხლისა) როგორც ღირებულების საზომს. მათგან ამზადებდნენ ჭურჭლეს, ნაირ-ნაირ სამკაულს, საკულტო-რელიგიური დანიშნულების საგნებს და ა. შ.

რკინის წარმოებასა და გამოყენებას განსაკუთრებული ადგილი ეთმობოდა ხეტების სამეურნეო ცხოვრებაში, რაც მტკიცდება ხეთური ლურსმული ტექსტების მონაცემებით (ტექსტების უმეტესობა თარიღდება ძვ. წ. XV—XIII სს-ით). არსებობდა სხვადასხვა სახის რკინა როგორც მეტეორიტული, ასევე დედამიწისეული, მადნეული წარმოშობისა. ხეთურ წყაროებში დადასტურებულია: „რკინა“, „ციხ (ციური) რკინა“ (აშკარად მეტეორიტული), „შავი რკინა“, „კარგი (წმინდა) რკინა“, „კერის რკინა“, რაც რკინის სხვადასხვა ხარისხზე უნდა მიუთითებდეს. არის შემთხვევები, როცა ერთსა და იმავე ტექსტ-

ში რამდენიმე ხარისხის რკინა ერთმანეთის გვერდითაა ჩამოთვლილი (ე. ი. ერთმანეთისგანაა განსხვავებული). მაგალითად, ე. წ. „რკინის ნაკეთობათა სიაში“ ერთმანეთისგან მკაფიოდაა გამოჩეული „რკინა“, „შავი რკინა“, „კარგი (წმინდა) რკინა“ და „კერიის რკინა“ (შდრ. გამოთქმები: „5 პირი პატარა სატევრებისა შავი რკინისგან, 10 პირი სატევრებისა რკინისგან, 1 საყრდენი კარგი რკინისგან“; „...ყუთი (მათ შორის), 60 ცალი რკინისგან; 88 დიდი ყუთი, მათ შორის 66 — კარგი რკინისგან, ხოლო 22 — კერიის რკინისგან“ (დამზადებული); „56 პირი სატევრებისა რკინისგან... 16 გურზი (საომარი იარაღი) შავი რკინისგან“ და ა. შ.).

„რკინისგან“ მზადდებოდა რკინის ნაკეთობათა დიდი რაოდენობა ხეთების სახელმწიფოს არსებობის სხვადასხვა პერიოდში. ესენია: სამეფო ტახტი და კეერთი, ლუჯაბათა, ადამიანთა, ცხოველთა და ფრინველთა გამოსახულებანი, საყრდენები, ლურსმნები (სოლები), ცულები, საკურთხევლები, კერა და ა. შ. „შავი რკინისგან“, რომელიც ზოგჯერ ენაცვლებოდა „ცის რკინას“ (ე. ი. მეტეოროიტულს) ამზადდებდნენ დიდი რაოდენობით მრავალ ნივთს: ქურქლებს, სატევრებს, დანებს, სატევრებისა და დანების პირებს, შუბებს, დიდ და პატარა ყუთებს (სხვადასხვა ნივთის შესანახად), საყრდენებს და სხვ. „კერიის რკინა“ და „კარგი რკინა“ (შესაძლოა, ფოლადი) იშვიათი იყო და მათგან მზადდებოდა შედარებით ნაკლები რაოდენობის საგნები. „კარგი რკინის“ დამზადების ტექნიკა, როგორც ჩანს, მარტო ხეთებისათვის უნდა ყოფილიყო ცნობილი მთელს წინა აზიაში, სადაც რკინის განსაკუთრებით მეტეოროიტული რკინის, გამოყენებას კარგა ხანია იცნობდნენ. როგორც ცნობილია, სწორედ „კარგი რკინა“ გახდა მიზეზი წერილისა, რომელიც ასურეთის მმართველმა სალმანასარ I ხათუსილი III-ს გაუგზავნა თხოვნით, ამ უკანასკნელს გამოეგზავნა მისთვის „კარგი რკინა“. წერილზე ხათუსილი III-მ თავაზიანად უპასუხა: „რაც შეეხება კარგ რკინას, რომლის შესახებ შენ მწერდი: კარგი რკინა ქიტუვაანაში, ჩემს „ბექდის საბლში“, არ არის. რკინა დასამზადებლად („გასაკეთებლად“) ცუდია (ე. ი. ძნელია). მე უკვე დაწერე („ვბრძანე“), რომ მათ დაიწყონ კარგი რკინის კეთება. მათ ჯერ (იგი) არ დაუმთავრებიათ. როგორც კი დაამთავრებენ, გამოგივზავნი. ახლა კი გიგზავნი სატევრის, პირს რკინისა“. არ ვიცი, ხათუსილიმ შეასრულა თუ არა თავისი დანაპირები. მაგრამ წერილიდან უნდა ჩანდეს ხეთების პროორიტეტი „კარგი რკინის“ დამზადებას საქმეში (ყოველ შემთხვევაში, იმდროინდელ ასურეთში ასეთი რკინის დამზადებაში დახელოვნებული ოსტატები არ უნდა ყოფილიყვნენ).

ხეთურ წყაროებში შემონახა მითითებები რკინის ნაკეთობათა წონის, ზომისა და რაოდენობის შესახებ. ყველაზე მძიმე საგნის —

კულტის ობიექტის — „რკინის წყაროს“ წონა იყო 45 კგ და 450 გრამი, ყველაზე მსუბუქი (მინიატურული) საგანი რკინისა 1 სიკლს (ე. ი. 8,4 გ) იწონიდა. ტექსტებში დასახელებული ყველაზე გრძელი საგანი — გამოსახულება რკინის სანაშენო ხარისა 3 მტკაველი სიგრძისა იყო, ხოლო მოკლესი — ქალის პატარა ქანდაკებისა — ნახევარი მტკაველი (ზომა-წონა მრავალი ნივთისა — ტახტისა, კვერთხისა, შუბებისა, სატევრებისა, ქურჭლებისა და ა. შ. გაურკვეველია). დიდი რაოდენობით ამზადებდნენ „ახალი სამეფოს“ დროინდელი ხეუბი ე. წ. „მოგარაო ქურჭლებს“ (ტექსტებში საუბარია ასობით ასეთი რკინის ქურჭლებზე), რკინის სატევრებსა და დანებს, ისევე როგორც მათ რკინის პირებს, რკინის ყუთებს (კოლოფებს) სხვადასხვა ნივთის შესანახად, რკინის საყრდენებს ღვთაებათა გამოსახულებებისათვის, ლურსმანებს (სოლებს). რკინისგან მზადდებოდა აგრეთვე გურზები, ჩაქუჩები, ცულები და სხვა ნივთი, თუმცა ტექსტებში ისინი დიდი რაოდენობით არ მოიხსენიება. რკინის ნივთები მზადდებოდა არა მარტო საკულტო-რიტუალურ და ფეფუნების დანიშნულებისათვის, არამედ უტილიტარული — პრაქტიკული გამოყენებისათვის.

ხეუბის „ძველი სამეფოს“ დროიდან ცენტრალურ ანატოლიაში მომხდარი იყო მკედელთა სპეციალიზაცია: რკინის მკედელნი (სიტყვასიტყვით, „რკინის მკეთებელნი“) უპირისპირდებოდნენ ოქროს, ვერცხლისა და სპილენძის მკედლებს. რკინის მკედლებს ზოგჯერ „რკინის კაცებს“ უწოდებდნენ. არსებობდა „რკინის სახლი“ — სამკედლო თუ ადგილი (საწყობი), სადაც ინახებოდა რკინა.

რკინის საგნები მზადდებოდა ხათის ქვეყნის სულ სხვადასხვა ადგილას და დიდი რაოდენობით, რაც გამორიცხავს ვარაუდს, თითქოს რკინის მეტალურგია ხეუბთან შეზღუდული იყო. წერილობითი წყაროების მონაცემთა გათვალისწინებით, ხათის ქვეყანაში სათანადო დონეზე უნდა მდგარიყო როგორც რკინის მოპოვება, ასევე მისი წარმოება. მაგრამ იმავე წერილობით წყაროებში არსად არ მოიძებნება მითითება რკინის მადნის მოპოვებაზე, რკინის სადნობ ღუმელებზე და, საერთოდ, რკინის მეტალურგიასთან დაკავშირებულ სხვა საკითხზე. როგორც ჩანს, რკინის მადნის გარკვეული ნაწილის მოპოვებაც თვით ხათის ტერიტორიაზე ხდებოდა (განსაკუთრებით. მის ჩრდილოეთ რაიონებში, რომლებიც მოგვიანებით შედიოდნენ პონტოში, სადაც „რკინის მკეთებელი“ ხალიბები ბინადრობდნენ). მაგრამ გარკვეული ნაწილი მადნისა, ან თვით გამომდნარი რკინისა, მეზობელი ოლქებიდან რომ შეიძლებოდა ყოფილიყო შემოტანილი, ამაში დაეკვება ძნელი უნდა იყოს. არ არის გამორიცხული, რომ რკი-



ნის მადანი ან თვით რკინა შემოეტანათ, მაგალითად, ტავროსის მთე-  
ბიდან, სადაც მოგვიანო ხანებში (ძვ. წ. I ათასწლეულის დასაწყისში)  
რკინის მდიდარ საბადოებს ამუშავებდნენ (აქედან ასურეთში ტონო-  
ბით რკინა გაჰქონდათ). ასევე არ არის გამოსარიცხი რკინის მადნის  
ან რკინის შემოტანა ხათის ტერიტორიაზე სამხრეთ-დასავლეთ სა-  
ქართველოს (ისტორიული კოლხეთის სამხრეთ-დასავლეთი) რაიონე-  
ბიდანაც, სადაც რკინის მეტალურგიის უძველესი კერა აღმოჩნდა უკა-  
ნასკნელი 20—30 წლის მანძილზე (როგორც აქ მოპოვებული არქეო-  
ლოგიური მასალის დათარიღებამ აჩვენა, რკინის მეტალურგიის და-  
საწყისი აღნიშნულ მხარეში ძვ. წ. XVIII ს-ს განეკუთვნება).

ხეთური ლურსმული ტექსტების მონაცემები გარკვეულად მიუ-  
თითებს განვითარებული რკინის მეტალურგიის არსებობაზე ხეთებ-  
თან, განსაკუთრებით, „ახალი სამეფოს“ ხანაში, როდესაც ხათის ტე-  
რიტორიაზე მზადდებოდა რკინის ნაწარმა დიდი რაოდენობა (რო-  
გორც მეტეორიტული, ასევე მიწისეული, მადნეული რკინისაგან), რაც  
შეუძლებელი იქნებოდა რკინის წარმოების ტექნიკის სათანადო ათვი-  
სების გარეშე (მადნეული რკინის დამუშავება ცენტრალურ მცირე  
აზიაში ხდებოდა ძვ. წ. III ათასწლეულის ბოლოდან. ეს დადასტურ-  
და ალაჯა-ჰუიუქში ნაპოვნი რკინის სატევრის მეტალოგრაფიული  
ანალიზით).

ხეთური ტექსტების მონაცემებიდან გამომდინარე, ძვ. წ. XIV—  
XIII სს-ის ცენტრალურ ანატოლიაში მოხდა გადასვლა სარიტუალო  
წმინდა და ფუფუნების საგნებისათვის საჭირო რკინის ნაკეთობათა  
წარმოებიდან რკინის გამოყენებაზე როგორც ლითონისა შედარე-  
ბით ფართო მოხმარების საგნების დასამზადებლად. ეს კი არსებითი  
ხასიათის პირობაა იმისათვის, რომ ცენტრალურ ანატოლიაში განი-  
საზღვროს გვიანი ბრინჯაოს ეპოქის პარალელურად თანაარსებული  
რკინის ხანის ადრეული პერიოდის დასაწყისი ძვ. წ. XIV—XIII სს-  
ით, რის შემდეგ ანატოლიაში და, საერთოდ, ძველ აღმოსავლეთში  
იწყება რკინის ფართო ათვისების პერიოდი (ძვ. წ. XII ს-იდან).

ძირითადი საწარმოო უჯრედი:  
უშუალო მწარმოებლის პრობლემა

მოსასლეობის ძირითად მწარმოებლურ უჯრედს ხეთებთან, ისე-  
ვე როგორც ძველი აღმოსავლეთის სხვა მრავალ ხალხთან, წარმო-  
ადგენდა ინდივიდუალური „სახლი“ (ხეთურად ფირ-, ფარნ-),  
ამ სიტყვით ხეთები აღნიშნავდნენ არა მარტო საკუთრივ საცხოვრე-  
ბელ სახლს (შენობას), რომელშიც ცხოვრობდა ოჯახი, არამედ ამ ინ-

დივიდუალური ოჯახის მთელ სამეურნეო კომპლექსს, მისი ყველა წევრისა (შდრ. რომაული „ფამილია“) და საოჯახო მეურნეობის ჩათვლით. სახელმწიფო მეურნეობის სისტემაში მყოფი დიდი „სახლები“ იქმნებოდნენ სწორედ ასეთი ცალკეული, წვრილი „სახლები-საგან“ (მეურნეობისაგან) საკუთარი მუშახელით. ინდივიდუალური „სახლი“ — მეურნეობა შედგებოდა რამდენიმე აუცილებელი კომპონენტისაგან — 4 შემადგენელი ნაწილისაგან, რომლებიც ქმნიდნენ ერთიან სამეურნეო კომპლექსს. ესენია: 1. საკუთრივ სახლი, როგორც: ნაგებობა, რომელშიც ცხოვრობდა ოჯახის ყველა სრულფუნქციონირი წევრი, ე. ი. ოჯახის თავი, მისი მეუღლე და შვილები (უფროსი ადამიანების ჩათვლით); 2. სხვადასხვა ზომის მიწის ნაკვეთი. იგი შეიძლებოდა ყოფილიყო სახანავი მიწღორი ანდა ეენახი. ბალი ან ბოსტანი და ა. შ. ზოგიერთ სასოფლო-სამეურნეო ნაგებობასთან (მაგალითად, საბძელთან) ერთად; 3. საქონლის გარკვეული რაოდენობა, როგორც: წესი, ხარები და ცხვრები, აგრეთვე ძროხები, ჯორები, სახედრები და სხვა ცხოველი; 4. მუშა-პერსონალი, როგორც წესი, მონები, რომლებიც შრომობდნენ მეურნეობაში და მკვეთრად გამოიყოფოდნენ სახლის პატრონის ოჯახის წევრთაგან.

ასეთი ინდივიდუალური „სახლებისაგან“ შედგებოდა მთელი სახელმწიფო და კერძო მეურნეობა: სასახლის (სამეფო), ტაძრის, სხვადასხვა საკულტო ობიექტის მეურნეობანი, მეფის ბოძებით ან წყალობის სახით გაცემული მეურნეობები. რამდენიმე ინდივიდუალური „სახლი“ ქმნიდა მეტნაკლებად მსხვილ „სახლს“, რომელიც ერთ რომელიმე განსაზღვრულ პირს ეკუთვნოდა, განსაკუთრებით, ბოძებით ან წყალობით გაცემულ მეურნეობებში (ასეთი გამსხვილებული „სახლი“ შედგებოდა 2-დან 13 ინდივიდუალურ „სახლამდე“). ბოძების შემდეგ თითოეული ინდივიდუალური მეურნეობა განხილვებოდა როგორც ცალკეული პირის მფლობელობა, ზოგჯერ, შესაძლოა, როგორც საკუთრებაც.

ინდივიდუალურ „სახლებთან“ დაკავშირებით საერთოდ დგება საკითხი ხეთურ საზოგადოებაში მატერიალური დოვლათის უშუალო მწარმოებლის შესახებ. არსებობდა რამდენიმე კატეგორია უშუალო მწარმოებლებისა, რომელთაგან ერთ-ერთი მთლიანად იყო მოკლებული მფლობელობის ან საკუთრების უფლებას წარმოების ყოველგვარ საშუალებებზე. ასეთი უშუალო მწარმოებლები ინდივიდუალური „სახლის“ მხოლოდ კომპონენტები იყვნენ და წყაროებში აღინიშნებოდნენ ტერმინებით: „მონა“, „თავი“, „სული“, „შინამსახური“, „ნამრა“ და სხვა. წარმოების პროცესში ყველა მათგანს განიხილებოდა როგორც „სახლის“ მფლობელის სრული საკუთრება და მუდამ სამართლის ობიექტი იყო (ე. ი. იყენებდნენ ჯარიმის გადახდის დროს).

ქონების გაყოფისას მათაც ჰყოფდნენ, ყიდდნენ ან ყიდულობდნენ, ჩუქნიდნენ და ა. შ.). ასეთები იყვნენ ნამდვილი მონები, პატრიარქალურ (საოჯახო) მონობაში მყოფნი. ხეთურ წერილობით ძეგლებში მათი ზოგადი აღმნიშვნელია „შუმერული სიტყვა „ირ“ — „მონა; მსახური; არათავისუფალი; დამოკიდებული; ქვეშევრდომი“ (ხეთური სიტყვა „მონისთვის“ უცნობია).

მათგან არსებითად განსხვავდებოდნენ უშუალო მწარმოებლები, რომელთაც საკუთარი „სახლები“ გააჩნდათ, მაგრამ ექსპლუატაციას განიცდიდნენ სამეფო, სატაძრო ან კერძო მფლობელთა მსხვილ მეურნეობებში. ისინი მიწის უბრალო დამმუშავებლები კი არ იყვნენ, არამედ დასამუშავებელი ნაკვეთების მფლობელებს წარმოადგენდნენ (რადგან მიწა საკუთრების უფლებით არ ჰქონდათ მიღებული). სამაგიეროდ, მათ საკუთრებაში იმყოფებოდა საქონელი, ზოგჯერ მონა, წარმოებული პროდუქციის ნაწილი, სასოფლო-სამეურნეო იარაღები და ა. შ. ისინი სამართლის სუბიექტებად გვევლინებიან. ყოველივე ამით მათ ექმნებოდათ ეკონომიკური შესაძლებლობა მატერიალური დანტერესებისათვის, სამეურნეო ინიციატივისა და მეურნეობის დამოუკიდებელი მართვისათვის. წარმოების მთელ პროცესს ისინი ასრულებდნენ მხოლოდ თავიანთი „სახლების“ სამუშაო ძალებით. ინდივიდუალურად უძღვებოდნენ რა მეურნეობებს, ისინი განიცდიდნენ სასახლის (მეფის), ტაძრის ან დიდებულთა მხრიდან გარკვეულ ექსპლუატაციას (იხდიდნენ ნატურალურ თუ სხვა სახის ბეგარას) და შეზღუდული ჰქონდათ პირადი და მფლობელობითი უფლებანი — მოკლებული იყვნენ საკუთრებას მიწაზე, არ შეეძლოთ თავისუფლად გადაადგილება იმის გამო, რომ მისი დასახლება მიწერილი იყო ტაძრს, სასახლეს ან საკულტო ობიექტს. ხეთურ წყაროებში მათ ზოგად აღსანიშნავად იხმარებოდა ასევე შუმერული ტერმინები „ირ“, ანდა „საგ. გემე. ირ. მეშ“ — „მონა ქალთა და მონათა თავები“, რომელსაც შეესატყვისებოდა აქადური სიტყვა „აშთაფირუ“ — „ყმანი“.

როგორც უხედავთ, სახალხო მეურნეობის უშუალო წვრილ მწარმოებელთა ფაქტობრივად ორი ძირითადი კატეგორიის აღსანიშნავად ხეთურ ტექსტებში ერთი და იგივე ტერმინი — ირ არის ნახმარი, ეს იმით იყო გამოწვეული, რომ ირ აღნიშნავდა დამოკიდებულების სულ სხვადასხვა ფორმაში მყოფ ადამიანებს. ამიტომაც, ამ ტერმინის ერთმნიშვნელობიანი განმარტება როგორც „მონა“, ხშირად იწვევს გაუგებრობასა და არეუ-ღარეუვას. იგი ყოველთვის კონტექსტის მიხედვით უნდა ითარგმნოს მისი სხვადასხვა მნიშვნელობის („მონა; მსახური; არათავისუფალი; დამოკიდებული; ქვეშევრდომი“ და ა. შ.) გათვალისწინებით.

უშუალო მწარმოებელთა ფართო ფენებს ქმნიდნენ სოციალურად თავისუფალი და ეკონომიკურად დამოკიდებული მეთემენი, რომლებიც ასევე ინდივიდუალური „სახლების“ მფლობელები იყვნენ და ფართო უფლებებით სარგებლობდნენ. თემში მიღებული, ფაქტობრივად, სახელმწიფო მიწის, ფლობის გამო ისინი იხდიდნენ სხვადასხვა სახელმწიფო სავალდებულო ბეგარას, რომლებიც იკრიფებოდა ან სრულდებოდა სასახლის (მეფის), ტაძრის ან საკულტო ობიექტის, მეფის მსხვილი მოხელეების სასარგებლოდ (იხ. ქვემოთ). მათ შეეძლოთ თავიანთი, საკუთარი თანხებით მიწის ნაკვეთის შექმნაც. ასეთი ტიპის უშუალო მწარმოებლები ტექსტებში ნახსენები არიან როგორც (ამა და ამ) დასახლების კაცები“.

სამიწათმოქმედო ურთიერთობანი:

მიწაზე საკუთრების ფორმები, მიწის უძღვა-გაუძღვა

სახელმწიფოსგან ქვეყნის სასოფლო თემთა დამორჩილების პროცესი, როგორც ჩანს, დამთავრდა „ძველი სამეფოს“ დასასრულისათვის (მარტო თელიფინუმ შეძლო დამორჩილებინა 60 „სახორბლე“ და 34 „საფურაე“ მიწები — თემები. იხ. ზემოთ). იგი არ მიმდინარეობდა უმტკივნეულოდ, რადგან თავისუფალი თემების გადაქცევა დამოკიდებულ ერთეულებად იწვევდა გარკვეულ წინააღმდეგობას თავისუფალ მეთემეთა მხრიდან. მაგრამ სასოფლო თემების მოქცევა სახელმწიფო სისტემაში უკვე გარდუვალი მოვლენა იყო „ძველი სამეფოს“ პერიოდისათვის, როდესაც ძირითადად უნდა მომხდარიყო მიწაზე სახელმწიფო საკუთრების გაბატონებულ ფორმად გადაქცევა.

მომდევნო ხანებში მცირე სამიწათმოქმედო თემები (— დასახლებანი მიმდებარე სავარგულებით) კონცენტრირებული იყვნენ უფრო დიდი საქალაქო თემთა ირგვლივ, რომელთაც ეწოდებოდათ „ციხე-სიმაგრენი“ (ხ ა ლ ც ი —) და შედგებოდნენ 5-დან 20-მდე დასახლებისაგან. ესენი იყვნენ რაიონის, ოლქის, პროვინციის ტოლი ერთეულები და წარმოადგენდნენ არა მარტო ადმინისტრაციულ, არამედ სავაჭრო და ხელოსნურ ცენტრებს თავიანთი „სასახლეებითურთ“ — ხათის პერიფერიულ დასახლებებში სამეფო (სასახლის) მეურნეობის საყრდენებითურთ.

სტრუქტურულად ასეთი საქალაქო თემები შედიოდნენ სახელმწიფოში, რაც აუცილებელი იყო სამიწათმოქმედო თემთა ერთ მთლიანობაში გაერთიანებისათვის. მართალია, ხათის სახელმწიფოს ჩამოყალიბების დროიდან მიწაზე კოლექტიური მესაკუთრის ფუნქცია თემში თანდათან ქრებოდა, მაგრამ თემი მაინც განაგრძობდა არსე-

ბობას როგორც სამოქალაქო ორგანიზაცია. თემი გახდა სახელმწიფოს ორგანული ნაწილი და სრულიად არ ეწინააღმდეგებოდა სახელმწიფო ხელისუფლებას.

მიწაზე საკუთრების გაბატონებული ფორმა ხეტებთან სახელმწიფო საკუთრება იყო. სახელმწიფო მიწების მნიშვნელოვანი წილი მოდიოდა სასახლის მიწებზე, რომელთა ფლობა სათანადო ვალდებულების მოხდას მოითხოვდა. მათი გადასაწილება შეეძლო მხოლოდ მეფეს, რომელიც ნაკვეთებს გადასცემდა არა მარტო კერძო პირებს, არამედ სახელმწიფო „სახლებსაც“. არანაკლებ მნიშვნელოვანი იყო სატაძრო მიწების საკუთრება, რომელიც არ იყო სტაბილური და მდიდრდებოდა სხვადასხვა გზით (ძირითადად, ნაკვეთების შეწირვებით, ზოგჯერ ყიდვით). არც ასეთი მიწების გასხვისება შეეძლო მათ მფლობელთ, რადგან მიწა ღვთის საკუთრებად განიხილებოდა და მისი გასხვისება ღვთის წინაშე მძიმე ცოდვად ითვლებოდა. სატაძრო მიწის მფლობელი იხდიდა სათანადო ბეგარას „ღვთის“ (ე. ი. ტაძრის) სასარგებლოდ. სასახლისა და სატაძრო (საკულტო ობიექტების ჩათვლით) მიწების შევსების წყაროს. ისევე როგორც მიწის ფლობის სხვა კატეგორიათა (ბოძების, წყალობის) წარმოშობის წყაროს, წარმოადგენდა სათემო მიწის ფონდი, რომელიც ფაქტობრივად ასევე სახელმწიფო საკუთრება იყო. მიწების ამ ფონდს, რომელთა ნაწილზეც მეთემენი იხსდნენ, სახელმწიფო იყენებდა ბოძების გასაცემად, სახელმწიფო სამსახურისათვის წყალობის გაცემისას, სასახლის ან ტაძრის სხვადასხვა მეურნეობისათვის ახალი ნაკვეთების გამოსაყოფად, „ნამრასათვის“ (იხ. ქვემოთ) ახალი „სახლების“ შესაქმნელად და ა. შ. სათემო მიწის მფლობელთ სახელმწიფო ნებას რთავდა თავისუფლად ესარგებლათ ნაკვეთებით: მათ შეეძლოთ მოეხდინათ ტერიტორიული დაყოფა — ცალკეულ ნაკვეთებად დანაწევრიანება, ნაკვეთის (ანდა მისი ნაწილის) მემკვიდრეობით გადაცემა. გაყიდვაც კი, მაგრამ ყველა ასეთ შემთხვევაში სახელმწიფო ითხოვდა სახელმწიფო ვალდებულებათა აუცილებელ შესრულებას ახალი მფლობელის მხრიდან, რაც მართლაც სრულდებოდა პრაქტიკაში.

როგორც აღვნიშნეთ, სახელმწიფო საკუთრება მიწაზე გაბატონებული ფორმა იყო ხეტებთან, მაგრამ იგი, ამავე დროს, არ იყო სრული სახელმწიფო საკუთრება ქვეყნის ყველა მიწაზე, რადგან არსებობდა არასახელმწიფო — კერძო საკუთრებაში მყოფი მიწები. ასეთი მიწების წარმოშობის წყაროდ გვევლინება: მეფისგან ნაკვეთების გაცემა ბოძებით, განსაკუთრებით, ისეთებისა, რომლებიც თავისუფლდებოდნენ სახელმწიფო ვალდებულებებისაგან; მეურნეობის გაყოფა, როდესაც ვალდებულებებისაგან განთავისუფლებული მიწის ნა-

წილი აღმოჩნდებოდა კერძო პირის საკუთრებაში; და ყიდვა-გაყიდვა მიწისა, რაც არცთუ ისე იშვიათი და შეზღუდული იყო. მაგრამ ყოველგვარი შეზღუდვების გარეშე და გარკვეული პირობით — სათანადო სახელმწიფო ვალდებულებების მოხდის პირობით იყიდებოდა მხოლოდ გარკვეული კატეგორიის მიწები, ისეთები, რომლებიც არ განეუთვნებოდნენ არც სასახლეს და არც ტაძარს, ე. ი. სათემო ფონდთან დაკავშირებული მიწები, ანდა უკვე ვინმეს საკუთრებაში არსებული ნაკვეთები. ხეთური კანონებიდან გამომდინარე, იყიდებოდა მინდორ-ველი, ვენახი, საძოვარი და დასახლებაც კი. ამიტომაცაა, რომ ხეთურ საზოგადოებაში (მესოპოტამიურისაგან განსხვავებით) მიწის ყიდვა-გაყიდვა არ მოითხოვდა ფარული ფორმების განვითარებას, ან მიწის გასხვისების აკრძალვის შემოვლას ფიქტიური ფორმებით.

სახელმწიფო მიწით სარგებლობა მოითხოვდა გარკვეული სახელმწიფო ვალდებულებების მოხდას, რომლებსაგან თავისუფლდებოდნენ მხოლოდ მეფის ბრძანებით.

სახელმწიფო ვალდებულებანი:

„იგუნიტაბის“ წარმოშობა, „საიგუნიტაბო სიგალები“

ხეთურ საზოგადოებაში სახელმწიფო ვალდებულებებზე მსჯელობისას მხედველობაში იღებენ ხათის მშრომელი მოსახლეობის ან სხვადასხვა მეურნეობის ვალდებულებებს, რომელთა იძულებით შესრულებას გულისხმობდა, ხეთური ტერმინოლოგიით, სახანი და ლუცი.

სახანი იგულისხმებოდა ყველაფერი, რაც შეიძლებოდა ჩაბარებულიყო ნატურალური სახით (წვრილი თუ მსხვილი რქოსანი საქონელი, ერბო, ყველი და სხვა რძის ნაწარმი, მატყლი, ქსოვილები და ა. შ.), ე. ი. სახანი იყო ნატურალური ბეგარა (გადასახადი), რომელიც ითვალისწინებდა ცალკეული უშუალო მწარმოებლისა თუ მრავალი მსხვილი მეურნეობის მოვალეობას (მათ შორის საკულტო და სატაძრო მეურნეობათა ვალდებულებებს, თუკი ისინი არ თავისუფლდებოდნენ მეფის სპეციალური დადგენილებით) მზა სახით ჩაება-რებიანთ რძისა და კვების სხვადასხვა პროდუქტი, სასოფლო-სამეურნეო და, საერთოდ, სხვადასხვა საწარმოო ნაწარმი, მსხვილფეხა და წვრილფეხა რქოსანი საქონელი და ა. შ. მეფის, მისი მოხელეებისა და ცალკეული ღვთაების (ტაძრების) სასარგებლოდ იმ მიწით სარგებლობისათვის, რომელიც მათ სახელმწიფომ გამოუყო მფლობელობის უფლებით.

ლუცი იყო შრომითი ბეგარა. იგი მოითხოვდა ისეთ ვალდებულებათა შესრულებას, როგორცაა მინდვრების ან ვენახების დამუშავება, მიწის გათხნა, ციხე-სიმაგრეთა შეკეთება, სამშენებლო თუ სხვა სახის სახელმწიფოებრივი და საზოგადოებრივი სამუშაოები მეფის, მისი დიდი მოხელეებისა და ღვთაებათა (ტაძართა) სასარგებლოდ მიწის იმ ნაკვეთებით სარგებლობისათვის, რომლებიც სახელმწიფომ გადასცა ცალკეულ უშუალო მწარმოებლებს ან სხვადასხვა მეურნეობას მფლობელობის უფლებით (ამ სახის ბეგარაში შეიძლება შესულყო სახელმწიფოსთვის მეომარი რაზმების მიწოდებაც).

არსებობდა „ყოველდღიური“, „ყოველთვიური“ და „ყოველწლიური სახანი და ლუცი“. ხეთურ ტექსტებში ნახსენებია „სახანი და ლუცი ქვეყნის ბატონისათვის“ (ამ შემთხვევაში მეფე არ იგულისხმება), „სახანი და ლუცი ოლქის უფროსისთვის“, „სახანი და ლუცი ქალაქის თავისთვის“, „სახანი და ლუცი მეფისთვის“, „სახანი და ლუცი ღვთაებისთვის“ (ტაძრისთვის. თვით ტაძრები განთავისუფლებული იყვნენ ორივე სახის სახელმწიფო ბეგარისაგან).

წარმოდგენდნენ რა შესასრულებელ სამუშაო-ვალდებულებათა მხოლოდ სახეობებს. სახანი და ლუცი დაკავშირებული იყვნენ სახელმწიფო მიწების მფლობელობასა და სარგებლობასთან. მათი კონკრეტული სახეობანი ყოველთვის განისაზღვრებოდა მეფის ან სასახლის მიერ, ქვეყნის სხვადასხვა ადგილას კი, როგორც ჩანს, მათ ადგენდნენ ზემონახსენები „სასახლეები“, ანუ ე. წ. „სახლები მეფისა“. ბეგარა განისაზღვრებოდა ვალდებულების მქონე პირთა პროფესიის გათვალისწინებით (მაგალითად, მწყემსებს ახდევინებდნენ ცხვარს, ქონს, ყველს, რძეს), ცალკეული „სახლის“ სამეურნეო მოღვაწეობის ანგარიშგაწვეით. ერთისგან ითხოვდნენ სახანის შესრულებას, მეორისგან — მხოლოდ ლუცისა, სხვებისაგან — ორივეს.

არავის ჰქონდა უფლება განთავისუფლებული „სახლისაგან“, ან პიროვნებისაგან მოეთხოვა სახანისა და ლუცის შესრულება, არავის არ შეეძლო, „მიახლოებოდა ქიშკარს“ ასეთი „სახლისა“. ქიშკართან იდგა, ან ქიშკარზე ეკიდა, მარადმწვანე ხე ე ი ა — ან მისი ტოტი — ამა თუ იმ „სახლის“ განთავისუფლების სიმბოლო (ვარაუდობენ, რომ ეს მარადმწვანე ხე უნდა ყოფილიყო ურთხელი).

საგადასახადო (საბეგრო) „იმუნიტეტის“ (შეუვალობის, განთავისუფლების) ინსტიტუტი წარმოიშვა „ძველი სამეფოს“ ხანაში, როდესაც შეიქმნა იმის საჭიროება, რომ ცალკეულ სახელმწიფო მეურნეობებს, ადამიანთა ცალკეულ კატეგორიებს ანდა კერძო პირებს მიეღოთ გარკვეული პრივილეგიები სახელმწიფო ვალდებულებათა ამა თუ იმ ფორმიდან განთავისუფლებისა, რაც მხოლოდ და მხოლოდ ცენტრალური ხელისუფლების ნებართვით შეიძლებოდა მომხდარიყო.

ასეთ შემთხვევებში სახელმწიფო უარს ამბობდა სახელმწიფო მიწებზე მსხლოში მოსახლეობის (ისევე როგორც სახელმწიფო მიწების-მქონე მეურნეობების) გადასახადების აკრეფისა და სავალდებულო სამუშაოთა შესრულების უფლებისაგან, გადასცემდა რა ამ უფლებას ტაძარს, საკულტო დაწესებულებას თუ ცალკეულ პირს, რომლის სასარგებლოდაც ამიერიდან შესრულდებოდა ყველა საქმრო სამუშაო. იმუნიტეტის გაცემა იყო სახელმწიფოსთვის განკუთვნილი გადასახადებისა და სამუშაოების დათმობა მიწის მფლობელთა სასარგებლოდ.

ადრეული ხანებიდანვე „განთავისუფლება“ ნიშნავდა, როგორც წესი, სახანისა და ლუცის ვალდებულებათა მოხდისაგან განთავისუფლებას. „განთავისუფლების“ დროს სარგებლობდნენ სამართლებრივი ძეგლების (ან საადათო სამართლის) ნორმებით, რის გამოც იმუნიტეტის გაცემა არ ფორმდებოდა სპეციალური დოკუმენტით. მაგრამ „ახალი სამეფოს“ დროს პრაქტიკაში შემოდის სპეციალური ფორმის დოკუმენტის შედგენა შეუვალობის გაცემასთან დაკავშირებით. ასეთი ტექსტები თითქმის უნიფიცირებულია, მათ აშკარად ემჩნევათ ტერმინოლოგიისა და ფრაზოლოგიის სტანდარტიზაცია, რის გამოც ისინი შეიძლება ჩავთვალოთ როგორც „სიგელები“, რომლებშიც ფიქსირებულია საიმუნიტეტო უფლებები, პრივილეგიები თუ მოვალეობანი.

ჩვენამდე მოღწეული ყველა საიმუნიტეტო დოკუმენტი შედგენილია მხოლოდ მეფის, დედოფლის ანდა მეფე-დედოფლის სახელით. „სიგელს“ ჰქონდა ერთგვარი „პრეამბულა“, სადაც აღინიშნებოდა დოკუმენტის შემდგენლის სახელი, ზოგჯერ მთელი მისი გენეალოგიის ჩვენებით. ზოგიერთ მათგანში მოყვანილია ტექსტის შედგენის მოტივები, შეუვალობის გაცემის მიზეზი. ამის შემდეგ იწყებოდა ძირითადი ნაწილი, სადაც მოთხრობილი იყო, თუ სახელდობრ რას გულისხმობდა „განთავისუფლება“. დოკუმენტის ამ ნაწილში დაწვრილებით იყო ჩამოთვლილი სამუშაოები და გადასახადები, რომლებთაგან თავისუფლდებოდნენ მეურნეობანი თუ ცალკეული პირები. „სიგელს“ გააჩნდა აგრეთვე დასკვნითი ნაწილი, რომლითაც იკრძალებოდა შედგენილი დოკუმენტის უგულვებელყოფა ან მისი შინაარსის შეცვლა. „სიგელის“ ბოლოში ზოგჯერ წყველის ფორმულაც იწერებოდა ხათის „ათასი ღვთაების“ დამოწმებით.

უძველესი „საიმუნიტეტო“ სიგელი განეკუთვნება ასმუნიქალს, ხათის „დიდ დედოფალს“, არხუევანდა I-ის მეუღლეს (ძვ. წ. XV ს-ის მეორე ნახევარი). ტექსტის მიხედვით, სახან-ლუცისაგან თავისუფლდება ახლადშექმნილი „ქვის სახლი“ (როგორც ვარაუდობენ. გარდაცვლილ მეფეთა მავზოლეუმში, უკვე საკულტო ადგილად ქცეული) მთელი მეურნეობითა და მუშა პერსონალით, რომელიც ამიერიდან



განიხილებოდა როგორც „ქვის სახლზე“ (ე. ი. მის მეურნეობაზე) მიმაგრებული: „ასე (ამბობს) ასმუნიქალი, დიდი დედოფალი: „ქვის სახლი“, რომელიც შეექმენით (— სიტყვასიტყვით: „გავაკეთეთ“), და ამ „ქვის სახლს“ რომელი დასახლებანი გადავეცი, რომელი ხელო-სანნი გადავეცი, რომელი მეგუთნენი, მწყემსნი და მეცხვარენი გადავეცი, ს ა რ ი ქ ე ვ ა-კაცთაგან რომელი ავიღეთ და მათი სახლებითა და მათი დასახლებებითურთ „ქვის სახლს“ გადავეცი, რომელი მეკარენიც აღრე „ქვის სახლს“ გადავეცი, (ყველა) მათგანი სახანისა და ლუცისგან. დაე, განაავისუფლდეს...! მათ წინ, დაე, ე ი ა-ხე იდგეს. დაე, ისინი არავინ არ გამოიყენოს (სახანისა და ლუცისთვის). მათ მსხვილფეხა და წვრილფეხა საქონელს, არავინ ხელი არ ახლოს (სახანისა და ლუცისათვის). ისინი, დაე, ყველაფრისგან განთავისუფლდნენ! უკეთუ ვინმე (ამ) „ქვის სახლის“ მიმართ სიკვდილის ტოლ ცოდვას ჩაიდენს, დაე, იგი მოკვდეს...“.

**მასპლუტაციის ფორმები:**

**მონური და არამონური შრომის სახეები**

ხეთურ ლურსმულ ტექსტებში კარგად აისახა ექსპლუატაციის ფორმათა სიმრავლე. ერთ-ერთი მათგანია მონური ექსპლუატაცია, რომელსაც იყენებდნენ ინდივიდუალურ „სახლებში“, მეფის კარზე, უშუალოდ ტაძრებში, ისევე როგორც საკულტო ობიექტებში, შეძლებული ხეთების ოჯახებში და ა. შ. ამგვარად, მონური ექსპლუატაცია ფართოდ იყო გამოყენებული ხათის სამეფოში, მაგრამ იგი არ წარმოადგენდა წარმოების საფუძველს, იგი მხოლოდ პატრიარქალური საოჯახო მონობის სახით არსებობდა. მართალია, „სახლების“ მქონე „ნამრა“ ექსპლუატაციის გარკვეულ ეტაპამდე სახელმწიფო მონებდა უნდა დარჩენილიყვნენ (იხ. ქვემოთაც), მაგრამ მათი ექსპლუატაციის ფორმა სრულიადაც არ იყო მონური, რომელსაც ხეთები სახელმწიფო მეურნეობაში არაეფექტურად თვლიდნენ (მოგვიანებით კრ ასეთი „ნამრა“ საზოგადოების წევრი ხდებოდა).

ხეთურ საზოგადოებაში არამონური ექსპლუატაციის სწავლასხვა ფორმის შესახებ ხეთურმა ლურსმულმა წყაროებმა მეტად საყურადღებო ცნობები შემოგვინახა. მონობის გვერდით, შრომის არამონური სახის გამოჩენა და გამოყენება განპირობებული იყო სხვადასხვა გარემოებით — წარმოების დონისა და შესაბამის საწარმოო ურთიერთობათა გარკვეული განვითარებით, ქონებრივი და სოციალური უთანასწორობით და ა. შ. „ძველი სამეფოს“ დროიდან არამონური შრო-

მე თავის გამოხატულებას პოულობდა ხეთების შრომითი მოღვაწეობის სულ სხვადასხვა ფორმაში.

ვანსაკუთრებითაა აღსანიშნავი ე. წ. „ბარშჩინის“ ტიპის შრომა, ე. ი. არამონური შრომის ისეთი სახე, რომლის დროსაც უშუალო მწარმოებლის აუცილებელი შრომა გამოყოფილი იყო ნამატი შრომისაგან სივრცესა და დროში. ხეთური დოკუმენტების მიხედვით, თუკი სახელმწიფო სისტემის ინდივიდუალურ მეურნეობაში („სახლში“) მხოლოდ ერთი მამაკაცი იყო, მაშინ იგი ვალდებული იყო ოთხი დღის განმავლობაში შეესრულებინა „სასახლის სამუშაო“, ხოლო მომდევნო ოთხი დღის მანძილზე — „თავისი სახლის სამუშაო“. აქ იგულისხმება ისეთი მდგომარეობა, როდესაც „მამაკაცი“ სასახლისათვის მუშაობდა სულ სხვა დროს, ვიდრე თავისი „სახლისათვის“. ხეთური წყაროების სხვა მაგალითის თანახმად, თუკი „სახლში“ ოთხი მამაკაცი იყო, მაშინ ორ მათგანს უნდა შეესრულებინა სამუშაო სასახლისათვის, ხოლო ორს — სამუშაო თავისი „სახლისთვის“. მაგრამ იმ შემთხვევაში, თუკი „სახლში“ ორი მამაკაცი იყო, მაშინ ერთი მათგანი შეასრულებდა „სასახლის“ სამუშაოს. მოყვანილ შემთხვევებში აშკარად იგულისხმება ისეთი მდგომარეობა, როდესაც უშუალო მწარმოებელი შრომობდა სხვადასხვა ადგილას — თავის „სახლში“ და სასახლეში (უფრო სწორად, სასახლისათვის, სასახლის მეურნეობაში).

როგორც ვხედავთ, ერთი ტექსტის თანახმად „მამაკაცის“ სამუშაო დრო იყოფოდა ორ ნაწილად, მაშინ როდესაც მეორე ტექსტის მონაცემებით ორად იყო გაყოფილი უკვე სამუშაო ძალა „სახლებისა“, რომლებშიც შრომობდა ოთხი ან ორი მამაკაცი. იმის გამო, რომ ამ უშუალო მწარმოებლებს მოუხდებოდათ შრომა განცალკევებულ მეურნეობებში (ე. ი. სივრცობრივად სხვადასხვა ადგილას) ასევე განცალკევებული იქნებოდა მათი აუცილებელი და ნამატი შრომაც. რადგან აუცილებელ შრომას ისინი დახარჯავდნენ თავიანთ მეურნეობებში, ხოლო ნამატს — სასახლის მეურნეობაში გარკვეული დღეების მანძილზე. ანდა „სახლის“ ნახევარი მუშახელის ყოველდღიურად გამოყოფით სასახლის იძულებითი სამუშაოების შესასრულებლად.

სასახლის მეურნეობაში წარმოების ასეთი სისტემის არსებობა მტკიცდება ხეთური წყაროების სხვა მონაცემებითაც, რომელთა თანახმად კარგად ჩანს შესასრულებელ სამუშაოთა დაყოფა „მეფის სამუშაოდ“ და ვინმეს „სახლის სამუშაოდ“, აგრეთვე „სასახლის მინდვრებად“ და „მეგუთნეთა მინდვრებად“ და ა. შ. (საგულისხმოა, რომ ორად იყოფოდა „სახლში“ მყოფი სასაქონლო გამწვევი ძალაც). სამუშაოთა

მსეთი დაყოფა არსებობდა აგრეთვე სატაძრო მეურნეობაშიც, სადაც ერთმანეთს უპირისპირდებოდა „ღვთის მინდორი“ (ე. ი. ტაძრის ნაკვეთი) და „მეგუთნის მინდორი“ (ნაკვეთი). სასახლის მიწაზე მფლობელობისა და სარგებლობის უფლებით მყოფი მეგუთნე ვალდებული იყო დაემუშაებინა „სასახლის მინდორი“. მაშასადამე, მას უნდა ეშრომა სასახლისათვის სხვა დროს, ხოლო თავისთვის — სხვა დროს. სატაძრო მეურნეობაში მეგუთნეს მოუხდებოდა ეშრომა ორ სხვადასხვა ნაკვეთზე: თავის მიწაზე და „ღვთის მინდორზე“. მეგუთნის ასეთი ექსპლუატაციის დროს ნამატი შრომა გამოყოფილი იქნებოდა აუცილებლისგან სივრცესა და დროში.

ამგვარად, ზემოგანხილული წარმოების სისტემა, სამეცნიერო ლიტერატურაში „მუშაობით ასანაზღაურებელი ბეგარით“ ანუ „საბატონო ბეგარით“ („ბარშჩინით“) ცნობილი, დასტურდება ხეთური საზოგადოების უშუალო მწარმოებელთა შორის როგორც სასახლის (სამეფო), ასევე სატაძრო მეურნეობებში. ამასთანავე, კარგად ჩანს უშუალო მწარმოებლის ექსპლუატაციის ნორმა: შეფარდება ნამატი შრომისა, რომელიც იძულებით სრულდებოდა სასახლისთვის თუ ტაძრისთვის, აუცილებელ შრომასთან შეადგენდა 50%-ს, რაც არც ისე მაღალი ექსპლუატაციის შაჩვენებელი უნდა იყოს ძველი სამყაროს ასე ადრეული ეპოქისთვის (დაახლოებით ძვ. წ. XVII—XIII სს-ისათვის).

არამონური შრომის ეს სახე, რომლის დროსაც ხორციელდებოდა არამონური ექსპლუატაცია, ფართოდ უნდა ყოფილიყო გავრცელებული მთელს ქვეყანაში და უფრო ფართოდ უნდა ყოფილიყო განვითარებული, ვიდრე არამონური შრომის სხვა სახეობანი. იგი ადრეკლასობრივ ხეთურ საზოგადოებაში წარმოების საფუძველი უნდა ყოფილიყო (მეთემეთა ექსპლუატაცია ამ არამონური შრომის გამოყენებით ხორციელდებოდა).

ერთ-ერთი ისტორიული ფორმა შრომისა, რომელიც ხათის საზოგადოებაში არსებობდა დამხმარე წარმოების სახით, დაქირავებული შრომა იყო. სხვისი შრომის დროებით სარგებლობის ნორმები სხვადასხვა სამუშაოთა შესასრულებლად გარკვეული საქირაო თანხის ანაზღაურებით დადასტურებულია ხეთურ კანონებში.

ხათის ქვეყანაში დაქირავებული შრომა გამოიყენებოდა. ძირითადად, სოფლის მეურნეობაში, უფრო ნაკლებ — სამხედრო საქმეში.

სოფლის მეურნეობაში მისი გამოყენება ხდებოდა, როგორც წესი, სეზონურ სასოფლო-სამეურნეო სამუშაოთა დროს, განსაკუთრებით, მოსავლის აღებისას, როდესაც დამატებითი მუშახელის მოთხოვნა იზრდებოდა. ამ პერიოდში ადამიანებს ქირაობდნენ მინდვრებზე სამუშაოდ (მარცვლეულის აღებისას კონების შესაკრავად და საზიდ-

რებზე დასატვირთავად, ფარდულებში მათ მოსათავსებლად). დამატე-  
ბითი მუშახელი ხეტებს სჭირდებოდა აგრეთვე გაზაფხულობით სა-  
ველე სამუშაოთა (განსაკუთრებით, ხენა-თესვის) შესასრულებლად.

ხათის ქვეყანაში დაშვებული იყო ადამიანთა დაქირავება სამხედ-  
რო ლაშქრობებში მონაწილეობის მიზნით, როგორც ჩანს, მეომრების  
სახით (ლაშქრობისთვის ქირაობდნენ ქალებსაც, მაგრამ არა როგორც  
მეომრებს). დაქირავებულთ აგზავნიდნენ ლაშქრობაში სამხედრო ვალ-  
დებულნი, რომელთაც უფლება ჰქონდათ თავის მაგივრად ლაშქარში  
გაეგზავნა ყველა, ვინც დათანხმდებოდა შეესრულებინა დამქირავებ-  
ლის მოვალეობა განსაზღვრული საჭირო თანხის აღებით (ლაშქარი  
დგებოდა მხოლოდ თავისუფალთა რიგებიდან, მონებს ლაშქარში არ  
რიცხავდნენ).

დაქირავების ვადის ძირითადი ერთეული იყო თვე, ქირა ჯაიცი-  
მონა ვერცხლის ან მარცვლეულის სახით. მათი ოდენობა ისაზღვრე-  
ბოდა არა მარტო შესასრულებელ სამუშაოთა სახითა და ხანგრძლი-  
ვობით, არამედ დაქირავებულის კვალიფიკაციით, აგრეთვე სქესით: ქა-  
ლები ჩვეულებრივ თითქმის 2-ჯერ ნაკლებს იღებდნენ, ვიდრე მამა-  
კაცები.

მიუხედავად იმისა, რომ დაქირავებულის დროებით გამოყენება  
ეკონომიკური თვალსაზრისით უფრო ხელსაყრელი იყო, ვიდრე მონის  
შეძენა, დაქირავებული შრომის როლს ხათის საზოგადოებაში არ მიუ-  
ღწევია იმ დონემდე, როგორც იყო, მაგალითად, ძველი ბაბილონუ-  
რი ხანის ბაბილონში (ცნობილია, რომ დაქირავების დროს ბაბილონში  
აღვნიდნენ სპეციალურ ხელშეკრულებებს, რომელთა მსგავსი ხეთებს  
არ გააჩნდათ).

არამონური სახის ექსპლუატაციის თავისებური ფორმა გამოყე-  
ნებული ჰქონდათ ხეთებს „სახლების“ მქონე ნამრას ექსპლუატაციის  
დროს. ძვ. წ. II ათასწლეულის არცერთ ძველადმოსავლურ საზოგა-  
დოებაში ნამრას შრომა და ექსპლუატაცია არ იყო გამოყენებული  
ისე ფართოდ, როგორც ამას ადგილი ჰქონდა ხეთების სახელმწიფო-  
ში. საქმე ეხება ხეთებისგან დაპყრობილი ტერიტორიებიდან მასობ-  
რივად აყრილ (მთელი ოჯახებით) და ხეთების ტერიტორიაზე ძალით  
გადმოსახლებულ ხალხს — დეპორტირებულებს (ხეთურად „არნუ-  
ვალა“ — „წამოყვანილი“, შუმერულად „ნამრა“), რომლებიც ათასო-  
ბით შემოჰყავდათ ხათის სამეფოში (დაპყრობილი მოსახლეობის გადა-  
სახლება პრაქტიკაში იყო შუა საუკუნეების ახლო აღმოსავლეთშიც.  
შდრ. ქართველთა ძალით აყრა და გადასახლება ფერეიდანში შაჰ-აბას  
I-ის დროს). მარტო მურსილი II-მ თავისი მეფობის 10 წლის განმავ-  
ლობაში ასი ათასამდე „ნამრა“ გაგზავნა ხათში. დეპორტირებულთა  
ზედი სულ სხვადასხვა იყო: მათ ნაწილს სსახლეში, ტაძარში ან სა-

კულტო ობიექტებში, ისევე როგორც კერძო მეურნეობებში ტოვებდნენ მონებად, ნაწილს ყიდდნენ, დიდ ნაწილს კი მიწის ნაკვეთებს ურიგებდნენ (შდრ. რომში კოლონებისთვის მიწების დარიგება), სხვადასხვა საწარმოო საშუალებებს აძლევდნენ და სამი წლით სახელმწიფო ბეგრისაგან ანთავისუფლებდნენ. სასახლისა და სატაძრო მეურნეობებში მომუშავე ნაძრას ათ-ათი ადამიანისაგან შემდგარ „სახლებად“ ანაწილებდნენ (შდრ. სპარტაში ილოტების დასახლება 10—15 კაცისაგან შემდგარ კლერებად). შვედობიანობის დროს ასეთ „სახლებს“ სასოფლო-სამეურნეო პროდუქტებს და ხელოსნურ ნაწარმს ამზადებინებდნენ, ომიანობის შემთხვევაში „სახლების“ მამაკაცებს მეომრებად იყენებდნენ. ხეთები თვლიდნენ, რომ ნაძრას ასეთი დასაქმება გაცილებით მეტ ეკონომიკურ ეფექტს იძლეოდა, ვიდრე მათი დატოვება მონებად (იხ. ქვემოთაჲ).

„სახლებიანი“ დეპორტირებულების გადაცემა „ახალი სამეფოს“ დროს სპეციალური დოკუმენტით ფორმდებოდა. ჩვენამდე მოაღწია, მაგალითად, ერთმა ასეთმა ვრცელმა, თუმცა რამდენადმე დაზიანებულმა, ტექსტმა (შემოინახა სხვა ტექსტების ფრაგმენტებიც. რომელშიც ჩამოთვლილია მეფისგან სხვადასხვა დასახლებათა ტაძრებისათვის (— ღვთაებებისათვის) გადაცემული დეპორტირებულებიანი „სახლები“). ინტერესს არ იქნება მოკლებული გავეცნოთ ზოგიერთ ნაწყვეტს ამ ტექსტიდან:

„ქ. უვალმაში „მზემ“ ღვთაებებს ეს დაუდგინა: 1 „სახლი“, რომელშიც 10 ნაძრაა..., 1 „სახლი“, რომელშიც „მთიელთა“ 16 ნაძრაა, 1 „სახლი“, რომელშიც არის 10 ნაძრა — ინარას მონები, 1 „სახლი“ ქურუმის 4 ნაძრათი, 1 „სახლი“, რომელშიც არის მეფის მქსოველთა 10 ნაძრა. სულ: 5 „სახლი“, რომლებშიც 50 ნაძრაა...“.

„ქ. ვიციდასაში ღვთაება ფირვას „მზემ“ ეს დაუდგინა: 4 სახლი, რომელშიც ცხენების მწყემსთა 40 ნაძრაა. 4 მსხვილფეხა (და) 30 წვრილფეხა საქონელს თუმანას ქვეყნის მეფე გასცემს...“.

„ქ. ფადანიში ღვთაება ფირვას „მზემ“ ეს დაუდგინა: 1 „სახლი“, რომელშიც სარმანცანელი 10 ნაძრაა, 2 „სახლი“ დახარიათული 20 ნაძრათი, 1 „სახლი“ ქურუმის ნაძრათი..., სულ 4 „სახლი“ 40 ნაძრათი“.

„ქ. ქალასმითაში მფარველ ღვთაებას (და) ღვთაება ალას „მზემ“ ეს დაუდგინა: 2 „სახლი“, რომლებშიც 20 ნაძრაა. ისინი ადრე ღვთაებათა მონები (იყვნენ). 5 „სახლი“, რომლებშიც 50 ახარევასელი ნაძრაა...“ და ა. შ. (ტექსტში მითითებულია მრავალი დასახლება. რომლებსაც გადაეცათ ძირითადად 10—10 ნაძრიანი „სახლები“).

## საბელმწიფო და მისი აპარატი და სოციალური სტრუქტურა

საბელმწიფო და მისი აპარატი:

მეფე-დედოფალი, „უაირველესნი“ და სხვანი

სახელმწიფოს ხეტებთან საკმაოდ არამყარი სტრუქტურა ჰქონდა. ამ მხრივ იგი თითქმის არ განსხვავდებოდა მითანისგან და მცირე აზის, სირიისა და ჩრდილოეთ შუამდინარეთის შედარებით წერილი პოლიტიკური გაერთიანებებისაგან. უშუალოდ მეფესა და დედოფალს დამორჩილებულ ქალაქებსა და ოლქებს გარდა, არსებობდნენ წერილი ნახევრად დამოუკიდებელი სამთავროები (უფლისწულთათვის), ისევე როგორც მსხვილ სახელმწიფო მოხელეთათვის სამართავად გადაცემული რაიონები. ყოველივე ამის გამო, მჭიდროდ ცენტრალიზებული სამეფო ხელისუფლება ხეტებს არც გააჩნდათ (სამეცნიერო ლიტერატურაში ხეტების სახელმწიფოს მიმართ ზოგჯერ ხმარებული სიტყვა „ცენტრალიზებული“ მხოლოდ პირობითია და არაფერი აქვს საერთო მოგვიანო ეპოქების „ცენტრალიზებულ სახელმწიფოსთან“). სწორედ ამ გარემოებამ უარყოფითი (შეიძლება ითქვას, დამღუპველი) გავლენა იქონია ხეტების სახელმწიფოზე მისი არსებობის ყველაზე კრიტიკულ მომენტში — „ზღვის ხალხების“ შემოსევის დროს. მრისხანე მტრის წინააღმდეგ ხათი არ აღმოჩნდა ერთ ძლიერ ძალად შეკრული (მოულოდნელობის ფაქტორმაც თავისი როლი ითამაშა). პირიქით. ხეტების სამეფო ისე სწრაფად დაიშალა, იგი თითქოს არც არსებობდა („ზღვის ხალხების“ შემოსევის დროს სულ სხვა ვითარება შეიქმნა ეგვიპტეში, რომელმაც შოახერხა მოახლოებული მტრის არა მარტო შეჩერება, არამედ განადგურებაც).

ხეტების სახელმწიფოს სათავეში ედგა მეფე (ხასსუ-), ადრეული ხანებიდან თაბარნას, ხოლო მოგვიანებით — „დიდი მეფისა“ და „ჩემი ზის“ (= „მზის“) ტიტულების მქონე. თავიდანვე მისი მდგომარეობა არც ისე მყარი იყო, რადგან სამეფო ხელისუფლებას ზღუდავდა ფანქუ — ადრეულ ხანებში მოქმედი სახალხო კრება, ხოლო თელიფინუს დროს — სამეფო კარის (სასახლის) დიდ-

შულთა და მოხელეთა საკრებულო (ამავე პერიოდში ფუნქციონირებდა აგრეთვე თ უ ლ ი ა — მთელი ხათუსას საკრებულო, რომელიც აერთიანებდა დიდებულებს, მსახურთა სხვადასხვა კატეგორიებს. მასზე განიხილებოდა ძირითადად, როგორც ჩანს, სასამართლო საქმენი). „ძველი სამეფოს“ ხანაში სამეფო ხელისუფლების სისუსტით იყო გამოწვეული სისპოის ღერა ტახტზე ასვლის პრეტენდენტთა შორის. თელიფინუმ მნიშვნელოვნად გაამაგრა სამეფო ხელისუფლება, დაასუსტა რა დიდებულთა ძალა. „ახალი სამეფოს“ პერიოდში ხეთების მეფე უკვე სახელმწიფოს ერთპიროვნული მმართველი გახდა.

მეფე იყო უზენაესი ქურუმი. ხეთები მეფეს თავის სიცოცხლეში არასდროს აღმერთებდნენ, გარდაცვალების შემდეგ კი მას „ღვთაებად“ თვლიდნენ (გარდაცვლილ მეფეთა სულის კულტი დაკანონებული იყო). მეფე — უზენაესი ქურუმი — აუცილებლად უნდა დასწრებოდა რელიგიურ დღესასწაულებს, რომლებიც ძირითადად იმართებოდა აღრე გაზაფხულზე, გვიან შემოდგომასა და ზამთარში — დანარჩენ დროს, განსაკუთრებით, ზაფხულს მეფე ლაშქრობაში ატარებდა. დღესასწაულების დროს იგი მოგზაურობდა მთელს ქვეყანაში, მონაწილეობას იღებდა რიტუალებში (ხშირად, დედოფალთან ერთად).

მეფე იყო მთავარსარდალი და უზენაესი მსაჯული. იგი აწესრიგებდა დიპლომატიურ ურთიერთობებსაც.

მეფის შემდეგ მნიშვნელოვანი ფიგურა იყო დ ე დ ო ფ ა ლ ი, რომელიც ატარებდა თავანანას ტიტულს, თუკი იგი ტახტის მემკვიდრის დედა იყო და ამ ტიტულის მატარებელი წინა დედოფალი გარდაცვლილი იყო. თუ არა და, მას მხოლოდ „დედოფალს“, ზოგჯერ „დიდ დედოფალს“ უწოდებდნენ (ასეთები იყვნენ ასმუნიქალი, ფულუხეფა). ხეთების დედოფალი უზენაეს ქალ-ქურუმად ითვლებოდა და მას ფართო საკულტო თუ პოლიტიკური უფლება-მოვალეობანი გააჩნდა. არსებებდა I-ის მეუღლემ, „დიდმა დედოფალმა“ ასმუნიქალმა, როგორც ზემოთაც დავინახეთ, შეჭმნა სრულიად ახალი „ქვის სახლი“ — სატაძრო მეურნეობის ერთ-ერთი სახე, რომელსაც გადასცა დასახლებანი მუშა და მომსახურე პერსონალითურთ, განათავისუფლა რა მისი მეურნეობა სახელმწიფო ბეგრისაგან. „დიდი დედოფალი“ ფულუხეფა, ხათუსილი III-ის მეუღლე, დიდ როლს თამაშობდა სატაძრო მეურნეობის გაძლიერებაში და, საერთოდ, სახელმწიფო საქმეთა მართვაში (მეფესთან ერთად). იგი დამოუკიდებელ დიპლომატიურ მიმოწერასაც აწარმოებდა ეგვიპტის ფარაონთან. მას საკუთარი საბეჭდავიც ჰქონია, როგორც ეს ჩანს ეგვიპტესთან დადებული სამშვიდობო ხელშეკრულებიდან, სადაც ეკითხულობთ: „საბეჭდავი ფულუხეფასი, ხათის დედოფლისა, ქიუჟათის ქვეყნის ქალიშვი-

ლისა, ქ. არინას მზის ღვთაების მოსიყვარულესი, დედამიწის ქალბატონისა, ღვთაების მსახურისა“. ფუძე ხეფას საბეჭდავით დამოწმებულია, აგრეთვე, უგარითში აღმოჩენილი ერთი წერილი (თიხის ფირფიტაზე), რომელშიც ხათის დედოფალი გვევლინება მეფის („მზის“) უფლებით და გვამცნობს თავის გადაწყვეტილებას ერთ-ერთ სადავო საკითხზე.

ხათის ისტორიაში ფუძეხეფას მაგალითი განიხილება როგორც საყურადღებო ფაქტი დედოფლის აქტიური მონაწილეობისა ქვეყნის საშინაო და საგარეო საქმეებში. ამასთანავე, ხათუსილი III-ისა და ფუძეხეფას მოღვაწეობა წარმოადგენს მეფისა და დედოფლის 25 წლიანი თანამმართველობის საუკეთესო მაგალითს (ხათუსილი და ფუძეხეფა ბედნიერი მეუღლენიც იყვნენ: ჰყავდათ ბევრი ვაჟიშვილი და ქალიშვილი. ვაჟთაგან ერთი — ყველაზე უფროსი, თუთხალია. მეფე გახდა, ზოგიერთი მათგანი — ხეთების ლაშქრის ხარდლებად, ქალიშვილთაგან ერთი რამსეს II-ის მეუღლე იყო).

ფუძეხეფას როლზე ხათის სახელმწიფოში მიუთითებს თუნდაც ის ფაქტი, რომ რამსეს II ყოველ წერილს ხათში აგზავნიდა ორ ეგზემპლარად — ერთს ხათუსილი III-ისათვის, მეორეს — სწორედ ფუძეხეფასთვის. ხათის დედოფალი რამსესს უგზავნიდა პირად წერილებსაც მისი ერთი ქალიშვილის რამსესთან შეუღლების თაობაზე. ივარაუდებოდა ფუძეხეფას გამგზავრება ამურაში, სადაც იგი პირადად შეხვდებოდა ფარაონს. ასევე ივარაუდებოდა ხათის მეფე-დედოფლის გამგზავრება ეგვიპტეში. მაგრამ ხათუსილის გარდაცვალებამ ეს უკანასკნელი სავარაუდო გეგმა ჩაშალა. ფუძეხეფამ თავისი აქტიური მოღვაწეობა განაგრძო მისი შვილის — თუთხალია IV-ის გამეფების შემდეგაც.

უფლისწულები სახელმწიფოში გარკვეული პრივილეგიებით სარგებლობდნენ. თელიფინუს დროიდან მათ გზავნიდნენ დაპყრობილი ქალაქების სამართავად, სადაც ისინი თავს „პატარა მეფეებად“ თვლიდნენ. უფლისწულები ფლობდნენ დიდ მამულებს მათზე მსხდომი უშუალო მწარმოებლებითურთ. მეფის მემკვიდრე უფლისწული (თუხქანთ-) ბავშვობიდანვე მონაწილეობდა სახელმწიფო საქმეებში.

პოლიტიკური, სამეურნეო-ადმინისტრაციული თუ სასამართლო საქმენი იხილებოდა და წყდებოდა ხათუსას. სასახლეში, რომელსაც გააჩნდა თავისი „ფილიალები“ — ასევე „სასახლენი“ ქვეყნის სხვადასხვა მსხვილ დასახლებებში. ასეთი „სასახლეები“ განიხილებოდნენ როგორც სამეურნეო-ადმინისტრაციული და სასამართლო ცენტრები პროვინციებში. ამ „სასახლეებში“ („მეფის სახლებში“), რომელთაც გააჩნდათ თავიანთი არქივებიც კი, აწარმოებდნენ მიმოწერას უშუალოდ მეფესთან სამეურნეო-ადმინისტრაციული. თუ სასა-



შართლო საქმეებთან დაკავშირებით. თურქეთის თანამედროვე სოფელ მამათ-ჰუიუქის ადგილას (ზილესთან ახლოს) 70-იან წლებში არქეოლოგებმა გათხარეს სწორედ ასეთი „სასახლე“. იგი განეკუთვნებოდა ზეთურ წყაროებში მოხსენიებულ ქალაქ თაფიგას (თაფიქას). სასახლეში იპოვეს ლურსმული ფირფიტების მცირე არქივი, რომელშიც დაცული აღმოჩნდა ტექსტები მიმოწერისა „დიდ მეფესა“ და ოლქის მმართველს შორის (სულ 114 ცალი).

ხათუსას სასახლეში, სადაც მოთავსებული იყო მეფისა და დედოფლის რეზიდენციები („მეფის სახლი“, „დედოფლის სახლი“), თავს იყრიდნენ მეფის დიდი მოხელენი — დიდებულები („თელიფინუს ტექსტის“ მიხედვით, „უპირველესნი“): „სასახლის ძეთა“ მთავარი, „ათასის თავები“, „ბატონები“, ხაზინადართა მთავარი, მწდეთა მთავარი, „კვერთხის მტარებელთა“ მთავარი, „სახლის მამანი“, მცველთა მთავარი, მელვინეთუხუცესთა მთავარი, „ოქროს იარაღის მტარებელთა“ მთავარი, მესუფრეთა მთავარი, მზარეულთა მთავარი, „მინდვრის ათასთა“ მთავარი, ეტლოსანთა მთავარი, მთავარი ზედამხედველი და ა. შ. „ძველი სამეფოს“ ხანაში „უპირველესნი“ შეადგენდნენ ფანქუსა დ თულიას, რომლებიც მეფე-დედოფალთან ერთად წყვეტდნენ პოლიტიკურ, ადმინისტრაციულ, სასამართლო თუ სხვა საკითხს. „ახალი სამეფოს“ ეპოქაში, მართალია, ფანქუსა და თულიას ფუნქციონირება უნდა გაუქმებულიყო, ან მნიშვნელოვნად შესუსტებულიყო, მაგრამ „უპირველესები“ მაინც დიდ მოხელეებად რჩებოდნენ და დიდი უფლებებით სარგებლობდნენ.

ხათუსას სამეფო კარზე საქმიანობდნენ: „სასახლის ძენი“, ხაზინადარნი, მწდენი, „კვერთხის მტარებელნი“, მცველები, მელვინეთუხუცესები, „ოქროს იარაღის მტარებლები“, მესუფრენი, მზარეულნი, ეტლოსნები, ზედამხედველები და სხვა დაბალი რანგის მოხელენი.

მეფის მოხელეებით მოფენილი იყო ხათის მთელი ქვეყანა. მეფე ნიშნავდა თავის ნაცვლებს სხვადასხვა ქალაქში. სასახლევრო რაიონებში მეფის მიერ იგზავნებოდა „ოლქის მმართველი“ („სახლვრის ბატონი“), რომელთა უპირველესი მოვალეობა იყო სასახლევრო პუნქტების დაცვა და მტრის შემოტევის მოგერიება, „სასახლის“ მიწებზე მოსავლის აღების ორგანიზება და სხვ. ადგილობრივი მმართველობა ზორციელდებოდა ცენტრალური ხელისუფლებისა და ადგილობრივი თვითმმართველობის წარმომადგენელთა თანამოქმედებით.

მთელი სახელმწიფოებრივი სისტემის საყრდენი უკრედი იყო თემი, რომელიც ცნობდა მეფის უზენაესობას, თუმცა ინარჩუნებდა გარკვეულ ავტონომიას. მეფე ანგარიშს უწევდა ადგილობრივ ტრადიციებსა და წეს-ჩვეულებებს. თემის სათავეში უხუცესები იდგნენ ადმინისტრაციული და სამართლებრივი ფუნქციებით.

ხეტური კანონებისა და სამართლებრივი თუ პოლიტიკური შინა-არსის სხვა წყაროებიდან კარგად ჩანს, რომ ხეტებისათვის დამახასიათებელი იყო საზოგადოების თავისუფალ წევრთა დაპირისპირება არათავისუფალი ადამიანებისადმი. „ძველი სამეფოს“ დროს უკვე არსებობდა ოპოზიცია: „თავისუფალი — არათავისუფალი“ („მონა“). ამგვარად, ხეტების ისტორიის აღრეული პერიოდებიდანვე შეინიშნებოდა საზოგადოების ორწევრიანი სოციალური სტრატეგიკაცია.

ამასთანავე, ხეტური ლურსმული ტექსტების ანალიზი აჩვენებს იმასაც, რომ საზოგადოების თავისუფალი წევრები, თავის მხრივ, იყოფოდნენ სამ ძირითად ფენად: არისტოკრატთა, ქურუმთა და რაგითი (სოციალურად თავისუფალ, მაგრამ ეკონომიკურად დამოკიდებულ) მეთემეთა ფენებად (ხეტურ კანონებში ქურუმები, მეომრები და მეთემენი არ არიან გამოყოფილი ადამიანთა ცალკე კატეგორიების სახით).

ყურადსაღებია, რომ სოციალურად თავისუფალი ადამიანის აღსანიშნავად (რომელსაც უპირისპირდება სოციალურად არათავისუფალი ადამიანი) ხეტურ ტექსტებში იხმარებოდა არა მართო უბრალოდ „კაცი (ქალი)“ ან „ადამიანი“, როგორც ეს შუამდინარულ სანართლებრივ დოკუმენტებშია (მაგალითად, ცნობილ „ხამურაბის კანონებში“), არამედ შედგენილი ტერმინები: „კაცი (ქალი) თავისუფალი“, ან „ადამიანი თავისუფალი“ (ორივე სქესის წარმომადგენელთათვის). ხეტურ კანონებში ერთმანეთს ენაცვლება „კაცი (ქალი) თავისუფალი“ და „ადამიანი თავისუფალი“. ასეთი გამოთქმები ძველი ახლო აღმოსავლეთის არცერთ სხვა სამართლებრივ დოკუმენტებში არ დასტურდება.

ზედსართავი სახელის — „თავისუფალის“ გამოჩენა „კაცთან (ქალთან); ადამიანთან“ შეთავსებით მკვლევართაგან ჩვეულებრივ გაგებულა როგორც უტყუარი მაჩვენებელი ამ „კაცის; ადამიანის“ სოციალური თავისუფლებისა, რაშიც მართლაც არ შეიძლებოდა დაეჭვება. მაგრამ მხოლოდ ამ გარემოების კონსტატირება საკმარისი არ არის აიხსნას მიზეზი „თავისუფალის“ გამოჩენისა გამოთქმაში „კაცი თავისუფალი“, მით უმეტეს, რომ სხვა ძველადმოსავლური სამართლის ძეგლებში სოციალური თავისუფლების ხაზგასასმელად არსად არ ხმარობდნენ სიტყვა „თავისუფალს“ (ხშირად თვით ხეთი მწერლებიც არ ხმარობდნენ ამ სიტყვას, რადგან იცოდნენ, რომ „კაცი (ქალი)“ სოციალურად თავისუფალს აღნიშნავდა). როგორც ხეტური ტექსტე-

ბის ანალიზი აჩვენებს, გამოთქმა „კაცი (ადამიანი) თავისუფალი“ გულისხმობდა, როგორც ჩანს, არა მარტო სოციალურ, არამედ ვარკვეულ ეკონომიკურ ასპექტსაც, რადგან ამით ხაზი ესმებოდა, სახელდობრ რისგან იყო ეს „კაცი (ადამიანი)“ განთავისუფლებული, თავისუფალი.

ხეთურ ტექსტებში, განსაკუთრებით, ხეთურ კანონებში, სიტყვა „თავისუფალი“ („განთავისუფლებული“) ნახმარია, პირველ რიგში, იმ მეურნეობათა („სახლების“) ან ადამიანთა მიმართ, რომლებიც თავისუფალი, განთავისუფლებული იყვნენ სახელმწიფო სავალდებულო მოვალეობათაგან, სახელდობრ, სახანისა და ლუცისაგან. მეურნეობები ანდა ადამიანები, რომლებსაც ცენტრალური ხელისუფლება ჩამოართმევდა ამ „თავისუფლებას“, აღარ იყვნენ „თავისუფლები“ („განთავისუფლებულები“) ეკონომიკური თვალსაზრისით და იწყებდნენ სახანისა და ლუცის შესრულებას. აშკარაა, რომ ასეთ შემთხვევებში „თავისუფლება“ გამოიხატებოდა სახანისა და ლუცისაგან განთავისუფლებაში, რაც დასტურდება ე. წ. „საიშენიტეტო სიგელების“ (იხ. ზემოთ) მონაცემებითაც, რომლებშიც „განთავისუფლება“ ნიშნავდა სწორედ აღნიშნულ მოვალეობათაგან განთავისუფლებას.

აქედან გამომდინარე ივარაუდება, რომ გამოთქმაში „კაცი თავისუფალი“ უძველეს ხანებში ჩაქსოვილი იყო ეკონომიკური ასპექტიც, გულისხმობდა რა მეფის (სასახლის) სახანისა და ლუცისაგან განთავისუფლების პირობას („ძველი სამეფოს“ ხანაში სახელმწიფო ვალდებულებათაგან განთავისუფლებულთა წრე გაცილებით ფართო იყო, ვიდრე „ახალი სამეფოს“ დროს, როდესაც მეფის ბრძანებით ეს პრივილეგიები გაუუქმდათ ადამიანთა გარკვეულ წრეებს). მომდევნო პერიოდში ეს ასპექტი ერწყმის სოციალური თავისუფლების შინაარსს და გამოთქმა „კაცი თავისუფალი“ იქცევა პრივილეგიებული ადამიანის ზოგად აღმნიშვნელ ტერმინად, რომელიც გულისხმობდა საერთოდ სოციალურად თავისუფალ ადამიანებს. „ახალი სამეფოს“ ხანაში ამ ტერმინს ეძლევა კიდევ უფრო კონკრეტული მნიშვნელობაც — ზოგჯერ იგი აღნიშნავდა „წარჩინებულს, დიდგვაროვანს“, რომლისთვისაც შრომითი საქმიანობა ითვლებოდა სამარცხვინოდ, ანდა დასჯის ერთ-ერთ ფორმად (ეს ჭერ კიდევ „ძველი სამეფოს“ ხანაში შეინიშნებოდა: მეფე თვლიდნენ დიდგვაროვანი დამნაშავენი დასაჯა იმით, რომ მათ „მზრებდნენ იარაღი აჰყარა“ და ხელში „გუთანი მასცა“).

თავისუფალთა ყველაზე მაღალ ფენას შეადგენდნენ, როგორც ზემოთ აღნიშნა, არისტოკრატიის წარმომადგენლები, რომლებიც თავის მხრივ იყოფოდნენ „მაღალ“ და „დაბალ“ წრეებად. სამეფო საჯარეულოს გარდა არისტოკრატიის მაღალ წრეს ვანეკუთვნებოდნენ

მეფის „უპირველესი“ მოხელეები, დიდგვაროვნები (იხ. ზემოთ), რომელთა შორის დიდი სამხედრო ჩინოსანნიც იყვნენ (არისტოკრატიის დაბალი წრეები მოიცავდნენ მეფის მოხელეებს, რომლებიც არ განეკუთვნებოდნენ „უპირველესებს“ და სხვებს). სწორედ ეს „უპირველესები“ შედიოდნენ ფანქუსა და თულიას შემადგენლობაში.

თავისუფალთა პრივილეგიურ ფენას შეადგენდნენ ქურუმები და კულტის სხვა მაღალი მსახურნი (იხ. ქვემოთ, ტაძართან დაკავშირებით). თავისუფალთა ფართო ფენებს ქმნიდნენ თემის არისტოკრატია („უხუცესები“) და თავისუფალი მეთემენი (ეს უკანასკნელები ეკონომიკურ დამოკიდებულებაში იყვნენ სახელმწიფოს მიმართ).

ხეთური კანონების პარაგრაფთა დიდი ნაწილი ეძღვნება იმ სხვადასხვა სამართალდარღვევათა განხილვას, რომლებიც სწორედ ამ „თავისუფალ ადამიანებს“ ეხებოდათ. „თავისუფალთა“ მოკვლისათვის ან სხეულის დაზიანებისათვის გათვალისწინებული იყო სხვადასხვა ანაზღაურება (ძირითადად, ფულადი — ვერცხლით), თანაც დადგენილი იყო მაღალი კომპენსაციები „თავისუფალთა“ სასარგებლოდ (თითქმის ყოველთვის გაორმაგებული), რაც უზრუნველყოფდა მათ გაძლიერებულ დაცვას. თვითონ „თავისუფლები“ სხვადასხვაგვარად ისჯებოდნენ ჩადენილი დანაშაულისთვის. კომპენსაციათა რაოდენობის მიხედვით თუ ვიმსჯელებთ, მათი საგადასახადო უნარი ჩვეულებრივ ორჯერ მეტი იყო, ვიდრე „არათავისუფალისა“ („მონისა“), ე. ი. მატერიალურად ისინი უფრო მეტად იყვნენ უზრუნველყოფილი, ვიდრე „არათავისუფლები“. ეს მატერიალური უთანასწორობა შეიმჩნევა ხეთურ ტექსტებშიც, რომლებშიც მოცემულია დაპირისპირება: „მდიდარი — ღარიბი“.

„არათავისუფალთა“ წრეც საკმაოდ ფართო უნდა ყოფილიყო. უპირველეს ყოვლისა, „არათავისუფლებში“ იგულისხმებოდნენ ხეთური კანონების იმ „მონათა“ დიდი ნაწილი, რომლებიც „თავისუფლებს“ უპირისპირდებოდნენ. ესენი იყვნენ სოციალურ თავისუფლებას მოკლებული, გარკვეულ დამოკიდებულებაში მყოფ ადამიანთა ფართო ფენები (მეგუთნეები, მწყემსები, მებალენი, მევენახენი, წვრილი ხელოსნები და ა. შ.). ასეთ „მონებს“ ჰქონდათ „სახლი“ — მეურნეობა (სახელმწიფო მეურნეობათა სისტემაში. იქნებოდა ეს სამეფო ანუ სასახლის, სატაძრო თუ საკულტო მეურნეობა), ოჯახი, წარმოების საშუალებანი, ჰყავდათ საქონელი, ზოგიერთს — მონებიც, ფლობდნენ საკუთარ ხორბალს, ვერცხლს და სხვას (მიწა მათ მფლობელობისა და სარგებლობის უფლებით ჰქონდათ მიღებული სახელმწიფო მეურნეობის ფონდიდან). როგორც წესი, ისინი ითვლებოდნენ სამართლის სუბიექტებად და „სამოქალაქო თემის“ წევრებად და არ განიხილებოდნენ როგორც რომელიმე კერძო პირის ან სახელმწიფო მეურნეო-

ბის სრულ საკუთრებად, იმყოფებოდნენ რა დამოკიდებულების გარკვეულ ფორმაში. ყოველივე ამის გამო, გაუმართლებელია მათი განხილვა როგორც „ნამდვილი“ მონები, რომელთა არსებობა ხეთურ საზოგადოებაში ექვს არ იწვევს, მიუხედავად იმისა, რომ ხეთურ წყაროებში ორივე ეს კატეგორია „მონებისა“ ერთი ტერმინითაა აღნიშნული (იხ. ზემოთ).

„არათავისუფლებში“ შედიოდნენ „ნამდვილი“ მონებიც. ე. ი. ადამიანები, რომლებიც მოკლებული იყვნენ ყოველგვარ უფლებებს და გარეშეეკონომიკური იძულების გზით განიცდიდნენ ექსპლუატაციას თავიანთი ბატონების მხრიდან. ისინი წარმოადგენდნენ ბატონის (ან რომელიმე მეურნეობის) სრულ საკუთრებას, მათ არ გააჩნდათ საკუთარი მეურნეობა — „სახლები“, წარმოების საშუალებანი. ეკონომიკურად მონა, როგორც აღვნიშნეთ, ვილაყის საკუთრება იყო, პოლიტიკურად „სამოქალაქო თემის“ გარეთ იდგა, ხოლო იურიდიულად — სამართლის ობიექტი იყო (იყენებდნენ ანაზღაურებათა გადახდის დროს, „სახლის“ ქონების გაყოფისას, ყიდვა-გაყიდვისას ან გაჩუქებისას). სწორედ ასეთი მონები იხსენიებიან ხეთურ ტექსტებში როგორც „სახლის“ ერთ-ერთი კომპონენტი (იხ. ზემოთ) და აღინიშნებიან ტერმინებით: „თავი“, „სული“, „მონა“, „მონა ქალთა და მონა კაცთა თავები“, „(სახლის) მსახურნი, „ნამრა“ (რომელსაც არ გააჩნდა „სახლი“) და ა. შ. მონებს იყენებდნენ „სახლის“ მიწების დამუშავებისას, საქონლის მოვლის საქმეში, ოჯახის წევრთა მომსახურებისათვის. ზოგჯერ მათ ამუშავებდნენ პატარ-პატარა ჯგუფებად წვრილ მეურნეობებში, სადაც ისინი წარმოების პროცესში ძირითად ძალას ქმნიდნენ.

ხათის სახელმწიფოში მონობის სხვადასხვა წყარო არსებობდა. მონებად ხდებოდნენ დეპორტირებულთა რიგებიდან (ყიდვა-გაყიდვის, ბოძებრს. შეწირვების გზით), მოვალეთაგან. დამნაშავეთაგან, თავისუფალ ადამიანთა ყიდვა-გაყიდვის შედეგად. არსებობდა აგრეთვე ფორმა მონობისა როგორც ქორწინებისა და ქურდობის ან მოტაცების შედეგი. განირჩეოდა მემკვიდრეობითი, მუდმივი და დროებითი მონობა. ხათის საზოგადოება იცნობდა ძირითადად სამი კატეგორიის მონებს: სამეფო (სასახლის), სატაძრო და კერძო საკუთრებაში მყოფ მონებს.

გარკვეულ მომენტამდე „არათავისუფლებს“ განეკუთვნებოდნენ „სახლებიანი“ დეპორტირებულებიც. რადგან ისინი დასაწყისში, როგორც ჩანს, ითვლებოდნენ სახელმწიფო მონებად — ხელოვნურად შექმნილი „სახლების“ მფლობელნი განიხილებოდნენ როგორც სახელმწიფო საკუთრება. მაგრამ მას შემდეგ, რაც ისინი „იარალის კაცნი“ გახდებოდნენ, უფლებრივ სტატუსსაც შეიცვლიდნენ. ეს ხდე-

ბოდა მათ მიერ „სახლების“ მიღების სამი წლის გასვლის შემდეგ. მხოლოდ მეოთხე წელს ისინი იღებდნენ „იარალის კაცთა“ სტატუსს, იწყებდნენ რა სახელმწიფო ვალდებულებათა (სახანისა და ლუცის) მოხდას. ეს ნიშნავდა იმას, რომ ამიერიდან ისინი თავისუფალთა (ალბათ, დაბალ ფენათა) რიგებში გადადიოდნენ — ამიტომაც უნდა იყოს, რომ ზოგიერთ ხეთურ ტექსტში „კაცი თავისუფალი“ და „იარალის კაცი“ სინონიმებად გვევლინებიან.

„არათავისუფალთა“ სტატუსი უნდა ჰქონოდათ ადამიანთა კიდევ სხვა კატეგორიებს, მაგალითად, „ხიფარა კაცთ“ (სიტყუასიტყვით „დაკავებული, დაქვრილი“), „ს ა რ ი ქ უ ვ ა-კაცთ“, „უ ფ ა თ ი-კაცთ“, „ლ უ ლ ა ხ ი“- და „ხ ა ფ ი რ ი ა-კაცთ“ („ხაფირია-კაცი“, ალბათ, ხ ა ბ ი რ უ ტერმინით აღნიშნული ადამიანები — თემიდან განდევნილები. ძველი ახლო აღმოსავლეთის სხვადასხვა ქვეყანაში ხ ა ბ ი რ უ ადამიანები მრავლად იყვნენ) და სხვებს.

#### ხეთური საზოგადოების სოციალურ- აქონოვითური წყობის აროგლევა

ხეთური საზოგადოება იყო ტიპური ადრეკლასობრივი ძველადმოსავლური საზოგადოება, რომლის სოციალურ-ეკონომიკური წყობის საკითხი დღეს ისევე პრობლემატურაა, როგორც საერთოდ ძველადმოსავლურ საზოგადოებათა სოციალურ-ეკონომიკური წყობის პრობლემა.

ხეთური წყაროების გამოქვეყნების დაწყებისთანავე, როდესაც მეცნიერთა განკარგულებაში აღმოჩნდა ხეთური კანონები, ისტორიული და რელიგიური შინაარსის ტექსტები, ბურჟუაზიულ ისტორიოგრაფიაში ხეთური საზოგადოება, ყველა სხვა ძველადმოსავლური საზოგადოების მსგავსად, გამოცხადებულ იქნა ფეოდალურად, რასაც ამჟამად მხარს უჭერს ბურჟუაზიულ ისტორიკოსთა დიდი უმრავლესობა. საბჭოთა ისტორიოგრაფიაში ხეთური საზოგადოების ხასიათის შეფასება იცვლებოდა იმისდა მიხედვით, თუ როგორ აფასებდნენ საერთოდ ძველი აღმოსავლეთის საზოგადოებათა სოციალურ-ეკონომიკურ წყობას 20-იანი წლებიდან დღემდე.

20-იან წლებში საბჭოთა ისტორიოგრაფიაშიც გავრცელებული იყო მოსაზრება ხეთური საზოგადოების ფეოდალური ხასიათის შესახებ. მაგრამ 30-იანი წლების დასაწყისიდან ხეთური საზოგადოება განიხილებოდა როგორც „აზიური წარმოების წესზე“ დამყარებული, თუმცა მალე უარყოფილ იქნა ეს ვარაუდიც: 1934 წ. აკად. ვ. სტრუვემ ძველადმოსავლური საზოგადოებანი, მათ შორის ხეთურიც,

მონათმფლობელურად განსაზღვრა. ეს ვარაუდი საბჭოთა ისტორიო გრაფიაში დღემდეა გაბატონებული, თუმცა 50-იანი წლების ბოლო „აზიური წარმოების წესთან“ დაკავშირებით წაიოწყებულმა ახალმ დისკუსიამ აზრთა დიდი სხვადასხვაობა გამოიწვია ძველამოსავლურ საზოგადოებათა სოციალურ-ეკონომიკური წყობის შეფასებაში — მონაწილეთა ერთმა ნაწილმა საეკვოდ მიიჩნია ამ გაბატონებული აზრის სისწორე. ეს შეეხო ხეთურ საზოგადოებასაც. ამგვარად, დღესაც ისმის კითხვა: როგორია ხეთური საზოგადოების სოციალურ-ეკონომიკური წყობის სურათი ხეთოლოგიის განვითარების თანამედროვე მიღწევათა შუქზე?

ხეთურ ლურსმულ ტექსტებში წარმოდგენილი, ნაწილობრივ ზემოგანხილული, მასალის მიხედვით თუ ვიმსჯელებთ, ხეთური საზოგადოების ზოგადი სახე მნიშვნელოვნად განსხვავდება ანტიკური ხანის საზოგადოებათა სურათისაგან. ამას გრძნობს ყველა, ვისაც კი ამ ორ სხვადასხვა ეპოქის საზოგადოებანი ურთიერთს შეუდარებია, მათ შორის, ძველ აღმოსავლეთში მონათმფლობელური წარმოების წესის მომხრეებიც კი. მაგრამ ეს უკანასკნელი, ძველამოსავლურ საზოგადოებებს უწოდებენ რა ხან „ადრემონათმფლობელურს“, ხან კიდევ „ადრეულ ძველ“ საზოგადოებებს, საერთო ჯამში, მათ მონათმფლობელური წარმოების წესზე დამყარებულ სახელმწიფოებად თვლიან. მაგრამ აშკარაა, რომ ხეთური საზოგადოების ეკონომიკური და სოციალური სტრუქტურა არ თავსდება ამ წინასწარ გამზადებულ სტანდარტულ განსაზღვრებაში, რადგან ხათში მონობა არ იყო წარმოების ძირითადი საფუძველი, ხოლო წარმოებით ურთიერთობებში მონური ტიპის ურთიერთობანი განმსაზღვრებელ როლს არ თამაშობდა.

მიუხედავად მონობის განვითარებისა ხეთურ საზოგადოებაში, მონობის ინსტიტუტი არ უნდა განვიხილოთ როგორც ძირითადი ფაქტორი, რომელიც განსაზღვრავდა ხეთური სოციალური ორგანიზმის ხასიათს. ეს უკანასკნელი კი განისაზღვრებოდა სოციალურად თავისუფალ და ეკონომიკურად დამოკიდებულ ადამიანთა საზოგადოებრივი მდგომარეობით, ე. ი. მეთემეთა, როგორც მატერიალური დოვლათის ძირითად მწარმოებელთა, მდგომარეობით. რაოდენობრივადაც თავისუფალი მეთემე იყო ხეთური საზოგადოების ძირითადი ფიგურა. მართალია, ზოგჯერ ხდებოდა მეთემეთა შრომის შეზღუდვა მონური შრომით, რომელსაც დროებით გაბატონებული ფორმაც ჰქონდა, მაგრამ ამას ადგილი ექნებოდა იშვიათად. მონური შრომა ფართოდ გამოიყენებოდა „ახალი სამეფოს“ დროს, როდესაც ხეთები წარმატებით ამთავრებდნენ სამხედრო ლაშქრობებს. მშვიდობიანობის დროს კი დებორტირებულთა ნაკადის შემოდღევა ხათის ქვეყანაში მნიშვნელოვნად მცირდებოდა, რაც იწვევდა მონათა რაოდენობის შემცირებასაც.

ასეთ შემთხვევებში კვლავ სასოფლო თემი ინარჩუნებდა მყარ მდგომარეობას, მონობა კი იღებდა პატრიარქალურ ხასიათს და საგრინობლად სუსტად მინი როლი ქვეყნის ეკონომიკაში.

ქველადმოსავლურ საზოგადოებათა განხილვა როგორც „წარმოების აზიურ წესზე“ დამყარებული, ანდა „პროტოფეოდალური“ ადრეკლასობრივი საზოგადოებები, უფრო მართებულია (ხეტების მიმართაც). ხეტურ საზოგადოებას ვერ ვუწოდებთ ვერც ფეოდალურს, რადგან უგულებელყოფილი იქნება ისეთი ფენომენი, როგორცაა მონობის მნიშვნელოვანი განვითარება, თუმცა არამონათმფლობელურ ურთიერთობათა არსებობა ხეტების სახელმწიფოში იმდენადაა თვალში საცემი, რომ ასეთ ურთიერთობათა განვითარების უგულებელყოფა შეუძლებელია.

სახელმწიფო სექტორის სასოფლო სამეურნეო წარმოების პროცესში ყალბდებოდა და ვითარდებოდა ძირითადად ორი ტიპის ეკონომიკური ურთიერთობანი — მონათმფლობელური და აშკარად არამონათმფლობელური. ამ უკანასკნელი ხასიათის ურთიერთობანი კი უფრო მრავალმხრივია (ყმური ურთიერთობა, დაქირავება, „სახლებიან“ დეპორტირებულთა წარმოებითი ურთიერთობანი, უშუალო მწარმოებლის მიმაგრება მიწაზე, მისთვის წარმოების საშუალებათა გადაცემა და ა. შ.). ამგვარად, ხეტურ საზოგადოებაში მონური და არამონური ურთიერთობანი ერთმანეთში მჭიდროდაა გადახლართული. ერთმანეთის გვერდით თანაარსებობენ. როგორც მკვლევართა ნაწილი ვარაუდობს, ასეთი ვითარება დამახასიათებელია საერთოდ ქველადმოსავლური ადრეკლასობრივი საზოგადოებებისათვის. რომლებიც, ცხადია, თავის შესაფერ წარმოების წესზე იყვნენ დამყარებული. წარმოების ამ წესს, ჩვენი აზრით, თავისუფლად შეიძლება ვუწოდოთ „ქველადმოსავლური წარმოების წესი“, ე. ი. წარმოების ის წესი, რომელიც ქველ ადმოსავლეთში იყო გავრცელებული. იგი გამოკვეთილად იქნება დაპირისპირებული „ანტიკური წარმოების წესისადმი“ (ე. ი. ანტიკურ სამყაროში არსებული წარმოების წესისადმი), რომლის ძირითადი საფუძველი განვითარებული მონათმფლობელობა იყო.



## ხეთური სამართალი

„არ ჰნა სამართლიანი საქმე უსამართლოდ,  
უსამართლო — სამართლიანად!“

ამ სიტყვებით მიმართავდა, როგორც ჩანს, მეფე, სასაზღვრო ოლქის მმართველს, რომელიც განაგებდა ადგილობრივ სასამართლო საქმეებსაც. იგი ვალდებული იყო მოესმინა სარჩელის მქონე პირთათვის, იქნებოდა იგი მონა, მსახური თუ თავისუფალი და გამოეტანა სათანადო მიუყერძობელი განაჩენი. „სამართლიანად მოქცევა“ მოსამართლის ვალი იყო ასე უძველეს ხანებშიც, თუმცა არ ვიცით. რამდენად პირნათლად ასრულებდა იგი ამ მოვალეობას და მართლაც იყო თუ არა იგი ყოველთვის „სამართლიანი“.

უზენაეს მსაჯულად მეფე ითვლებოდა. თვით ქვეყნის მბრძანებელი საქმეებში ერეოდა მხოლოდ რთული ვითარებისას — თუკი საქმე ეხებოდა გრძნეულებას, ან სიკვდილით დასჯას. მეფის სასამართლოს გადაწყვეტილება საბოლოო იყო: „უკეთუ ვინმე წინ აღუდგება მეფის განაჩენს, მისი სახლი, დაე. განადგურდეს! უკეთუ ვინმე წინ აღუდგება წარჩინებულის განაჩენს, მას თავი მოსჭრან!“

სასამართლო ხეტებთან იყო სახელმწიფოებრივი ორგანო. რომელიც კანონით განსაზღვრული წესის შესაბამისად იხილავდა სამოქალაქო და სისხლის სამართლის საქმეებს. სამეფო სასამართლოზე იხილებოდა სხვადასხვა საკითხი, ძირითადად. სახელმწიფო ქონების გაფლანგვა-მოთვისების, ან მოპარვის თაობაზე. ადგილობრივ სასამართლოთა უშუალო მოქმედება ხეთურ ტექსტებში არ აისახა. თუმცა მათი ფუნქციონირება გვეს არ იწვევს. სასამართლოს მსვლელობის ერთ-ერთ კომპონენტს — დაკითხვას (როგორც ბრალდებულთა, ასევე მოწმეთა) ეძღვნება არაერთი ხეთური დოკუმენტი. ხეტებს არ ჰყავდათ პროფესიონალი მოსამართლენი (თანამედროვე გაგებით). მოსამართლის ფუნქციებს ასრულებდა მეფე ან დედოფალი (სამეფო სასამართლოში), ანდა მოსამართლის უფლებებით აღჭურვილი სახელმწიფო მოხელენი (ადგილობრივ სასამართლოებში).

ხეთების წარმოდგენით სამართალი და კანონი ღვთაებრივი წარმოშობის იყო. ღვთაების წინაშე ფიცის დადება (განსაკუთრებით, დამნაშაის მხრიდან) აუცილებელი პირობა იყო სასამართლოს მსვლელობისას, სადაც მხოლოდ სიმართლე უნდა ეთქვათ. ყალბი ჩვენებისთვის ისჯებოდნენ. განსაკუთრებული დანაშაულის გამოვლენის მიზნით ბრალდებულის მიმართ ზოგჯერ იყენებდნენ ორდალიას — ბრალდებულს მდინარეში აგდებდნენ მისი დამნაშავეობა-უდანაშაულობის გასარკვევად: თუკი ბრალდებული გაუძლებდა გამოცდას, მას გამართლებულად ჩათვლიდნენ.

მკვლევართა ყურადღება მიიქცია ხეთების სამეფო არქივში აღმოჩენილმა ე. წ. „სასამართლო ოქმებმა“ (მათში ძირითადად დაკითხვის მიმდინარეობაა ასახული). ხეთები ამ სახის ტექსტებს „აქმეს“ უწოდებდნენ. ყველა მათგანი ეხება მხოლოდ სამოქალაქო სამართალს (სისხლის სამართლის საქმე აღნიშნულ ტექსტში არ ირჩევა). დოკუმენტი დგებოდა ერთ ეგზემპლარად (ღუბლიკატების გარეშე) მხოლოდ ამა თუ იმ სასამართლო პროცესის დამთავრების შემდეგ.

ტექსტებიდან არ ჩანს, სახელდობრ, რომელ ინსტანციაში აწარმოებდნენ სასამართლო დაკითხვას, ანდა სად გამოჰქონდათ სასამართლო დადგენილება. ერთ-ერთ ტექსტში, რომელშიც აღწერილია სასამართლო პროცესი მეფის მოხელის — უქურას შესახებ, განხილულია დედოფლის საჩივარი (ვარაუდობენ, რომ იგი ხათუსილი III-ის პუღლღე. „ღიღი დედოფალი“ ფუდუხეფაა), მასვე მიჰყავს რა სასამართლოს მსვლელობა.

ჩვენამდე მოღწეული ხეთური „სასამართლო ოქმები“ შედგენილია „ახალი სამეფოს“ დროს (როგორც ვარაუდობენ, ხეთური სამართალი ერთგვარ კავშირში იყო სხვა ძველადმოსავლურ სამართლებრივ სისტემებთან. გამოთქმულია აზრი ხეთების სასამართლო პროცედურაზე შუამდინარული სამართლის გავლენის შესახებ). „ოქმები“ არ დგებოდა სქემის, ტრაფარეტის მიხედვით. სასამართლოზე განიხილებოდა სხვადასხვა სასამართლო საქმე, იქნებოდა ეს სამეფო დოვლათის გაფლანგვის ან ქურდობის საქმე, ქრთამის აღების. სხვისი ჩაკუთრების უკანონოდ მითვისების საქმე, თუ აკრძალული მაგიური აქტის, ყალბი დოკუმენტის გაცემის, სასახლის საწყობიდან ნივთისა და საქონლის უსაბუთოდ (ტექსტში — „უბეკლოდ“) გაცემის საქმე.

ბრალდებულებად ან მოწმეებად გამოდიოდნენ, როგორც წესი, სახელმწიფო მოხელენი, მათ შორის, მაღალი თანამდებობის პირნი. სასამართლო პროცესის — დაკითხვის მსვლელობისას აშკარავდებოდა ფაქტები ამა თუ იმ მოხელისგან თავისი თანამდებობის ბოროტად გამოყენებისა, რაც განიხილებოდა როგორც უმძიმესი დანაშაული.

ჩვენამდე მოაღწია სამართლებრივი შინაარსის ერთ-ერთმა უძველესმა დოკუმენტმა — ხეთურმა კანონებმა, უფრო სწორად, კანონთა კრებულმა, რომელიც თანამედროვე მკვლევართა ნუმერაციით 241 პარაგრაფს შეიცავს (ზოგიერთ მათგანს აქვს A და B ქვეპარაგრაფებიც). თავისი მნიშვნელობითა და ორიგინალობით იგი თითქმის არ ჩამოუვარდება ბაბილონის მეფე ხამურაბის ცნობილ „კოდექსს“.

კაუხალური ფორმულირების მიხედვით, ხეთური კანონების კრებული ორი ძირითადი ნაწილისაგან შედგება. ეს არის ე. წ. „I ფირფიტა (დაფა)“ და „II ფირფიტა (დაფა)“, რომლებიც „ძველი სამეფოს“ დროსაა შედგენილი. შემოინახა „I ფირფიტის“ პარალელური ტექსტიც (სულ 41 პარაგრაფი ფრაგმენტებითურთ). იგი „ახალი სამეფოს“ დროინდელია (დაახლოებით, ძვ. წ. XIII ს-სა — არნუენდა III-ის ან თუთხალია IV-ის მეფობის ხანისა).

„I ფირფიტა“ (100 პარაგრაფით), რომელსაც ხეთური ტექსტის დასაწყისი სიტყვების მიხედვით უწოდებენ აგრეთვე „უკეთუ კაცს“, შეიცავს ადანიანის პირადი და საკუთრების უფლებათა განმარტებას. მასში აღწერილია „თავისუფალი კაცისა“ და „მონის“ მდგომარეობა, მოცემულია სასჯელთა სისტემა სხვადასხვა დანაშაულისათვის, განხილულია სახელმწიფო ვალდებულებათა შესრულების ცალკეული პირობა და ა. შ. „I ფირფიტაში“ პარაგრაფები შინაარსის მიხედვით ასეთი თანმიმდევრობითაა წარმოდგენილი: მკვლელობა (გამართლებული მკვლელობის შემთხვევების ჩათვლით), ვინმეზე თავდასხმა ან ვინმეს ცემა-დასახიჩრება, მონის მფლობელობასთან (განსაკუთრებით, გაქცევასთან) დაკავშირებული სხვადასხვა შემთხვევა, ქორწინებასთან დაკავშირებული ნორმების შესრულება-დარღვევა, დაქირავება, სახელმწიფო ვალდებულებათა მოხდის პირობები სახელმწიფო მიწის ფლობის დროს, მიწის მფლობელობის პირობები, ქურდობა, ცეცხლის წაქიდება (სხვადასხვა ობიექტისთვის) და სხვა.

„II ფირფიტა“ (ხეთური ტექსტის დასაწყისი სიტყვების მიხედვით, „უკეთუ ვაზს“) ეხება მიწათმფლობელობისა და ნათესების სამართლებრივი დაცვის, ანტისახელმწიფოებრივი და ანტისაზოგადოებრივი მოქმედების სასჯელთა სისტემის, ქურდობისა და შეთანხმების დარღვევის, ქალის ღალატის, დაქირავებული შრომის, ფასების ტარიფისა და სხვა საკითხებს. შინაარსობრივად პარაგრაფები განლაგებულია შემდეგი თანმიმდევრობით: დანაშაულობანი ვენახისა და ბაღბოსტნის ფლობასთან დაკავშირებით, ქურდობა და დაზიანება საკუთრების სხვადასხვა ობიექტისა, ყიდვა-გაყიდვასთან დაკავშირებული

სამართალდარღვევანი (მიწის გაყიდვის დროსაც), დაქირავებასთან, სოფლის მეურნეობასთან, ზოგიერთი რელიგიური წეს-ჩვეულების დარღვევასთან დაკავშირებული შემთხვევები, ფასების ჩამოთვლა, სქე-  
ლობრივ ურთიერთობათა მოწესრიგება და სხვა.

კანონთა ტექსტიდან კარგად ჩანს საკანონმდებლო სისტემის თან-  
დათანობით განვითარება: მრავალ მუხლში აღნიშნულია, თუ როგორი  
იყო სასჯელი ამა თუ იმ დანაშაულისა „წინათ“ და „ახლა“. ასეთ შემ-  
თხვევებში სასჯელი ყოველთვის შერბილებულია, როგორც წესი,  
განახევრებულია. ანდა, თუ „I ფირფიტაში“ ამა თუ იმ დანაშაული-  
სათვის დადგენილი იყო ადამიანთა ანაზღაურება „თავებით“, „II  
ფირფიტაში“ „თავები“ შეცვლილია უკვე ფულადი ჯარიმით და ა. შ.

კანონებში დიდი ადგილი ეთმობა საკუთრების ფორმების. გან-  
საკუთრებით. „თავისუფალ კაცთა“ უფლებების დაცვას. „თავისუ-  
ფალთაგან“ შედარებით „მონის“ მკვლელობა ან სხეულის დაზიანება  
შეფასებული იყო ჩვეულებრივ ნახევარ ფასად. სასაქონლო-ფულადი  
სისტემის განვითარების ნიმუშს წარმოადგენს ფასების ტარიფი. სხვა-  
დასხვა სახის სამუშაოთა შეფასება. კანონთა კრებულში განხილულია  
ადამიანისა და პირუტყვის დაქირავების პირობები, საოჯახო სამართ-  
ლისა და მემკვიდრეობის წესი (ოჯახი ხეთებთან წარმოადგენდა კარ-  
გად ორგანიზებულ მონოგამიურ უჯრედს, რომელსაც სათავეში ედგა  
ოჯახის თავი — მამა).

კანონებში დაცულია უნიკალური ცნობები ქორწინების ფორ-  
მებთან დაკავშირებით. ხეთებში გავრცელებული იყო ე. წ. „ქორწინ-  
ება შესყიდვით“ — სასიძოს ოჯახის მიერ გარკვეული გამოსასყი-  
დის — ურვათის (ურვადის) გაღება. არსებობდა ე. წ. „ერებუ“  
ქორწინება: ქალის ოჯახის მიერ გამოსასყიდის მიღება სიძი-  
საგან და მისი შესვლა ქალის სახლში — ზედსიძედ გახდომა. დაშვე-  
ბული იყო შერეული ქორწინების სხვადასხვა ფორმა (ქორწინება  
„თავისუფალსა“ და „მონებს“ შორის), როდესაც ორივე მხარე სა-  
კუთარ სოციალურ სტატუსს ინარჩუნებდა.

ხეთური კანონები მნიშვნელოვანი წერილობითი წყაროა ხეთთ-  
რი საზოგადოების სოციალურ-ეკონომიკური ურთიერთობების შე-  
სასწავლად. იგი უძველესი სამართლებრივი ძეგლია მცირე აზიიდან,  
წარმოადგენს რა ხეთური სამართლის ბრწყინვალე ნიმუშს. ამაში ადვი-  
ლად დარწმუნდება ყველა, ვინც უშუალოდ გაეცნობა ხეთურ კანო-  
ნებს, რომელთაგან მკითხველს მხოლოდ „I ფირფიტის“ თარგმანს  
ეთავაზობთ.

§ 1. [უკეთუ] ვინმე\* [ჩხუბში მოკლავს (თავისუფალ) კაცს] ან (თავისუფალ) ქალს, იგი [მას (ე. ი. ცხედარს) შინ მიიტანს], აგრეთვე 4 „თავს“ (ე. ი. ადაშიანს) გაიღებს, კაცს ან ქალს, [და მის (ე. ი. დაზარალებულის) სახლს] ჩააბარებს.

§ 2. [უკეთუ] ვინმე ჩხუბში მოკლავს [მონა კაცს] ან მონა ქალს, იგი მას (შინ) მიიტანს, [აგრეთვე 2 „თავს“] გაიღებს, კაცს ან ქალს, და მის სახლს ჩააბარებს.

§ 3. [უკეთუ] ვინმე თავისუფალ [კაცს] ან ქალს სცემს და იგი მოკვდება, ხელი მისი კი (უნებლიეთ) ჩადის ცოდვას, იგი მას (შინ) მიიტანს, აგრეთვე 2 „თავს“ გაიღებს და მის სახლს ჩააბარებს.

§ 4. [უკეთუ] ვინმე მონა კაცს ან მონა ქალს სცემს და იგი [მოკვდება, ხელი მისი კი (უნებლიეთ) ჩადის ცოდვას. იგი მას (შინ) მიიტანს, აგრეთვე 1 „თავს“] გაიღებს [და] მის სახლს ჩააბარებს.

§ 5. [უკეთუ] ვინმე ხეთ ვაჭარს მოკლავს, 100 მინა ვერცხლს გაიღებს და მის [სახლს] ჩააბარებს. თუკი (ეს მოხდება) ლუფია ქვეყანაში ანდა ფალას ქვეყანაში, [იგი 100] მინა ვერცხლს გაიღებს და მის დოვლათსაც აანაზღაურებს. როდესაც ეს ხათის ქვეყანაში (მოხდება), იგი ვაჭარსაც (შინ) მიიტანს.

§ 6. [უკეთუ] ადამიანი, კაცი ან ქალი, სხვის თემში (ჩექსტშია „დასახლობაში“) მოკვდება, ვის მიწაზეც გარდაიკვლება, მან 100 გიპესარი მინდორი უნდა გამოყოფს და მან (ე. ი. გარდაიკვლილს მემკვიდრემ) თავისთვის აიღოს.

§ 7. უკეთუ ვინმე თავისუფალ ადამიანს დააბრმავებს ან მას კ[ბილს] ჩაუმტვრევს, წინათ (ამისთვის) 1 მინა ვერცხლს იხდინენ, ახლა კი იგი (ე. ი. დამნაშავე) 20 სიკლ ვერცხლს გაიღებს და მის სახლს ჩააბარებს.

§ 8. უკეთუ ვინმე მონა კაცს ან მონა ქალს დააბრმავებს ან მას კ[ბილს] ჩაუმტვრევს, იგი [10] სიკლ ვერცხლს გაიღებს და მის სახლს ჩააბარებს.

§ 9. უკეთუ ვინმე ადაშიანს თავს გაუტეხს (დაუზიანებს). წინათ (ამისთვის) [6 სიკლ] ვერცხლს იხდინენ: (თავ)გატეხილი 3 სიკლ

\* სიტყვაში „ვინმე“ აქ და ქვემოთ ყველგან იგულისხმება როგორც „თავისუფალი“, ასევე „არათავისუფალი“ ადამიანი (ე. ი. „მონა“). ასეთ შემთხვევებში ჩადენილი დანაშაულისათვის ყოველი მათგანი თანაბრად ისჯება და თანაბრად იხდის ანაზღაურებას, რაც მეტად თავი-ებური მოვლენაა მთელს ქვეყანაში მართალი.

ვერცხლს იღებდა, ხოლო სასახლისათვის 3 [სიკლ ვერცხლს იხდიდ-  
ნენ. ახლა კი მეფემ სასახლისა (ე. ი. სასახლის წილი) გააუქმა და მხო-  
ლოდ (თავ)გატეხილი თავისთვის 3 სიკლ ვერცხლს აიღებს.

§ 10. უკეთუ ვინმე ადამიანს ზიანს მიაყენებს და იგი ავად გახ-  
დება, იგი [მასვე] მოუვლის. მის სანაცვლოდ კი კაცს მისცემს და იგი  
[მის (ე. ი. დაზარალბულის)] სახლში იმუშავეს (მანამ), სანამ იგი  
გამოჯანმრთელდება. როგორც კი იგი გამოჯანმრ[თელდება], იგი (დამ-  
ნაშავე) მას 6 სიკლ ვერცხლს მისცემს. მკურნალის ქირასაც იგივე  
[გადაიხდის].

§ 11. უკეთუ ვინმე თავისუფალ ადამიანს ხელს ან ფეხს მოს-  
ტეხს, იგი მისთვის 20 სიკლ ვერცხლს გაიღებს და მის სახლს ჩააბარ-  
ებს.

§ 12. უკეთუ ვინმე მონა კაცს ან მონა ქალს ხელს ან ფეხს მოს-  
ტეხს, იგი 10 სიკლ ვერცხლს გაიღებს და მის სახლს ჩააბარებს.

§ 13. უკეთუ ვინმე თავისუფალ ადამიანს ცხვირს მოაჭამს, 1 მი-  
ნა ვერცხლს გაიღებს და მის სახლს ჩააბარებს.

§ 14. უკეთუ ვინმე მონა კაცს ან მონა ქალს ცხვირს მოაჭამს,  
3 სიკლ ვერცხლს გაიღებს და მის სახლს ჩააბარებს.

§ 15. უკეთუ ვინმე თავისუფალ ადამიანს ყურს მოახევს, 12  
სიკლ ვერცხლს გაიღებს და მის სახლს ჩააბარებს.

§ 16. უკეთუ ვინმე მონა კაცს ან მონა ქალს ყურს მოახევს, 3  
[სიკლ] ვერცხლს გაიღებს.

§ 17. [უკეთუ] ვინმე თავისუფალ ქალს ნაყოფს მოუშლის, თუკი  
(ნაყოფი) 10 თვისაა — იგი 10 სიკლ ვერცხლს გაიღებს, ხოლო თუკი  
5 თვისაა — 5 სიკლს გაიღებს და მის სახლს ჩააბარებს.

§ 18. უკეთუ ვინმე მონა ქალს ნაყოფს მოუშლის, თუკი (ნაყო-  
ფი) 10 თვისაა — იგი 5 (?) სიკლ ვერცხლს გაიღებს.

§ 19 A. უკეთუ რომელიმე [მე] ლუვიელ ადამიანს, კაცს ან ქალს,  
ქ. ხათუსაში მოიპარავს და მას არცავეს ქვეყანაში წაიყვანს, (თუკი)  
ბატონი მისი იპოვის, იგი მხოლოდ (მას) თავის სახლში წამოიყვანს.

§ 19 B. უკეთუ ვინმე ხეთი ქ. ხათუსაში ლუვიელს მოიპარავს და  
მას [ლუვიას ქვეყანაში წა]იყვანს, წინათ (ამისთვის) 12 „თავს“ იხდი-  
ნენ, ახლა კი იგი (ე. ი. ქურდი) 6 „თავს“ გაიღებს [და მის სახლს  
ჩაა]ბარებს.

§ 20. უკეთუ რომელიმე ხეთი ხათის მონას ლუვიადან გაიტაცებს  
და მას ხათის ქვეყანაში მოიყვანს, ხოლო ბატონი მისი [იპოვის] მას,  
იგი (ე. ი. ქურდი) მასში 12 სიკლ ვერცხლს გაიღებს და მის სახლს  
ჩაა[ბარებს].

§ 21. უკეთუ ვინმე ლუვიელის მონას ლუვიას ქვეყნიდან [გაი-  
ტაცებს] და მას ხათის ქვეყანაში წაიყვანს, ხოლო ბატონი მისი

წილის მას, იგი მხოლოდ თავის მონას დაიბრუნებს. ანაზღაურება [არ არის].

§ 22. უკეთუ მონა კაცი გაიქცევა და მას ვინმე უკან დააბრუნებს, თუკი მას [ახლო-მახლო] შეიპყრობს, იგი მას ფეხსაცმელს მისცემს. თუკი მდინარის (იგულისხმება მდ. მარასანთა, თანანედროვე ყიზილ-ირმაკი) აქეთ (შეიპყრობს) — 2 [სიკლ ვერცხლს მისცემს], ხოლო თუკი მდინარის იქეთ — იგი მას 3 სიკლ ვერცხლს [მისცემს].

§ 23. უკეთუ მონა კაცი გაიქცევა და იგი ლუვიას ქვეყანაში წავა, ვინც უკან დააბრუნებს, მას იგი 6 სიკლ ვერცხლს მისცემს. უკეთუ [მონა გაიქცევა] და იგი მტრის ქვეყანაში წავა, ვინც უკან [დააბრუნებს], მასაც იგივე წაიყვანს.

§ 24. უკეთუ მონა კაცი ან მონა ქალი [გაიქცევა]. მისი ბატონი ვის კერასთანაც იპოვის, კაცის ერთი წლის (მუშაობის) საფასურში მას (ე. ი. ბატონს [...]) მინა ვერცხლს მისცემს, ხოლო ქალის [ერთი წლის (მუშაობის)] საფასურში 40 (?) სიკლ [ვერცხლს გაიღებს].

§ 25. [უკეთუ] ადამიანი (წყლიან) ჭურჭელს ან წყაროს წაბილწავს, [წინათ] (ამისთვის) [6 ? სიკლ ვერცხლს იხდიდნენ]: ვინც [წაბილწავდა] — [3 სიკლ ვერცხლს იხდიდა], (ხოლო) [სასახლისათვის 3] სიკლ ვერცხლს იღებდნენ. ახლაკი მეფემ სასახლისა (ე. ი. სასახლის წილი) [გააუქმა. ვინც წაბილწა, მხოლოდ იგი 3 (?) სიკლ ვერცხლს გაიღებს] და [მის სახლს] ჩააბარებს.

§ 26. (შემორჩენილია ცალკეული სიტყვები).

§ 27. [უკეთუ მამაკაცი ცოლს შეირთავს და მას თავის სახლში წაიყვანს, მის ივარუსაც (სამემკვიდრო წილს — მზითვეს) შინ მიიტანს. უკეთუ ქალი იქ] გარდაიცივება და მის ნივთებს დაწვავენ, მის ივარუს მამაკაცი [აიღებს]. უკეთუ იგი მამამისის სახლში მოკვდება, ხოლო შვილები [მისი არსებობენ], მის ივარუს მამაკაცი არ [აიღებს].

§ 28 A. უკეთუ ქალიშვილი მამაკაცთანაა შეპირებული, სხვამ კი იგი გაიტაცა, თანხა, რამდენიც პირველმა მამაკაცმა გაიღო, ვინც (ქალი) გაიტაცა, იმან უნდა აუნაზღაუროს მას. მამა და დედა არ აანაზღაურებენ.

§ 28 B. უკეთუ მას (ე. ი. ქალიშვილს) მამა (და) დედა სხვა კაცს მისცემენ, მაშინ მამა და დედა აანაზღაურებენ. § 28 C. უკეთუ მამა და დედა უარს იტყვიან (ანაზღაურებაზე), მაშინ მას მისგან (ე. ი. სხვა კაცისაგან) გაყრიან.

§ 29. უკეთუ ქალიშვილი მამაკაცთანაა კავშირში, ხოლო იგი მას ურვათს გადაუხდის, (ამის) შემდეგ (თუკი) მამა (და) დედა დავას ასტეხენ და ისინი მას მამაკაცს ჩამოაცილებენ, ურვათს ისინი ორმაგად აანაზღაურებენ.

§ 30. და უკეთუ მამაკაცს ქალი ჯერ კიდევ არ წამოუყვანია და იგი მას უარს ეტყვის, ურვათზე, რომელიც მან გაიღო, იგი (აქვე) უარს იტყვის.

§ 31. უკეთუ თავისუფალი მამაკაცი და მონა ქალი ახლო კაც-შირში არიან, შემდეგ კი ისინი მორიდგებთან და იგი მას თავის ცოლად შეირთავს, ისინი ოჯახსა და შვილებს შექმნიან. (ამის) შემდგომ (თუკი) ისინი ერთმანეთს ბოროტებას მიაყენებენ, ანდა გასცილდებიან, (მაშინ) ისინი სახლს (ოჯახს) შეთანხმებულად გაიყოფენ: შვილებს კაცი წაიყვანს. ერთ შვილს თავისთვის ქალი წაიყვანს.

§ 32. უკეთუ მონა კაცი (თავისუფალ) ქალს ცოლად შეირთავს, მათი სამართალიც ზუსტად იგივეა.

§ 33. უკეთუ მონა კაცი (ცოლად) შეირთავს მონა ქალს, მათი სამართალიც ზუსტად იგივეა.

§ 34. უკეთუ მონა კაცი (თავისუფალ) ქალში ურვათს გაიღებს და მას ცოლად შეირთავს, (მაშინ) მას ვერავინ ვერ შეეცილება (?).

§ 35. უკეთუ თავისუფალ ქალს აგრიგი ან მწყემსი გაიტაცებს, ხოლო მის ურვათს არ გაიღებს, მაშინ იგი (ქალი) სამი წლით [დამონ]დება (= მონა ქალი გახდება).

§ 36. უკეთუ მონა კაცი თავისუფალ ყმაწვილში ურვათს გაიღებს და მას ზედ იძიდ მოიყვანს, მაშინ მას ვერავინ ვერ შეეცილება (?).

§ 37. უკეთუ ვინმე ქალს გაიტაცებს, ხოლო მას უკან დაედევნება მშველელი (ჭკუფი): თუკი 2 კაცი ან 3 კაცი მოკვდება. ანაზღაურება არ იქნება (რადგან იტყვიან): „შენ მგელი გახდი!“ (?).

§ 38. უკეთუ კაცები დანაშაულისთვის შეპყრობილი არიან და მათ საშველად (გამოსახსნელად) ვინმე წავა. დავისას კი [ხის ურ]დულს გამოიყენებენ და მშველელს იგი (შესაძლოა, მოსამართლე) სცემს, ხოლო იგი მოკვდება, ანაზღაურება არ იქნება.

§ 39. უკეთუ [კაცი სხვის] მინდვრებს ფლობს, იგი სახანს შეასრულებს. თუკი იგი [სახანზე] უარს იტყვის, მინდვრებსაც სხვა აიღებს. იგი [მათ] ვერ გაყიდის.

§ 40. უკეთუ „იარალის კაცი“ გადაიკარგება, (მის ადგილას) „ვალდებულების კაცი“ დაინიშნება და (თუკი) „ვალდებულების კაცი“ იტყვის — „ეს არის ჩემი იარალი, ხოლო ეს არის ჩემი სახანი“ —, „იარალის კაცის“ მინდვრებს იგი ბეჭდით დაიმტკიცებს. მას „იარალიც“ ექნება და იგი სახანსაც შეასრულებს. მაგრამ უკეთუ იგი „იარალიც“ უარს იტყვის და „იარალის კაცის“ მინდვრებს ვერანად გამოაცხადებენ, მაშინ მათ მეთემენი დაამუშავებენ. თუკი მეფე დებორტირებულს გაიღებს და მას მინდვრებს ჩააბარებენ, იგი „იარალის (კაცი)“ გახდება.



§ 41. უკეთუ „ვალდებულების კაცი“ გადაიკარგება, (მის ადგილას) „იარაღის კაცი“ დაინიშნება და (თუკი) „იარაღის კაცი“ იტყვის — „ეს არის ჩემი იარაღი, ხოლო ეს არის ჩემი სახანი“ — „ვალდებულების კაცის“ მინდვრებს იგი ბეჭდით დაიმტკიცებს. მას „იარაღიც“ ექნება და იგი სახანსაც შეასრულებს. თუკი იგი სახანზე უარს იტყვის, მაშინ „ვალდებულების კაცის“ მინდვრებს სასახლეში აიღებენ და სახანიც გაუქმდება (შეწყდება).

§ 42. უკეთუ ვინმე კაცს დაიჭირავენ და იგი სალაშქროდ წავა და მოკვდება. თუკი საფასური გაცემული იყო, იგი არ ანაზღაურდება. (მაგრამ) თუკი მისი საფასური არ იყო გაცემული, (მაშინ) 1 „თავს“ გაიღებს (დამჭირავებელი) და იგი საფასურსაც — 12 სიკლ ვერცხლს გაიღებს, ხოლო ქალის საფასურს — 6 სიკლ ვერცხლს გაიღებს.

§ 43. უკეთუ კაცს თავისი ხარი მდინარეზე გადაჰყავს, მეორე (კაცი) კი უბიძგებს (მას) და ხარის კუდს (თვითონ) ჩაეჭიდება და მდინარეზე გადავა. ხოლო ხარის პატრონს მდინარე წაიღებს, მაშინ სწორედ მას (ე. ი. მეორე კაცს) შეიპყრობენ.

§ 44 A. უკეთუ ვინმე კაცს ცეცხლში ჩააგდებს და იგი მოკვდება, იგი მის (მაგიერად) ახალგაზრდას გაიღებს.

§ 44 B. უკეთუ ვინმე კაცს (საკულტოდ) განწმენდს, (შეწირვის) ნარჩენებს იგი დაწვის ადგილას მიიტანს. უკეთუ მათ მინდორში, ანდა ვინმეს სახლში მიიტანს, მაშინ ეს (გრძნეულობაა) და [მეფის სამართლის საქ]მეა.

§ 45. [უკეთუ] ვინმე ნიეთებს იპოვნის და მათ თავის პატრონს დაუბრუნებს], (მაშინ) [მას] იგი დაასაჩუქრებს. მაგრამ თუკი იგი მათ არ მიუტანს (პატრონს), იგი ქურდი რქნება].

§ 46. [უკეთუ] ვინმე [დასახლება]ში ფლობს მინდვრებსა და სახანა როგორც ივარუს, თუკი [მას მინდვრები მთლიანად მიეცა], ლუცის შეასრულებს. თუკი მას [ცოტა] მინდვრები [მიეცა, ლუცის] არ შეასრულებს. მამამისის სახლიდან შეასრულებენ. უკეთუ ივარუსს პატრონის მინდვრებს ქულე(?) გამოჰყოფს [ანდა მეთემენი] მისცემენ (მას) მინდვრებს, მაშინ იგი ლუცის შეასრულებს.

§ 47 A. უკეთუ ვინმე ფლობს [მინდვრებს] (ვითარცა მეფის საჩუქარს, ლუცის არ [შეასრულებს. მეფე მაგიდილ]ან პურს იღებს და იგი მას აძლევს.

§ 47. B... უკეთუ [„იარაღს“ კაცის] [მინდვრებს] მთლიანად ვინმე იყიდის, ლუცის შეასრულებს. უკეთუ იგი [მინდვრების მეტ ნაწილს იყიდის], ლუცის [არ] შეასრულებს. მაგრამ თუკი მას მინდვრებს ქულე(?) [გამოუყოფს], ანდა [მას მე]თემენი მისცემენ. იგი ლუცის [შეასრულებს].

§ 48. ხიფარა (?) ასრულებს ლუცის და ხიფარასთან ვაჭრობას არავინ არ მართავს. მის ძეს, მის მინდორს, მის ვენახს არავინ არ იყიდის. ვინც ხიფარასთან ვაჭრობას გამართავს, იგი ნავეპარალს [დაკ]არგავს. ხიფარამ რაც გაყიდა, იგი მას უკან მიიღებს.

§ 49. [უკეთუ ხ]იფარა იქურდებს, (ნაქურდალის) ანაზღაურება არ (მონდება). თუკი თ უ ი ქ ა ნ თ (?) (არსებობს), სწორედ მან აანაზღაუროს იგი ... ნაქურდალს აძლევდნენ. როდესაც ყველანი სტყუოდნენ, ისინი ქურდები ხდებოდნენ ... მეფის (სამართალში) მისცეს.

§ 50. (რაც შეეხება) უქქე-კაცს(?), რომელიც ქ. ნერიქში გამგებლობს (?), რომელიც ქ. ა[რინაში], რომელიც ქ. ციფლანთაში (გამგებლობს), (რაც შეეხება) ქურუმს ყველა ქალაქში: მათი სახლები თავისუფალია, ხოლო მათი მოწილენი ლუცის ასრულებენ. როდესაც ქ. არინაში მე-11 თვე დადგება, იმის [სახლი], ვის კიშვარზე ე ი ა- გამოჩნდება, თა[ვისუფალია].

§ 51. წინათ ვინც ქ. არინაში მქსოველი ხდებოდა, მისი სახლი თავისუფალი იყო, მისი მოწილენი და მისი ადამიანებიც თავისუფალი იყვნენ. ახლა კი [მხოლოდ მისი სახლია თავისუფალი, მოწილენი მისი] და ადამიანები მისი კი სახანსა და ლუცის [ასრულებენ]. ქ. ციფლანთაშიც ასევეა.

§ 52. „ქვის სახლის“ მსახური, უფლისწულის მსახური (და) ს უ ფ ა თ ი ს (?) უფროსი, რომლებიც [„იარალის კაცთა“ (მინდვრებს) შორის] მინდვრებს ფლობენ, ლუცის ას[რულებენ].

§ 53. უკეთუ „იარალის კაცი“ და მისი მოწილე ერთად არიან, [როდესაც ისინი ერთმანეთს ბოროტებას მიაყენებენ], (მაშინ) მათ სახლს (=მეურნეობას) ერთმანეთში გაიყოფენ. უკეთუ მათ მინდვრებზე [10 „თავია“, 7 „თავის“] „იარალის კაცი“ აიღებს, ხოლო 3 თავს — მისი მოწილე. [მინდვრების წვრილფეხა (და)] მსხვილფეხა საქონელსაც ასევე გაყოფენ. უკეთუ ვინმეს მეფის ბოძების ფირფიტა აქვს, [როდესაც ისინი ერთმანეთში] წინანდელ მინდვრებს გაიყოფენ, (ამის შემდეგ) ბოძების 2 ნაწილს [„იარალის კაცი“ აიღებს], ხოლო 1 ნაწილს — მისი მოწილე აიღებს.

§ 54. წინათ მ ა ნ და-მეომრები, ს ა ლ ა-მეომრები, ქ. თამალქის მეომრები, ქ. ხათრას მეომრები, ქ. ცალფას მეომრები, ქ. თასხინიას მეომრები, ქ. ხემუვას მეომრები, [მშვილდო]სანნი, [ხუროს ხელოსნები], მეჯინიბენი და მათი ქ ა რ უ ხ ა ლ ა (?) -კაცები ლუცის არ [ასრულებდნენ], სახანს არ იხდიდნენ.

§ 55. როდესაც ძენი ქ. ხათისა, „ვალდებულების კაცნი“, მოვიდნენ, მეფის მამას თავყანი სცეს და უთხრეს: „გადასახანს არავინ გვიხდის და ჩვენ არ გვიცნობენ. „თქვენ ხართო ვალდებულების კაცნი!“..

მაშინ მეფის მამა თუ ლიაზე გამოვიდა და ბრძანა (ტექსტში: ბეჰედო დაუსვა): „წადით! როგორიც თქვენი მოძმენი არიან, თქვენც ისეთი-ვენი იყავით!“

§ 56. ყინვის (მტკვრევისაგან), სამეფო გზის გამაგრებაზე წასვლისაგან (ან) ვენახში მოსავლის აღებისაგან [შესპილენძეთგან] არავენაა თავისუფალი. მებაღენიც ყველა იმავე (საქმეში) ლუცის [ასრულებენ].

§ 57. უკეთუ ვინმე სანაშენო ხარს მოიპარავს, თუკი ხარი ძუძუმწოვარაა, იგი არაა [სანაშენო] ხარი. თუკი ხარი ერთი წლისაა, იგი არ არის სანაშენო ხარი. თუკი ხარი ორი წლისაა, იგი სანაშენო ხარია. წინათ 30 ხარს აძლევენ, ახლა კი 15 ხარს გაიღებს (ხარის ქურდი) — 5 ორწლიანს, 5 ერთწლიან ხარს და 5 ძუძუმწოვარა ხარს გაიღებს იგი და მის სახლს ჩააბარებს.

§ 58. უკეთუ ვინმე სანაშენო ცხენს (აჯილდას) მოიპარავს, თუკი ძუძუმწოვარაა, იგი არაა სანაშენო ცხენი. თუკი ერთი წლისაა, იგი არ არის სანაშენო ცხენი. [თუკი] ორი წლისაა, იგი სანაშენო ცხენია. წინათ 30 ცხენს აძლევენ, ახლა კი 15 ცხენს გაიღებს (ქურდი) — 5 ცხენს ორწლიანს, 5 ცხენს ერთწლიანს (და) 5 ცხენს ძუძუმწოვარას გაიღებს იგი და მის სახლს ჩააბარებს.

§ 59. უკეთუ ვინმე სანაშენო ვერძს მოიპარავს, წინათ 30 ცხვარს აძლევენ. ახლა კი [15] ცხვარს გაიღებს (ქურდი) — 5 დედალ ცხვარს (ნერბს), 5 ვერძს (ერკემალს), 5 ბატკანს გაიღებს იგი და მის სახლს ჩააბარებს.

§ 60. უკეთუ ვინმე სანაშენო ხარს იპოვის და მას (პატრონის) ნიშანს მოაცლის, პატრონი [მისი კი მას მიაგნებს], 7 ხარს გაიღებს — 2 ხარს ორწლიანს, 3 ხარს ერთწლიანს (და) 2 ძუძუმწოვარა ხარს გაიღებს იგი და მის სახლს ჩააბარებს.

§ 61. უკეთუ ვინმე სანაშენო ცხენს იპოვის და მას (პატრონის) ნიშანს მოაცლის, პატრონი [კი მას] მიაგნებს, 7 ცხენს გაიღებს (ქურდი) — 2 ცხენს ორწლიანს, 3 ცხენს ერთწლიანს (და) 2 ძუძუმწოვარას გაიღებს იგი და მის სახლს ჩააბარებს.

§ 62. უკეთუ ვინმე სანაშენო ვერძს იპოვის და მას ნიშანს მოაცლის, პატრონი კი მას მიაგნებს, 7 ცხვარს გაიღებს — 2 დედალ ცხვარს, 3 ვერძს (და) 2 ბატკანს გაიღებს იგი და მის სახლს ჩააბარებს.

§ 63. უკეთუ ვინმე საგუთნე ხარს მოიპარავს, წინათ 15 ხარს აძლევენ, ახლა კი 10 ხარს გაიღებს — 3 ხარს ორწლიანს, 3 ხარს ერთწლიანს (და) 4 ძუძუმწოვარას გაიღებს იგი და მის სახლს ჩააბარებს.

§ 64. უკეთუ ვინმე შესაბმელ ცხენს მოიპარავს, მისი ანაზღაურებაც ზუსტად იგივეა.

§ 65. უკეთუ ვინმე გაწვრთნილ (?) ვაცს, უკეთუ მოშინაურებულ გაჩეულ თაჲს, უკეთუ გაწვრთნილ წთის ცხვარს მოიპარავს, ანაზღაურება ზუსტად იგივეა, როგორც თხისა.

§ 66. უკეთუ საგუთნე ხარი, უკეთუ შესაბმელი ცხენი, უკეთუ ძროხა, უკეთუ ჭაკი ვირი (სხვის) ბაკში შეერევა, (ანდა) უკეთუ ვაცი გაწვრთნილი, უკეთუ დედალი ცხვარი, უკეთუ ვერძი (სხვის) ბაკში შეერევა. პატრონი [მისი კი იპო]ვის, იგი მას კანონიერად უკან წამოიყვანს. [როგორც ქურდს მას არ] აიყვანენ (შეიპყრობენ).

§ 67. უკეთუ ვინმე ძროხას მოიპარავს. წინათ 12 [მსხვილფეხა საქონელს] აძლევდნენ, ახლა კი 6 მსხვილფეხა საქონელს გაიღებს — 2 მსხვილფეხა საქონელს ორწლიანს, ორს ერთწლიანს (და) 2 მსხვილფეხა საქონელს ძეძუმწოვარას გაიღებს იგი და მის სახლს ჩააბარებს.

§ 68. უკეთუ ვინმე ფაშატს მოიპარავს, მისი ანაზღაურებაც ზუსტად იგივეა.

§ 69. უკეთუ ვინმე დედალ ცხვარს ან ვერძს მოიპარავს, წინათ 12 ცხვარს აძლევდნენ. ახლა კი 6 ცხვარს გაიღებს — 2 დედალ ცხვარს, 2 ვერძს (და) 2 ბატყანს გაიღებს იგი და მის სახლს ჩააბარებს.

§ 70. უკეთუ ვინმე ხარს, უკეთუ ცხენს, უკეთუ ჭორს, უკეთუ ვირს მოიპარავს, მისი პატრონი კი მას მიაგნებს, იგი მას კანონიერად უკან წამოიყვანს. გარდა ამისა, იგი (ქურდი) მას ორმაგს მისცემს და მის სახლს ჩააბარებს.

§ 71. უკეთუ ხარს, ცხენს, ჭორს ვინმე იპოვის, იგი მას მეფის ჭიშკარაჲს მიღწის. თუკი იგი ქვეყანაში (—დასახლებაში) იპოვის და მას უბუცესები გადასცემენ, მაშინ იგი მას შეაბამს კიდევ. როდესაც მას პატრონი მისი იპოვის, იგი მას კანონიერად უკან წაიყვანს. როგორც ქურდს მას არ აიყვანენ (შეიპყრობენ). (მაგრამ) თუკი იგი უბუცესებმა არ გადასცეს, იგი ქურდი იქნება.

§ 72. უკეთუ ხარი ვინმეს მინდორზე მოკვდება. მინდვრის პატრონი 2 ხარს გაიღებს და მის სახლს ჩააბარებს.

§ 73. უკეთუ ვინმე (სხვის) ცოცხალ ხარს ნაწილებად დაჭრის. ეს იგივეა, რაც ქურდობა.

§ 74. უკეთუ ვინმე ხარს რქას, ანდა ხარს ფეხს მოსტეხს. ამ (ხარს) იგი თვითონ წაიყვანს, ხოლო კარგ ხარს ხარის პატრონს მისცემს. უკეთუ ხარის პატრონი იტყვის: „მხოლოდ ჩემს ხარს წავიყვან“. (მაშინ) იგი თავის ხარს აიღებს და (მას) 2 სიკლ ვერცხლს მისცემს (დამნაშავე).

§ 75. უკეთუ ვინმე ხარს, ცხენს, ჭორს (ან) ვირს შეაბამს და იგი მოკვდება, ანდა მას მგელი შეჭამს, ანდა დაიკარგება, (მის მაგივრად)

იგი (ე. ი. ვინმე) კანონიერად (საქონელს) მისცემს (პატრონს). მაგრამ თუკი იტყვის: „ღმერთმა მოკლა“, (მაშინ) იგი დაიფიცებს.

§ 76. უკეთ ვინმე ხარს, ცხენს, ჯორს (ან) ვირს დააკავებს, ხოლო იგი მის მიწაზე მოკვდება, იგი მას (ე. ი. მკვლარ საქონელს) (შინ) მიიტანს და მის საფასურსაც მისცემს (დაზარალებულს).

§ 77 A. უკეთ ვინმე მაკე ძროხას სცემს და ნაყოფს გამოუგდებს, იგი 2 სიკლ ვერცხლს გაიღებს. უკეთ ვინმე მაკე ცხენს სცემს და ნაყოფს გამოუგდებს, 2 სიკლ ვერცხლს [გაიღებს].

§ 77 B. უკეთ ვინმე ხარს ანდა ცხენს თვალს ამოუგდებს, 6 სიკლ ვერცხლს გაიღებს და მის სახლს ჩააბარებს.

§ 78. [უკეთ ვინმე ხარს] დაიჭირავებს და მას სახრეს [ან მათარასს] ვადაჰკრავს, მისი პატრონი კი ამას (ნაცემს) იპოვის, იგი [1 საწყაო] ხორბალს გაიღებს.

§ 79. უკეთ ხარები (სხვის) მინდვრებზე გავლენ, მინდვრის პატრონი კი (ამას) [ნახავს], იგი (მათ) 1 ღლეს შეაბამს. როდესაც ვარსკვლავები ამოვა, იგი იმათ პატრონს უკან მიუდენის.

§ 80. [უკეთუ] ვინმე მგელს ცხვარს დააგდებინებს, ხორცს მისი პატრონი აიღებს. თვითონ კი ცხვრის ტყავს აიღებს.

§ 81. უკეთ ვინმე ხორბალზე (გასუქებულ) ღორს მოიპარავს, წინათ 1 მინა ვერცხლს აძლევდნენ. ახლა კი 12 სიკლ ვერცხლს გაიღებს და მის სახლს ჩააბარებს.

§ 82. უკეთ ვინმე ეზოს (?) ღორს მოიპარავს, 6 სიკლ [ვერცხლს] გაიღებს და მის სახლს ჩააბარებს.

§ 83. უკეთ ვინმე მაკე ღორს მოიპარავს, 6 სიკლ ვერცხლს გაიღებს] და გოჭებსაც დაითვლის: (ყოველ) 2 გოჭზე (1) საწყაო ხორბალს გაიღებს [და მის სახლს ჩააბარებს].

§ 84. უკეთ ვინმე მაკე ღორს სცემს და იგი მოკვდება, [მისი ანაზღაურება] ზუსტად [იგივეა].

§ 85. უკეთ ვინმე პატარა გოჭს (დედა-ღორს, ან ძუძუს) მოაცილებს და მოიპარავს, [... საწყაო ხორბალს] გაიღებს.

§ 86. უკეთ ღორი კალოზე, ანდა მინდორზე (ან) ბაღში გაივლის და კალოს. მინდვრის (ან) ბაღის პატრონი სცემს და იგი მოკვდება. იგი მას მის პატრონს უკან მიჰგვრის. თუკი მას არ მიჰგვრის, იგი ქურდი იქნება.

§ 87. უკეთ ვინმე მწყემსი ძალს სცემს და იგი მოკვდება. 20 სიკლ ვერცხლს გაიღებს და მის სახლს ჩააბარებს.

§ 88. უკეთ ვინმე მონადირის ძალს სცემს და იგი მოკვდება, 12 სიკლ ვერცხლს გაიღებს და მის სახლს ჩააბარებს.

§ 89. უკეთ ვინმე ეზოს ძალს სცემს და იგი მოკვდება, 1 სიკლ ვერცხლს გაიღებს

§ 90. უკეთუ ძალი ღორის ქონს შექმას, ქონის პატრონი კო ამას (ნახავს) და მას მოკლავს, მას (შეუძლია) ქონი მუცლიდან ამო- იღოს. ანაზღაურება არ არის.

§ 91. [უკეთუ] ვინმე ფუტკარს სკიდან მოიპარავს, წინათ [... სიკლ ვერცხლს აძლევდნენ, ახლა კი 5 სიკლ ვერცხლს გაიღებს და მის სახლს ჩააბარებს.

§ 92. [უკეთუ 2 სკას ან] 3 სკას ვინმე მოიპარავს, წინათ (ქურდს) ფუტკარების დასაკებნად (აძლევდნენ). ახლა კი 6 სიკლ ვერცხლს გაი- ღებს. უკეთუ ვინმე სკას მოიპარავს, თუკი შიგნით თაფლი არ არის, 3 სიკლ ვერცხლს გაიღებს.

§ 93. უკეთუ თავისუფალ კაცს შეიპყრობენ მანამ, სანამ (სხვის) სახლში ჯერ კიდევ არ შესულა (გასაქურდად), იგი 12 სიკლ ვერცხლს გაიღებს. უკეთუ მონას [მანამ] შეიპყრობენ, სანამ (სხვის) სახლში ჯერ კიდევ არ შესულა, [იგი 6 სიკლ ვერცხლს] გაიღებს.

§ 94. უკეთუ კაცი თავისუფალი სახლს გაქურდავს, იგი (ნაქურ- დალს) კანონიერად მთლიანად დააბრუნებს. [წინათ] ქურდობისათვის 1 მინა ვერცხლს [აძლევდნენ, ახლა კი 12] სიკლ ვერცხლს გაიღებს (ქურდი). თუ ბევრს მოიპარავს, იგი ბევრს [აანაზღაურებს]. თუკი ცოტას მოიპარავს, იგი ცოტას აანაზღაურებს და მის სახლს ჩააბა- რებს.

§ 95. უკეთუ მონა სახლს გაქურდავს, იგი (ნაქურდალს) კანონიე- რად მთლიანად [დააბრუნებს]. ქურდობისათვის 6 სიკლ ვერცხლს გაიღებს]. მონას მის ცხვირსა (და) ყურებს მოაჭრიან და მას მის ბატონს დაუბრუნებენ. თუკი ბევრს მოიპარავს, იგი [ბევრს] აანაზღაუ- რებს, თუკი ცოტას მოიპარავს, [იგი ცოტას აანაზღაურებს. თუკი ბატონი მისი იტყვის: „მის მაგიერად მე ავანაზღაურებ“, [მაშინ იგი აანაზღაურებს. თუკი უარს] იტყვის, მაშინ იგი მხოლოდ მონას [ჩა- აბარებს].

§ 96. [უკეთუ] კაცი ხორბლის ბელელს გაქურდავს და ბელლის [ხორბალს მოიპარავს], იგი [ბელელს] ხორბლით აავსებს, 12 სიკლ ვერცხლს გაიღებს და მის სახლს ჩააბარებს.

§ 97. [უკეთუ] მონა ხორბლის ბელელს გაქურდავს და ბელლის [ხორბალს მოიპარავს], იგი [ბელელს] ხორბლით აავსებს, 6 სიკლ ვერცხლსაც გაიღებს და მის სახლს ჩააბარებს.

§ 98. [უკეთუ] კაცი თავისუფალი (სხვის) სახლს დაწვავს, იგი სახლს კვლავ ააშენებს. რაც სახლის შიგნით განადგურდება, იქნება ეს აღმინაო, მსხვილფეხა თუ წვრილფეხა საქონელი, მთლიანად (?) არ აანაზღაურებს.

§ 99. უკეთუ მონა (სხვის) სახლს დაწვავს, ბატონი მისი აანაზღა- ურებს. მონას მის ცხვირსა და ყურებს მოაჭრიან და მას თავის ბა-

ტონს დაუბრუნებენ. მაგრამ თუკი იგი (ბატონი) არ აანაზღაურებს, (მაშინ) იგი მხოლოდ მას (ე. ი. მონას) ჩააბარებს.

§ 100. უკეთუ ვინმე (თივის) ფარდულს (?) დაწვავს, მან მისი (ე. ი. დაზარალებულის) საქონელი უნდა გამოკვებოს (ზამთარში). მან იგი (ე. ი. ზარალი) გაზაფხულზე უნდა აანაზღაუროს, ფარდული ადა-დგინოს (? ტექსტშია „დააბრუნოს“). თუკი თივა შიგ არ იყოს, მან ფარდული ააშენოს.

## ხეთური რელიგია

ზოგადად ხეთურ რელიგიას

მსოფლიოს გარდასულ რელიგიებს შორის ხეთური რელიგია — ძვ. წ. II ათასწლეულის მცირე აზიის ცენტრალური ნაწილის ბინადართა რწმენა ზებუნებრივი ძალებისა — საკმაოდ ორიგინალური და თვითმყოფი იყო. მისი ფესვები ღრმად იჭრება მცირე აზიის წინარე ისტორიაში — ძვ. წ. VII—VI ათასწლეულებისკენ, როდესაც ჩათალ-ჰუიუქისა და ჰაჩილარის ცივილიზაციაში ჩნდებოდა პროტოტიპები ანატოლიის მომავალი დიდი ხალხის რელიგიური წარმოდგენებისა. ხეთური რელიგია წარმოადგენდა ყველა იმ ხალხთა და ტომთა რელიგიების ერთობას, რომლებთანაც ურთიერთობა უხდებოდათ ხეთებს მათი არსებობის მთელს მანძილზე. ამან განაპირობა ხეთურ პანთეონში არა მარტო მცირე აზიაში ოდესღაც გადმოსახლებული ინდოევროპელი ტომების (ნესიტების, ლუვიელების, ფალაელების) კუთვნილ ღვთაებათა, არამედ ანატოლიის ცენტრალური რაიონების აბორიგენული მოსახლეობის — ხათების ღვთაებათა არსებობა. უფრო მეტიც, ხეთური პანთეონის ძირითადი შემადგენელი ნაწილი სწორედ ხათური ღვთაებებისაგან შედგებოდა. ხურიტებთან მრავალსაუკუნოვან მჭიდრო ურთიერთობათა შედეგად ხეთურ პანთეონს შეემატა ხურიტული (ხურიული) წარმოშობის ღვთაებანი, ხოლო სემიტებთან ზანგრძლივმა კონტაქტებმა განაპირობეს სემიტურ (ასურულ-ბაბილონურ, ამორეულ) ღვთაებათა გაჩენა ხეთური პანთეონის წარმომადგენელთა შორის. მრავალრიცხოვან ხეთურ პანთეონს განეკუთვნებოდნენ არიული წარმოშობის ღვთაებანიც და ა. შ.

ამიტომაც მიაჩნდათ ხეთებს, რომ მათ „ათასი ღვთაება“ ჰყავდათ. ხეთურ წყაროებში დამოწმებულ ღვთაებათა რაოდენობა კი, შესაძლოა, უფრო მეტიც იყო. ეს გასაგებიცაა: ხეთების ყოველ დასახლებას (ასეთები კი მართლაც ათასიც იქნებოდა და მეტიც!) თავისი საკუთარი ღვთაება ჰყავდა, თავისივე საკულტო ადგილით, ჰქონდა თავისი რიტუალები, მითოლოგია, დღესასწაულები. ხათის ქვეყნის



მასშტაბით კი ეს ქმნიდა მართლაც მრავალრიცხოვან და რთულ პანთეონს — ხეთი „თეოლოგების“ ყველა ღვთაების ერთობლიობას.

ხეთური რელიგია პოლითეისტური იყო (მონოთეიზმის არაერთაბრი ნიშანი მას არ გააჩნდა). იგი აბამდა კავშირს ადამიანებსა და ბუნების ძალებს შორის. ადამიანს უსახავდა რწმენასა და შიშს ზებუნებრივი ძალებისა. ამდენად გასაგებია, რომ გაღმერთების ობიექტებად გვევლინებიან ცა, მზე, მთვარე (შესაძლოა, სხვა ციური მნათობიც). გაღმერთებული იყო დედამიწა (ქვესკნელისა და ზესკნელის ძალებით) და ბუნების მოვლენები: წვიმა, ქექა-ქუხილი, ღრუბლები, საერთოდ, აწინდი — ტაროსი, რომლის ღვთაება ითვლებოდა „ღვთაებათა მეფედ“ არა მარტო ხეთებთან, არამედ მის მეზობელ ხალხებსა თუ ტომებში (ხათის ჩრდილო-აღმოსავლეთით მცხოვრებ ქასქებშიც). ხეთები ქედს იხრიდნენ მთების, მდინარეების, წყაროებისა და ზღვის ღვთაებათა წინაშე.

ცალკეულ თემს, მცირე მასშტაბის დასახლებას, საკუთარი ღვთაება ჰყავდა. უფრო დიდი დასახლების თუ მხარის ტაძრებში რამდენიმე (ხანდახან მთელი ათეული, ან უფრო მეტი) ღვთაების გამოსახულება — კერპი იდგა. რაც ადასტურებს ღვთაებათა „თანაარსებობას“. ღვთაებათა კერპები ძირითადად ტაძრებში „ცხოვრობდნენ“, ანდა მათ ღია ცის ქვეშ სპეციალურად გამოყოფილ საკულტო ადგილებში ჰქონდათ მოსასვენებელი. მცირე ტაძრებში ხშირად ერთი ან ორი მსახური — ქურუმი იყო, რომელიც ღვთაებას ყოველდღიურ კულტმსახურებას უწევდა.

ხეთური რელიგია ითვალისწინებდა სხვადასხვა ხასიათის რიტუალებს ამა თუ იმ მოვლენასთან დაკავშირებით. ტექსტებში დაწვრილებითაა აღწერილი მიცვალებულის (განსაკუთრებით, მეფის) დამარხვის რიტუალი, რომელიც რამდენიმე დღეს გრძელდებოდა (დამარხვის ხეთურ წესს საერთო ჰქონდა ჰომეროსისეულ დამარხვის რიტუალთან). რიტუალები სრულდებოდა სასახლის ან ტაძრის აგების დროს, ომის დაწყების წინ, ამა თუ იმ სნეულების განკურნების მიზნით და ა. შ.

ადგილობრივ ღვთაებათა გარდა, ხეთებს ჰყავდათ აგრეთვე „სახელმწიფო ღვთაებანი“: უზენაესად ითვლებოდნენ მზის ქალღმერთი ქ. არინადან — „დედოფალი ხათის ქვეყნისა, ცისა და დედამიწისა, ქალბატონი ხათის მეფეთა და დედოფალთა“, და მისი მეუღლე, ტაროსის (და არა მზის!) ღვთაება ხათისა, რომელსაც ეწოდებოდა „მეფე ცისა, ბატონი ხათის ქვეყნისა“. მრავალ ადგილას თაყვანს სცემდნენ პანთეონის ერთ-ერთ მთავარ ღვთაებას — თელიფინუსს (ადარებენ სირიულ-ფინიკურ აღონისს. ეგვიპტურ ოსირისს, სემიტურ თამუზს). ხეთებს ყოვლისშემძლე ღვთაებად მიაჩნდათ ადამიანის მთარ-

ველი ღვთაება ინარა, ომიანობის დროს, ბუნებრივია, აღიღებდნენ  
იმის ღვთაებას და ა. შ.

რელიგიური რწმენისა და თაყვანისცემის ობიექტები — ღვთაე-  
ბები ხეთებთან ძირითადად ანთროპომორფული იყვნენ (არსებობდნენ  
ზომორფული ღვთაებანიც): ისინი იკვებებოდნენ, სვამდნენ, იცვამდ-  
ნენ და ა. შ.

ტაძარი ხეთებთან:

მისი აბაგაზუვაა, ფუნჯცია, კარსონალი...

რელიგიური კულტის მომსახურებისთვის განკუთვნილი ძირითადი  
ადგილი, კულტის ცენტრი, როგორც წესი, ტაძარი იყო. კულტის  
მომსახურების მიზნით ხეთებთან გამოიყენებოდა აგრეთვე სხვადასხვა  
დანიშნულების ობიექტი (მაგალითად, სტელა) ან სათანადოდ შერ-  
ჩეული ბუნებრივი ადგილი, იქნებოდა ეს წყარო, ქვა, მთა თუ კლდე.

ტაძრის სიძლიერე-სისუსტეზე ბევრი რამ იყო დამოკიდებული.  
ისევე როგორც ყველა სხვა ადრეკლასობრივ საზოგადოებაში, ხეთებ-  
თანაც ეკონომიკურად ძლიერი ტაძარი იყო არა მარტო მორწმუნეთა  
ფართო მასების ერთგვარი შემომკრებელი, რასაც უდიდესი მნიშვნე-  
ლობა ჰქონდა ქვეყნის პოლიტიკურ-ეკონომიკურ თუ საზოგადოებრივ  
ცხოვრებაში, არამედ სიძლიერის (დოვლათის) გარკვეული დამგრო-  
ვებელიც. მართალია, ტაძრის ყოველნაირი საკუთრება მხოლოდ და  
მხოლოდ ამა თუ იმ ღვთაების საკუთრება იყო, მისი მოხმარება არავის  
შეეძლო, გარდა თვით ღვთაებისა, მაგრამ იმავე „ღვთაების ნება-  
სურვილით“ ტაძრის მთელი სიძლიერის გამოყენება შეეძლო ცენ-  
ტრალურ ხელისუფლებას, იქნებოდა ეს მეფე — „მზე“ თუ დედო-  
ფალი — თავანანა. ძლიერი ტაძარი — ეს იყო იგივე ძლიერი უმა-  
ღლესი ქურუმი, მეფე, სამეფო ხელისუფლება საერთოდ.

ტაძრის ეკონომიკური მდგომარეობა განისაზღვრებოდა მისი მე-  
ურნეობის სიმძლავრით, ამ მეურნეობის უშუალო მწარმოებელთა ექს-  
პლუატაციის ხარისხით, მეურნეობის წარმოების ფორმებით, შეწირუ-  
ლებათა ხასიათით და ა. შ. ყოველი ახალი სატაძრო მეურნეობის შე-  
ქმნის შემდეგ ტაძარი და მისი მეურნეობა იღებდა გარკვეულ დამოუ-  
კიდებლობას, სახელმწიფო ვალდებულებათაგან განთავისუფლების  
ჩათვლით, თუმცა ფაქტობრივად სატაძრო მეურნეობაც სახელმწიფო  
მეურნეობის ერთგვარ „ფილიალად“ რჩებოდა.

კულტის განახლებისას უკვე არსებულ ტაძარსაც განაახლებდნენ,  
ზოგჯერ გააფართოებდნენ, ან დამხმარე სათავსოებს მიუშენებდნენ.  
მაგრამ თუკი რომელიმე ღვთაებას ტაძარი საერთოდ არ გააჩნდა და-  
სახლებაში, მაშინ მას ახალ ტაძარს აუგებდნენ და შიგ ღვთაების გა-

მოსახლეობასაც — კერძადაც მოათავსებდნენ. ძველი ტაძრის განახლება  
ბისას, ანდა ახლის აგებისას სრულდებოდა სპეციალური რიტუალი.

ხათუსაში (როგორც ზემო, ასევე ქვემო ქალაქში) გათხრილი ტა-  
ძრების ნანგრევების მიხედვით თუ ვიმსჯელებთ, აშენებდნენ საფუ-  
ძელიანად, თანაც საკმაოდ დიდი ფართობის კომპლექსს. ხათუსას  
ქვემო ქალაქში აღმოჩენილი ჰექა-ქუხილის ღვთაების ტაძარი მოი-  
ცავდა 160 მ სიგრძისა და 135 მ სიგანის ფართობს. დაახლოებით  
ანგარიშობენ, რომ მთავარი ტაძრების მთელი კომპლექსი 200-დან  
500 კვ. მ-მდე ფართობისა იყო.

ტაძრის ორიენტაცია ხეობთან სულ სხვადასხვა იყო. ტაძრები  
მიმართული იყვნენ ძირითადად ჩრდილოეთისაკენ, ჩრდილო-აღმო-  
სავლეთისაკენ ან აღმოსავლეთისაკენ. ხათუსაში მდებარე ტაროსის  
ღვთაების ტაძრის მიხედვით თუ ვიმსჯელებთ (მისი ნაწილობრივ  
რეკონსტრუირებული სქემა კარგა ხანია ცნობილია). მონუმენტური  
ჰიშკრის კარის ზღურბლით შედიოდნენ ტაძრის მოპირკეთებულ, ე. წ.  
„გარე ეზოში“, რომელსაც ირგვლივ ერტყა სხვადასხვა დანიშნულე-  
ბის სათავსოები. ტაძრის შესასვლელი იწყებოდა ხეთური ტაძრები-  
სათვის დამახასიათებელი ე. წ. „ხილამპარით“, ანუ „პორტიკით“ —  
3 ან 4 დიდი არამრგვალი სვეტისაგან წარმოქმნილი დახურული გა-  
ლერეით, რომლის გავლის შემდეგ შედიოდნენ ტაძრის შიდა ეზოში,  
საიდანაც უნდა მოხვედრილიყვნენ ყველაზე წმინდა ადგილას —  
კულტის სამყოფელში. ხშირად ეს „ხილამპარი“ მოწყობილი იყო  
სკულპტურებით, უმეტესწილად ლომების გამოსახულებით, რაც ტა-  
ძარში მოთავსებული მთავარი ღვთაების სიძლიერისა და დიდების მა-  
ნიშნებელი უნდა ყოფილიყო.

ტაძრის შიდა ეზოში იდგა პატარა შენობა, სადაც, როგორც ჩანს,  
ხდებოდა კულტის სამყოფელში შესვლამდე საჭირო „განბანვა, გან-  
წმენდა“. ანდა მსხვერპლის შეწირვა. შიდა ეზოს გარს ერტყა უშუა-  
ლოდ ტაძრის კომპლექსი — სხვადასხვა დანიშნულების მრავალი სა-  
თავსო (კულტის მომსახურე პერსონალისა და ტაძრის დოვლათის შე-  
სანახად განკუთვნილი) და, რაც ბოლოა, ყველაზე წმინდა ადგილი,  
სადაც იმყოფებოდა ღვთაების გამოსახულება — ცელა.

ეს იყო ოთხკუთხედის ფორმის დიდი ოთახი, გრანიტის ქვისაგან  
ნაგები, სადაც თავსდებოდა კვარცხლბეკი, ე. ი. კულტის საყრდენი,  
კერა და ტახტი (მასზე იჯდა მეფე საკულტო ცერემონიალის დროს).  
საყრდენზე ღვთაების გამოსახულება — კერპი იდგა. ჩვეულებრივ  
ცელა ოთახის ერთ-ერთი კედლის წინ, ორი ფანჯრის შუა იდგა. ოთახს  
სხვა ფანჯარაც ჰქონდა, რაც საშუალებას იძლეოდა დღისით მედამ  
სინათლეზე მდგარიყო ღვთაების გამოსახულება. ამ ფანჯრებიდან  
ღვთაების დანახვა შეეძლოთ ტაძრის შიდა ეზოდანაც, სადაც თავს

იყრიდა მლოცველთა დიდი რაოდენობა (უშუალოდ ცელაში შესვლა შეეძლოთ მეფეს, დედოფალსა და მათ თანმხლებ პირებს — გარკვეულ კულტის მსახურებს). შიდა ეზოში თავმოყრილი მორწმუნენი მხოლოდ შორიდან იღებდნენ მონაწილეობას საკულტო ცერემონიალში: ისმენდნენ გალობას, ლოცვის დროს წარმოთქმულ სხვადასხვა რეჩიტატივს (დეკლამაციური ხასიათის ზელოდიას) ხეთურ, ლუვიურ, ხათურ ან ხურიტულ ენებზე.

ტაძრის მთლიან კომპლექსში შედიოდა გარე ეზოს ირგვლივ ედებარე მრავალი სხვადასხვა ფართობის ოთახი (ხათუსას ზემოაღნიშნული ტაძრის ტერიტორიაზე გათხრილია 88 ოთახი), რომელთა დიდი ნაწილი სამეურნეო დანიშნულების უნდა ყოფილიყო. კულტის ნომსახურებისათვის, კულტის მომსახურე პერსონალის შენახვისათვის, რელიგიური დღესასწაულების დროს ჩასატარებელ სხვადასხვა ცერემონიალისათვის საჭირო იყო დიდი რაოდენობის სასოფლო-სამეურნეო პროდუქტი (მარცვლეული, ფქვილი, გამომცხვარი პური, ზეთი, ქონი, ლუდი ან ღვინო, ხორცეული და ა. შ.).

დიდ ტაძარებში კულტმსახურებას ეწეოდნენ „დიდი (უფროსი) ქურუმები“. იგივე „წმინდა ქურუმები“, „მცირე (უმცროსი) ქურუმები“. „ზეთის მცხებლები“, „დედანი ღვთისა“, „ტაძრის კაცნი“. ეს უკანასკნელები ასრულებდნენ კულტმსახურების მთავარ ფუნქციას. მათ მოვალეობაში შედიოდა: საკულტო ცერემონიალში მონაწილეობის მიღება, რელიგიური დღესასწაულების დროულად ჩატარებისათვის თვალყურის დევნება, დღე-ღამის განმავლობაში ტაძრის შიგნით ღვთაებათა დაცვის (განსაკუთრებით. ღამით დარაჯობის) ორგანიზაცია, ტაძრის კერაში ეცეხლის დანთება და მისთვის თვალყურის დევნება (ეცეხლი არ უნდა ჩამქრალიყო) და ა. შ.

ქურუმთა მთავარი მოვალეობა იყო უშუალოდ კულტმსახურების — მსხვერპლის შეწირვის ცერემონიალის გარდა. ტაძრის დაცვაში მონაწილეობის მიღება, ტაძრის მეურნეობის ორგანიზაცია, ხვნათესვისათვის, მოსავლის აღება-განაწილებისათვის თვალყურის დევნება.

ტაძრს გააჩნდა თავისი მომსახურე პერსონალი. „მუსიკოსები“, „მომღერლები“ და „მოცეკვავენი“ რელიგიური ცერემონიალის ჩატარების მუსიკალურ ნაწილში მონაწილეობდნენ. მომსახურე პერსონალის რიცხვს განეკუთვნებოდნენ აგრეთვე „ღვთაებათა მზარეულნი“ — „მელვინეთუხუცესი“, „მესუფრე“, „პურის მცხობელი“, „მელვინე“, საკუთრივ „მზარეული“ და სხვ.

ტაძრის მუშა პერსონალის ძირითად ბირთვს წარმოადგენდნენ უშუალო მწარმოებლები: ესენი იყვნენ ტაძრს ჯადაცემული „სახლე-

ბიანი“ დეპორტირებულები, უშუალოდ ტაძრის მიწებზე მსხდომი მე-  
გუთნენი და სხვანი, ტაძრის საქონლის მომვლელი მწყემსები და ა. შ.

ტაძარზე იყვნენ მიმაგრებული ცალკეული დასახლებები მეთე-  
მეებიტურთ, რომლებიც „ღვთის სახანსა და ლუცის“ ასრულებდნენ.

ტაძრებში სრულდებოდა რელიგიურ დღესასწაულთა მთელი წყე-  
ბა: ყოველი დღის, თვის, წლისა და წლის სხვადასხვა დროისადმი მი-  
ძღვნილი დღესასწაულები, ცალკეულ ღვთაებათა დღესასწაულები,  
რომლებიც თითოეულ დასახლებაში (თემში), ქალაქში იმართებოდა.  
ისინი ეძღვნებოდა ბუნების მოვლენებს (ქექა-ქუხილს, წვიმას), ცალ-  
კეულ შემთხვევებს („ტაძრის მსახურთა ინსტრუქციაში“ ეს დღესას-  
წაულები დაწვრილებითაა ჩამოთვლილი).

განსაკუთრებული გულმოდგინებით ტარდებოდა სამეფო დღე-  
სასწაულები, რომელთაგან გამოირჩეოდა მრავალდღიანი სეზონური  
დღესასწაული ან თახშუმი: 38 დღის განმავლობაში, გაზაფხულზე,  
მეფე (დედოფალთან ერთად) ატარებდა სარიტუალო მოგზაურობას,  
რომელიც იწყებოდა ხათუსაში და მთავრდებოდა ქ. ანქუჯაში, სადაც  
მეფე იწვევდა „დიდ კრებას“. რიტუალი მთავრდებოდა საგაზაფხულო  
წვიმის დღესასწაულით.

სეზონური სამეფო დღესასწაული იყო აგრეთვე ნუნთარი-  
ასხა. იგი იმართებოდა გვიან შემოდგომით, როდესაც მეფე ამთავ-  
რებდა სამხედრო ლაშქრობებს. როგორც ვარაუდობენ, ახალი წლის  
დადგომასთან დაკავშირებით (ადრე გაზაფხულზე) დღესასწაულობდ-  
ნენ ვურულიას (იგი ხათური წარმოშობისა იყო). რომლის მთავა-  
რი მონაწილენი მეფე და დედოფალი იყვნენ. სამეფო წყვილი ხათუ-  
საში მართავდა ქილამ დღესასწაულს. ხათუსაში უფლისწულის მო-  
წაწილებით იმართებოდა დღესასწაული ხასუმა (ასევე ადრე გა-  
ზაფხულზე), რომლის დროსაც უფლისწული შემოივილიდა ტაძრებს და  
ღვთაებებს სწირავდა სასმელს, ანთახშუმ-მცენარეს და ა. შ.

ყოველი დღესასწაული თავის დროზე უნდა ჩატარებულყო —  
აკრძალული იყო საგაზაფხულო დღესასწაულთა გადატანა შემოდგო-  
მისთვის (ანდა პირუქუ). მოსავლის აღებას, ქორწილს, მოგზაურობას,  
საერთოდ რაიმე საქმიანობას ხელი არ უნდა შეეშალა დღესასწაულ-  
თა ჩატარებისათვის. მთავარი პასუხისმგებელი დღესასწაულთა ორ-  
განიზაციისა იყო „ტაძრის კაცი“, რომელსაც არავითარი შეცდომა არ  
უნდა დაეშვა. წინააღმდეგ შემთხვევაში იგი, „თავის ცოლთან, ბავ-  
შვებთან და მონებთან ერთად“, ღვთისგან ისჯებოდა.

ტაძრებს გააჩნდათ მრავალნაირი შეწირულობანი, იქნებოდა ეს  
მიწის ნაკვეთები, დეპორტირებულები, საქონელი, მარცვლეული, სას-

მელი თუ კვების პროდუქტი, ცალკეული ნივთები (მათ შორის, ძვირფასი ლითონისგან დამზადებული). ტაძრები დიდ სიმდიდრეს ფლობდნენ.

ხათის „ათასი:ღმთაება“:

ხეთურ კარათა აღწერილობანი

„... მაგრამ უკეთუ შენ ამ სიტყვებს დაიცავ, დაე, ამ ათასმა ღმთაებად, რომელთაც მე, „მზემ“. ლაბარნა-მუჯათალიმ, დიდმა მეფემ, მოეუხმე — ხათის ღმთაებებმა, ვილუსას ქვეყნის ღმთაებებმა, ტაროსის ღმთაება „ფიხასასიმ“ — „მზის“ მფარველმა ღმთაებამ ..., შენი (ყოველგვარი) დოვლათითურთ დაგიფარონ შენ!“ — ასე აფრთხილებს ხეთების მეფე ვილუსას მძფე ალაქსანდრუს მასთან დადებულ ვასალურ ხელშეკრულებაში, სადაც დაწვრილებითაა ჩამოთვლილი ღმთაებანი, ოღონდ მათი რიცხვი იქ ათასამდე როდი აღწევს.

„...ჩემს უფალთ, დაე, ყოველივე კეთილად ჰქონდეთ! დაე, ათასმა ღმთაებამ თქვენ სიცოცხლე შეგინარჩუნოთ, ხოლო შენ მათ, დაე, ხელები კეთილად შემოგახვიონ და დაგიცვან. დაე, მათ სიცოცხლე, ჯანმრთელობა, სიმხნევე, გრძელი წლები, ღმთაებრივი სიყვარული, ღმთაებათა სიმშვიდე და გულის სიხარული მოგივლინონ შენ! ღმთაებებს რასაც სთხოვ, დაე, (ყოველივე) აგისრულონ!“ — კეთილდღეობით შაშათში (ხეთურ თაფიგაში) აღმოჩენილი ლურსმული არქივის ერთ-ერთ ტექსტში, რომელსაც მეფე უგზავნის თავის მოხელეს.

ხათის „ათასი ღმთაება“ იხსენიება მრავალ ხეთურ ტექსტში. მაგრამ „ათასი ღმთაება“ არც იყო მარტო ხათის კუთვნილი ღმთაებანი. იგი ასახავდა ყველა იმ ღმთაებათა ერთობას, რომლებთანაც ურთიერთობა უხდებოდათ ხეთებს მათი არსებობის მთელს მანძილზე. ყველა მათგანის ჩამოთვლა და დებსასიათება შეუძლებელიცაა.

ხეთური ხანის ანატოლიაში ძალზედ იყო გავრცელებული ტაროსის ღმთაების კულტი მისი სხვადასხვა სახეობით. სამხრეთით მდებარე ოლქებში ლუვიური პანთეონის ღმთაებები — სანთა, დათა, თარხუნი და სხვანი ბატონობდნენ, სამხრეთ-აღმოსავლეთითა და აღმოსავლეთით — ხურიული პანთეონის წარმომადგენლები: ხეფათი, თესუფი, შაუშქა. ხეთების სამეფოს ცენტრში კი თავყანს სტემდნენ ხათური და ინდოევროპული წარმოშობის ღმთაებებს. აქ მდებარეობდა ერთ-ერთი დიდი რელიგიური ცენტრი ხეთებისა — „წმინდა ქალაქი“ არინა, რომლის მთავარი ღმთაება მზის ქალღმერთი იყო (იხ. ზემოთაც). ამავე მხარეში მდებარეობდა ასევე „წმინდა ქალაქები“ ციფლანთა და ერთ-ერთი დიდი რელიგიური ცენტრი ნერიქი, სადაც აღმერთებდნენ ქა-

ჩიშხლის ღვთაებას. მრავალ ადგილას სცემდნენ თაყვანს თელიფინუს (იხ. ზემოთ) და ა. შ.

ბოლაშქოის ლურსმული არქივის მრავალრიცხოვან რელიგიურ ტექსტებში უხვად მოიპოვება ცნობები, საგულდაგულოდ რომ აღწერენ ხეთური პანთეონის ღვთაებებს, უფრო ზუსტად, მათ გამოსახულებებს — კერაებს, როგორც ძირითადს, ასევე მეორეხარისხოვანს. თავისი დანიშნულებითა და ხასიათით ეს მართლაცდა უნიკალური მითითებანი ხეთური არქივიდან ამოკრთვეს, საფუძვლიანად შეისწავლეს და გამოაქვეყნეს მეცნიერებმა.

მკვლევარებმა ზუსტად განსაზღვრეს რა ამ მითითებათა ხასიათი, სავსებით ლოგიკურად უწოდეს მათ „ხეთურ კერათა აღწერილობანი“. მართლაც, ისინი მეტ-ნაკლები სიზუსტით ასახავენ სხვადასხვა ხეთურ ღვთაებას, გადმოსცემენ მათ სახეებს, ასახელებენ კერათა ვინაობას, განსაზღვრავენ მათ ატრიბუტებს. მსგავსი შინაარსის „აღწერილობანი“ იშვიათად თუ მოიპოვება მთელს ძველდამოსავლურ ისტორიულ-რელიგიურ ტექსტებში.

ხეთურ კერათა „აღწერილობანი“, რომელთა დიდი ნაწილი შემორჩენილია ძვ. წ. XIV—XIII სს-ით დათარიღებულ ტექსტებში, ძირითადად ჩართულია რელიგიური ხასიათის ისეთ წყაროებში, როგორცაა ე. წ. „საინვენტარო“ და „სადღესასწაულო“ ტექსტები. „საინვენტარო ტექსტებს“ ადგენდნენ იმ მიზნით, რომ შეემოწმებინათ ტაძრების კუთვნილი ინვენტარის (მათ შორის, ძვირფასი მასალისაგან დამზადებული კერაების) დაცვის მდგომარეობა, განეხორციელებინათ სათანადო კონტროლი კულტის მსახურებისთვის, საჭიროების შემთხვევაში აღედგინათ დანგრეული ტაძრები და ძველი კერაები, აეგოთ ახალი ტაძრები და კერპთსალოცაეები, გაეძლიერებინათ კულტის მომსახურება. ამ „აღწერილობათა“ ერთი ნაწილი, შესაძლოა, შედგა თუთხალია IV დროს განხორციელებული ე. წ. „საკულტო რეფორმის“ შედეგად (როგორც ვარაუდობენ, „საინვენტარო ტექსტებით“ უნდა ესარგებლათ პროვინციებში დაგზავნილ მეფის მოხელეებსაც).

რელიგიური „სადღესასწაულო ტექსტებიც“ დიდი დაკვირვებითა და სიფრთხილით დგებოდა: მათში ზუსტად მიუთითებდნენ დღესასწაულთა ჩატარების დროს და, საერთოდ, მათი მოწყობის მიმდინარეობას, მხედველობაში იღებდნენ რა თითოეული ღვთაების ბუნებას. ყოველივე ეს მოითხოვდა კერაების ზუსტად და ლაკონიურად აღწერას, მათი ატრიბუტების სათანადოდ განსაზღვრას. რაც დიდი გულმოდგინებით უნდა შეესრულებინათ. ამდენად, როგორც „საინვენტარო“, ასევე „სადღესასწაულო“ ტექსტები მეტად სანდოა და ისინი არსებული სინამდვილის ამსახველი არიან. „აღწერილობანი“ იმდენად ზუსტი გამოდგა, რომ მკვლევარებმა მათ მიხედვით ამოიცნეს ხეთური

ხანის ანატოლიის კლდეებზე ნაკვეთი რელიეფური გამოსახულებანი ღვთაებებისა (განსაკუთრებით, იაზილიქაიას სკულპტურული გაღერვისა).

ქვემოთ განხილული „აღწერილობანი“ არ ეხება დედაქალაქის ტაძრებში მოთავსებულ ღვთაებებს (როგორც ზემოთ აღინიშნა, ხათუსაში 5 დიდი ტაძარი იყო), არც ხეთების სამი დიდი „წმინდა ქალაქის“ — არინას, ნერიქისა და ციფლანთას ტაძართა კერპებს, რომელთა მომსახურება სახელმწიფო დონეზე სრულდებოდა. ქვემოთყვანილი „აღწერილობანი“ ეხება ქვეყნის პერიფერიულ დასახლებებში. განსაკუთრებით, ხათის ჩრდილოეთ და ჩრდილო-აღმოსავლეთში არსებული ტაძრებისა და სხვადასხვა სალოცავის ღვთაებებს, რომელთა რაოდენობა საკმაოდ დიდია. ღვთაებათა აღწერილობისას ხეთი მწერლები იყენებდნენ გარკვეულ ფორმას, თუ შეიძლება ითქვას, მოდელს, რომლის მიხედვითაც წარმოადგენდნენ ამა თუ იმ კერპს. ჩვენთვის საინტერესო „ფორმის“ შემადგენელი ელემენტების შენდგენაირი თანმიმდევრობა შეინიშნება: კერპის სახელწოდება — გამოსახულების აღწერა — სქემა — მასალა — დაცულობა — ზომა — კერპის ინვენტარი. ყველა ამ კომპონენტის აღნიშვნა საჭირო იყო. თუ შეიძლება ითქვას, „ვრცელი ფორმის“ შესადგენად, რომელიც მეტნაკლებად იკვეცებოდა, თუკი რომელიმე ამ ელემენტთაგანს ტექსტში არ მიუთითებდნენ.

ღვთაებათა აღწერილობის სტრუქტურის ვრცლად გასაცნობად ჯერ მივმართოთ თვით „აღწერილობებს“, რომელთა თარგმანს ქვემოთ გთავაზობთ (რასაკვირველია, შერჩევით და მცირეოდენი შემოკლებებით).

ხეთურ კერპთა სახეები შემდეგნაირად გამოიყურება:

„ღვთაება იშთარი (— ხეთური სახელი უცნობია): [... ქალღვთაება]. მჭდომარე. მხრებიდან [ფრთები გამოსდის]: მარჯვენა ხელში ოქროს თასი [უპყრია. მარცხენა ხელში] აქვს ოქროს „სიკეთე“ (— რაღაც სიმბოლო). მის ქვემოთ საყრდენია, მოვერცხლილი. [რომლის ქვეშ] დევს ლომის გამოსახულება, მოვერცხლილი. ლომის ფრთების მარჯვნივ [და მარცხნივ] ქალღვთაება ნინათა (და) ქალღვთაება ქულითა დგანან, ისინი ვერცხლისაა, მათი თვალები მოოქრულია...“.

„ღვთაება იშთარი „ძახილისა“: ოქროს ქანდაკება. მდგომარე მამაკაცი\*. მხრებიდან ფრთები გამოსდის. მარჯვენა ხელში ოქროს ცული უპყრია, მარცხენა ხელში კი ოქროს „სიკეთე“ აქვს: დგას კუდიან

\* მცირეზღული იშთარი (ხურბული შაუშქა) ორბუნებოვანი ღვთაება იყო, მღერდისა და მამრის თვისებებით.



ლომზე, მოვერცხლილზე, რომლის მკერდი მოოქრულია. ფრთებიდან მარჯვნივ და მარცხნივ ქალღეთაება ნინათა და ქალღეთაება ქულითა დგანან“.

„ტაროსის ღეთაება ცისა: ქანდაკება მამაკაცისა, მოოქრული, მდგომარე, მარჯვენა ხელში გურზი (— საბრძოლო იარაღი) უჭირავს, მარცხენა ხელში — ოქროს „სიკეთე“; დგას მამაკაცის გამოსახულებიან. მოვერცხლილ, ორ ზთაზე; მის ქვემოთ საყრდენია ვერცხლისა, აქვს 2 „ბიბრუ“-ჭურჭელი ვერცხლისა. ორ ღღესასწაულს შემოდგომასა და გაზაფხულზე უხდის მეფის სახლი (=სასახლე)“.

„ღეთაება ზაბაბა (— ომის ღეთაება. ხეთური სახელი უცნობია): ქანდაკება ვერცხლისა, [მდგომარე] მამაკაცი. მარჯვენა ხელში უჭირავს გურზი, მარცხენა [ხელში] — ფარი. მის ქვეშ [დგას] ლომი. ლომის ქვემოთ საყრდენია, მოვერცხლილი. 2 ღღესასწაულს შემოდგომასა და გაზაფხულზე... ამზადებენ ქამამას მცხოვრებნი. აქვს ვერცხლის ხელადა, მსახურნი არ ჰყავს“.

„მფარველი ღეთაება (— ხეთურად ინარა): ქანდაკება მამაკაცი-სა, მდგომარე. მისი თვალები მოოქრულია. მარჯვენა ხელში უპყრია ვერცხლის შუბი. მარცხენა ხელში ფარი უჭირავს. დგას ირემზე. მის ქვემოთ საყრდენია, მოვერცხლილი. ორ ღღესასწაულს შემოდგომასა და გაზაფხულზე უხდის დალას დასახლება. მსახური არ ჰყავს“.

„იხასანტურია-წყარო (ქ. თარამეჭაში): ღეთაების გამოსახულებაა ხის ქანდაკება ქალისა, მოვერცხლილი, მდგომარე. ერთი წყრთის სიმალისა. მარჯვენა ხელში ვერცხლის თასი უკავია, აქვს ვერცხლის სამაჯური. 20 ოქროს თვლით („წყაფით“). 6 (თვალი) ვერცხლისა კი აქვს შუბლზე, სამი ვერცხლის ნახევარმფარე აქვს მკერდზე...“

„დასახლება ქუნქუნია. „ყოვლისმძლე“ ღეთაება ტაროსი: ღეთაების გამოსახულებაა „ბიბრუ“-ხარი ხისა, მოვერცხლილი..., 1 წყრთის სიმალისა. მის ქვემოთ საყრდენია, მოვერცხლილი. (აქვს) 1 რკინის ჭურჭელი შესაწირავისათვის, 2 ხელადა ვერცხლისა, 1 რგოლი ვერცხლისა — მასზე „ყოვლისმძლე“ ტაროსის ღეთაების სახელია ამოკვეთილი — 1 პატარა თასი სასახლიდან (შეწირული), ერთი რქა — ორ ადგილას მოვერცხლილი. სამი საღეთო კვერთხი...“

„დასახლება ვიანაუენათა. ველ-მინდვრის მფარველი ღეთაება: მისი გამოსახულებაა ოქროს ქანდაკება მამაკაცისა, მდგომარე. მარჯვენა ხელში უპყრია ოქროს მშვილდი, მარცხენა [ხელში] უჭირავს ოქროს არწივი (და) ოქროს კურდღელი. აქვს ოქროს ხმალი, ოქროს თვლებით. დგას ირემზე...“

„დასახლება ლაფანა. ღეთაება იაია: ღეთაების გამოსახულებაა ხის ქანდაკება ქალისა, მდგომარე, 1 [წყრთის] სიმალისა. თავი მოოქრული აქვს, სხეულის ნაწილები დაფარულია ტყვიით. ქალღეთაების ქვე-

მთ, მარჯვნივ და მარცხნივ, დგას ტყვიით დაფარული ორი ხის არ-  
ხარი. 1 არწივი, ტყვიით დაფარული, 2 კვერთხი, 2 ბრინჯაოს ხელადა.  
ღვთაების კუთვნილებაა. (ღვთაებას) ახალი ტაძარი აქვს. მამაკაცი ქუ-  
რუმი აღრეც ჰყავდა...”

„ქ. ლიხციანას ტაროსის ღვთაება თელიურაში: ღვთაების გამო-  
სახულებაა ხის ხარი..., მოვერცხლილი. თავი და მკერდი მოოქრული.  
აქვს, 1 წყრთის სიმაღლისა. მის ქვემოთ საყრდენია. აქვს 1 ვერცხლის.  
თასი.... 10 მცირე მზის დისკო ბრინჯაოსი... ახალი ტაძარი ავუგეთ.  
ქურუმი აღრიდანვე ჰყავს. (ახლა) დავუღვინეთ ზეთის მცხებელი (ქუ-  
რუმი) და „შუბის კაცი“ (ტექსტში შემდეგ აღწერილია ქ. თელიურას.  
სხვა დასახლებათა ქალღვთაებანი).

„ღვთაება ცანცისა. მთა ისქი [...]: ღვთაების გამოსახულებაა..  
ქანდაკება მოვერცხლილი ხის მამაკაცისა, მდგომარე, აცვია [სამოსი],  
1 წყრთის სიმაღლისა... მისი თვალები და წარბები „ბაბილონის ქვის-  
განაა“; მარჯვენა ხელში ბრინჯაოს გურზი უჭირავს, მარცხენა ხელში  
უკავია ვერცხლის ფარი, სპილოს ძვლის არწივისა და სპილოს ძვლის  
ლომის გამოსახულებით ... 1 სასმისი, 2 არხარის რქა და 10 „თალა“  
ღვთაების კუთვნილებაა. აუგეს ახალი ტაძარი, დაუნიშნეს [ქურუმი].

ბევრ შემთხვევაში ღვთაებათა აღწერილობა კიდევ უფრო ლაკო-  
ნიურაა, გადმოცემულია რა აღწერილობის სტრუქტურის მხოლოდ  
ზოგიერთი ძირითადი კომპონენტი. მოვიყვანთ რამდენიმე ასეთ მაგა-  
ლითსაც.

„ღვთაება თითიუთი: რკინის ქანდაკება ქალისა, მჭდომარე. თვა-  
ლები ვერცხლით აქვს დაფარული...”

„ღვთაება ხანაგა: ვერცხლის ქანდაკება მამაკაცისა, მდგომარე..  
ცალი თვალი, ვერცხლით დაფარული, დაიკარგა...”

„[ქალღვთაება...: ქანდა]კება სპილენძისა, დაფარულია ოქროთი...  
[აქვს] წყვილი საყურე, ოქროსი და (ძვირფასი) ქვისა...”

„ღვთაება ცახაფუნა: ქანდაკება ქალისა, მდგომარე, დამზადებუ-  
ლია [...]საგან. მარჯვენა ხელში უჭირავს ყურძნის მტევანი, ოქროსი...”

„[ღვთაება...]: ქანდაკება ვერცხლის მამაკაცისა, მდგომარე...  
(აქვს) 3 წყრთა სიმაღლე...”

„მთა ცივანა. ღვთაების (გამოსახულებაა) ქანდაკება მამაკაცისა,  
რკინისა, ერთნახევარი მტკაველი სიმაღლისა“ და ა. შ.

მსგავსი მაგალითების მოყვანა მრავლად შეიძლება.

ხათურ კერათა „აღწერილობის“ სტრუქტურა

გავეცანით რა „აღწერილობათა“ ნიმუშებს, შევეუდგეთ ღვთაე-  
ბათა აღწერილობის დეტალურად განხილვას მისი ცალკეული კომპო-

ნენტის მიხედვით. ზემოგანხილული მასალის გარდა, მოვიშველიებთ რსეთებსაც, რომელთა შესახებ აქამდე არაფერი გვქონდა ნათქვამი.

„აღწერილობების“ დასაწყისშივე ხშირად დასახელებულია კერპის ადგილსამყოფელი: დიდი ან პატარა დასახლებული პუნქტი, აგრეთვე მთა, მდინარე, წყარო (ზოგჯერ დასახელება პუნქტისა არ არის მოცემული, ან დაზიანებულია). აქვე შევნიშნავთ, რომ მთა ხეთებისათვის ისევე როგორც ხურიტებისათვის, იყო არამარტო ღვთაების სამყოფელი, არამედ მთა განასახიერებდა თვით ღვთაებასაც, გამოისახებოდა რა ზოგჯერ ადამიანის სახით. ხეთურ ტექსტებში გვხვდება არაერთი მაგალითი, როდესაც მთა და მასზე „მოზინადრე“ ღვთაება ერთსა და იმავე სახელს ატარებდნენ.

თვით კერპის გამოსახულება შედარებით მცირე ზომის ქანდაკება იყო (ილინი მტკაველით, ან წყრთით იზომებოდნენ და არ აღემატებოდნენ 3 ასეთ საზომ ერთეულს), კერპი იდგა ტაძარში, ანდა ღია ცის ქვეშ მდებარე სპეციალურ საკულტო ადგილას. როგორც წყაროებში შეინიშნება, ხეთების „ახალი სამეფოს“ ხანაში ცდილობდნენ ასეთი კერპები უკვე „სახლებში“ — ტაძრებში მოეთავსებინათ, რისთვისაც სრულიად ახალი „ღვთის სახლი“ — ტაძარი იგებოდა.

„აღწერილობათა“ დასაწყისშივე მოცემულია კერპის სახელწოდებაც, რომელიც სათანადოდ შეესაბამება მის ატრიბუტს. წარმოდგენილია ამინდის (ტაროსის), ომის, ადამიანის მფარველის, მზის, მინდვრის, მდინარის, მთის და ა. შ. ღვთაებანი. ბევრი კერპის შესახებ სახელწოდებების მეტი არაფერი ვიცით. თვალშია საცემი ტაროსის ღვთაების ნაირსახეობა: დასახლებათა უმეტესობას გააჩნდა თავისი ტაროსის ღვთაება, რაც გასაგებია — ანატოლიის კლიმატური და რელიეფური თავისებურებანი განაპირობებდნენ ბუნების ძალებისადმი უსაზღვრო თავყვანისცემას. ასევე ბუნებრივია სხვადასხვანაირი ომის ღვთაების (იგი გამოიხატებოდა მეომრის სახით), ანდა მფარველი ღვთაების არსებობა.

„აღწერილობებში“ ამის შემდეგ აღნიშნულია მასალა, რომლისგანაც კერპებს ამზადებდნენ. ასეთად გამოიყენებოდა ოქრო, ვერცხლი, ბრინჯაო, რკინა, სპილენძი, ხე, თიხა, ძვირფასი ქვებიდან — ლილაქვა. ლითონი (აღნიშნულთან ერთად ტყვიაც) და ძვირფასი ქვები (ლილაქვის გარდა, ე. წ. „ბაბილონის ქვა“ და სხვანი, რომელთა მნიშვნელობა დაუდგენელია) გამოყენებული იყო აგრეთვე ღვთაების ტანის სხვადასხვა ნაწილის ინკრუსტირებისთვის, განსაკუთრებით, თვალების, თავისა და მკერდისათვის.

ჩვენთვის საინტერესო ტექსტების მიხედვით, ხეთურ კერპთა უმეტესობა. როგორც ზემოთ აღინიშნა, ანთროპომორფულია. წარმოდ-

გენილია ორივე სქესის ღვთაებანი. ამასთანავე, ქალღვთაებანი, როგორც წესი, სხედან, მამაკაცი ღვთაებები კი დგანან (ძალზედ მცირე გამონაკლისის გარდა, როდესაც პირიქითაა: ქალღვთაება დგას, ხოლო მამაკაცი კერპი — ზის. აქა-იქ ვხვდებით ღვთაებათა განსხვავებულ პოზასაც, როდესაც მაგალითად, ღვთაება მუხლმოდრეკილია). დასახელებულია ზომორთული ღვთაებანიც ხარის, ცხენის, ლომის, შესაძლოა, ირმის გამოსახულებებით.

„აღწერილობებში“ ძალზედ ხშირად დადგენილია ღვთაების ატრიბუტი, რაც გამოიხატებოდა ღვთაების ორივე ან ცალ ხელში სხვადასხვა საგნის დაკავებით. ეს არსებითი, დამახასიათებელი თვისება ღვთაების ბუნებას განსაზღვრავდა. ატრიბუტების აღნიშვნისას დაკულია „მარჯვენა-მარცხენას“ დაპირისპირების პრინციპი. ღვთაების ბუნების განმსაზღვრელად ძირითადად გვევლინება მარჯვენა ხელში დაკავებული საგანი.

ქალღვთაებებს მარჯვენა ხელში, როგორც წესი, უჭირავთ სხვადასხვა ფორმის თასი, ყურძნის მტევანი და სხვა ნივთი, რომლებიც ხშირად ოქროსგანაა დამზადებული. მარცხენა ხელში კი მათ უპყრობთ „სიკეთის“ სიმბოლო — ოქროს რაღაც საგანი, რომლის გამოსახულება დაუდგენელია.

მამაკაც ღვთაებებს მარჯვენა ხელში უჭირავთ ოქროს ცული, გურზი (მასალა ძირითადად მითითებული არ არის, მაგრამ გურზი ზის უნდა ყოფილიყო, რადგან ეს სიტყვა დაწერილია „ზის“ დეტერმინატივით, მხოლოდ ერთ შემთხვევაშია გურზი ბრინჯაოსი), გარდა ამისა, შუბი (ზოგჯერ ვერცხლისა), მშვილდი (ოქროსი) და ფარი (როგორც ჩანს, სხვა საგნებიც, რომელთა დასახელება ტექსტში დაზიანებულია). მარცხენა ხელით მამაკაც ღვთაებს უკავია „სიკეთის“ სიმბოლო (ოქროსი). ფარი (ზოგჯერ ვერცხლისა, სხვადასხვა გამოსახულებით), შოლტი (თუ კომბალი), ოქროს არწივი, კურდღელი და ა. შ. მამაკაც ღვთაებებს აქვთ. აგრეთვე, ხმალი (ხანდახან ოქროს თვლებიანი), წერაქვი, შხის დისკო (ოქროსი ან ვერცხლისა) და სხვა საგანი.

ღვთაების ატრიბუტის აღნიშვნის შემდეგ ზოგჯერ მითითებულია ღვთაების ჩაცმულობა. „აღწერილობათა“ თანახმად, ანთროპომორფულ ღვთაებებს ტანთ ეკვთ რაღაც სამოსი, ცხვირაწეული ფეხსაცმელი და გამაშის მსგავსი წინდები. ღვთაებათა ჩაცმა-დახურულობაზე მეტ წარმოდგენას იძლევა ღვთაებათა რელიეფური გამოსახულებანი მცირე აზიის სხვადასხვა ადგილიდან, განსაკუთრებით, იაზილიქიას კლდეში ნაკვეთი გალერეადან. ამჯერად კი ჩვენს ყურადღებას იქცევს ბოლაზქოის ე. წ. „მეფის ჭინკართან“ გამოსახული ერთი კარგად ცნობილი რელიეფი მდგომარე მამაკაცისა, რომელსაც მკვლევართა უმეტესობა ახლა განიხილავს როგორც ღვთაებას მეომრის გა-

მოსახლეებით (ადრე მას „თეშუბსაც“ ეძახდნენ): მარჯვენა ხელში მას უპყრია საბრძოლო ცული, რომლის ყუა დაღარულია და თითქოს „ღვის“ თუ „მზის“ შთაბეჭდილებას ქმნის (ამ ცულს სამეცნიერო ლიტერატურაში მიიჩნევენ როგორც „ცენტრალურ კავკასიურს“), მარცხენა ხელი შეკრული მუშტით მაღლა აქვს აღმართული (ეტყობა, ხელში რაღაც ეკავა, რომელიც შემდგომ წაიშალა რელიეფიდან, თუ არა და მუშტი უნდა გადმოსცემდეს თაყვანისცემის ეესტს), წელზე ხმალი არტყია, თავზე ხურავს საკმაოდ მასიური ზემოთ აწვრილი ჩაფხუტი ლოყებისა და კისრის საფარველებით, ტანს აცვია, როგორც ვარაუდობენ, ჭაჭვის პერანგი და კარგად ცნობილი მცირეაზიული, გულგახსნილი, ორნამენტებიანი მოკლე ტუნიკა შემოჭრილი სარტყლით. ჩვენ წინაშეა აშკარად მეომარი ღვთაება!

„აღწერათა“ სტრუქტურის ერთ-ერთი ძირითადი ნაწილია ის ადგილი, სადაც საუბარია კერპების წმინდა ცხოველთა შესახებ (ასეთებად გვევლინებიან ლომი, ხარი, ირემი და ა. შ.) და, განსაკუთრებით, ღვთაებათა მომსახურე თუ მცველ კერპებზე. იშთარის მსახური ღვთაების როლში გამოდის ქალღვთაებათა წყვილი: ნინათა და ქულითა, რომლებიც ასევე ემსახურებიან მამაკაცის სახით წარმოდგენილ ე. წ. „ძახილის“ იშთარს. მსგავსი წყვილი მსახური თუ მცველი ღვთაებანი იყვნენ, აგრეთვე, ხეთური წყაროების სხვა მონაცემთა მიხედვით, ხურიტული წარმოშობის შერი (ხურ. „ღღე“) და ხური (ხურ. „ღაღე“). ეს უკანასკნელი იყვნენ ღვთაებრივი ცხოველები და, ამავდროს, მცველი თუ მსახური ღვთაებანი ხურიტული ტაროსის ღვთაება თეშუბისა, რომელიც მოგვიანებით ხეთებმაც გააღმერთეს თავისი წყვილი ღვთაებთაგან. მსახურის თუ მცველის როლში გამოდის აგრეთვე მთის ღვთაებათა წყვილი, მამაკაცი ღვთაებანი ხაცი (!) და ნამნი, რომელთაც თავდაპირველად ჩრდილოეთ სირიაში მდებარე მთების სახელწოდებები ჰქონდათ. ხოლო ძვ. წ. II ათასწლეულის შუა ხანებიდან ხეთებმა და ხურიტებმა ისინი გააღმერთეს და თავიანთი ტაროსის ღვთაების მცველებად გამოაცხადეს. მათ ზოგჯერ ხეთები მოუხმობდნენ კიდევ მეზობელ ქვეყნებთან დადებულ ხელშეკრულებებში „ხათის ათას ღვთაებათან“ ერთად. იაზილიქიას რელიეფურ გამოსახულებებში ტაროსის ღვთაება ცისა სწორედ ამ წყვილ მთა-ღვთაებაზე დგას. ამგვარად, მთავარ ღვთაებათან ერთად, აღნიშნული წყვილი ღვთაებანი ქმნიდნენ ღვთაებათა ე. წ. „ტრიადას“ (მდრ. იშთარი — ნინათა — ქულითა; თეშუბი — შერი — ხური; ტაროსის ღვთაება — ხაცი — ნამნი და სხვ.), რომელიც ფუნქციონალურად ერთ დიდ კულტს განაახიცებდა. ძირითად და წყვილ მცველ თუ მსახურ ღვთაებათა ასეთი „ტრიადები“.

როგორც ჩანს, დამახასიათებელი იყო მხოლოდ ხეთურ-ხურიტული სამყაროსთვის.

„აღწერილობებში“ საკმაოდ ხშირადაა მითითებული ღვთაების კუთვნილი ინვენტარი: სხვადასხვა ფორმისა და მასალის ე. წ. ბიბრუ-ჰურტული, ხელადები, სასმისები (მათ შორის, თასები), მოვერცხლილი სასმელი რქები („ყანწები“), საღვთო კვერთხები, მზის დისკოები, საყურეები, სამაჯურები, რაღაც „რგოლები“ და სხვა მრავალი საგანი, რომლებიც ღვთაებას „ესაჭიროებოდა“ სხვადასხვა დანიშნულებისათვის.

ღვთაება იდგა საყრდენზე, რომელსაც ზოგჯერ სხვადასხვა წმინდა ცხოველის გამოსახულება ჰქონდა. ღვთაებებს უხდიდნენ დღესასწაულებს, მოსავლელად უნიშნავდნენ ქურუმებს და ა. შ.

უფრო დაწვრილებით „ხეთურ ღვთაებათა აღწერილობაზე“, მათ სტრუქტურაზე, რომელიც საკმაოდ გამოკვეთილადაა ასახული ტექსტებში, აღარ შევჩერდებით. მათთან დაკავშირებით მოვიყვანთ კიდევ ერთი ღვთაების აღწერილობას, ოღონდ უკვე არა ხეთურ წყაროებში დადასტურებულს. ეს გახლავთ მხოლოდ ძველ ქართულ საისტორიო ტექსტებში შემორჩენილი აღწერილობა არმაზის კერპისა, წლების მანძილზე რომ მრავალი მკვლევრის ძიების ობიექტია.

არმაზის კერპის აღწერილობა:

აღწერილობის სტრუქტურა

„ქართლის ცხოვრებაში“ შემავალი თხზულება „მოქცევა მირიან მეფისა და მის თანა ყოვლისა ქართლისა წმიდისა და ნეტარისა დედისა ჩუენისა ნინო მოციქულისა მიერ“, როგორც ცნობილია, არმაზის კერპს შემდეგნაირად აღწერს: „და იხილა წმინდამან ნინო, რამეთუ დგა კაცი ერთი სპილენძისა, და ტანსა მისსა ეცუა ჯაჱვ ოქროსი, და თავსა მისსა ჩაბალახი მყარი, და თუალნი ესხნეს ზურმუხტი და ბივრილი, და ხელთა მისთა აქუნდა ხრმალი ბრწყინვალე, ვითარცა ელვა, და იქცეოდა ხელთა შინა. უკეთუ ვინმე შეეხებიან, თავი თავისი სიკუდილად განწირის...“

და კუალად იყო მარჯუენით მისსა კაცი ოქროსი და სახელი მისი გაცი; და მარცხენით მისსა უდგა კაცი ვერცხლისა, და სახელი მისი გაიმ, რომელნი-იგი ღმერთად უჩნდეს ერსა მას ქართლისასა“.

არმაზის კერპის გარეგნული სახის აღწერილობა დაცულია „წმინდა ნინოს ცხოვრებაშიც“. თვითონ ნინო ამბობს: „ვიხილე და აჰა დგა კაცი ერთი სპილენძისაჲ: და ტანსა მისსა ეცუა ჯაჱვ: ოქროსაჲ: და ჩაფხუტი ოქროსაჲ: და სამხარნი ესხნეს: ფრცხილი და ბივრიტი და

ხელსა მისსა აქუნდა ზრმალი ლესული: რომელი ბრწყინვიდა და იქცევოდა ხელსა შინა რეცა თუ: რომელი შეეხებთან თავი თავისი სიკვილი განიწიროს... და მარჯულ მისა დგა კერპი ოქროსა, და სახელი მისი გაცი: და მარცხლ მისა კერპი ვერცხლისაჲ: და სახელი მისი: გა: რომელნი იგი ღმერთად ჰქონდეთ მამათა თქუენთა არიან ქართლით“.

არმაზის კერპის აღწერილობასთან პირდაპირ კავშირშია ლეონტი მროველის აღნიშნული ნაწარმოების შემდეგი ცნობილი ადგილი: „რამეთუ აჰა ესერა, ღმერთნი დიდნი, სოფლის მპყრობელნი, მზისა მომფენელნი, წვიმისა მომცემელნი და ქუეყანისა ნაშრომთა გამომზრდელნი ღმერთნი ქართლისანი, არმაზ და ზადენ, ყოვლისა დაფარულისა გამომეძიებელნი, ძუელნი ღმერთნი მამათა ჩუენთანი, გაცი და გაიმ...“

აქვე უნდა მოვიყვანოთ კიდევ ერთი ადგილი ლეონტი მროველის იმავე ნაწარმოებიდან: „და ამანვე ფარნავაზ შექმნა კერპი დიდი სახელსა ზედა თვისისა: ესე არს არმაზი, რამეთუ ფარნავაზს სპარსულად არმაზ ერქუა. ამართა კერპი იგი არმაზი თავსა ზედა ქართლისასა, და მიერთგან ეწოდა არმაზი კერპისა მისთვის“.

ყოველივე აღნიშნულიდან გამომდინარე, დიდ სიძნელეს არ წარმოადგენს გამოვეყოთ არმაზის კერპის აღწერილობის ძირითადი კომპონენტები: კერპის ანთროპომორფულობა და სქესი, მისი პოზა, მასალა, რომლითაც იგი დამზადდა, ღვთაების ატრიბუტები, ღვთაების ბუნება, მისი ჩაცმულობა, კერპის თანმხლები წყვილი ღვთაების არსებობა; ამასთან ერთად, ისმება საკითხი კერპისა და მისი ადგილსამყოფელის სახელწოდებათა იგივეობის შესახებ. როგორც ვხედავთ, არმაზის კერპის აღწერილობა მთავარ დეტალებში იმეორებს ხეტურ ღვთაებათა აღწერილობას (რასაკვირველია, ზოგიერთი გამონაკლისით).

მოკლედ განვიხილოთ თითოეული კომპონენტი ცალ-ცალკე.

ისევე როგორც მცირეაზიულ (ხეტურ-ხურიტულ) ღვთაებათა დიდი ნაწილი, არმაზის კერპიც ანთროპომორფულია. კერპი წარმოდგენილია მამაკაცის სახით. ღვთაების გამოსახულების ნიშანდობლივი თვისებები — ჩაცმა-დახურვა და იარაღის ტარება, ისევე როგორც მამრობითი სქესის წყვილი თანმხლები ღვთაებების (გაცისა და გას) ყოლა — მამაკაცურია.

ხეტურ კერპთა „აღწერილობების“ მსგავსად, არმაზის „აღწერილობაშიც“ ეს მამაკაცი ღვთაება მდგომარე პოზაშია. ასეთსავე მდგომარეობაში არიან მისი თანმხლები (მცველი თუ მსახური) წყვილი ღვთაებანიც.

ხეთურ კერბთა „აღწერილობებში“ დადასტურებულა მრავალი მითითების მსგავსად, ზემომოყვანილ ქართულ ტექსტებშიც ხაზგასმულია, რომ არმაზის კერპი დამზადებული იყო ლითონიდან, კერძოდ, სპილენძისაგან (როგორც ზემოთ დავინახეთ, ხეთური კერპებიც მზადდებოდა სპილენძისაგან). მითითებულია, რომ მას თვალები ძვირფასი ქვების — ზურმუხტისა და ბივრილის, იმავე ბივრიტის (ე. ი. ლურჯი და ცისფერი პათოსანი თვლების) ჰქონდა (ვარიანტი: ვერცხლისა და ბივრიტისა). ხეთურ კერბთა „აღწერილობებშიც“ ხაზგასმით მიუთითებდნენ, ამა თუ იმ ლითონისგან დამზადებულ ღვთაებას რომ განსხვავებული ლითონის, ანდა ძვირფასი ქვის თვალები, ისევე როგორც სხეულის სხვადასხვა ნაწილი, გააჩნდა (ქანდაკებების დამზადების ასეთი წესი გავრცელებული იყო ძველი აღმოსავლეთის სხვადასხვა ხალხშიც). სხვადასხვა ლითონისგან — ოქროსა და ვერცხლისგან (ერთ-ერთი ვარიანტის მიხედვით, ვერცხლისაგან) იყო დამზადებული არმაზის თანმხლები ორი ღვთაების ქანდაკებებიც. ოქრო გამოყენებულია აგრეთვე მთავარი კერპის ჯაჭვის პერანგისა და ჩაფხუტისათვის. საგულისხმოა ფაქტი, რომლის მიხედვით ძირითადი ღვთაების (არმაზის) კერპი სპილენძისაგან, ხოლო მისი თანმხლები ღვთაებანი (გაცი, გა) ოქრო-ვერცხლისგან იყვნენ დამზადებული (მათა ზომები მითითებული არ არის). ზემოგანხილულ ქართულ წყაროებში ამის მიზეზი აუხსნელია (ანალოგიური ფაქტი არ დასტურდება ხეთურ-ხურიტულ სინამდვილეში).

ზემოგანხილული ქართული ტექსტების მონაცემთა მიხედვით, არმაზის კერპის მთავარ ატრიბუტად უნდა მივიჩნიოთ „ხრმალი ლესული“, რომელიც „ბრწყინავდა ვითარცა ელვა, და იქცეოდა ხელთა შინა“ (ე. ი. წყარო მას მაგიურ ძალასაც მიაწერდა). ხმალთანაა დასაკავშირებელი ღვთაების ჯაჭვის პერანგი, ჩაფხუტი და სამხარნი, ე. ი. „საბეჭური; ლევიტონი“. ყოველივე ეს გარკვეულად უნდა განსაზღვრავდეს ჩვენთვის საინტერესო ახლადშექმნილი კერპის ბუნებას — არმაზი აშკარად მეომარი ღვთაებაა.

არმაზის ღვთაების ბუნებისათვის გასათვალისწინებელია არმაზისა და ზადენის ღვთაებათა მიმართ შემდეგი ზემოაღნიშნული გამოჩნატქვაში, რომლის მიხედვით ისინი იყვნენ „სოფლის მპყრობელნი, მზისა მომფენელნი, წვიმისა მომცემელნი და ქუეყანისა ნაშობთა გამომზრდელნი ღმერთნი ქართლისანი“. ექვემოთხანელია, რომ აღნიშნულ თვისებათაგან გარკვეული ნაწილი არმაზის ღვთაებასაც ეხებოდა, სახელდობრ, „სოფლის მპყრობელნი“ (ე. ი. ხაზი ესმება არმაზის ღვთაების მეომარ ხასიათს), შესაძლოა, „წვიმის მომცემელნიც“, რაშიც ტაროსის ღვთაების ერთ-ერთი ნიშანი უნდა იგულისხმებოდეს. ამგვარად, არმაზის კერპის „აღწერილობაში“ ეს კერპი წარმოდ-



გენილია როგორც მეომარი ღვთაება, რომელსაც, წყაროების სხვა მონაცემთა გათვალისწინებით, უნდა ჰქონოდა აგრეთვე ამინდის ღვთაების ფუნქციაც.

ამდენად, არმაზი უახლოვდება მცირეაზიულ (ხეთურ-ხურიტულ) ომისა და ტაშროსის (თეშუბის) ღვთაებებს. მასში თითქოს თავმოყრილია ამ ორი ანატოლიური ღვთაების თვისებები. ზემოთქმულიდან გამომდინარე, არმაზს ვერ განვიხილავთ როგორც მთავარის ღვთაებას (ტოპონიმი „არმაზიკ“ რომ ეტიმოლოგიურად „მთვარედ“ გაიაზრებოდეს, იხ. ქვემოთ), რომლისათვის დამახასიათებელი ძირითადი ნიშან-თვისებები მას აშკარად არ გააჩნია. მაგრამ იგი არც ირანული რელიგიური სამყაროდან აღებული კერპია. მართალია, ფარნავაზ I ახლადშექმნილ ქართლის სამეფოში მართვა-გამგეობის მოწყობას შედგომია ირანის სამეფოსთან მიმსგავსებით, მაგრამ მას „საკულტო რეფორმის“ გატარებისას — არმაზის კერპის „შექმნისას“ — აშკარად არ მიუმართავს ირანული რელიგიური სამყაროსთვის. ამას თვალნათლივ ამტკიცებს თვით ფარნავაზის მიერ „შექმნილი“ კერპი, მისი სახე და ბუნება, რომლის შესახებ წყაროებში არსად არ დასტურდება მითითება, რომ ფარნავაზმა ისიც თითქოსდა ირანული სამეფოს მიმსგავსებით შექმნა. სპარსულ სამყაროს კერპი უკავშირდება მხოლოდ და მხოლოდ მისი სახელწოდებით. მაგრამ ესეც მხოლოდ და მხოლოდ იმიტომ, რომ დაარქვა რა უსახელო კერპს თავისი სახელი, „ფარნავაზის“ მაგივრად მას „არმაზ“ უწოდა, რადგან „ფარნავაზს სპარსულად არმაზ ერქვა“. სხვა მხრივ, არმაზის კერპს ირანულ რელიგიურ სამყაროსთან არაფერი აქვს საერთო.

არმაზის კერპის „აღწერილობიდან“ გამომდინარე. ეს ღვთაება ჩაეცმულ-დახურულია: ახურავს ჩაფხუტი (ვარიანტი: „ჩაბალახი მყარი“), აცვია ჭაჭვის პერანგი და ატარებს „სამხართ“ — საბეჭურებს. როგორც დავინახეთ, ხეთურ კერპთა „აღწერილობანიც“ ითვალისწინებდა ღვთაებათა ჩაეცმას.

ხეთურ კერპთა „აღწერილობების“ ანალოგიურად, არმაზის კერპის „აღწერილობაც“ ადასტურებს ძირითადი კერპის (ე. ი. არმაზის) მცველი თუ მსახური ორი ღვთაების (გაციისა და გას) არსებობას, თანაც აქაც დაცულია პრინციპი „მარჯვნივ-მარცხნივ“ მათი განლაგებისა. ამგვარად, ამ „აღწერილობაშიც“ წარმოდგენილია ღვთაებათა „ტრიადა“. რომელსაც შეიძლება ეწოდოს „არმაზული“. „არმაზული ტრიადის“ გამოჩენა ქართლში მეტად საგულისხმო ფაქტია ხეთურ-ხურიტულ „ტრიადებთან“ ანალოგიისათვის.

წყვილ ღვთაებათაგან მარჯვნივ მდგომარე კერპი — გაცი უფრო დაფასებულია, იგი ოქროსგანაა დამზადებული, მარცხნივ მდგომარე გა (გაიმ) კი — ვერცხლისაგან (ერთ-ერთი ნუსხის მიხედვით,

ღორივე კერპი ვერცხლისაა). როგორც ზემოთ აღინიშნა, ხეთური ტაროსის ღვთაებასაც ჰყავდა დაწყვილებული ღვთაებანი, რომელთაგან ერთს, შესაძლოა, ძირითადი ღვთაებისგან მარჯვნივ ედგომს, ერქვა ხ ა ც ი, რაც თითქოს მოგვაგონებს არმაზის ღვთაების მარჯვნივ მდგომარე მცველი (თუ მსახური) ღვთაება გ ა ც ი ს სახელწოდებას. ამ უკანასკნელის დაკავშირება მცირეაზიულ (ხეთურ-ხურიტულ) სამყაროსთან სხვა მონაცემებითაც ივარაუდება: ზუსტად ამ ფონეტიკური შემადგენლობის სიტყვა ხეთურ ლექსიკაშიც დასტურდება. ხეთურად (შესაძლოა, ხურიტულადაც) „გაცი“ რაღაც ჰურქელს აღნიშნავდა, „გაციისაგან“ ნაწარმოებია ტოპონიმი „გაციურა“ (მდებარეობდა ხათის ჩრდილო-აღმოსავლეთში), მამაკაცის სახელი „გაციმარია“, ღვთაების სახელი „გაცითაიეთი“ (= „ქაცითაიეთი“). შესაძლოა, იგივე სიტყვა აქოს დადასტურებული მდინარისა და დასახლების ისეთ სახელწოდებებში, როგორიცაა „გაციარუნილი“, „გაცანა“ და სხვანი.

დღეისათვის ძნელია რაიმე გარკვეულის თქმა არმაზის დაწყვილებულ ღვთაებათაგან მარცხნივ მდგომ გ ა ს ეტიმოლოგიის შესახებ, რასაც მნიშვნელოვნად ართულებს სხვადასხვა წყაროში ამ სახელწოდების სხვადასხვა ფორმის არსებობა: გა — გაი — გაიმ — გაიამ — გაიამა — გიმ. მაგრამ გა( გაი) რომ უფრო მეტად ისევ მცირეაზიულ (ხეთურ-ხურიტულ) სამყაროსთანაა დასაკავშირებელი, ასეთი შეხედულება უფრო რეალურად უნდა გამოიყურებოდეს.

თვით სახელწოდება „არმაზისათვის“ დღემდე შემოთავაზებულ ეტიმოლოგიათაგან ყოველივე აღნიშნულის შემდეგ, თითქოს მეტ დამაჯერებლობას უნდა იძენდეს ვარაუდი. რომლის მიხედვით სიტყვა „არმაზ“ შეიძლება დაუკავშირდეს ხეთურ-ლუვიურ სიტყვას „არმა(ს)“ — „მთვარე“, რომლის საფუძველზე უნდა შექმნილიყო მთის აღმნიშვნელი ტოპონიმიც (როგორც ვარაუდობენ, ადრეულ ხანებში იგივე მთა „ქართლად“ იწოდებოდა). მაგრამ არ არის გამორიცხული აგრეთვე ვივარაუდოთ, რომ სახელწოდება „არმაზი“ მიმდინარეობს „აპურამაზად“ სახელწოდებისგან. როგორც ცნობილია, ივ. ჭავჭავაძის შვილი შესაძლებლად მაიჩნევდა ამ სახელწოდებათა მხოლოდ ამგვარ ურთიერთობას.

ზემომოყვანილი ძველი ქართული ტექსტებიდან გამომდინარე, ყურადსაღებია ფაქტი არმაზის მთისა და არმაზის ღვთაების სახელწოდებათა იგივეობის შესახებ. როგორც მცირეაზიულ (ხეთურ-ხურიტულ) სამყაროში ხდებოდა, აქაც კარგად ჩანს მთისა და ღვთაების ურთიერთობა, რაც გამოიხატა იმაში, რომ ახლად შექმნილი „დიდი ღვთაების“ სახელი დაერქვა მთას, რომელზედაც იგი „დაბინავეს“.

ამით ვამთავრებთ ხეთურ კერპთა „აღწერილობებთან“ არმაზის კერპის „აღწერილობის“ შედარებას, რომელიც გვიჩვენებს, რომ ეს

ორივე „აღწერილობა“ სტრუქტურულად თითქმის ერთნაირადაა აგებული. ზოგადად დაცულია რა აღწერილობის მცირეაზიული (ანატოლიური) მოდელი, არმაზის „აღწერილობა“ შეიცავს თითქმის ყველა ძირითად კომპონენტს, რომლებიც ახასიათებს ხეთურ ღვთაებათა „აღწერილობებს“.

ჯმთურ-არმაზულ „აღწერილობათა“  
მსგავსების სავარაუდო მიზეზები

რასაკვირველია, შორსა ვართ ვარაუდისაგან, რომ ზემომოხსენიებული ძველი ქართული ისტორიული ტექსტების შემდგენლებს ესარგებლათ ხეთურ კერპთა „აღწერილობებით“. როგორც ახლა ვიცით, მათ წარმოდგენაც არ ჰქონდათ ძვ. წ. II ათასწლეულის დროინდელ ზეთებზე. რომლებიც ცენტრალურ ანატოლიაში ცხოვრობდნენ (მათთვის კარგად იყო ცნობილი მხოლოდ ბიბლიაში მოხსენიებული „ხეთები“ — ბიბლიის ქართული თარგმანების „ქეტელნი“, „ძენი ქეტისნი“). მაგრამ ძველი ქართული ისტორიული წყაროების შემდგენლებს (დაახლოებით IX—X სს-ში) არმაზის კერპის აღწერილობისას ხელთ უნდა ჰქონოდათ უფრო ადრეული ხანის რომელიღაც წყარო. რომელშიც დაცული იქნებოდა „არმაზული ტრიადის“ აღწერილობა და ეს უკანასკნელი მწიგნობრული გზით უნდა შესულიყო ზემოაღნიშნულ თხზულებებში (არ არის გამორიცხული ვივარაუდოთ, რომ არმაზის კერპის აღწერილობა შემორჩენილიყო ზეპირ ტრადიციაშიც. რომლის საფუძველზე მოგვიანებით მოხდებოდა მისი წერილობითი გაფორმება). თვით „აღწერილობა“ კი შედგენილი უნდა იყოს უშუალოდ არმაზის „კერპთა მსხვერვის“ წინ აღნიშნული „ტრიადის“ თვითმხილველის მიერ. არმაზის კერპის „აღწერილობის“ დამსგავსება ხეთურ „აღწერილობებთან“ შეეძლო გამოეწვია მხოლოდ იმას, რომ თვითმხილველმა თავიდან ბოლომდე ზუსტად აღწერა (IX ს-ში) მის წინაშე მდგომი ღვთაებათა სამეული, რომელიც ტიპურ მცირეაზიულ ღვთაებებს განასახიერებდა.

როგორც ძველი ქართული ისტორიული ტექსტებიდან ვრწმუნდებით. არმაზის კერპი მისი განადგურებიდან 600-ზე მეტი წლის წინ (დაახლოებით ძვ. წ. III ს-ის პირველ მეოთხედში) „შექმნა“ ახლად წარმოქმნილი ქართლის სახელმწიფოს პირველმა მეფემ — ფარნავაზმა. „საკულტო რეფორმის“ გატარების მიზნით, რაც გულიანობდა ერთიანი სახელმწიფო რელიგიის შექმნას, ფარნავაზმა დააარსა სრულიად ახალი კულტი — ღვთაებათა სამეული არმაზის უზენაესობით. ახალი სინკრეტული კულტი, რომელიც დაუპირისპირდა ადგილობ-

რივ სატომო ღვთაებებს, უნდა შექმნილიყო, როგორც ზემოთ დავი-  
ნახეთ, ღვთაებათა აღწერილობის ძველ მცირეაზიულ მოდელთან მი-  
მსგავსებით. ჩანს, ასეთი „მოდელი“ არსებობდა ანატოლიაში არა-  
მარტო ხეთურ-ხურიტულ ხანაში, არამედ მომდევნო პერიოდშიც  
(ძვ. წ. I ათასწლეულში), როდესაც ხეთურ-ხურიტული კულტურისა  
და რელიგიის ტრადიციები ჯერ კიდევ არ იყო გამჭრალი აღმოსავ-  
ლეთ მცირე აზიაში. ამის დადასტურებაა მდიდარი მატერიალური  
კულტურის ძეგლები (მათ შორის, კლდეში ნაკვეთი რელიეფური  
გამოსახულებანი ტაროსისა და ომის ღვთაებებისა) და წერილობითი  
წყაროების მონაცემები აღნიშნული რეგიონიდან (მათი განხილვა ამ-  
ჟამად ძალიან შორს წავიყვანდა).

ახალი სახელმწიფო რელიგიის შექმნისას ძველი მცირეაზიული  
რელიგიური ტრადიციების გამოყენება სრულიადაც არ უნდა ყოფილი-  
ყო შემთხვევითი. როგორც ჩანს, „საკულტო რეფორმის“ გამტარებლები,  
რომლებმაც წარმოადგინეს „ტრიადის“ ძირითადი და მასვე დაქვემ-  
დებარებული ღვთაებათა კერპები, კარგად იცნობდნენ ამ ტრადიციებს.  
ეს მით უფრო სავარაუდოა, რომ ისტორიული ქართლის ტერიტორია-  
სა და აღმოსავლეთ მცირე აზიას შორის უძველესი დროიდანვე უნდა  
არსებულობდეს სათანადო კონტაქტები.

ქართულ ისტორიოგრაფიაში კარგა ხანია გამოთქმულია ვარაუდი  
ძველი ქართლის ზოგიერთი ტოპონიმ-ღვთაების (არმაზის, ზადენისა  
და სხვათა) კავშირის შესახებ მცირეაზიულ სამყაროსთან, დაშვებულია  
რა შესაძლებლობა ანატოლიიდან ინდოევროპელ ტომთა გარკვეული  
ნაკადის, ანდა უფრო სამხრეთიდან ქართველურ ტომთა გადმო-  
სახლების შესახებ. ამ უკანასკნელ შესაძლებლობას მხარს უნდა უჭერდეს  
ძველი ქართული ისტორიული ტექსტების, როგორც ჩანს, სარწმუნო  
მონაცემები, კერძოდ, მითითება „არიან ქართლიდან“, ყოველ ეპქს  
გარეშე, ისტორიული ქართლის უფრო სამხრეთით მდებარე ტერი-  
ტორიიდან, გაცი და გა ღვთაებათა გადმოტანის შესახებ. ქართველურ  
ტომთა უძველესი კერის არსებობა მდ. კოროხისა და ზემო ევფრა-  
ტის სათავეებში, სადაც მდებარეობდნენ ძვ. წ. XII ს-ის ასურული  
წყაროების მუშქაიას (ბერძნ. „მოსხოს“, ქართ. მესხების), დაიანის  
(ურარტული წყაროების „ღიაუხის“, ე. ი. ტაოს) ქვეყნები, უძველესი  
ხანებიდანვე განაპირობებდა ქართველურ ტომთა კავშირს მცირეაზი-  
ულ სამყაროსთან. სწორედ აღნიშნულ ადგილებში ხორციელდებოდა  
კონტაქტები კულტურულ თუ რელიგიურ სფეროებში. უფრო მეტიც.  
აღმოსავლეთ მცირე აზიის ჩრდილოეთ და ჩრდილო-აღმოსავლეთ  
რაიონებთან ერთად სამხრეთ ამიერკავკასია ქმნიდა ერთ დიდ რეგი-  
ონს, სადაც ვითარდებოდა სხვადასხვა სახის ურთიერთობანი ადრე  
ბრინჯაოს პერიოდიდან მოყოლებული უფრო მოგვიანო ხანებამდე.

ხეთების სამეფოს განადგურების შემდეგ, როდესაც უნდა მომხდარიყო მდ. კოროხისა და ზემო ევფრატის ტერიტორიიდან ქართველურ ტომთა (მუშქების) პოლიტიკური ცენტრის გადანაცვლება უფრო ჩრდილოეთისაკენ (ხოლო ნაწილისა — სამხრეთისაკენ), ისტორიულ ქართლში გადმოსახლებულებს თან უნდა გადმოეტანათ თავიანთი ძველი, ანატოლიასთან მჭიდროდ დაკავშირებული, კულტურულ-რელიგიური ტრადიციებიც, რომლებიც ახალ ადგილებში სათანადოდ მოიკადებდნენ ფეხს და იარსებებდნენ ძვ. წ. III ს-ის პირველ მეოთხედამდე, როდესაც ფარნავაზმა გაატარა ზემოაღნიშნული „საკულტო რეფორმა“.

## ხეთური კულტურა

მატერიალური საფუძველი, საიდანაც აღმოცენდა და განვითარდა ხეთური კულტურა, საკმაოდ ორიგინალური და თვითმყოფი იყო. ამან განაპირობა ხეთური კულტურის ის თავისებურებანი, რომლებითაც იგი არსებითად განსხვავდებოდა ძველი აღმოსავლეთის სხვა ხალხთა კულტურათაგან. თუ ხათური (პროტოხეთური) და ინდოევროპელი ტომების შერევა-შეჭვარედილების შედეგად ჩამოყალიბდა ხეთური ეთნოსი, ასევე ძირითადად ამ ორი ეთნიკური ჯგუფის კულტურულ მიღწევათა შერწყმამ საფუძველი ჩაუყარა ხეთურ კულტურას, რომელსაც თავიდანვე ახასიათებდა ადგილობრივი, ხათური ელემენტების სიჭარბე.

ხეთურ კულტურაზე გარკვეული გავლენა მოახდინეს ხერიტულმა და ლუვიურმა, ისევე როგორც ჩრდილოეთ სირიულმა და შუამდინარულმა, კულტურულმა სამყაროებმა. ამიტომაც აღნიშნავენ, რომ ხეთური კულტურა მოიცავს არა მარტო ადგილობრივი ტომების მიერ შექმნილ კულტურას, არამედ ხეთების სამეფოში შემავალი მრავალფეროვანი მოსახლეობისა და მეზობელი ხალხების კულტურულ ნამოღვაწარსაც. საბოლოოდ ჩამოყალიბდა არა რომელიმე ამ სამყაროს კულტურის „ხეთური ვარიანტი“, არამედ სრულიად ორიგინალური ხეთური კულტურა მთელი თავისი მრავალფეროვნებით.

ხეთური ხელოვნების ძეგლები დღესაც გვანცვიფრებენ თავიანთი ორიგინალობით, სისადავითა და ოსტატობის მაღალი დონით. სწორედ ხეთური ხელოვნებისა და მატერიალური კულტურის მრავალი ძეგლი, რომლებსაც გასულ საუკუნეში პოულობდნენ მცირე აზიის ტერიტორიაზე, გახდა „მიზეზი“ მივიწყებული ხეთური ცივილიზაციის აღმოჩენისა.

ცენტრალური მცირე აზიის წინახეთური ხანის ხელოვნების ძეგლები ყურადღებას იპყრობენ ფორმებისა და ტიპების თავისებურებებითა და მრავალფეროვნებით. ესენია ვერცხლისა და ბრინჯაოსაგან დამზადებული ცხოველთა პატარა ფიგურები, ოქროს დოქები და თასები, ე. წ. „შტანდარტები“ ზოგჯერ ირმის გამოსახულებით. უნიკა-

ლურია ქვისგან დამზადებული პრიმიტიული კერამები ქიულ-თეფე-დან. ამ დროის კერამიკის ნიმუშები გამოირჩევა თავიანთი ფორმებითა და პროპორციებით და ლითონის ჭურჭლების პროტოტიპებს წარმოადგენენ. მაღალ დონეს მიაღწია ანატოლიურმა გლაბტიკამ, რომელიც წარმოდგენილია ძირითადად ცილინდრული საბეჭდავებით მესოპოტამიურ სტილში, ხშირად ანატოლიური მოტივებით.

ხეთური ხელოვნების ცალკეული ნიმუში, განსაკუთრებით, კლდეში ნაყვეთი რელიეფები, აჩვენებს ხეტი მოქანდაკეების მაღალ ოსტატობასა და ტექნიკას. ამის დამამტკიცებელია, მაგალითად, იაზილიქიას რელიეფები, რომელთა ნაწილი დაკავშირებულია რელიგიურ კულტებთან და მთლიანადაა დამოკიდებული რიტუალურ ტრადიციებზე. ხათის სხვადასხვა ადგილებში ნაპოვნი რელიეფების ნაწილი საერო ხასიათისაა.

ბუნებრივი კლდის გამოშვერილ ზედაპირზე გამოკვეთილი გამოსახულებანი განუყოფელი ელემენტია მთელი არქიტექტურული ანსაზლისა. ასევე დაცულია ერთიანობა ცალკეულ ქანდაკებებსა და შენობის არქიტექტურას შორის. არის შემთხვევები, როდესაც გამოსახულებანი დამუშავებულია ერთი მხრიდან: „ლომთა ქიშკრის“ ლომები ბოლაზქოიში შესანიშნავადაა დამუშავებული მხოლოდ ფასადის მხრიდან. იგივე ითქმის ალაჯა-ჰუიუქის მფარველ სფინქსებზე. მაგრამ ორივე ძეგლი მთლიანად დამუშავებულის შთაბეჭდილებას ტოვებს. ზოგჯერ ფიგურის თავი გამოქანდაკებულია ნაწილობრივ, თუმცა იქმნება შთაბეჭდილება, რომ იგი მთლიანია. რელიეფებში ზოგიერთი გამოსახულება თითქმის მთლიანად ბრტყელია და კონტურებით არიან გადმოცემული, ე. ი. ფიგურები გამოსახულია პირობითად, დაუმთავრებლად. არადა იქმნება შთაბეჭდილება დამთავრებული ფიგურისა. ზოგიერთი რელიეფი ვაცილებით ღრმა და პლასტიკურია, ყურადღება გადატანილია მუსკულატურაზე, ჩაცმის დეტალებზე, რაც ადგილობრივი ტრადიცია უნდა იყოს.

ხეთური ხელოვნება ნატურალისტურია. ადამიანთა, ცხოველთა და ცალკეულ საგანთა გამოსახვისას მხატვარი გადმოცემდა ყველაზე უფრო მისაწვდომსა და გასაგებს ამა თუ იმ კონკრეტული სიტუაციისათვის. მამაკაცის ტრადიციულ ფიგურას თავი ყოველთვის ჰქონდა პროფილში, მხრები და მკერდი — ანფასში, ფეხები — კვლავ პროფილში: ეს იყო დამახასიათებელი ელემენტი „ვაეკატურობისა, სიმამაცისა“.

ფიგურათა პირობითი და მარჯვე განლაგება მთელ გამოსახულებას აძლევდა მხატვრულ ღირსებას: ფიგურა მიმართულია წინ, რაც მოძრაობისა და ძალის შთაბეჭდილებას ქმნის. ფიგურები არასდროს არ კვეთენ ერთმანეთს. ხეთურ რელიეფებში ცდაც არაა იმისა, რომ გადმოიცეს სამგანზომილებიანი გამოსახულება.

საერო ცხოვრების გამომსახველი რელიეფებიდან აღსანიშნავია ალაჯა-პუიუქში შემორჩენილი რელიეფები მუსიკოსებისა, „აკრობატებისა“, ნადირობის სცენებისა და სხვა.

საინტერესოა მცირე ფორმიანი ნაწარმოებებიც: მოხდენილი მოყვანილობა აქვთ ცხოველებისა თუ ფრინველების ფორმიან კერამიკულ ჭურჭლებს. ღვთაებათა ფიგურები პირობითია და იმეორებენ კლდეზე გამოხატულ რელიეფთა გამოსახულებებს. თავისებურია ლითონისგან დამზადებული ადამიანების მინიატურული ფიგურები. თავიანთი ფორმებითა და სახეებით ყურადღებას იპყრობს ბრინჯაოს სხვადასხვა ჭურჭელი. დახვეწილია ხეთური გლიპტიკა. „ახალი სამეფოს“ ხანაში ნაკლებად იხმარებოდა ცილინდრული საბეჭდავები, სამაგიეროდ მომრავლდა ტიპური ხეთური საბეჭდავები, რომელთაც ზემოდან კონუსის ფორმა აქვთ, ხოლო ძირი — მრგვალი.

ხეთური არქიტექტურის ნიმუშები ასევე ადგილობრივ ტრადიციას მისდევენ, თუმცა მაინც შეიმჩნევა მეზობელი კულტურული რეგიონების ერთგვარი გავლენაც. ხეთური სასახლეები და ტაძრები, რომელთაგან ძირითადად ნანგრევები შემორჩა, მართალია, თავიანთი გრანდიოზულობითა და სიმდიდრით არ უნდა ჰგვანებოდნენ ცნობილ სამეფო რეზიდენციებსა და ტაძრებს კრეტადან, ეგვიპტიდან, მარიდან. შუამდინარეთიდან, მაგრამ როგორც მათმა რეკონსტრუქციებმა აჩვენა, ისინი იმდროინდელი არქიტექტურის ბრწყინვალე ნიმუშები უნდა ყოფილიყვნენ. ყურადღებას იქცევდნენ რა თავიანთი მონუმენტურობითა და სისადავით.

სანიმუშოდ მარტო ხათუსას არქიტექტურული კომპლექსიც კმარა. ბუიუქ-კალეს დიდ კლდოვან ბორცვზე განლაგებული ციხე-სიმაგრე ტაძრებითურთ ერთ მთლიან არქიტექტურულ ანსამბლს ქმნიდა: აქ იყო მეფისა და დედოფლის რეზიდენციები ფართო გალავნითა და მძლავრი ალაყაფის კართურთ, ხუთი დიდი ტაძარი, სამეფო და სატაძრო არქივები. სამეფო კარის მომსახურება შენობები თუ სამეურნეო საწყობები. ქალაქს გარს ერტყა გალავანი რამდენიმე მძლავრი ჰიშკრით, რომელთაგან არქიტექტურული თვალსაზრისით აღსანიშნავია ე. წ. „სამეფო ჰიშკარი“, „ლომთა ჰიშკარი“, „სფინქსთა ჰიშკარი“.

ხეთური არქიტექტურისთვის დამახასიათებელი თვისებაა სრული ასიმეტრიულობა როგორც ცალკეულ ნაგებობათა გეგმაში, ასევე ქალაქის დაგეგმარებაში საერთოდ. მაგალითად, ტაძრის შენობათა განლაგებისას თვალშია საცემი მათი ცალკეული ნაწილის ან ფასადის ერთმანეთთან სრული შეუთავსებლობა (გამონაკლისია გალავნის ჰიშკრები, რომელნიც სიმეტრიულადაა განლაგებული).



სპეციფიკური ხეთური მანერაა კედლების მშენებლობისას დიაგონალური ხაზებისათვის უპირატესობის მიცემა. ტაძრებისა და სასახლეებისათვის დამახასიათებელია ვიწრო სათავსოთა სიმრავლე (ამ მხრივაც სიახლოვე ჩანს კრეტას სასახლეებთან). ტაძრის შენობები, ქუჩა, სათავსოები ტაძრის ეზოს ირგვლივაა განლაგებული. მასიური ქვების პლიტების გამოყენება სამშენებლო მასალად ჩვეულებრივი იყო ხეთებისათვის (ისევე როგორც მიკენში, ტრაში, კრეტაში). ხეთები არ იცნობდნენ მრგვალ სვეტებს (კოლონებს) და მშენებლობაში იყენებდნენ ოთხკუთხა საყრდენებს. შენობის ფანჯრები დაბალი პარაპეტით კეთდებოდა არა ეზოს, არამედ მოპირდაპირე კედლის მხარეს.

მართალია, ცენტრალური მცირეაზიული საზოგადოება განეკუთვნებოდა მაშინდელი ცივილიზებული სამყაროს პერიფერიას, მაგრამ იგი ადრევე ეზიარა კაცობრიობის ისეთ კულტურულ მონაპოვარს, როგორიცაა დამწერლობა. ჯერ კიდევ „კაპადოკიური“ ფირფიტების ხანაში (ძვ. წ. XIX—XVIII ს.) ცენტრალურ ანატოლიაში ფართოდ იყო გავრცელებული ლურსმული დამწერლობის ის სახეობა, რომელსაც შუამდინარელი ვაჭრები ხმარობდნენ თავიანთ ყოველდღიურ საქმიანობაში. შემოინახა ცალკეული ტექსტები და წარწერები, რომლებიც ამტკიცებენ, რომ ზუსტად იმავე დამწერლობას იყენებდნენ ადგილობრივ ქალაქ-სახელმწიფოებში (ტექსტებს ადგენდნენ არა ადგილობრივ მცხოვრებთა ენაზე, არამედ აქადური ენის ძველ ასურულ დიალექტზე, რომელზედაც ლაპარაკობდნენ შუამდინარელი ვაჭრები). ამას ადასტურებს ლურსმული ფირფიტები. შედგენილი ადგილობრივ წერილ სამთავროთა მმართველების (ვარშამას, ფოზბანას, ანითას და სხვ.), ცალკეულ დიდ მოხელეთა („ციბის მოძღვრის“) სახელით. დამწერლობის სხვა სახეობა აღნიშნული ხანის ანატოლიაში არ არსებობდა (ყოველ შემთხვევაში, დღეისათვის არ არის გამოვლენილი სხვა დამწერლობით შედგენილი ტექსტები).

მომდევნო ხანებში დამწერლობის ზემოაღნიშნული სახეობა სავსებით ქრება ცენტრალურ მცირე აზიაში, სადაც ხეთების სამეფო წამოყალიბდა. „ძველი სამეფოს“ დროიდან ხეთებმა შეითვისეს ლურსმული დამწერლობის სხვა სახეობა, რომელიც მათ მიუხადავებს თავიანთ ენას. ეს იყო ძველი აქადური ლურსმული დამწერლობის ის ვარიანტი, ჩრდილოეთ სირიაში რომ იხმარებოდა (ამ დამწერლობით შედგენილია ალაღანის ლურსმული არქივის ფირფიტები). ლურსმული დამწერლობის ახალი სახეობის შემოტანას მცირე აზიაში უკავშირებენ ხეთების „ძველი სამეფოს“ მმართველთა, განსაკუთრებით, ხათუსილი I-ის მეფობის პერიოდს (თანადროულაა ალღან VII ფენისა). როდესაც ხეთები ლაშქრობდნენ ჩრდილოეთ სირიაში და

ჩრდილოეთ მესობოტამიაში (ხურიტების წინააღმდეგ). სწორედ ამ ხანებში უნდა გაცნობოდნენ ისინი ჩრდილოეთ სირიაში გავრცელებულ ლურსმულ დამწერლობას, მიესადაგებინათ იგი ხეთური ენისათვის და დაეწყათ ხეთურ ენაზე ტექსტების შედგენაც (როგორც ზემოთაც აღინიშნა, „ძველი სამეფოს“ დროს ტექსტები დგებოდა აქადურ ენაზეც იმავე ლურსმული დამწერლობის გამოყენებით).

ლურსმული დამწერლობის გარდა, ხეთები იცნობდნენ აგრეთვე ე. წ. ლუვიურ (ხეთურ) იეროგლიფურ დამწერლობას. მაგრამ მას ხეთები არ იყენებდნენ თიხის ფირფიტებზე ტექსტების დასაწერად. ამ დამწერლობის ნიმუშები შემონახულია ხეთურ საბეჭდავებზე, რომლებიც მეფეს და დედოფალს განეკუთვნებოდნენ (ასეთი საბეჭდავები ჩვეულებრივ ორენოვანი იყო: მეფის სახელი ტიტულატურითურთ დაწერილი იყო იეროგლიფურად და ლურსმულად), კლდეებზე, მეფისა და ღვთაებათა სახელების წერისას და ა. შ. როგორც ვარაუდობენ, იეროგლიფური დამწერლობა იხმარებოდა ხეთების დროინდელ მცირე აზიაში ძირითადად ხის მასალაზე წერისას, რის გამოც ასეთმა წარწერებმა ჩვენამდე არ მოაღწია. ასეთ ვარაუდს უნდა ამტკიცებდეს ხეთურ ლურსმულ ტექსტებში დამოწმებული ტერმინები: „ხის ფირფიტის (=ფირფიტაზე) მწერალი“, „ხის ფირფიტის (ფირფიტაზე) მწერალთა სახლი“ (იეროგლიფური დამწერლობით შესრულებული შედარებით ვრცელი წარწერები განეკუთვნება მოგვიანო პერიოდს, ძვ. წ. I ათასწლეულის პირველ ნახევარს, როდესაც არსებობდნენ ე. წ. გვიანხეთური სამეფოები).

ხეთურ ლურსმულ დამწერლობაზე შეიქმნა მსოფლიოს ერთ-ერთი უძველესი და უმდიდრესი წერილობითი ძეგლები სხვადასხვა ენისა.

ბოლაზქოის (ხათუსას) ლურსმულ არქივში შემოინახა ხეთების მეფეთა ანალები — მეფობის წლების თანმიმდევრობით შედგენილი ისტორიული ჩანაწერები (მატიანეები).

სამეფო ანალების სტილშია შედგენილი 1957 წ. ბოლაზქოიში აღმოჩენილი, ხეთურ და აქადურ ენებზე შედგენილი, ლურსმული ტექსტი ხეთების „ძველი სამეფოს“ ერთ-ერთი თვალსაჩინო მმართველისა — ხათუსილი I-სა. ამ „ანალებში“ პირველ პირშია მოთხრობილი ხათუსილის ლაშქრობათა შესახებ, რომლებიც მან მოაწყო მცირე აზიასა და ჩრდილოეთ სირიაში თავისი მეფობის პირველ ნახევარში. გარდა ამისა, ამ მნიშვნელოვან წერილობით წყაროში სხვა ხასიათის ცნობებიცაა დაცული, კერძოდ, სამეფო ტახტის მემკვიდრეობასთან დაკავშირებით: დიდი მეფე, თაბარნა ხათუსილი I, რომელიც უკვე მეფობდა ხათუსაში და არა ქუსარაში, ყოფილა თავანანას (ამ შემთხვევაში, წინა მეფის მეუღლის) ძმისწული.

.ხეთების მეფეთა ანალებისაგან განსაკუთრებით გამოირჩევა „ანალები“ მურსილი II-სა, რომლის ხანგრძლივი მმართველობის პერიოდში ანალისტიკამ მცირე აზიაში მიაღწია თავისი განვითარების უმაღლეს საფეხურს. მურსილი II-ის სახელით ანალების სტილში შედგენილი იყო აგრეთვე „საქმენი“ სუფილულიუმა I-სა, მურსილის მამისა.

მურსილი II-ის „ანალებმა“ ჩვენამდე მოაღწია ორივე ვერსიით (ორივე ხეთურ ენაზე). ერთ-ერთ მათგანს, მოცულობით უფრო მცირეს, მკვლევრებმა უწოდეს „ათწლიანი ანალები“ (იმის გამო, რომ იქ მოთხრობილია მურსილის სამხედრო ოპერაციებზე, რომლებიც მან ჩაატარა მეფობის ათი წლის განმავლობაში). მურსილის „ანალების“ მეორე ვერსიას კი მეცნიერებმა შეარქვეს „ვრცელი ანალები“: ტექსტში დაწვრილებითაა აღწერილი ძირითადად სალაშქრო საქმენი, რომლებიც აღნიშნულ მეფეს გადახდა მბრძანებლობის თითქმის 30 წლის მანძილზე.

მურსილი II-სა და სუფილულიუმა I-ის „ანალები“, რომელთა შემდგენლები წარმოგვიდგებიან როგორც ჩინებული ისტორიკოსები, ძველადმოსავლური სამყაროს ისტორიულ თხზულებათა, კერძოდ, ანალისტიკის, ნიმუშებად შეიძლება ჩაითვალოს.

ბოლნაქის არქივში შემონახა აგრეთვე ხეთების სხვა მეფეთა ანალები, მაგალითად, „თუთხალიას ანალები“, „არნუვანდას ანალები“, ისევე როგორც ფრაგმენტები რომელიღაც სხვა ანალებისა, რომელთა ავტორები ჩვენთვის უცნობია.

მეფეთა ანალების ქანრს ხეთები იყენებდნენ მათი არსებობის თითქმის მთელს მანძილზე, მით უმეტეს, რომ ისტორიულ ნაწარმოებთა შექმნის ხელოვნება ხეთებს მაღალ დონეზე ჰქონდათ აყვანილი. როგორც ვარაუდობენ, ისტორიული თხრობის ჩვენთვის საინტერესო ქანრმა — ანალისტიკამ — გარკვეული გავლენა იქონია მოგვიანო ხანის ასურეთისა და ურარტუს მეფეთა „ანალების“ განვითარებაზე.

მეზობელ თუ არამეზობელ ქვეყნებთან პოლიტიკურ ურთიერთობათა რეგულირების მიზნით ხეთები ადგენდნენ ე. წ. ს ა ხ ე ლ მ წ ი ფ ო ხ ე ლ მ ე კ რ უ ლ ე ბ ე ბ ს.

სახელმწიფო ხელშეკრულებებს ხეთების მეფეები სდებდნენ მეზობელი და ახლო აღმოსავლეთის არამეზობელი ქვეყნების მბრძანებლებთან (მეზობლებთან, როგორც წესი, ხეთურ ენაზე, არამეზობლებთან — აქადურ ენაზე).

ჩვენამდე მოღწეული ყველაზე ადრინდელი ხელშეკრულება შედგენილია ხეთების „ძველი სამეფოს“ ხანაში, სახელდობრ, თელიფინუს მმართველობის პერიოდში. ეს იყო ხეთების ამ მეფისა და ქიციუ-

ვათანა მეფე ისფუთახსუსთან დადებული ხელშეკრულება (აქადურ და ხეთურ ენებზე). არსებობდა აგრეთვე ხელშეკრულება ხეთების მეფე ციდანთასა და ქიცუვათანას მმართველ ფილიას შორის. აღრიღელი ხელშეკრულებები ფორმდებოდა პარტიტეტის საწყისებზე, რაც გულისხმობდა მხარეთა უფლებების სრულ თანასწორობას.

ხეთების დაპყრობითი პოლიტიკის გაფართოებამ სუფილულიუმა I-ის დროიდან გამოიწვია, როგორც დავინახეთ, ხეთების საგრძნობი აქტიუზაცია ანატოლიის სამხრეთსა და აღმოსავლეთში, ჩრდილოეთ სირიასა და ჩრდილოეთ მესოპოტამიაში. ყოველივე ეს იწვევდა აღნიშნულ მხარეებში მდებარე ქვეყნებთან პოლიტიკურ ურთიერთობათა რეგულირებას სპეციალური წერილობითი დოკუმენტის შექმნის სახით.

სუფილულიუმა I-ის დროიდან უნდა შექმნილიყო გარკვეული სქემა ამ ხასიათის დოკუმენტების გაფორმებისა, რაც მოგვიანებით სრულყვეს. ხელშეკრულებათა ნაწილი შედგენილი იყო პარიტეტის, ნაწილი კი — „ვასალიტეტის“ პრინციპით.

„ვასალიტეტის“ ქვეყნებთან დადებული ხელშეკრულება იწყებოდა ხელშეკრულების დამდები ხეთების მეფის პრეამბულით, რომელშიც აღინიშნებოდა ხელშეკრულების დამდები ორი ქვეყნის ურთიერთობათა წინასიტორია. შემდეგ კი გადმოიციეოდა ძირითადი დანიშნულება ხელშეკრულებისა: დაპყრობილი ქვეყნის მეფე ვალდებულებას იღებდა რეგულარულად მიეწოდებინა ხეთებისათვის დამხმარე მეომარი რაზმები (საბრძოლო ეტლებთან ერთად), სისტემატურად უხადა ხარკი, დროულად ეცნობებინა ხეთების მეფისათვის მტრის მოულოდნელი გამოჩენა, ანდა შეთქმულება, უყოყმანოდ დაებრუნებინა ხეთებისათვის ლტოლვილნი და ა. შ. თავისი მხრიდან ხეთების მეფე ვალდებულებას იღებდა დახმარებოდა „ვასალს“ მტრის გამოჩენისას. ხელშეკრულებაში ხშირად მოხმობილი იყვნენ ღვთაებანი, მოპყავდათ წყევლის ფორმულა და ა. შ.

პარიტეტის საწყისებზე შედგენილი ხელშეკრულების ნიმუშად უნდა ჩაითვალოს ხათუსილი III-სა და ფარაონ რამსეს II-ს შორის დადებული ხელშეკრულება, რომელიც ისტორიაში ერთ-ერთი ადრეული სამშვიდობო ხელშეკრულებაა.

ზემოთ არაერთსეღ ციტირებული ისტორიული თხზულებანი — „ხათუსილი I-ის ანდერძი“, „თელიფინუს ტექსტი“ და „ხათუსილი III-ის ავტობიოგრაფია“ წარმოადგენენ ისტორიული ჟანრის უძველეს ბრწყინვალე ნიმუშებს. ამავე დროს, ისინი სცილდებიან ისტორიულ თხზულებათა სახეობას და თავიანთი ფორმით, სტილიტურნი ნიშნებით უახლოვდებიან ლიტერატურულ ჟანრს. ამ მხრივ გამოირჩევა „ხათუსილის ანდერძი“ და „ხათუსილი III-ის ავტობიო-

გრაფია“. ისტორიული ფაქტების გადმოცემისას „ხათუსილის ანდერძი“ გაოცებას იწვევს ენის სილამაზითა და სისადავით, დიალოგთა მოხერხებული ჩართვით, დარიგებისა და ჩივილის შერწყმით, შედარებების ოსტატური გამოყენებით (შდრ. მაგალითად, „... ის აღარ არის ჩემი შვილის მაგრამ დედამისმა ძროხისებრ დაიბღვლა: „მე, ცოცხალს, ძლიერ ძროხას, მუცელი გამოშლია...“, „დედამისი — გველია“ და სხვ.). როგორც ირკვევა, უკვე ხათუსილი I-ის მეფობის დროისათვის ხეთური ლიტერატურა აყვავებას იწყებს, რასაც ამტკიცებს „ძველ სამეფოში“ შექმნილი სხვა ნაწარმოებიც: ე. წ. „სასახლის ქრონიკა“ ანუ „დამრიგებლობითი მოთხრობების კრებული“, სხარტი, დახვეწილი ენით ნაწერი, წარწერები სამხედრო ლაშქრობათა შესახებ და სხვა მრავალი. „ხათუსილი III-ის ავტობიოგრაფია“, რომელიც ამჟამის ერთ-ერთი უძველესი ნიმუშია, ზოგჯერ აღარებენ „ძველ აღთქმაში“ აღწერილ ამბავს იოსებთან დაკავშირებით. ნაწარმოებში მთელი ყურადღება გადატანილია თვით ავტორზე, გამოყენებულია ტექსტის შინაარსის ინდივიდუალური ხასიათი და ფორმა. „ავტობიოგრაფიის“ მიზანი თითქოს ნათელია: განდიდება ახალშემოდებული ხურიტული ღვთაების — შაუშქა-იშთარის კულტისა, რომელიც ხათუსილის მფარველობდა მთელ მის პოლიტიკურ საქმიანობაში, ამართლებდა რა ხათუსილის ყოველ მოქმედებას, უკანონოსაც კი. მაგრამ ეს ნაწარმოები უფრო მეტად „თავის მართლების“ ნიმუშია, ვიდრე „ავტობიოგრაფიისა“. ამიტომაცაა, რომ მკვლევართა ნაწილი ახლა მას „აპოლოგიასაც“ (ე. ი. „პატიებას, მიტევებას, შეწყნარებას“) უწოდებენ. ხათუსილი მშვენივრად გრძნობდა, რომ მისგან ტახტის მოპოვება — უზურპაციის ტოლი იყო, მისი მოქმედება — საეჭვო, როგორც ზნეობრივი, ასევე მართლშეგნების თვალსაზრისით. ამიტომაც იწყებს იგი თავის მართლებას — ყველა მისი მოქმედება ღვთაება იშთარით იყო ნაკარნახევი და მოწონებული.

შინაარსითა და ლიტერატურული დამუშავების თვალსაზრისით ყურადღებას იპყრობენ პატარ-პატარა მოთხრობები და ზღაპრები ანატოლიური სიუჟეტით. ერთ-ერთი უძველესი სიუჟეტი ჟნდა იყოს დაცული „ქანესის დედოფლის შვილების ამბავში“: ქანესის (=ნესას) დედოფალმა ერთხელ ერთბაშად 30 ვაჟი შვა. ეს რა დავბადეო, თქვა დედოფალმა და ვაჟიშვილები ყოველგვარ უწმინდურობასთან ერთად სხვადასხვა ქურჭელში მოათავსა, ქურჭლები კი გაატანა მდინარეს (ე. ი. მარასანთას), რომელმაც ისინი ცალფას ზღვაში (ე. ი. შავ ზღვაში) ჩაიტანა. ღვთაებებმა ბიჭები ზღვიდან ამოიყვანეს და გაზარდეს. გამობდა ხანი და დედოფალმა კვლავ შვა ერთბაშად 30, ამჯერად, ქალიშვილი, რომლებიც მან თვითონ გამოზარდა. ამასობაში ვაჟები დაიზარდნენ და ნესასკენ გამოემართნენ. გზაში

ისინი იგებენ, რომ ერთხელ ქანესის დედოფალს ერთბაშად 30 ქალი-შვილი გაუჩენია, ხოლო მისი ადრე დაბადებული ვაჟები სადღაც გადაკარგულან. გახარებული ვაჟები მიემართებიან ნესას საკუთარი დედის სანახავად. მაგრამ ღვთაებებმა მათ შიგნეული შეუცვალეს და დედამ ვედარ იცნო თავისი ვაჟები, რომლებსაც მან მიათხოვა თავისივე ქალიშვილები. ვერცერთმა ძმამ ვერ იცნო თავისი და, გარდა ნაბოლარისა, რომელმაც თქვა: ჩვენი დები არ ვითხოვოთ, ასეთ საქციელს ნუ ჩავიდნით, ეს ჩვენ არ გვჩვევიანო. მაგრამ ყველაფერი გვიან იყო: მის ძმებს უკვე ღამე გაეთიათ თავიანთ დებთან...

ძველი ანატოლიური სიუჟეტია შენარჩუნებული ისეთ ნაწარმოებებში, როგორცაა მოთხრობა ქ. ცალფას ალყის შესახებ, მოთხრობა მინდვრის ვაჟის დაბადების შესახებ და სხვა მრავალი.

მკვლევართა განსაკუთრებულ ინტერესს იწვევს მურსილი II-ის მოთხრობა იმის თაობაზე, თუ მან როგორ დაკარგა და შემდეგ აღიდგინა მეტყველების უნარი. როგორც ვარაუდობენ. ეს არის კაცობრიობის კულტურის ისტორიაში უძველესი შემთხვევა აფაზიისა (მეტყველების მოშლილობისა). რომელსაც თვით მურსილი, ვითარცა ღრმა მისტიკოსი, რელიგიურ ინტერპრეტაციას აძლევს. არადა მოთხრობა შეიცავს აღნიშნული მოვლენის მიზეზსაც: ერთ-ერთი ლაშქრობის დროს ძლიერ განრისხებულა ჭექა-ქუხილის ღვთაება, მას ისე მძლავრად დაუქუხნია, რომ მურსილის... შეშინებია, „მისი პირიდან გამოშავალი სიტყვები შემცივრებულა“, იგი ენას პირში ძლივსლა აბრუნებდა. ასეთ მდგომარეობაში ყოფილა მურსილი წლების მანძილზე, სანამ ძილში არ უნახავს სიზმარი. თუ როგორ უნდა განკურნებულიყო... ქუმანის (=ქიციუვანას) ქვეყანაში, ჭექა-ქუხილის ღვთაების ტაძრისთვის უნდა შეეწირა ხარი და ფრინველები, რომლებსაც ცეცხლში დაწვავდნენ...

ხათუსას არქივმა ხეთური რელიგიური ლიტერატურის მრავალი ნაწარმოები შემოგვინახა. მათ რიცხვს განეკუთვნებათ „ლოცვანი“, რომელთაგან მურსილი II-ის „ლოცვა“ შავი ჭირის წინააღმდეგ ერთ-ერთი უძველესია ამ ჟანრის მსოფლიო ლიტერატურაში. მურსილის „ლოცვებს“ საერთო აქვთ ძველი აღთქმის „გამოსლვათა“ წიგნთან. მათ აერთიანებთ იდეა, რომ ამქვეყნიური მეფენი მორჩილი უნდა იყვნენ ღმერთისა. მსგავსებას ამჟღავნებს ორივე ნაწარმოებში გატარებული აზრი: მამის ცოდვაზე შეიძლება პასუხი აგოს შვილმაც, ადრე თუ გვიან შურისგების დღე დადგება.

ლოცვის მიზეზი გამხდარა შავი ჭირის (ყამის) გავრცელება ხათის სამეფოში: ოცი წლის განმავლობაში სენი თურმე მუსრს ავლებდა ქვეყანას. ავადმყოფობა ეგვიპტიდან შემოუტანიათ დეპორტირებუ-

ლებს. მურსილის სიტყვებით კი, ყველაფერი ორაკულს დაუდგენია: ღვთაებებმა შავი ჭირი მოუვლინეს ხათის მცხოვრებთ მურსილის მამის — სუფილულიუმას მიერ ჩადენილი ცოდვისთვის — „თუთხალია უმცროსის“ (როგორც ჩანს, თუთხალია III-ის შვილის) მოკვლისთვის, რომლის შემდეგ, მართალია, მურსილის მამას ჩაუტარებია სათანადო მსხვერპლშეწირვა, მაგრამ ქვეყნის მასშტაბით მსხვერპლი არ შეუწირავთ ამ ცოდვის მოსანანიებლად. თითქოს ამას გაუბოროტებია ღვთაებები, რომლებმაც ხათის ქვეყანას შავი ჭირი მოუვლინეს. ახლა მურსილი აღიარებს მამის ცოდვას, პატიებას სთხოვს ღვთაებებს დაღვრილი სისხლისათვის და ევედრება მათ, ისმინონ მისი ლოცვანი, მიიღონ ქვეყნის მსხვერპლშეწირვები და ხათიდან განდევნონ საშინელი სენი, თვითონ მურსილი კი სიკვდილს გადაარჩინონ: „ჭირის გამო გვედრები შენ, ტაროსის ღვთაებავ, უფალო ჩემო მისმინე, ხათის ღვთაებავ ტაროსისა, უფალო ჩემო, და გადაარჩინე! მე შენ ამას შეგახსენებ: ჩიტი გალიას უბრუნდება, გალია კი მას სიცოცხლეს უნარჩუნებს. ანდა, თუკი მონას რაიმე უჭირს, იგი თავის ბატონს მიმართავს ვედრებით. ბატონი მას მოუსმენს და მისი მოწყალე იქნება: რაც მას ამძიმებდა, შეუმსუბუქებს. ანდა, უკეთუ მონა რაიმეს შესცოდებს, ამას კი იგი ბატონის წინაშე აღიარებს, მაშინ ბატონს როგორც სურს, ისე მოიქცევა. მაგრამ მას შემდეგ, რაც იგი ბატონის წინაშე თავის ცოდვას აღიარებს, ბატონი მისი დაცხრება, ბატონი მას აღარ დასჯის. მეც ხომ მამაჩემის ცოდვა ვაღიარე: ეს ქვემარტად ასეა, ეს მე ვქმენ. თუკი ანაზღაურებაა საჭირო, ანაზღაურება უკვე მოხდა: თვით შავი ჭირი გახდა სამაგიერო შურისგება... ხათის ღვთაებავ ტაროსისა, უფალო ჩემო, გადაარჩინე! ჭირი ხათის ქვეყნიდან განდევნილ იქნეს!“.

„ლოცვათაგან“ აღსანიშნავია აგრეთვე დედოფალ „ფუღუხეფას ლოცვა“, რომელიც გამოირჩევა დიდი ლირიზმითა და მეტაფორებით. იგი მიმართულია ქ. არინას მზის ქალღვთაებისადმი (ხურბიტული ტერმინოლოგიით, ხეფათისადმი), რომელსაც დედოფალი ევედრება, სიცოცხლე აჩუქოს მის მეუღლეს — ხათუსილის (III-ს). ღვთაებას იგი პირდება ყველა დღესასწაულის — ყოველთვიურის თუ ყოველწლიურის — გადახდას, ყველა რიტუალზე დასწრებას, ყოველნაირი მსხვერპლის შეწირვას: „მე, ფუღუხეფა, ძველთაგან შენი მსახური ვარ, — მიმართავს იგი ქალღვთაებას —, მე შენი საფურე ხბო ვარ შენი საფურედან, მე ქვა ვარ შენი ტაძრის საფუძვლისა... ქ. არინას ქალღვთაებავ მზისა, უფალო ჩემო, შემიწყალე, მისმინე! ხალხი ამბობს, ღვთაება თხოვნას უსრულებს ქალს, როდესაც იგი მშობიარობისას იტანჯებაო. მე, ფუღუხეფა, ქალი, ასევე ვიტანჯები მშობიარობისას...“.

მემისრულე, რასაც გვედრები: ხათუსილის, მენს მსახურს, სიცოცხლე შეუნარჩუნე...“.

ხეთური საგალობლები (ჰიმნები) ძირითადად მზისადმი — მზის ღვთაებისადმი მიძღვნილი. როგორც ცნობილია, ხეთებს ჰყავდათ რამდენიმე მზის ღვთაება, სხვადასხვა ფუნქციითა და სქესით ერთმანეთისგან განსხვავებული. მზის ღვთაებისადმი მიძღვნილ საგალობლებიდან გამოსჰვივის ამ ღვთაებათა დიდი ძალა და ცხოველმყოფელობა. მზე გვევლინება ვითარცა ყოვლისმხედველი და ყოვლისშემძლე, მართლმსაჯულების ქომაგი, ადამიანთა მოწყალე, მათი დამცველი და ბოროტებისგან განმწმენდი, ქვეყნის მომწესრიგებელი, ღვთაებათა შორის მბრწყინავი, მთელი ცისა და დედამიწის მანათობელი, ქვეყნის მაიცნკროვნებელი, ცისა და დედამიწის სიმრგვალიდან გამომავალი და ა. შ. მზეს ემონებიან ცის მეუფენი და დედამიწის ღმერთნი...

მზის ღვთაების საგალობელში აღწერილია ამ ღვთაების გამგზავრება ცხენებიანი საბრძოლო ეტლით. მსგავსი მოტივები შეინიშნება სხვა ხალხების (ძველი ეგვიპტელების, დასავლელი სემიტების) საგალობლებში მზის ღვთაებისადმი.

საკმაოდ მდიდარია ხეთური მითოლოგიური ლიტერატურა, საიდანაც გამოირჩევიან ხათური, ხურიტული, ლუვიური, შუამდინარული წარმოშობის მითები. ადგილობრივი, ხათური წარმოშობისაა მითი ციდან ჩამოვარდნილი მთვარის, ანუ მთვარის ღვთაების შესახებ, რომლის ინტერპრეტაცია აზრთა სხვადასხვაობას იწვევს. მითის თანახმად, ციდან დედამიწაზე მთვარის ჩამოვარდნა დაინახა მხოლოდ რამდენიმე ღვთაებამ, მათ შორის, ქექა-ქუხილის ღვთაებამ, რომელმაც თავისი მდევერები (წვიმა, თქეში, ქარი) დაადევნა მას, თვითონ კი შიშმა და ძრწოლამ მოიცვა. ქალღვთაება ქამრუსეფას კითხვაზე, ამას რას შერებო, ტაროსის ღვთაებამ უპასუხა, რომ მან მთებიდან და კლდე-ღრეებიდან ქარიშხალი და წვიმა გამოუშვა. ქამრუსეფა ურჩევს მას განთავისუფლდეს შიშისგან და ძრწოლისაგან. მიუხედავად შიშისა, ქექა-ქუხილის ღვთაება ცაზე აბრუნებს მთვარეს, ხელმეორედ ქმნის რა მას. დედამიწა კვლავ ნათდება... შესაძლოა, ტაროსის ღვთაების შეშფოთება გამოიწვია იმან, რომ ზეცის წარმომადგენელი — მთვარის ღვთაება აღმოჩნდა დედამიწაზე, სადაც არ იყო მისი ადგილი. ეს ეწინააღმდეგებოდა ბუნებას, მით უმეტეს, რომ დედამიწა სიბნელემ მოიცვა. მითიდან ის დასკვნა უნდა გაკეთდეს, რომ ზეცის მკვიდრი ზეცაში უნდა იყოს, დედამიწას კი სინათლე უნდა დაუბრუნდეს. მთვარის დაბრუნება ზეცაზე ამშვიდებს ცის მეუფეთ, დედამიწა კვლავ განათებულია. სამყაროში ასეთი მარადიული კონონია...



ხათის ქვეყანაში დიდად იყო პოპულარული მითი ღვთაების შესახებ, რომელიც ქრება და შემდეგ კვლავ მოველინება ქვეყანას. ამ მითის რამდენიმე ვერსია შემოინახა. მოქმედების ადგილი და მოქმედი პირები ადასტურებენ მის ხათურ სუბსტრატს. ღვთაების გაქრობა (არა გარდაცვალება!) იწვევს გვალვას, ბუნების ჭკნობას. დანარჩენ ღვთაებათა ცდები — იპოვონ და დააბრუნონ გამქრალი ღვთაება, წარმატებით მთავრდება, რასაც მოჰყვება აღორძინება. გამქრალი ღვთაების როლში სხვადასხვა ღმერთი გამოდის: ხათური თელიფინუ ან ტაროსის ღვთაება.

...რალაცაზე განრისხებული თელიფინუ, ტაროსის ღვთაების ვაჟი, სადღაც გადაკარგულა და ყოველი სიკეთე თან წაუღია... ამის გამო ღვთაებში სუნთქვა აღარ შეიძლება, საქონელი ნადგურდება და აღარ მრავლდება, ადამიანებსაც იგივე ბედი სწევიათ. მცენარეული სამყარო გამხმარა, ღვთაებში შიმშილი დაჰკვიდრებულა. დიდი და მცირე ღვთაებები საგონებელში ჩავარდნილან, თელიფინუ თუ ვერ იპოვეს, შიმშილით სული ამოხდებათ. დაიწყეს მისი ძებნა. მაგრამ დიდმა და მცირე ღვთაებებმა თელიფინუს კვალს ვერ მიაგნეს. ვერც ფრთამალმა არწივმა, ვერც ტაროსის ღვთაებამ თელიფინუ ვერ აღმოაჩინა. მაშინ ღვთაებათა ქალბატონი ნინთუ იხმობს ფუტკარს და არიგებს მას, თუ როგორ მოძებნოს თელიფინუ. თუკი იპოვის, ფეხები და ხელები ნესტრით დაუჩხვლიტოს, წამოაყენოს და ღვთაებას მიჰგვაროს. ფუტკარი გადალახავს მთებს, ხეობებს, მდინარეებს, წყაროებს და ქ. ლიხტინაში მიაგნებს მძინარე თელიფინუს, ნესტრით დაჩხვლევს მას და გამოაღვიძებს. ახლა კვლავ განრისხდება ღვთაება — ნაკადულებს აჩერებს, მდინარეებს მიმართულებას უცვლის, ხალხს ღუბავს, საქონელს წყვეტს...

ამის შემდეგ მითში დაწერილებითაა აღწერილი რიტუალი, თუ თელიფინუს სხეულისაგან როგორ უნდა განარიღონ გულსწყრომა, მძინევარება, რისხვა. რიტუალის შემდეგ თელიფინუ კვლავ ბრუნდება და იწყებს ზრუნვას ქვეყნიერებაზე. მის წინ აღიმართება მარადმწვანე ხე ეია- (როგორც ახლა ვარაუდობენ, ურთბელი), რომელზედაც ჰკიდია საწმისი — სიმრავლის, სიუხვის, გამრავლების, დღეგრძელობის, სიცოცხლის სიმბოლო. თელიფინუს მითის მოტივის ტიპოლოგიურ პარალელს ხედავენ სვანურ რიტუალში „მელია-ტელეფია“ შესახებ. ინტერესს იწვევს აგრეთვე თელიფინუს კულტის ერთ-ერთი ატრიბუტი — კავშირი მარადმწვანე ხესთან, რომლის გამოყენებას რიტუალში ადარებენ ნაძვის ხის როლს საშობაო დღესასწაულების დროს.

ხათური საახალწლო რიტუალის — ფურულის მითოლოგიურ მოთხრობაში გველემშაზე (ილუიანქაზე) ასახულია ამ უკანასკნელთან

ტაროსის ღვთაების ბრძოლა, რომლის სცენები შემონახულია მცირე-აზიული ხელოვნების ძეგლებზე (მაგალითად, ბარელიეფზე მალატიადან). მითის მიხედვით, ტაროსის ღვთაებისა და გველეშაპის შერკინება ამ უკანასკნელის გამარჯვებით მთავრდება. დამარცხებულმა ტაროსის ღვთაებამ დახმარებისთვის ღმერთებს მიმართა, ქალღვთაება ინარას კი სთხოვა, სადღესასწაულოდ მომზადებულიყო. ქალღვთაებამ დიდებული სუფრა გააწყო და შინ მოიპატოჟა ილუიანქა, რომელიც სტუმრად თავის შვილებთან ერთად მოვიდა. გამომთვრალი ილუიანქა თოკით შებოქვს (ამაში ინარას დაეხმარა მოკვდავი ხუფასია, რომელთანაც ქალღვთაებამ ღამე გაათია), ტაროსის ღვთაებამ კი ილუიანქა შვილებიანად განგმირა. შურისგებით დაკმაყოფილებულმა ტაროსის ღვთაებამ ქვეყანას წვიმა მოუვლინა... შეტაკებას ღვთაებასა და მის მოწინააღმდეგე გველეშაპს შორის, რაც ახალი წლის მოახლოებასთან დაკავშირებით ხდებოდა, ადარებენ იმ რიტუალურ ბრძოლებს, სა-ახალწლო დღესასწაულების დროს რომ იმართებოდა მოგვიანო ხანის მსოფლიოს სხვადასხვა ხალხში.

ზემოაღნიშნულ ორ მითოსს ზოგიერთი მკვლევარი ყურადღებას აქცევს მათში მოხსენიებული ცხვრის (ვერძის) ტყავის, ე. ი. „საწმისის“ მიმართების გამო ანტიკური ხანის „ოქროს საწმისის“ მითოსთან. ხეთურ მითოსთა მონაცემების დახმარებით ცდილობენ აღადგინონ უძველესი ფენა ანტიკური ლეგენდებისა იასონისა და მედეას კოლხეთში ყოფნის შესახებ (პინდაროსისა და აპოლონიუს როდოსელის ნაწარმოებთა მიხედვით).

ცენტრალური და ჩრდილოანატოლიური (ხათური) რაიონების მცხოვრებთა რელიგიურ წარმოდგენებში მნიშვნელოვან როლს ასრულებდა ცხვრის ან თხის ტყავი როგორც სიმბოლო სამეფოს კეთილდღეობისა. ამასთანავე, საკმე ეხებოდა განსაკუთრებულად შერჩეული ცხოველის ტყავს.

გაზაფხულის დადგომასთან დაკავშირებულ სამეფო დღესასწაულებისას გარკვეული ქალაქების საკულტო შემოვლის დროს საწმისს თან დაატარებდნენ, როგორც ჩანს, ტყავის სამკურნალო მაგიური ძალის გამო (მდრ. ერთი ხეთური ტექსტის სიტყვები: „...შემდეგ დღეს საწმისი ქ. არინადან მიალწევს... (რომელიდაც ქალაქს), შემდგომ დღეს საწმისი მიემგზავრება ქ. თავინიას..., შემდგომ დღეს საწმისი თავინიადან უკან ბრუნდება“ და ა. შ.).

„თელიფინუს მითოსის“ მიხედვით, „ღვთაება თელიფინუ ზრუნავს მეფეზე. თელიფინუს წინ აღმართულია (მარადმწვანე) ხე ე ი ა, რომელზედაც ჰკიდია ცხვრის ტყავი (საწმისი). მასში მოთავსებულია ქონი, ქერი, ხორბალი და ღვინო, ხარი და ცხვარი, ხანგრძლივი სი-

ცოცხლე და შთამომავლობა...“. ამავე მითოსის სხვა ადგილას ნახსენებია საკურთხეველის წინ ჩამოკიდებული ბატკნის ტყავი (საწმისი). კიდევ ერთი ადგილის თანახმად, საწმისი არის ის, რასაც ღვთაება ხანახანას მიერ გაგზავნილი ფუტკარი იპოვის: „ფუტკარმა იპოვა და თან წაიღო საწმისი. როგორც კი მას ფუტკარი მიუახლოვდება, ხანახანა სამ წყაროს გააჩენს. ერთ მათგანთან (რომელიღაც) ხე დგას, მეორესთან თასია დადებული, უკანასკნელთან კი ცეცხლი ანთია. ხანახანა იქ ზის და შეპყურებს ფუტკარს, რომელიც მოდის და საწმისს თასზე დებს...“.

ამ მაგიურ-მითური ექსკურსების მიხედვით, ვერძის ტყავი, ერთი მხრივ. ფუნქციონალურად გაგებულია როგორც განაყოფიერების ღვთაება. მეორე მხრივ კი იგი სახეობაა ძალისმქონე ფეტიშისა, რომელზედაც დამოკიდებულია ქვეყნის კეთილდღეობა.

ბერძნული წყაროების მიხედვით, საწმისი არის კეთილი ძალის მქონე, ბედნიერებისა და სიუხვის განმასახიერებელი ფეტიში, რომელიც ბატონობას, კერძოდ, სამეფო ხელისუფლების მიღებას უწყობს ხელს. თელიფინუს თქმულების თანახმად კი ცხვრის ტყავი სიკეთის მომგვრელი ღვთაებრივი საგანია.

ბერძნული ლეგენდის თანახმად, საწმისი ოქროსია. ამ ვითარებას ხეთურ წყაროებში ხაზი ესმება იმით, რომ საწმისი შეიძლება შემკული იყოს მზის დისკოთი. თუ ბერძნული ტრადიციით იგი არის მეფე აიეტის მფლობელობაში, ანდა კლდეზე დგას ან მუხაზეა ჩამოკიდებული არესის მინდორზე. ხეთური წყაროების მონაცემთა გათვალისწინებით, საწმისი ეიას ხეზე (ურთხელზე) ჰკიდია. ან ხანახანას მინდორში დადებულ თასზე დევს. სამეფო ხელისუფლებასთან კავშირში ინტერესს იწვევს ქალაქ ნერიქის საკულტო ტრადიციები. საწმისი და მასთან დაკავშირებული ეიას ხე ნერიქის კულტში იმსახურებენ განსაკუთრებულ პატივისცემას. ხეთების სამეფოში ვერძის ტყავის მნიშვნელობას თუ გადავიტანთ აიაში არსებულ ოქროს საწმისზე. მაშინ გასაგები გახდება აიეტის წინააღმდეგობა. ვინმეს გადასცეს საწმისი, რადგან ეს ტოლი იქნებოდა ვინმესათვის მისი სამეფო ხელისუფლების გადაცემისა, ე. ი. ოქროს საწმისის ფლობა სამეფო ხელისუფლების ფლობას ნიშნავდა.

იასონ-მედეასა და საწმისის მოდარაჟე ურჩხულის ლეგენდის გაგებისათვის მკვლევარნი მიმართავენ მეორე ხეთურ მითოსს. რომელიც ურჩხულთან (გველეშაბთან) არის დაკავშირებული. ბერძნული და ხეთური თქმულებების მიხედვით, წყვილებად გვევლინებიან, ერთი მხრივ, იასონი და მედეა, ხოლო მეორე მხრივ, ხუფასია და ინარა. მედეა და ინარა აძინებენ ურჩხულს, ინარა — მათრობელა სსმისით. მედეა კი — მაგიური მოქმედებით. ორივეს შეუძლია უშოზრად მიუ-

ახლოვდეს ურჩხულს. ორივე მოსიყვარულე წყვილის საბოლოო მიზანია ურჩხულის დათრგუნვა. როგორც იასონი, ასევე ხუფასია მოკვდავი არიან. ზოგიერთი ბერძნული გადმოცემის მიხედვით, მედეა უკვდავია ვითარცა ღვთაება, ინარას მსგავსად. როგორც ხუფასია, იასონიც წარმოდგენილია ვეგეტაციური რიტუალის ერთ-ერთ მოქმედ პირად.

თუკი თელიფინუს მითისა და ურჩხულის შესახებ მითოლოგიურ თქმულებაში საქმე გვაქვს ორ ჩრდილოანატოლიურ ვეგეტაციურ მითოსთან (ძვ. წ. II ათასწლეულში), იასონ-მედეას თქმულებაში (ძვ. წ. I ათასწლეული) ორივე მითოსი ერთ მოტივად არის გაერთიანებული. მაგრამ თელიფინუს მითში საწმისის მოტივი განსახილველია როგორც რიტუალში ჩართული ნაწილი იმისათვის, რათა განმტკიცდეს სამეფოს სიკეთე. იასონ-მედეას სიუჟეტში კი საეკვოა, რომ ოქროს საწმისის მოდარაჟე ურჩხულის მოტივი მითურია. მას მოგვიანო ხანის ჩანამატ ზღაპრულ მოტივად მიიჩნევენ.

წმინდა საწმისის იდეის წარმოშობის ადგილად მიიჩნევენ ანატოლიის ცენტრალურ და ჩრდილოეთ რაიონებს, სადაც ინდოევროპელი ტომების გამოჩენამდე ხათები ბინადრობდნენ. ანატოლიის ამ რაიონებიდან ეს იდეა მიკენურ-ბერძნულ სამყაროში უნდა შეღწეულიყო. ზოგიერთი მკვლევარის ვარაუდით, თქმულება ოქროს საწმისზე ბერძენ კოლონიტებს უნდა გადაეტანათ კოლხეთში მხოლოდ ამ სამყაროდან (ძვ. წ. VIII ს-ში), რითაც გამოირიცხება აღნიშნული იდეის წარმოქმნა თვით კოლხეთის ტერიტორიაზე. მაგრამ ასეთი ვარაუდი არ არის დამაჯერებელი, რადგან ვერძის ტყავის მაგიურობის იდეა შეიძლებოდა კოლხეთში გავრცელებულიყო სწორედ უშუალოდ ანატოლიის ჩრდილო-აღმოსავლეთი რაიონიდან, რომელიც უძველესი ხანებიდანვე ესაზღვრებოდა ქართველურ ტომთა განსახლების არეალს. ამასთანავე, სავსებით დასაშვებია წმინდა საწმისის იდეის, ანდა მისი ანალოგიური თქმულების წარმოშობა საკუთრივ კოლხეთში (ცხვრის კულტის არსებობა ქართველურ ტომებში ექვს არ იწვევს არქეოლოგიური და ეთნოგრაფიული მასალების მიხედვით).

ხეთურ ლიტერატურაში განსაკუთრებული ადგილი უჭირავს თარგმნილ ნაწარმოებებს. ხეთურ ენაზე იყო თარგმნილი ძველი შუამდინარეთის ხალხური ეპოსი „გილგამეში“, ქანაანელთა ერთი მითოლოგიური შინაარსის ტექსტი ღვთაება ელკუნერშაზე („ღვთაება, შემქმნიელი დედამიწისა“) და სხვა ნაწარმოები.

ხეთურად ითარგმნა აგრეთვე ხურიტული ლიტერატურის რამდენიმე შესანიშნავი ნაწარმოები. მათგან აღსანიშნავია მითოლოგიური მოთხრობა ზეცაში მეფობის არსებობის შესახებ, სადაც აღწერილია ხელისუფლების გადასვლა ღვთაებათა ერთი დინასტიიდან მეორეზე, და მითოლოგიური მოთხრობა ღვთაება ქუმარბიზე. ორივე ეს ნაწარ-

მოები ერთმანეთს ავსებს და ქმნის მოთხრობათა ციკლს ქუმარბის შესახებ.

... ოდესღაც ცაში მეფობდა ღვთაება ალალუ. მას მსახურად ჰყავდა ღვთაებათა შორის უპირველესი ანუ. რვა წელს მეფობდა ალალუ. ზეცაში, მეცხრე წელს კი მას ანუმ ომი გამოუცხადა. ალალუ გაიქცა შორეულ ქვესკნელში. გამეფებულ ანუს ქუმარბი, ალალუს შთამომავალი, ემსახურებოდა რვა წლის განმავლობაში. მეცხრე წელს ქუმარბი შეებრძოლა ანუს, რომელმაც ცას მიაშურა. მაგრამ ქუმარბი დაეწია ანუს და ციდან ჩამოიყვანა. ამ დროს ანუ ახერხებს თავისი მამაკაცური ძალა დათვისოს ქუმარბის სხეულში. ქუმარბი ფეხმძიმე ხდება და გადაწყვეტს, სირცხვილისათვის შური იძიოს ანუზე. იგი რჩევისთვის მიმართავს ენლილს, შემდეგ კი ეას ევედრება დახმარების აღმოჩენას, მაგრამ ამაოდ... ქუმარბი პირიდან შობს დიდ ლოდს (ქუნქუნუცის), მას ტაძარში ათავსებენ და განადიდებენ. უამრავ მსხვერპლს სწირავენ ქუმარბის, რომლის კეფიდან შემდეგ ჩნდება ტაროსის ღვთაება, შემდეგ — არანცახ (მდ. ტიგრისი) ღვთაება, ბოლოს — თასმისუ ღვთაება. ახალშობილი ღვთაებანი ქანცურას მთას. მიაშურებენ. მითი მთავრდება თხრობით, თუ როგორ გააჩინა დედამიწამ ტყუპი, რომელსაც ეამ სამოსი, ვერცხლი და ჯადოსნური თითისტარი უბოძა...

ეპიკურ პოემას ღვთაება ქუმარბიზე „ულიქუმის სიმღერასაც“ უწოდებენ. ღვთაებათა მამა ქუმარბი მტრობს ტაროსის ღვთაებას, რომლის მიმართ მან ბოროტება ჩაიფიქრა — დაუახლოვდა კლდეს, რომელმაც მას გაუჩინა შვილი — ლოდი, სახელად — ულიქუმი. ამან უნდა დაამარცხოს ტაროსის ღვთაება, დააშინოს სხვა ღვთაებანი ცაში. ლოდი გასაზრდელად გაგზავნეს დედამიწაზე, სადაც იგი ზღვაში დღითი დღე იზრდება. მეთხუთმეტე დღეს ზღვაში იდგა გიგანტური ლოდი. ამან დაარღვია ცაში ღვთაებათა მყუდროება. მზის ღვთაება გაოგნებულია შექმნილი არსებით. ტაროსის ღვთაება შიშმა შეიპყრო და ბრძოლისთვის მზადება იწყო. ჯერ სამოცდაათი ღვთაება შეებრძოლა ულიქუმის, მაგრამ მან ყველა მათგანი დაამხო ზღვაში. ახლა მან ხმელეთზე გადმოინაცვლა და აღიმართა ცაში ვითარცა ხმალი: სიმაღლეში ცხრა ათასი ვერსი, სიგანეში — ცხრა ათასი ვერსი. ღვთაებები ფიქრს მიეცენ, არ იციან როგორ დაამარცხონ ულიქუმი. ბოლოს ისინი მოუწოდებენ „ძველ ღვთაებებს“, გახსნან მათ მამა-პაპათა დაბეჭდილი საწყობები: იქ ინახება გარდასულ დღეთა საჭრისი — ნამგალი, რომლითაც მათმა წინაპრებმა ერთ დროს ცა დააშორეს დედამიწას. ახლა კი სწორედ იმ საჭრისით ძირში უნდა გადაქრან ულიქუმი — ღვთაებათა მეტოქე. ღვთაება უფელურის მეთა-

ევობით ღმერთები საბოლოოდ შეებრძოლნენ ულიქუმის და დაამარცხეს იგი. ღვთაება ეა გადაჭრის ულიქუმის. ტაროსის ღვთაება ზეიშობს...

ორი უკანასკნელი ნაწარმოები მსოფლიო კულტურის ისტორიისათვის საინტერესოა იმდენად, რამდენადაც მათ მიიჩნევენ ძველალმოსავლური ლიტერატურისა და ძველი ბერძნული მითოლოგიური და პოეტური ტრადიციების დამაკავშირებელ რგოლად. მაგალითად, სიუჟეტი მოთხრობისა ღვთაებათა ოთხი თაობის ცვლზე ანალოგიურია ჰესიოდეს მოთხრობისა ურანოსიდან კრონოსზე. ხოლო კრონოსიდან ზევსზე ხელისუფლების გადასვლის შესახებ. ასევე, სიუჟეტი მითისა ღვთაება ქუმარბიზე ძალიან წააგავს ჰესიოდისეულ მითს ტიფონის შესახებ.

მკვლევართა აზრით, საქმე გვაქვს ერთსა და იმავე მითის ორ ვერსიასთან — ხეთურ-ხურიტულთან და ბერძნულთან. ძველი ბერძნული ტრადიციით, ტიფონთან შებრძოლება მოხდა ჩრდილოეთ სირიაში ნღებარე მთაზე—ციფონზე, რომელიც „ულიქუმის სიმღერაში“ ტაროსის ღვთაების სამყოფელია. ურანოსის დასაქურისება კრონოსის შიერ განიხილება როგორც ანალოგიური ებიზოდი ხეთურ-ხურიტული ვერსიისა იმ განსხვავებით, რომ გამარჯვებული ქუმარბი ფეხმძიმედ ზდება მისივე მოწინააღმდეგე ანუსაგან (ზოგიერთი მკვლევარი ამას განიხილავს როგორც ზუსტ პარალელს ეგვიპტური მითისა ჰორის და სეთის შესახებ: ღვთაებათა დაბადება სეთის თავისაგან, ანდა ქუმარბის მიერ, ანალოგიურია ბერძნული მითისა ზევსის თავისგან ათენას დაბადების შესახებ). მითის ბერძნულ და ხურიტულ ვარიანტებს აერთიანებს მოტივი საჭრისის გამოყენებისა (ორივე ვარიანტში — ნამგლისა, „თეოგონიაში“ იგი რკინის, ხოლო ქუმარბის ციკლში — სპილენძისაა). აღნიშნული საჭრისით ადრე ცა გამოჰყვეს დედამიწისაგან, ხოლო კრონოსმა დაასაქურისა ურანოსი. „ულიქუმის სიმღერაში“ საჭრისი დაკავშირებულია ღვთაება უფელურისთან, რომელსაც, ბერძნული ვარიანტის ატლასის მსგავსად, ცა და დედამიწა მხრებით უჭავია. გადაჭრა რა ულიქუმი, ღვთაება ეამ ამით მას ძალღონე დააკარგვინა, რაც მსგავსია მოტივისა ბერძნულ მითში ანტეოსის შესახებ.

ხათუსას არქივის ძირითადი ნაწილი რელიგიური ლიტერატურის არაერთ სახეობას შეიცავს. აქ შემოინახა მრავალი რიტუალი, ღვთაებათა სიები, დარიგებანი ტაძრის მსახურთათვის, ორაკულთა ტექსტები და სხვა. აქვეა სამეცნიერო და სპეციალური ლიტერატურაც. ამ მხრივ აღსანიშნავია ასტროლოგიური, სამედიცინო და მათემატიკური ხასიათის ნაშრომები. მაგრამ ამ ხასიათის ტექსტები ხეთებმა მხოლოდ თარგმნეს ასურულ-ბაბილონურიდან (აქადურიდან) ისე, რომ საკუ-

თარი თითქმის არაფერი მიუმატებიათ. შუამდინარულ სამყაროსთან კულტურულ ურთიერთობებს უკავშირებენ ხეთების მიერ ისეთი ტექსტების შექმნას, რომლებიც ეძღვნებათ ღვიძლით მკითხაობას და, საერთოდ, ღვიძლის მოდელეებზე ლურსმულად წერას (წერის ასეთი პრაქტიკა დასტურდება ხმელთაშუა ზღვის ქვეყნებშიც). ბაბილონური გავლენით ხსნიან ხეთებში ლინგვისტიკის საწყისების განვითარებას: ხეთი მწერლები ადგენდნენ სიტყვათა სამენოვან (შუმერულ — აქადურ — ხეთურ) სიებს — ლექსიკონებს, რაც მოითხოვდა სიტყვების მორფოლოგიურ ანალიზს. „ახალი სამეფოს“ პერიოდში შუამდინარეთის გავლენით განვითარებას მიაღწია ისეთმა საქმიანობამ, რომელიც ძალზედ წააგავს თანამედროვე დოკუმენტალისტიკას: ხათუსას არქივში შემონახა დოკუმენტების კატალოგთა ლურსმული ტექსტები, ისევე როგორც ეტიკეტები ცალკეულ ტექსტზე.

ხათუსას არქივში დაცული სპეციალური ლიტერატურიდან უნდა აღინიშნოს ტექსტები ხეთურ მეცხენეობაზე. ეს არის პირველი თხზულება მსოფლიო ლიტერატურაში, სადაც დაწვრილებითაა აღწერილი ცხენების გაწვრთნა — გახედნა, რაც 184 დღეს გრძელდებოდა. იგი ერთგვარი ტრაქტატია, რომელსაც სპეციალურ ლიტერატურაში უწოდებენ „კიკულის ტექსტს“, რადგან მისი შემდგენელი იყო ვინმე მეცხენე კიკული, წარმოშობით ხურიტი (მითანელი). ტექსტი შეიცავს უძველეს ტერმინოლოგიას მეცხენეობის შესახებ.

ამ მოკლე მიმოხილვით ვამთავრებთ ხეთურ კულტურაზე საუბარს.

ხეთური კულტურის ტრადიციები არ გამქრალა ხეთების სამეფო დაცემის შემდეგაც. ბევრი მათგანი გაგრძელდა მოგვიანო ხანებში ჩრდილოეთ სირიისა და ანატოლიის სამხრეთ-აღმოსავლეთ პერიფერიაზე, სადაც ძვ. წ. I ათასწლეულში ჩამოყალიბდა რამდენიმე ე. წ. „გვიანხეთური“ სამთავრო.

## ბოლოთქმა

აი, ასე წარმოგვიდგება ხეთური საზოგადოების სურათი ხეთოლოგიის თანამედროვე მიღწევათა მუქზე, თუმცა ჩვენც ვგრძნობთ, რომ ამ სურათის ყოველი დეტალი თანაბრად დამაჯერებელი როდია. მიუხედავად ამისა, ნარკვევში ხეთები წარმოჩენილია როგორც არამართო ერთ-ერთი უძველესი ხალხი მსოფლიოში, არამედ როგორც რეალური ადამიანები განუმეორებელი ინდივიდუალობით.

ხეთური ცივილიზაცია წარმოგვიდგება როგორც მესამე დიდი ძველადმოსავლური ცივილიზაცია შუამდინარულისა და ეგვიპტურის შემდეგ. იგი მოწინავე იყო სხვადასხვა ასპექტით: სამხედრო საქმის მაღალი ორგანიზებით ხეთებმა შეძლეს საუკუნეთა მანძილზე არაერთხელ შეენარჩუნებინათ გაბატონებული მდგომარეობა მთელს ძველ ახლოაღმოსავლურ სამყაროში; პოლიტიკური, სოციალური, ეკონომიკური თუ რელიგიური ორგანიზაციის თვალსაზრისით ისინი მუდამ ინარჩუნებდნენ თავიანთ ინდივიდუალობას; ხეთური კანონმდებლობისა და მართლმსაჯულების შესრულება უდავოდ გამოირჩეოდა ორიგინალობით; მეტალურგიის განვითარების, განსაკუთრებით, რკინის წარმოებისა და გამოყენების თვალსაზრისით, ცენტრალური მცირე აზია ერთ-ერთი უძველესია მსოფლიოში; ხეთური კულტურის ცალკეული მონაპოვარი (ხელოვნების, ლიტერატურის დარგებში) მოწინავე ადგილს იჭერს მსოფლიო კულტურის საგანძურში.

ხეთოლოგია ძალზედ „მობილური“ მეცნიერული დისციპლინაა ძველადმოსავლური მეცნიერების სხვა დარგებს შორის, რაც საეხებით გასაგებია: ჯერ არ დამთავრებულა ხათუსას არქივის გამოქვეყნება, ხეთური ტექსტების ყოველ ახალ გამოცემას სიახლე, ზოგჯერ, რადიკალური ცვლილება შეაქვს ჩვენს წარმოდგენებში ხეთების ისტორიის ამა თუ იმ საკითხზე; მსოფლიოს სხვადასხვა ქვეყანაში მომუშავე ხეთოლოგები კი განუწყვეტლივ ძიებაში არიან: ზოგიერთი გუშინდელი დასკვნა დღეისთვის მიუღებელია, ჩნდება სრულიად ახალი ვარაუდები, მოსაზრებანი, დებულებები...

მცირე აზიის არქეოლოგიას ხომ ყოველ წელს დიდი სიახლეები მოაქვს. ანატოლიის მიწა ხეთური ხანის ჯერ კიდევ ბევრ საიდუმლოს ინახავს. წინ გველოდება კიდევ არაერთი საინტერესო აღმოჩენა, მათ



შორის, ლურსმული არქივებისაც კი, შესაძლოა, არა ხათუსას არქივის ტოლი, არამედ მაშათ-ჰუიუქის არქივის მსგავსი, რომელმაც ხეტების ისტორიის არაერთი მანამდე უცნობი ფურცელი გადაშალა...

მომავლის პერსპექტივას ძალზედ სასიკეთო პირი უჩანს. ღრმად გვჭერა ისიც, რომ მომავალი ხეთოლოგიური და ქართველოლოგიური კვლევა-ძიება ბევრ სიახლეს გამოავლენს ჩვენთვის უაღრესად საინტერესო სფეროში — ხეთურ-ქართველურ ურთიერთობათა სფეროშიც.

- I. ქალღმერთებთან გამოსახულებანი (თიხა). პაჩილარი. ძვ. წ. VI—V ათასწლეულებში.
- II. თიხის ქურკლები. პაჩილარი.
- III. 1. „მზის დისკო“ (საკულტო შტანდარტი). ბრინჯაო. ალაჩა-პერიუქი. 2. ოქროს დიადემა. ალაჩა-პერიუქი.
- IV. 1. ირმის გამოსახულება (საკულტო შტანდარტი), ბრინჯაო ვერცხლით. ალაჩა-პერიუქი.  
2. ორთავიანი არწივი (ებრძვის ორ კერძელს), ალაჩა-პერიუქი.
- V. ოქროს ქურკლები ალაჩა-პერიუქიდან.
- VI. 1. „კაპადოკიური“ ფირფიტა ქიულთეფედან.  
2. ბრინჯაოს სატურის ნაწილი წარწერით: „სასახლე ანთასი, მეფისა“.  
ქიულთეფე.
- VII. 1. რატონი ლომის გამოსახულებით. თიხა. ქიულთეფე.  
2. „ნისკარტფორმანი“ ქურკელი. თიხა. ქიულთეფე.
- VIII. რომელიღაც ღვთაება, ცხოველზე მდგარი. ქვა. ქიულთეფე.
- IX. 1. აკადემიოსი ბედრჯის პროზნი.  
2. ბ. პროზნის მემორიალი მის მშობლიურ ქალაქში (ლაბეს ლისაში).
- X. 1—2. ხეთური ღვთაებები.  
3. კადემის ბრძოლაში მონაწილე ხეთები. ეგვიპტური გამოსახულება.
- XI. 1. ხეთების დამხმარენი კადემის ბრძოლაში. ეგვიპტური გამოსახულება.  
2. მეფე მუვათალი საბრძოლო ეტლით კადემში. ეგვიპტური გამოსახულება.
- XII. ხათუსას I ტაძრის რეკონსტრუქცია და გეგმა.
- XIII. 1. ხათუსას ერთ-ერთი რეკონსტრუქციული ნაგებობა.  
2. ხათუსას ციხე-სიმაგრის გეგმა.
- XIV. 1. მამაკაცის გამოსახულება (ჩრდილოეთ სირია). ბრინჯაო.  
2. რომელიღაც ხეთური ღვთაება. ბრინჯაო. ბოლაჯიოი.
3. შიშველი ბიჭის გამოსახულება. ბრინჯაო და რკინა.
- XV. 1. თუთხალია IV. იანილიქაია.  
2. თუთხალია IV-ის სახელის კარტუში ლუვიერ (ხეთურ) იეროგლიფურად-იაზილიქაია.
- XVI. 1. „სფინქსთა კიშკარი“ ალაჩა-პერიუქში.  
2. „ლომთა კიშკარი“ ბოლაჯიოიში.
- XVII. თორმეტი ღვთაების გამოსახულებანი იაზალიქაიაში.
- XVIII. 1. მეომარი ღვთაების გამოსახულება. ბოლაჯიოი.  
2. ტაროსის ღვთაება კლავს ურჩხულს (ილუიანქას). მალატია.
- XIX. 1. ხეთურ საბეჭდავთა ანაბეჭდები.  
2. ორი ზომორღული ქურკელი ხარების გამოსახულებით (ხეთური ტექსტების „შერი და ხური“). ბოლაჯიოი.
- XX. ხეთური ლურსმული ფირფიტა (ხეთური კანონები).
- XXI. 1. ხეთური ლურსმული ფირფიტა ორი ადამიანის თავის გამოსახულებით.  
2. ბოძების დოკუმენტი, საბეჭდავთა დამოწმებული.
- XXII. ლუვიური (ხეთური) იეროგლიფური წარწერა.
- XXIII—XXIV. გვიანხეთური რელიეფები საქართველოს სახელმწიფო მუზეუმიდან.

რა შვიძლება წავიკითხოთ  
ხეთებთან დაკავშირებით

ძართულ ენაზე

„არმალანი. აღმოსავლური მწერლობის ნიმუშები“. თბილისი, 1982 (მოცემულია ნ. ბენდუქიძის ქართული თარგმანები ხეთური ლიტერატურის ზოგიერთი ნაწარმოებისა).

მ. ბერიძე, დაკრძალვის რიტუალი ხეთებთან. „საქართველოს სახელმწიფო მუზეუმის მოამბე“, XXXVI—B, თბილისი, 1982.

გ. გორგაძე, ხათი — ათასი ღვთაების ქვეყანა. გაზ. „ახალგაზრდა კომუნისტი“, 1985, 19 და 26 იანვარი, 2 და 9 თებერვალი.

გ. გორგაძე, ხეთურ-არმაზული „ტრიალები“. „მნათობი“, 1985, № 7.

ქ. კერამი, ხეთების საილუმლოება. თბილისი, 1966.

ი. ტატიშვილი, კერის დადგმის ხეთური რიტუალი. „არქეოლოგიური ძიებანი“, თბილისი, 1985.

„ძველი აღმოსავლეთის ხალხთა ისტორია“ (სახელმძღვანელოს მეორე გამოცემა), თბილისი, 1988.

„ძველი აღმოსავლეთის ხალხთა ისტორიის ქრესტომათია“ (ქართული თარგმანები ისტორიულ-პოლიტიკური, სამართლებრივი, რელიგიური და მითოლოგიური შინაარსის ხეთური ტექსტებისა), თბილისი, 1989.

მ. წერეთელი, ხეთის ქვეყანა, მისი ხალხები, ენები, ისტორია და კულტურა. კონსტანტინოპოლი, 1924.

ნ. ხაზარაძე, თ. ცაგარეიშვილი, ხეთურ-ქართული მითოლოგიური პარალელები. „მნათობი“, 2, 1988.

„ხეთების სამეფო“, „ხეთური ენა“, „ხეთური ლიტერატურა“. „ქართული საბჭოთა ენციკლოპედია“, ტ. XI, 1987.

ს. ჯანაშია, ხეთების ისტორიისა და ენის საკითხისათვის. „ს. ჯანაშია, შრომები“, ტ. III, თბილისი, 1959.

## სტუმრები

В. Г. Ардзинба, Ритуалы и мифы древней Анатолии, Москва, 1982.

Н. А. Бендукидзе, Хеттский миф о Телешпу и его сванские параллели. «Вопросы древней истории», Тбилиси, 1973.

Т. В. Гамкрелидзе, В. В. Иванов, Индоевропейский язык и индоевропейцы, Тбилиси, 1984.

О. Р. Герни, Хетты, Москва, 1987.

Г. Г. Гноргадзе, Очерки по социально-экономической истории Хеттского государства, Тбилиси, 1973.

Б. Грозный, Хеттские народы и языки, «Вестник древней истории», 1938, № 2.

В. Замаровский, Тайны хеттов, Москва, 1968.

В. В. Иванов, Хеттский язык, Москва, 1963; Луна, упавшая с неба, Москва, 1977.

«История древнего мира», т. I, Москва, 1982.

Дж. Г. Маккунн, Хетты и их современники в Малой Азии, Москва, 1983.

Г. А. Меликишвили, Возникновение Хеттского царства и проблема древнейшего населения Закавказья и Малой Азии. «Вестник древней истории», 1965, № 1.


Дж. Мелларт, Древнейшие цивилизации Ближнего Востока, Москва, 1982.

Э. А. Менабде, Хеттское общество, Тбилиси, 1965.

П. Р. Рамшвили, «Каппадокийские» юридические документы о купле-продаже рабов и рабынь. «Археологические изыскания», Тбилиси, 1985.

И. М. Татишвили, Храмовый строительный ритуал у хеттов, «Археологические изыскания», Тбилиси, 1986.

Н. Б. Янковская, Клинописные тексты из Кюль-тепе, Москва, 1968.







1




2



1






1



2






1.



2



1



2



1




2






1



2



2




3




1



2




1




2





1




2




3




2



1






1



2



1



2



1



2



1



2







1



2







## შ ი ნ ა ა რ ს ი

წინათქმა	3
I. ხიდი აზიასა და ევროპას შორის. მაღალი კულტურის პირველი შუქურები	5
II. ცენტრალური ანატოლია ისტორიის გარიჟრაჟზე	11
III. ცენტრალური ანატოლიის უძველესი ბინადარნი	19
IV. ხეთების აღმოჩენა და ხეთური პრობლემის გადაჭრა	29
V. ხეთური ენოსი და ხათის ქვეყანა	41
VI. ხათის გამოჩენა წინა აზიის პოლიტიკურ ასპარეზზე. ხეთების „ძველი სამეფო“	50
VII. ხეთების „შუა სამეფო“. ხათი — ეკლავ განსაცდელში	62
VIII. „ახალი სამეფო“. ხეთების საგარეო პოლიტიკის ძირითადი მომენტები	66
IX. ხეთების სამეურნეო საქმიანობა და საზოგადოებრივი ურთიერთობანი	85
X. ხათის სახელმწიფოებრივი და სოციალური სტრუქტურა	106
XI. ხეთური სამართალი	117
XII. ხეთური რელიგია	132
XIII. ხეთური კულტურა	154
ბოლოთქმა	172
ილუსტრაციების სია	174
რა შეიძლება წაიკითხოთ ხეთებთან დაკავშირებით	175

### Григорий Григорьевич Гиоргадзе СТРАНА ТЫСЯЧИ БОЖЕСТВ

«МЕЦНИЕРЕБА»  
ТБИЛИСИ  
1988

დაიბეჭდა საქართველოს სსრ მეცნიერებათა აკადემიის  
სარედაქციო-საგამომცემლო საბჭოს დადგენილებით

სბ 3988

გამომცემლობის რედაქტორი ლ. კოტრიკაძე  
მხატვარი გ. ლომიძე  
მხატვრული რედაქტორი ი. სიხარულიძე  
ტექნორედაქტორი ნ. ბოკერიია  
კორექტორი ნ. მაჩაიძე  
გამომწვეები ლ. მაისურაძე

გადაეცა წარმოებას 30.5.1988; ხელმოწერილია დასაბეჭდად 14.9.1988;  
ქალაქის ზომა 60×90<sup>1/16</sup>; ქალაქი № 1; ბეჭდვა მაღალი;  
გარნიტურა ვენური; პირობითი საბეჭდო თაბახი 12,50;  
პირ საღ. გატ. 13,12; სააღრიცხვო-საგამომცემლო თაბახი 10,50;  
უე 02485; ტირაჟი 40000; შეკვეთა № 838;

ფასი 1 ჰან. 50 კაპ.

---

გამომცემლობა „მეცნიერება“, თბილისი, 380060, კუტუზოვის ქ., 19  
Издательство «Мецниереба», Тбилиси, 380060, ул. Кутузова, 19

---

საქართველოს სსრ მეცნ. აკადემიის სტამბა, თბილისი, 380060, კუტუზოვის ქ., 19  
Типография АН Грузинской ССР, Тбилиси, 380060, ул. Кутузова, 19